

# Feagaiga Tuai

Tusi Lesona a Faiaoga o Aoaoga o le Talalelei



# Feagaiga Tuai

---

Tusi Lesona a Faiaoga o Aoaoga o le Talalelei

Lomia ma faasalalauina e le  
O Le Ekalesia a Iesu Keriso o le Au Paia o Aso e Gata Ai  
Aai o Sate Leki, Iuta

E talia ma le agaga talisapaia ni o outou finagalo faaalua ma ni fautuaga e uiga i leni tusi lesona. Faamolemole ia auina mai o outou finagalo faaalua i le ofisa o le:

Curriculum Planning  
50 East North Temple Street, Floor 24  
Salt Lake City, UT 84150-3200  
USA

e-mail: [cur-development@ldschurch.org](mailto:cur-development@ldschurch.org)

Faamolemole ia tusi mai lou suafa, tuatusi, uarota, ma le siteki. Ia mautinoa ua tusi mai ai le igoa o le tusi lesona. Ona tusi mai ai lea o lou finagalo faaalua ma fautuaga e uiga i mea o lelei ai le tusi lesona ma vaega foi e mafai ona toe faaleleia atili.

Faavaa: *Ua Tuuina atu e Hana Lana Tama o Samuelu ia Eli*, saunia e Robert T. Barrett

© 1996, 2001 e le Intellectual Reserve, Inc.

Ua taofia aia uma

Lolomiina i le Iunaite Setete o Amerika

Faamaonia le faa-Peretania: 4/08

Faamaonia le faaliliuga: 4/08

Faaliliuina o le *Old Testament: Gospel Doctrine Teacher's Manual*  
Samoan

# Faasino Mataupu

Numera o le Lesona ma le Autu	Itulau
Fesoasoani mo le Faiaoga	v
1 “O Lau galuega ma Lou Mamalu lenei” (Mose 1)	1
2 “Na Filifilia Lava Oe Ae E Te Le i Fanau Mai” (Aperaamo 3; Mose 4:1–4)	6
3 O Le Fofoaga (Mose 1:27–42; 2–3)	10
4 “Ua Pupula Ou Mata Ona O Lau Solitulafono” (Mose 4; 5:1–15; 6:48–62)	13
5 “Afai e Lelei Mea e te Faia O le a Talia Oe” (Mose 5–7)	18
6 “Noa . . . Na Fausia le Vaa e Ola Ai Lona Aiga” (Mose 8:19–30; Kenese 6–9; 11:1–9)	24
7 O le Feagaiga FaaAperaamo (Aperaamo 1:1–4; 2:1–11; Kenese 12:1–8; 17:1–9)	28
8 Ola I le Amiotonu I Se Lalolagi Leaga (Kenese 13–14; 18–19)	33
9 “O le a Saunia e le Atua Se Tamai Mamoe” (Aperaamo 1; Kenese 15–17; 21–22)	37
10 Faamanuiaga o le Tofi, Faaipoipoga, I totonu o le Feagaiga (Kenese 24–29)	41
11 “Pe Faapefea ona Ou Faia Lenei Mea Leaga Tele” (Kenese 34; 37–39)	47
12 “Faauluolaina I le Nuu Ua Puapuagatia Ai A’u” (Kenese 40–45)	52
13 Nofopologa, Paseka ma le Malaga (Esoto 1–3; 5–6; 11–14)	57
14 “E Fai Outou ma Oloa Taua Mo’u” (Esoto 15–20; 32–34)	63
15 “Vaai i le Atua ma Ola Ai” (Numera 11–14; 21:1–9)	69
16 “Ou te le Mafai Ona Soli le Afioga a le Alii” (Numera 22–24; 31:1–16)	74
17 “Ia Oe Nei Galo ia te Oe” (Teuteronome 6; 8; 11; 32)	79
18 “Ia E Faamalosi ma Loto Tele” (Iosua 1–6; 23–24)	84
19 O Le Nofoaiga a Faamasino (Faamasino 2; 4; 6–7; 13–16)	90
20 “Ua Iloa e le Aai uma . . . o le Fafine Amio Lelei Lava Oe” (Ruta; 1 Samuelu 1)	96
21 O Le a Faasili e le Atua i latou e Faasili ia te Ia (1 Samuelu 2–3; 8)	101
22 “E Vaai Ieova i le Loto” (1 Samuelu 9–11; 13; 15–17)	107
23 “O Ieova e Va a’i Taua o Oe ma A’u e Faavavau” (1 Samuelu 18–20; 23–24)	114
24 “Ia e Faia se Loto Mama mo A’u” (2 Samuelu 11–12; Salamo 51)	118
25 “O Mea Uma Lava e Manava ia Vivii Atu ia Ieova” (Salamo)	125

26	O Le Tupu o Solomona: O le Tagata Poto, ma le Tagata Valea. (1 Tupu 3; 5–11)	131
27	Faatossinaga a Taitai Amioleaga ma Taitai Amiotonu (1 Tupu 12–14; 2 Nofoaiga a Tupu 17:20)	137
28	“E Mulimuli i le Afi o le leo Filemu ma le Itiiti.” (1 Tupu 17–19)	143
29	“Ua Ia Ava’e Foi le Ofu Tele o Elia.” (2 Tupu 2; 5–6)	149
30	“O Mai i le Fale o Ieova.” (2 Nofoaiga a Tupu 29–30; 32; 34)	154
31	“Amuia le Tagata na te Maua Le Poto.” (Faataoto ma le Failauga)	161
32	“Ua ou Iloa o lo o Soifua le Na te Togiolaina A’u” (Iopu 1–2; 13; 19; 27; 42)	168
33	Talai Atu o le Talalelei i le Lalolagi (Iona 1–4; Mika 2; 4–7)	173
34	“Ta te Osifeagaiga ma A’u i le Amiotonu.” (Hosea 1–3; 11; 13–14)	177
35	E Faaali le Finagalo o le Atua I Ana Perofeta (Amosa 3; 7–9; Ioelu 2–3)	181
36	O Le Mamalu o Siona e Avea ma Matagofie Uma (Isaia 1–6)	187
37	“Ua Faia e Ia Mea E Ofo Ai” (Isaia 22; 24–26; 28–30)	191
38	“E Leai se Faaola Ua na o A’u Lava” (Isaia 40–49)	195
39	“E Matua Matagofie i Luga o Mauga” (Isaia 50–53)	199
40	“Ia Faalautele le mea e Tu ai Lou Faleie” (Isaia 54–56; 63–65)	202
41	“O A’u Nei Ua ou Faia Oe I le Aso Nei . . . ma Pou U’amea.” (Jeremia 1–2; 15; 20; 26; 36–38)	206
42	“Ou Te Tusi ai I o Latou Loto” (Jeremia 16: 23; 29; 31)	210
43	O Le Leoleo Mamoe o Isaraelu (Ezekielu 18; 34: 37)	213
44	“E Ola Ai Foi mea uma E oo atu i ai le Vaitafe” (Ezekielu 43–44; 47)	219
45	“Afai Ou te Oti Ai, Oti ai Pea” (Tanielu 1: 3; 6; Eseta 3–5; 7–8)	223
46	“O Se Malo e le Faaumatia e Faavavau” (Tanielu 2)	228
47	“Ina Tulai Ia, Ina Tatou Faia Ia” (Esera 1–8; Neemia 1–2; 4: 6: 8)	233
48	“O Le Aso Sili ma le Matautia o Ieova.” (Sakaria 10–14; Malaki)	239

# Fesoasoani mo le Faiaga

---

Sa saunoa mai Peresitene Gordon B. Hinckley: “Ou te faamoemoe o le a avea lenei mea [o le suesue i tusitusiga paia] e fai ma mea e sili atu ona outou fiafia i ai nai lo se tiute; a le o lea, o le a avea ma mea e faamemelo i ai i le afioga a le Atua. Ou te folafola atu a o outou faitau, o le a faamalamalamaina o outou mafaufau ma o le a siitia o outou agaga.”

I le avea ai ma faiaga o Aoaoga o le Talalelei, ua ia te oe le matafaioi e fesoasoani ai i tagata o lau vasega e suesue ina ia fiafia i le Feagaiga Tuai ma maua malamalamaaga e pei ona folafola mai e Peresitene Gordon B. Hinckley. Ao e aoao atu, o le a e faatatai i faatataiga a le Faaola, o le sa fiafia i tusitusiga paia ma ia faaaogaina e aoao ai ona soo.

Ina ua faatoa mavae le toetu o Iesu Keriso, sa ia faaaogaina tusitusiga paia e aoao ai ni soo se toalua i le mea moni mamana. O le soo e igoa ia Kaleopa ma lana soa sa savalia le ala i Emau, sa laua talatalanoa i talafou sa laua maua e uiga i le tino o Iesu ua le o i ai i le tuugamau. A o la savavali, sa faatasi atu Iesu ia te i laua ae la te le iloa. Sa ia fesiligia i laua i le mea o lo o talanoaina, ma le mafuaaga o lo laua faanoanoa, ma sa la tau atu ia te ia le Faasatauroga ma le Toetu. Ina ua faalogo Iesu i ia mea, sa ia “faamatala ia te i laua o mea ua tusia ia te ia i tusitusiga paia uma” (Luka 24:27).

Sa faaife e Kaleopa ma lana soa le Faaola e latou te nonofo, a o nonofo i latou mo le meaai sa la iloaina o ia, o le Alii toetu. Sa ia mou ese mai la laua vaai, ona la fetautalatalai ai lea “E le i mu ea o ta loto i totonu ia i taua, ina ua fetalai o ia ia te i taua i le ala, ina ua faamatala mai foi e ia o Tusi ia te i taua? (Luka 24:32).

O tusi na mu ai loto o le au soo o tusi ia a Mose ma perofeta—o tusitusiga ua taua o le Feagaiga Tuai. A o aoaoina atu nei upu moni, o le a molimau atu e le Agaga Paia le moni i la outou vasega e pei ona ia molimauina ia Kaleopa ma lana soa.

O le suesue i le Feagaiga Tuai e tataua ona faamalosi ai molimau a tagata o le vasega e uiga i le Faaola ma a latou tautinoga e ola i le talalelei. Pe a taitaiina i latou e le Agaga i a latou suesuega, e tataua i tagata o le vasega ona mafai ona molimau atu ma Iopu, “Aua ua ou iloa o lo o soifua le na te togiolaina a’u, o aso amuli foi e tulai mai ai o ia i luga o le eleele.” (Iopu 19:25).

---

## Aoao Atu e Ala i le Agaga

A o sauniuni e aoao atu le vasega o Aoaoga o le Talalelei, e taua tele lou sailia o musumusuga ma taitaiga mai le Agaga o le Alii. “O le a tuuina atu foi le Agaga ia te outou i le tatalo i le faatuatua,” ua fetalai mai ai le Alii, “ae afai tou te le maua le Agaga aua tou te aoao atu” (MFF 42:14.) Ia manatua o le Agaga Paia o le faiaga lea i la outou vasega.

O le auala e te sailia ai le Agaga o le tatalo, anapogi, suesue i tusitusiga paia i aso taitasi, ma le usitai i tulafono. A o e sauniuni atu mo le vasega, ia tatalo mo le Agaga ina ia fesoasoani ia te oe ia e malamalama i mau ma manaoga o tagata o le vasega. O le Agaga foi e mafai ona fesoasoani ia te oe e fuafua ni auala lelei e

aoao ai mau ma faatusatusa i o tatou olaga i le taimi nei (1 Nifae 19:23). Faatasi ai ma le fesoasoani a le Agaga, o le a mafai ona avea oe ma auupega i aao o le Atua e aoao atu ana afioga i ana fanau.

Ua tuuina atu i lalo nisi o fautuaga e valaaulia ai le Agaga i lau vasega:

1. Ia tofi tagata o le vasega e faia tatalo i le taimi a o lei amataina le vasega ma le faaiuga. I le taimi o le vasega, ia e tatalo i lou loto mo le Agaga e taitaiina oe, e tatalaina loto o le vasega, ma musuia i latou.
2. Ia faaaoga mau (tagai “Taula’i atu i Tusitusiga Paia” o lo o i lalo).
3. Molimau atu i soo se taimi e musuia ai oe e le Agaga, ae le na o le faaiuga o le lesona. Molimau atu e uiga i le Faaola. Ia tofi tagata o le vasega e tuuina atu a latou molimau.
4. Ia faaaoga viiga, pese a le Peraimeri, ma isi musika paia e saunia ai loto o tagata o le vasega ia lagona le Agaga.
5. Ia faaali atu lou alofa i tagata o le vasega, o isi, ma le Tama Faalelagi ma Iesu Keriso.
6. Ia tau atu i tagata o le vasega ou lagona ma ni mea na tutupu e talafeagai ma mataupu o lo o i le lesona. Ia tofi ni tagata o le vasega e tuuina atu ni o latou foi lagona po o ni mea na tutupu. E tatau foi i tagata o le vasega ona faamatala mai pe faapefea ona latou aoaoina ni mea na talanoaina i lesona ua mavae.

---

### **Taula’i Atu i Tusitusiga Paia**

O sauniuniga mo le vasega o Aoaoga o le Talalelei e manaomia ai le filiga, ma le suesue ma le agaga tatalo i tusitusiga paia. Sa poloai mai le Alii, “Aua le saili e tala’i atu la’u upu, ae mua’i saili ia maua la’u upu.” Pe a e mauaina ana upu e ala i au suesuega i tusitusiga paia, ua folafola mai e le Alii “ona matala ai lea o lou laulaufaiva; o lea, afai e te manao ai, o le a e maua lo’u Agaga ma la’u upu, ioe, o le mana lea o le Atua i le faatalitonuina o tagata” (MFF 11:21).

O lenei tusi lesona o se meafaigaluega lea e fesoasoani ia te oe e aoao atu ai tusitusiga paia. Ia uunaia tamaiti e aumaia a latou tusitusiga paia i le vasega i vaiaso taitasi. Ia faaaoga faamaumauga i le Faaliliuga a Iosefa Samita.

I le taimi o le vasega, ia taula’i atu talanoaga i tusitusiga paia. Ia e mataala i le faaaogaina o faamatalaga ma isi faamatalaga e le o ni tusitusiga paia. E tatau ona aoao tagata o le vasega e saili le malamalama ma musumusuga mai tusitusiga paia ma upu a perofeta soifua.

E tatau ona tofi tagata o le vasega ma se kopi o le *Feagaiga Tuai Tusi Taiala Suesue a le Tagata o le Vasega* (34592). O lenei tusi o lo o i ai ni oototoga ma ni fesili o le a fesoasoani i tagata o le vasega ia malamalama i tusitusiga paia, mafaufau i le faaaogaina, ma saunia mo talanoaga a le vasega. Ia uunaia matua e faaaoga tusi taiala suesue i suesuega o tusitusiga paia i aiga.

---

### **Faatulagaina o Lesona**

O lenei tusi lesona ua tusia mo vasega o Aoaoga Faavae o le Talalelei a le autalavou ma tagata matutua e faaaoga i le tai fa tausaga. Ua fuafuaina lesona taitasi ma o lo o i ai le tele o faamatalaga e mafai ona e aoaoina atu i le taimi o le vasega

e tasi. Ia sailia le Agaga o le Alii e filifili ai tala faatusi paia, fesili ma gaoioiga e fetauti ma manaoga o tagata o le vasega.

O lesona taitasi e aofia ai vaega nei:

1. *Faamoemoega*. O le faamatalaga ua taua o le faamoemoega ua saunia ni manatu autu e taula'i i ai au sauniuniga mo le aoaoina atu o le lesona.
2. *Sauniuniga*. O le vaega muamua o sauniuniga o lo o ootoo atu ai le tala faatusi paia i le fuafuaina o le lesona. O nisi lesona o lo o fautuaina atu ai mau faaopoopo e faitau ina ia faateleina ai lou malamalama. I le tele o lesona, o lenei vaega o lo o aofia ai isi sauniuniga fautuaina, e pei o mea e faaoga e manaomia e te aumaia i le taimi o le vasega.
3. *Gaoioiga e faatosina mai ai*. O lenei vaega o lo o i ai se gaoioiga faigofie, mea e faaoga i le lesona, po o fesili e fesoasoani i tagata o le vasega e saunia ai e aoao, auai, ma lagona le aafiaga a le Agaga. E tusa lava pe e te faaogaina gaoioiga e faatosina mai ai a le tusi lesona po o sa oe lava gaoioiga, e taua lava le taula'i atu i le amataga o le lesona. E tatau ona puupuu le gaoioiga.
4. *Mau talanoaina ma le faaogaina*. O le vaega autu lenei o le lesona. Ia suesue ma le agaga tatalo le tala faatusi paia ina ia e aoao atu ma talanoaina ma le atoatoa. Ia faaoga fautuaga o lo o i le "Fesoasoani mo le Aoaoina atu o Tusitusiga Paia" (lalo) e faaliliu ai le auala o lo o e aoao atu ai ma faatumauina le fiafia o tagata o le vasega.
5. *Faaiuga*. O lenei vaega e fesoasoani ia te oe mo le ootooina o le lesona ma uunaia tagata o le vasega e ola i mataupu e pei ona talanoaina. E faamanatu ai foi ia te oe e tuuina atu lau molimau. Ia mautinoa e lava le taimi e faamaea ai lesona.
6. *Manatu faaopoopo e aoao atu ai*. O lenei vaega e aofia ai upu moni faaopoopo mai tala faatusi paia, isi manatu aoaoina, gaoioiga, ma isi fautuaga faaopoopo mo le fuafuaina o le lesona. Atonu e te mana'o e faaoga nisi o nei manatu o se vaega o le lesona.

---

## Fesoasoani mo le Aoaoina Atu o Tusitusiga Paia

Ia faaoga fautuaga nei o lo o i lalo e aoao atu ai ma le atoatoa tala faatusi paia:

1. Ia fesoasoani i tagata o le vasega ina ia malamalama i mea o lo o aoao mai e le mau e uiga ia Iesu Keriso, le Ieova o le Feagaiga Tuai, lea o lo o valoia mai i le Feagaiga Tuai lona fanau mai, lana misiona i le lalolagi, lona afio faalua mai, ma le faaeaina i le Meleniuma.
2. Fai atu i tagata o le vasega e mafaufau ma faaali mai ni auala patino e mafai ai ona faatatau ni mau i o latou olaga.
3. E faaopoopo i aoaoga, ia tuuina atu le faamamafaga i tala o lo o i le Feagaiga Tuai, aemaise lava tala o le faatuatua, ina ia mautinoa o lo o malamalama tagata o le vasega i ia tala ma talanoaina ni auala e mafai ai ona latou faaogaina.
4. Ia tuu atu i tagata o le vasega e saili mai ni upu, fuaiupu, po o i manatu o lo o taua soo i mau po o lo o i ai ni uiga taua mo i latou.



5. Ia tusia i luga o le lauapapa ni fuaiupu, upu taua, po o ni fesili e tali tutusa ma le tala faatusi paia. Ona faitau lea pe ootoo le tala. A o faalogologo tagata o le vasega i fuaiupu, upu taua, po o tali i fesili, ia taofi ma talanoaina.
6. I le Tusi a Mamona atoa, o le fuaitau, “ma ua faapea ona tatou iloa” o lo o faaaoaga e faamatala ai se oototoga o se mataupu aoaoina. A maea ona talanoaina se vaega o le mau, ona fai atu lea i tagata o le vasega e faauma mai fuaiupu “ma ua faapea ona tatou iloa” ina ia faamatala ai le mataupu o le talalelei sa aoaoina.
7. Ia sailia ma talanoaina faailoga sa faaaoaga i le Feagaiga Tuai. Faataitaiga, faatoa nofotane ma le faatoa faiava o lo o suitulaga ia Isaraelu ma le Faaola.
8. Vaai pe faapefea e tagata po o mea na tutupu o loo ta’ua i mau ona faatusatusa le eseese o le tasi i le isi. Mo se faataitaiga, e mafai ona e faatusatusa le eseese o Kaino ia Apelu ma Enoka (Mose 5–7); Tavita ma Patisepa (2 Samuelu 11) ma Iosefa i Aikupito ma le ava a Potifara (Kenese 39:7–13); po o le perofeta o Elia ma le Tupu leaga o Aapo (1 Tupu 16:29–33; 17–19).
9. Ia taitaia se tala e faatino i le faitauina. E faitauina e tagata o le vasega upu po o tala a tagata eseese i tusitusiga paia.
10. Ia vaevae le vasega i ni vaega laiti se lua pe sili atu foi. A maea ona talanoaina le tala faatusi paia, ona tuu atu lea i vaega taitasi e tusi i lalo mataupu o lo o aoaoina i tala. Ona tuu atu lea i vaega taitasi latou te talanoaina ma le vasega auala e mafai ai ona faatatau nei mataupu i o latou olaga.
11. Ia fai atu i tagata o le vasega e aumai a latou penitala mo le makaina o fuaiupu o le a talanoaina i a latou tusitusiga paia.

---

## O le Uunaia o Talanoaga i le Vasega

E le tatau ona e tuuina atu ni tala faafagogo ae e tatau ona e taumafai e fesoasoani i tagata o le vasega ina ia auai ma le loto atoa i le talanoaina o mau. Afai e auai tagata o le vasega, o le a sili atu ona latou aoao e uiga i mau ma malamalama i le auala e faatatau ai nei mataupu i o latou olaga. Ia saili i le taitaiga a le Agaga mo le filifilia o fesili e tuuina atu, le auala e faatulaga ai, ma le auala e atinae ai. O talanoaga i le vasega e tatau ona taulai atu i ni mataupu e fesoasoani ai i tagata o le vasega e o mai ia Keriso ma ola e pei o ona soo. Toefaatulaga talanoaga e le o ausia ai nei faamoemoega.

O mau ua saunia e fesoasoani ia te oe ma tagata o le vasega mo le sailia o tali o le tele o fesili i tusitusiga paia. O tali i nisi o fesili o le a maua mai ni mea na tutupu i nisi o le vasega.

O le talanoaina o mea uma o lo o taua i le lesone e le sili atu ona taua i lo le fesoasoani i tagata o le vasega ina ia maua se malamalamaaga sili i tusitusiga paia ma tautino atu e i latou lava o le a faateleina lo latou naunau e ola faapei o soo o Iesu Keriso. Afai o aoao mai e tagata o le vasega ni mea mai se talanoaga lelei, e sili atu ona lelei pe a faaauau pea lena fetufaaiga nai lo le taumafai e fai uma mea o loo aveatu i le lesone.

Ia faaaoaga taiala nei e faamalosiaina ai talanoaga faalevasega:

1. Fai atu se fesili ma ta'u atu se mau ina ia mafai e tagata o le vasega ona sailia tali.
2. Ia fai atu ni fesili e moomia ai ni manatu ma ni talanoaga, nai lo fesili e tali mai i le ioe ma le leai. O fesili e amata i le *aisea*, *faapefea*, *o ai*, *o le a*, *o anafea*, ma *o fea*, e sili atu ona manaomia mo le faamalosia o talanoaga.
3. Ia uunaia tagata o le vasega e fetufaai mai o latou manatu e uiga i ni mea ua latou aoaoina mai tusitusiga paia. Ia uunaia foi i latou e fetufaai mai ni mea na tutupu e faaalua ai le auala e mafai ai ona faatatau mataupu faaleagaga i le olaga. Ia tuuina atu ni faamatalaga talafeagai e uiga i o latou manatu.
4. Ia mataala i manaoga o tagata o le vasega. E ui lava ina tataua ona faamalosia tagata o le vasega i talanoaga, o nisi e faigata ona tali mai. Atonu e te manao e talatalanoa taitoatasi ma i latou ina ia iloa ai o latou lagona e uiga i le faitau leotele po o le auai i le vasega. Ia faaeteete i le tofia o tagata o le vasega e matamumuli.
5. Ia uunaia tagata o le vasega e sauni mo le vasega e ala i le suesue i le tala faatusi paia ua filifilia ma le *Feagaiga Tuai Tusi Taiala a le Tagata O Le Vasega (34592)*. O le a sili atu lo latou fia auai i talanoaga pe afai latou te saunia. Ia fautuaina tagata o le vasega latou te talanoaina ma o latou aiga tala faatusi paia ma lesona.



# “O Lau Galuega ma Lou Mamalu Lenei”

Lesona  
**1**

Mose 1

---

## Faamoemoega

Ina ia fesoasoani i le vasega ia malamalama (1) o tatou o fanau a le Atua. (2) e mafai ona tatou tetee atu i faaososoga a Satani, ma (3) o le galuega ma le mamalu o le Atua o le faaofuina lea o i tatou i le tino ola pea ma le ola e faavavau.

---

## Sauniuniga

1. Suesue ma le agaga tatalo mau nei mai le Penina Tau Tele:
    - a. Mose 1:1–11. Na vaai Mose i le Atua ma talanoa fesagai ma ia. Na aoaina e Mose o ia o se atalii o le Atua e pei o le Alo Pele e Toatasi o le Tama. Manatua: E ao i tamaiti o le vasega ona malamalama o Ieova, ae le o le Tama Faalelagi, na faaali ia Mose i lenei faaaliga. O Ieova o le Iesu Keriso lea i le muai olaga ma le Atua o le Feagaiga Tuai. E tasi i laua ma le Tama i le faamoemoega ma e suitulaga ia te ia i le mana ma le pule. O ana fetalaiga o afioga ia a le Tama, ma o nisi taimi, e pei ona taua i le Mose 1:6, e fetalai mai o ia mo le Tama.
    - e. Mose 1:12–23. Na faaososoina e Satani Mose; na tuliese a o ia e Mose.
    - i. Mose 1:24–39. Na toe faaali atu le Atua ma aoao atu lana galuega ma lona mamalu.
  2. Suesue le lesona ma filifili pe faapefea ona aoao atu tala faatusi paia. Talu ai e faigata tele ona fai uma fesili pe faia foi vaega uma o le lesona, ia filifili ma le agaga tatalo mea o le a sili ona fetauti lelei ma manaoga o le vasega. Atonu e manaomia le fetuutuunai o nisi o fesili ina ia fetauti ma tulaga e i ai le vasega.
  3. Aumai ia tofu le vasega ma se kopi o le *Feagaiga Tuai Tusi Taiala a le Tagata o le Vasega* (34592). (E tatau ona okaina e le uarota nei taiala e suesue ai, o se vaega o le oka faaletausaga o tusi e faaoga; e tatau i se tasi o le au epikopo ona tuuina atu nei tusi i le au peresitene o le Aoga Sa.)
  4. Afai e te faaogaina le gaoioiga lona lua e faatosina mai ai, vaai se taga pepa po o se taga su'i ma tuu i ai i totonu ni nai mea masani e pei o se maa, selu, ma se penitala.
- 

## Faalautelega Fautuaina o le Lesona

Faatomuaga i le  
Feagaiga Tuai

O le Feagaiga Tuai o se faamatalaga lea o le taulimaina e le Atua o ona tagata o le feagaiga mai le taimi o le Fofoaga i nai tausaga e faitau selau a o lei soifua mai le Faola. O loo aumaia i le Feagaiga Tuai faataitaiga mamana o le faatuatua ma le usiusitai. O loo faaaliga ai foi mea na mulimuli mai ona o le faagalogalo, lē usiusitai, po o le tetee i le Atua. O ona valoaga o loo tuuina mai ai molimau e uiga i le soifua mai o le Mesia, taulaga togiola, afio faalua mai, ma le nofoaiga i le meleniuma.

E faapoopo atu i le Feagaiga Tuai, o lenei vasega e aofia ai tusi a Mose ma Aperaamo mai le Penina Tau Tele. O nei tusi o loo maua mai ai faapoopoga taua ma faapupulaga o nisi o mea o loo taua i le tusi a Kenese. O le tusi a Mose o se

vaega mai le Faaliliuga o le Tusi Paia e Iosefa Samita. O le tusi a Aperamo o se faaliliuga na faia mai e le Perofeta o Iosefa Samita mai nisi o tusitusiga faa-Aikupito. Mo ni faamatalaga faaopoopo e uiga i le Faaliliuga a Iosefa Samita, tagai “Faaliliuga a Iosefa Samita.”

Gaoioiga e  
Faatosina Mai Ai

Atonu e te manao e faaoga se tasi o gaoioiga nei (po o sa oe lava gaoioiga) e amata ai le lesona. Filifili le gaoioiga e sili atu ona talafeagai mo le vasega.

1. Fai i le vasega e sue le Mose 1:6, 20–22, ma le 39 ma vaai ia mea moni taua o loo faaalua mai ai. E mafai ona eseese tali. Ia faamatala o lenei lesona o le a tulaui atu i mea moni e tolu o loo ta’ua i le “Faamoemoega” i le itulau 1 o le lesona.
2. Filifili ni tamaiti se toalua o le vasega ma tuu atu i ai le taga o loo i ai ni nai mea masani (tagai “Sauniuniga,” itulau 1). Fai i tamaiti na o le a la faia se taaloga, ae aua nei tuuina atu i ai ni faatonuga pe faamatala atu foi i ai le faamoemoega o le taaloga. Fai i ai e tatala le taga ma amata ona taaalo. O le a faamoemoe i laua e faamatala atu e mea o loo i totonu o le taga le taaloga. Peitai, e le o tuuina atu e mea o loo i totonu lea faamatalaga, ma o le a tau mafaufau le vaega lea pe o le a le mea e tatau ona fai.

Ia faamatala atu, ina ia malamalama i se taaloga, e ao ona tatou malamalama i lona autu po o le faamoemoega. E faapena foi, ina ia malamalama i o tatou olaga i le fogaeleele, e ao ona tatou malamalama i le autu po o le faamoemoega o o tatou olaga. E fesoasoani le Mose 1 tatou te malamalama ai i lenei mea i le taliina lea o fesili taua e tolu:

O ai i tatou?

E mafai faapefea ona tatou manumalo i faatosinaga a le fili?

O le a le galuega ma le mamalu o le Atua?

Mau Talanoaina  
ma le Faaogaina

A o e aoaoina atu nei mau, ia talanoaina pe faapefea ona faaoga i le olaga i aso taitasi. Uunai tamaiti o le vasega e faamatala ni aafiaga e faatatau i mataupu ua taua i le mau. I se taimi talafeagai a o faia le lesona, ia tufatufa i tamaiti le *Feagaiga Tuai Tusi Taiala a le Tagaa o le Vasega* (34592) ma uunai le vasega e faaoga e faalauteleina ai a latou lava suesuega i tusitusiga paia ma suesuega faaleaiga.

### 1. Ua Aoa Mai e le Atua o Mose o se atalii o le Atua.

Aoa atu ma talanoaina le Mose 1:1–11.

- O le a le mea na aoaoina e Mose e uiga i le Atua mai le aafiaga o loo faamatala mai i le Mose 1:1–7? O le a le mea na aoaoina e Mose e uiga ia te ia lava? (Atonu e te manao e faitau e tamaiti o le vasega le aofaiga o taimi na ta’ua ai e le Atua Mose o “lo’u atalii” i fuaiupu nei.)
- O le a le uiga o lea faaupuga, na foafoaina Mose “e faatusa” i le Faaola? (Mose 1:6). O le a se eseese e i ai o tatou olaga ina ua tatou iloa o i tatou o fanau a le Atua, na foafoaina e faatusa i lona Alo?

Sa aoa mai e le Susuga a Dallin H. Oaks: “Manatu i le mamana o le manatu o loo aoa mai i la tatou pese faapelepele ‘O A’u o se Atalii o le Atua.’ . . . O le tali lea i se tasi o fesili tele o le olaga, ‘O ai a’u?’ O a’u o se atalii o le Atua faatasi ma se sootaga faaleagaga ma matua faalelagi. O le mea moni e uiga i le i ai o o tatou matua faalelagi, ua faailoa mai ai o tatou agavaa e faavavau. O lena manatu

mamana o se faatosinaga malosi lea e puipuia mai ai i tatou mai le faalotovai-vaia. E mafai ona faamalasia i tatou taitoatasi e faia filifiliga amiotonu ma sailia mea sili o loo i totonu ia i tatou. Faatupuina i le mafaufau o se tagata . . . le manatu mamana, o ia o se atalii o le Atua ma ua e tuuina atu le faaaloalo ia te ia lava ma le uunaiga e manumalo ai i faafitauli o le olaga” (*Liahona*, Ianuari 1996, itulau 31).

- O le ta’u soo o Mose o “lo’u atalii” ma le faapea na foafoaina o ia “faatusa i lou Atalii e Toatasi na Fanau,” na avatu ai e le Atua ia Mose le lagona mau-maututu ma se malamalamaaga i lona taua. E mafai faapefea i le mulimuli atu i lenei mataupu faavae ona fesoasoani ia i tatou o ni matua? E mafai faapefea ona faamalasia ai faaipoipoga? E mafai faapefea ona faamalasia ai faigauo?

Ia fautua atu, o se lalolagi e foliga mai e fuao ai le faitio, manatu tetee ma faamatalaga taufaaleaga, e tatau ona tatou mulimuli i faataitaiga a le Alii ma tautala i mea e fesoasoani ai i isi ia latou iloa o i latou lava o fanau a le Atua e mamalu ma taua.

- O uiga ma tulaga agavaa taua ma le faavavau o Mose o loo faamamafaina mai i le Mose 1:1–7. Peitai, ina ua tuua o ia e le Atua, na faapea mai Mose, “O lenei, ua ou iloa i lenei mea o le tagata o se mea noa” (Mose 1:10). O le fea itu e taufai sa’o ai nei mea? (O le Atua e faavavau lona atamai ma e sili atu lona mamana nai le tagata soifua. O i tatou o ni mea noa pe a aunoa ma ia. Peitai, ona o i tatou o ana fanau, o lea e mafai ai foi ona tatou avefa e faapei o ia.)

## 2. Ua Faaosoosoina Mose e Satani; ua tulia o ia e Mose.

Aoao atu ma talanoaina le Mose 1:12–23.

- Ina ua oo mai Satani, o le a le mea na ia poloaiina Mose e fai? (Tagai Mose 1:12.) Mata o le a le mea na ta’u ai e Satani ia Mose o le “atalii o le tagata”? (Na manao Satani ia talitonu Mose e *le* o ia o se atalii o le Atua.) Aisea e manao ai Satani e aua nei o tatou talitonu pe le ta’ua foi i tatou o ni fanau a le Atua? E taumafai faapefea o ia e faia lenei mea?
- Na faapefea ona tali atu Mose ina ua ta’ua o ia e Satani o le “atalii o le tagata”? (Tagai Mose 1:13.) E mafai faapefea e se molimau malosi o tatou o atalii ma afafine o le Atua ona fesoasoani tatou te tetee atu ai i tofotofoga?
- E faafia ona fai atu Mose ia Satani e alu ese? (Tagai Mose 1:16, 18, 20, ma le 21.) O le a se mea ua aoao mai ia i tatou e uiga i le teena o taumafaiga a Satani?
- Na faapefea ona maua e Mose le malosi e tetee atu ai i tofotofoga a Satani? (Tagai Mose 1:18, 20–21.) Na mafai faapefea e Mose ona tuli ese Satani? E mafai faapefea e le tatalo ona faamalasia i tatou e tetee i tofotofoga? O a isi mea e mafai ona tatou faia e maua ai lenei malosi?

## 3. Ua toe faaali mai le Atua ma aoao atu e uiga i lana galuega ma lona mamalu.

Aoao atu ma talanoaina le Mose 1:24–39.

- Ina ua alu ese Satani, na toe segia Mose i le mamalu o le Atua ma sa faaali atu ia te ia se isi faaaliga o le lalolagi ma e o nonofo ai (Mose 1:24–28). O a fesili e lua na fesili atu ai Mose ina ua ia vaaia lenei faaaliga? (Tagai Mose 1:30.) O a tali na tuuina atu i ai e le Atua? (Tagai Mose 1:31–32, 39.)

- E ui lava sa foafoaina e le Atua lalolagi ma tagata e le mafaitaulia ia i tatou, na ia faamautinoa atu ia Mose na te silafia mea uma (Mose 1:35). E faapefea ou lagona ina ua e iloa e silafia lelei oe e le Tama Faalelagi ma Iesu Keriso ma e alolofa ia te oe? (Atonu e te manao e tuuina atu lau molimau i se taimi na e lagonaina ai lo la alolofa ma le manatu mai ia te oe.)

- O le galuega ma le mamalu o le Atua o le “faaofuina o le tagata i le tino ola pea ma le ola e faavavau” (Mose 1:39). O le a le tino ola pea? O ai na te mauaina le tino ola pea? O le a le ola e faavavau? O ai na te mauaina le ola e faavavau?

Ua saunoa mai Elder James E. Faust: “E i ai le eseese tele i le tino ola pea, po o le i ai i le vavau, ma le ola e faavavau, o le iai lea o se nofoaga i le afioaga o le Atua. E ala mai i le alofa tunoa o Iesu Keriso, e oo mai le tino ola pea ia i latou uma. . . . e faamaoni pe le faamaoni, amiotonu pe amioleaga. Peitai, o le ola e faavavau o le ‘meaalofa aupito silisili o meaalofa uma a le Atua’ (MFF 14:7). Tatou te mauaina lenei meaalofa, e tusa ai ma le fetalaiga a le Alii, ‘pe a outou tausia a’u poloaiga ma tumau e oo i le iuga.’ Afai tatou te tutumau, ua faapea mai le folafolaga, ‘o le a outou maua le ola e faavavau’ (MFF 14:7)” (Lipoti o le Konafesi, Oke. 1988, 14; po o le *Liahona*, Ianuari 1989).

- Aisea e taua ai lo tatou iloa o le galuega ma le mamalu o le Atua? O a nisi o ala patino e mafai ai ona tatou fesoasoani atu ia te ia i lenei galuega tele?

Ua saunoa mai Peresitene Gordon B. Hinckley: “Ua tatou i ai iinei e lagolago ina lo tatou Tama i Lana galuega ma Lona mamalu, ‘ia faataunuu le faaofuina o le tagata i le tino ola pea ma le ola faavavau’ (Mose 1:39). O lau galuega e taua tele i le tulaga o lou lava tiutetauave e pei foi o la’u galuega i lo’u tulaga. E leai se valaauga i lenei Ekalesia e faatauvaa pe itiiti foi lona tau. O tatou uma lava i le faataunuuina o o tatou tiute e aafia ai olaga o isi tagata. O i tatou uma taitoatasi e tusa ai ma o tatou tiute, na fetalai mai le Alii: . . . ‘O lou faia foi o nei mea ua e faia ai mea e sili ona lelei i ou uso a tagata, ma ua faateleina ai le mamalu o lou Alii’ (MFF 81:4)” (Lipoti o le Konafesi, Ape. 1995, 94; po o le *Liahona*, Iulai 1995, itulau 78; tagai foi i le MFF 81:5–6).

## Faaiuga

O loo aoao mai i le Mose 1 le mataupu mamana, o tatou o atalii ma afafine o le Atua. Fai i le vasega e mafaufau loloto i le taua o lenei upumoni. Molimau atu e silafia e lo tatou Tama Faalelagi i tatou ma e alofa o ia ia i tatou taitoatasi. Uunai tagata o le vasega e faamatala atu i o latou aiga o latou lagona e uiga i mea ua latou aoaoina mai i le Mose 1.

## Manatu Faaopoopo e Aoao Atu Ai

O mataupu o loo taua i lalo e faaopoopo i le oototoga o le lesona fautuaina. Atonu e te manao e faaaoga se tasi o nei manatu pe sili atu foi e aveva o se vaega o le lesona.

### 1. “Ua tuua Mose, ua na o ia” (Mose 1:9)

- Atonu e iai taimi e “tuua ai na o [i tatou]” e pei ona iai Mose—o taimi e le malosi ai lo tatou faalogoina o le Agaga pe tele ai foi tofotofoga. O le a se mea e mafai ona tatou aoaoina mai i le Mose 1 e fesoasoani tatou te taulimaina ai

ia taimi? (O tali e mafai ona aofia ai: O ia faigata atonu e le mafua ona o so tatou sese; e le tuulafoaiina atoatoa i tatou e le Atua, e pei ona taua i le fuai-upu e 15; ma e masani ona tatou maua mai le malosiaga tele i lo tatou feagai lea ma o tatou tofotofoga, valaau atu i le Atua, ma le faateleina o lo tatou faatuatua.)

## **2. O i tatou uma o fanau a le Atua**

- Na maua e Mose le faaaliga o loo tusia i le Mose 1 a o le i taitaieseina mai le fanauga a Isaraelu mai Aikupito. E te manatu na faapefea ona fesoasoani lenei faaaliga ia te ia i lenei taumafaiga, aemaise lava ina ua faalotovaivaia o ia i le faalogogata o tagata ma le faatuatua itiiti? E mafai faapefea ona fesoasoani lo tatou iloa o tatou uma o fanau a le Atua, i se faiaoga po o se taitai? E mafai faapefea e lenei malamalama ona fesoasoani ia i tatou ia tatou fegalegaleaiga ma tagata o o tatou aiga, o uo, ma isi?

## **3. O le faaliliuga a Iosefa Samita o le Tusi Paia**

Afai o maua le *Old Testament Video Presentations* (53224), atonu e te manao e faaali le “The Power of the Joseph Smith Translation,” e lima minute, o se vaega o le lesona. Faamanatu i le vasega o le tusi a Mose o se faamatalaga mai le Faaliliuga a Iosefa Samita o le Tusi Paia.



# “Na Filifilia Lava Oe Ae E Te Lei Fanau Mai”

*Aperaamo 3; Mose 4:1–4*

---

**Faamoemoega** Ina ia fesosoani i le vasega ia malamalama i le aoaoga faavae o le muai faauuina ma la latou matafaioi patino e fesosoani i le fausia o le malo o le Atua ma aumai agaga ia Keriso.

---

**Sauniuniga**

1. Suesue ma le agaga tatalo mau nei mai le Penina Tau Tele ma le Mataupu Faavae ma Feagaiaga:
  - a. Aperaamo 3:11–12, 22–23; Mataupu Faavae ma Feagaiaga 138:53–57. Na talanoa faafesagai Aperaamo ma le Alii ma ia iloa ai i le muai olaga e toatele agaga “tautaua ma le maoae” na muai filifilia/muai faauuina i a latou misiona faaletino (Aperaamo 3:11–12, 22–23). Na aoao atili mai e Peresitene Iosefa F. Samita e uiga i “e tautaua ma maoae” i se faaaliga o le asiasi atu o le Faaola i le Lalolagi o Agaga ao lumanai lona Toetu (MFF 138:53-57).
  - e. Aperaamo 3:24–28; Mose 4:1–4. Na faaaliga i se faaaliga ia Aperaamo ma Mose o Iesu Keriso sa filifilia i le Fono i le Lagi e avea ma o tatou Faaola ma ua tatou filifili e mulimuli ia te ia. Na faaaliga foi ia i laua o Lusifelo (Satani) ma agaga na mulimuli ia te ia, o i latou o e na tuliesea mai le Lagi.
2. Tusi faitau faaopoopo: Isaia 14:12–15; Faaaliga 12:7–9; Alema 13:3–5; Mataupu Faavae ma Feagaiaga 29; 36–39; ma fuaiupu totoe o le Aperaamo 3 ma le Mataupu Faavae ma Feagaiaga 138.

---

**Faalautelega  
Fautuaina o  
le Lesona**

Gaoioiga e Faatosina Mai Ai Atonu e te manao e faaoga se tasi o gaoioiga nei (po o sa oe lava gaoioiga) e amata ai le lesona. Filifili le gaoioiga e sili ona talafeagai mo le vasega.

1. Faailoa atu o tusitusiga paia o le a aoga tele ia i tatou pe a tatou faaaogaina a latou aoaoga i o tatou olaga. I le faia o lea, o le tele o taimi e tata ai ona tuuina i tatou lava i tulaga o perofeta anamua ma e na mulimuli ia i latou. Ae ui i lea i le Aperaamo 3:22–28 tatou te le tau tuuina i tatou lava i tulaga o se tasi tagata aua o loo faatatau ia fuaiupu i mea taua na tutupu ia i tatou. O nei mea tutupu na faataunuuina i le taimi o lo tatou muai olaga.
2. Tusi ni laina avanoa pupuu e shd be 12 i luga o le laupapa e faailoa ai mataitusi e 12 o le upu *muai faauuina*. Faamalalama atu o le upu o loo faailoa mai e ia laina avanoa, e faatatau i le muai olaga.

Tuu atu i le vasega avanoa e 12 e mate ai mataitusi e maua ai le upu. A sao ona mateina se mataitusi ona tusi lea i le avanoa talafeagai. A mateina se mataitusi e le o faaaogaina i le upu ona tusi lea i se vaega avanoa o le laupapa e foia ai le mate faalua mai.

A maea ona faatumuina laina avanoa e le vasega po o ua mateina le upu, feasoasoani ia i latou i le faamalamalamaina o le uiga o le upu. (Muai faauuina/muai filifilia o le muai faauuina lea e le Atua o ana fanau i le muai olaga ina ia faataunuu misiona eseese i le olaga faaletino. Ia faamalamalama atu o lenei lesone e faatatau i le muai olaga, i le toatele o agaga o e na muai filifilia/muai faauuina e faia mea taua mo le Tama Faalelagi.

Mau Talanoaina  
ma le Faaogaina

A o e aoaoina atu nei mau ia talanoaina pe faapefea ona faaoga i le olaga i aso taitasi. Uunai tagata o le vasega e faamatala ni aafiaga e faatatau i mataupu ua taua i le mau.

### **1. Ua aoaoina e Aperaamo e toatele agaga na muai faauuina mo a latou misiona i le olaga faitino.**

Aoao atu ma talanoaina le Aperaamo 3:11–12; 22–23, ma le Mataupu Faavae ma Feagaiga 138:53–57.

- I le faaaliga o loo tusia i le Aperaamo 3, na faaali atu ai e le Atua ia Aperaamo le Fono i le Lagi sa faia ao lei faavaeina le Lalolagi. (Manatua, ua faailoa mai e perofeta o aso e gata ai, o le Fono i le Lagi o ni fonos sa faia ae le o se fono e tasi.) O ai sa auai i lea fono? (Tama Faalelagi ma ana fanau faaleagaga.) O le a se aoaoga ua tatou maua e uiga i lea fono mai le Aperaamo 3:22–23?
- O ai “e tautaua ma le maoae” o loo faamatala mai i le Aperaamo 3:22–23? (O perofeta ma isi taitai o le Ekalesia.) Ia faamalamalama atu, i le tausaga 1918 na vaaia ai e Peresitene Iosefa F. Samita nisi o i latou ua taua o “e tautaua ma maoae” i se faaaliga o le lalolagi o agaga. O ai la na vaai i ai Peresitene Samita? (Tagai MFF 138:53; tagai foi i le manatu faaopoopo e aoao atu ai lona lua.)
- O le a le uiga o Aperaamo na “filifilia ae e te lei fanau mai? (Tagai Aperaamo 3:23. Na muai faauuina o ia e avea ma Perofeta.) O le a le uiga o le muai filifilia/muai faauuina? (Tagai i le faamatalaga o loo i le Gaioga e Faatosina Mai Ai lona lua.) O a mea a i latou o loo taua mai i le Mataupu Faavae ma Feagaiga 138:53 ua muai filifilia/muai faauuina latou te faia? (Tagai MFF 138:53–56.)
- Pe na mafai e le muai filifilia/muai faauuina ona faamautinoaina o Aperaamo, Iosefa Samita ma isi o le a avea ma ni perofeta? O le a le fesootaiga i le va o le muai filifilia/muai faauuina ma le filifiliga saoloto? (E ui lava ina muai faauuina/muai filifilia se tasi i se valaauga, o lena valaauga e faalagolago i le agavaa o le tagata ma lona naunau e talia le valaauga.)
- I le faaopoopo atu i le muai filifilia/muai faauuina o perofeta i o latou valaauga, ua muai filifilia/muai faauuina le toatele o “isi agaga filifilia” e fesoasoani i le atinaeina o lena malo i auala eseese. Faamata o le a se mea ua muai faauuina/muai filifilia i tatou e faia? (Tagai i le MFF 138:56.)

Na Aoao Mai Ezra Taft Benson:

“Ua faaagaga oe e le Atua e te oo mai i aso mulimuli a o lei oo mai le afio faa lua mai o le Alii. O nisi tagata o le a pauu ese, ao le malo o le Atua, o le a tumau atoatoa e faafeiloai le taliu mai o lona faaao–o Iesu Keriso lea. Atonu e talitutusa lava le amioleaga o lo tatou augatupulaga ma aso na o Noa ina ua faamamaina e le Alii le lalolagi i le lolo, ae e i ai le eseese tele lava i le taimi nei. Ua faasaoina e le Atua mo le taimi mulimuli nisi o ana fanau malolosi o e fesoasoani e tauaveina le Malo i le manumalo. . . .

“. . . Aua nei faaseseina outou—o outou o se augatupulaga faailogaina. E lei sili atu lava se tulaga e faamoemoeina mai le au faatuatua i se taimi puupuu naua nai lo i tatou nei” (*The Teachings of Ezra Taft Benson* [1988], 104–5).

- E faapefea ona tatou mautinoa ua tatou faataunuuina o tatou valaauga muai filifilia/muai faauuina? (O tali e ono aofia ai le ola ai i le talalelei, suesue i o tatou faamanuiaga faapeteriaka, saili ia maua e le tagata lava ia faaaliga. Ia faamanatu atu i le vasega o le faataunuuina o ia valaauga, e tatau ona tatou mauaina le naunau atu ma le agavaa. Tagai foi i le MFF 58:27–28.)

## **2. O Iesu Keriso na filifilia i le Fono i le Lagi e avea ma o tatou Faaola; ua tatou filifili e mulimuli ia te ia. O Lusifelo (Satani) ma agaga na mulimuli ia te ia ua tulieseai mai le lagi.**

Aoao atu ma talanoaina le Aperaamo 3:24–28 ma le Mose 4:1–4.

- Ia faamalamalama atu, na tuuina atu e le Tama Faalelagi i le Fono i le Lagi lana ata o le faaolataga ma filifilia se Faaola mo i tatou. O ai agaga e toalua na ofo e avea ma o tatou Faaola? (Tagai i le Aperaamo 3:27; Mose 4:1–2.) E faapefea ona eseese a la ofo na tuuina atu? (Na manao Iesu e mulimuli i le fuafuaga a le Tama Faalelagi ma tuu pea ia te ia le mamalu. Na manao Lusifelo e mulimuli i lana fuafuaga ma tauave le mamalu mo ia lava.) Aisea na filifili ai e le Tama Faalelagi Iesu Keriso e avea ma o tatou Togiola? (Tagai i le Mose 4:2–3.)
- O ai na tatou filifili e mulimuli i ai i le Fono i le Lagi? E faapefea ona tatou iloa na tatou filifili e mulimuli ia Iesu Keriso? (Ua tatou fananau mai i le lalolagi e maua ai tino faitino.)
- O le a le uiga o upu nei, *uluai tofi* ma le *tofi lona lua* o loo i le Aperaamo 3:26? (O le *uluai tofi* o loo faatatau lea i le muai olaga, ma le *tofi lona lua* o loo faatatau i le olaga faaletino. Na tausia o tatou *uluai tofi* i le filifili lea e mulimuli ia Iesu Keriso ae le o Lusifelo.) O le a le faamanuiaga na tatou maua ina ua tatou tausi i lo tatou uluai tofi? (O le avanoa e fanau mai ai i le lalolagi.) O a faamanuiaga tatou te maua pe a fai tatou te tausia lo tatou tofi lona lua? (Tagai i le Aperaamo 3:26.) E faapefea ona tatou tausi i lo tatou tofi lona lua?
- O le a le mea na tupu ia Lusifelo (Satani) ma i latou o e na filifili e mulimuli ia te ia? (Na tuli ese i latou mai le lagi ma le maua le avanoa e maua ai tino faaletino. Tagai i le Mose 4:3; Aperaamo 3:28; Faaaliga 12:7–9; MFF 29:36–37.)
- O a mea a Satani ma ana au o fai nei? (O loo latou taumafai pea e faaleaogaina lo tatou filifiliga saoloto? O loo iai i latou i le lalolagi i le taimi nei o ni agaga leaga, e faaosoosoina i tatou ia agasala. Tagai i le Mose 4:4.) O a ni auala e taumafai Satani ma ana au e faaititia ai pe faaleaogaina ai la tatou filifiliga saoloto? O a mea e mafai ona tatou faia e iloa ma teena ai a latou taumafaiga?
- E faapefea ona fesoasoani ia te oe ia iloa na e filifili i le Fono i le Lagi e mulimuli ia Iesu Keriso? Uunai le vasega ia faauau le faia o faaiuga e mulimuli ia Keriso e pei ona latou faia i le muai olaga.

Faaiuga

---

Ia e molimau atu e uiga ia Iesu Keriso ma lana matafaioi o le avea ma o tatou Faaola na muai faauuina. Faamatala atu i le vasega lou talitonuga o loo ia te i latou le agavaa e faataunuu ai a latou misiona na muai faauuina ai e fesoasoani ai i le fausia o le malo o le Atua.

---

**Manatu Faaopoopo  
e Aoao Atu Ai**

O mataupu o loo taua i lalo e faaopoopo i le ootootoga o le lesona fautuaina. Atonu e te manao e faaoga se tasi o nei manatu pe sili atu foi e avea o se vaega o le lesona.

**1. “Ma o le a tatou faataitai ai i latou”**

- O loo tuuina mai i le Aperamo 3:24–25 se tasi o faamoemoega taua na faia ai e Iesu Keriso le Lalolagi i lalo o le taitaiga a le Tama Faalelagi. Aisea na faia ai le Lalolagi? E faapefea ona fesoasoani lou iloa na e filifili e te sau i le lalolagi ae ua e iloa o le a tofotofoina oe iinei?

**2. “O e tautaua ma le maoae”**

- I lana faaaliga o loo i le Mataupu Faavae ma Feagaiga 138, na vaaia foi e Peresitene Iosefa F. Samita nisi o “e tautaua ma le maoae” o e na soifua i le lalolagi ao lei fanau mai Keriso. O ai na vaai i ai Peresitene Samita? (Tagai i le MFF 138:38–49). Atonu e te manao e tusia ia igoa i luga o le laupapa. Faailoa atu o le a mafai e le vasega ona aoao i nisi o i latou nei i le Aoga Sa i le tausaga o lumanai.)

*Mose 1:27–42; 2–3*

---

**Faamoemoega** Ina ia fesoasoani i le vasega ia lagona le loto faafetai na faia e le Atua mea uma lava ia aoga mo i tatou ma o i tatou ua faia i lona faatusa.

---

- Sauniuniga**
1. Suesue ma le agaga tatalo mau nei mai le Penina Tau Tele:
    - a. Mose 1:27–42. Ua vaai Mose i se faaaliga o le fofoaga a le Atua ma ua poloaiina ina ia tusia se tala o le fofoaina o le lalolagi.
    - e. Mose 2:1–25; 3:1–14. Ua iloa e Mose ua faia e le Atua mea uma lava.
    - i. Mose 2:26–31; 3:7, 15–25. Ua iloa e Mose ua faia tane ma fafine i le faatusa o le Atua.
  2. Tusi faitau faaopoopo: Aperaamo 4–5; Kenese 1–2.
  3. Afai e te faaaogaina le gaoioiga e faatosina mai ai lona lua, ia aumai kelei ma po o se sioka.
  4. Afai o loo maua vitio ia o loo taua i lalo, atonu e te manao e faaaogaina e avea o se vaega o le lesona:
    - a. “In the Image of God,” o se vaega e tolu-minute mai *Old Testament Video Presentations* (53224).
    - e. Se vaaiga puupuu mai le “The Creation,” vaega 1 o le kaseti vitio *Beginnings/Abraham* (53150).
    - i. O le ata Creation—Living Creatures (62483; Taga Ata o le Talalelei 100).
- 

**Faalautelega  
Fautuaina o  
le Lesona**

Gaoioiga e  
Faatosina Mai Ai

Atonu e te manao e faaaoga se tasi o gaoioiga nei (po o sa oe lava gaoioiga) e amata ai le lesona. Filifili le gaoioiga e sili atu ona talafeagai mo le vasega.

1. Fesili i le vasega e manatunatu po o le a le tele o se faamalamalaga latou te tuuina atu pe a fai o latou taumafai e tali se fesili o fesili o loo taua i lalo mo se tamaitiiti e lei ausia tausaga aoga. E faapefea ona tumau le vaalele i le ea pe a lele? E faapefea ona ola le televise. E faapefea ona tupu ma ola laau? O le toatele o i tatou e manatu i le tulaga o i ai le malamalama o le tamaitiiti ma tuu atu na o se aotelega o mataupu, ae taatia tulaga auiliili mo le tamaitiiti pe a matua.
  - E faapefea ona faatusa nei faataitaiga i le faaaliga a le Alii e uiga i le fofoaga? (Ua faaalina mai e le Alii na o le vaega o upu moni e faavavau o loo mafai e o tatou mafaufau faaletino ona malamalama ai, ma mea e tatau ona tatou iloa e maua ai le faolataga.)

O lenei lesona o le a talanoa ai upu moni ua faaalina mai e le Alii e uiga i le Fofoaga.

2. Ia fai atu i se tasi o le vasega e ofo mai na te faia pe tusi se meaaola, manu laitiiti i le faaaogaina o le lelei po o le sioka (Ia faatagaina na o se tasi po o se lua minute). Ona talanoaina lea o le moni e ui ina mafai ona tatou faia se faatusa o se meaola, ua na o le Atua e mafai ona aumaia le ola. O lenei lesonea o le a talanoa ai le vavega maoae o le faia e le Atua o le lalolagi ma mea ola uma o i ai.

Mau Talanoaina  
ma le Faaogaina

---

A o e aoaoina atu nei mau, ia talanoaina pe faapefea ona faaoga i le olaga i aso taitasi. Uunai le vasega e faamatala ni aafiaga e faatatau i mataupu ua taua i le mau.

### **1. Ua Vaai Mose i le faaaliga o mea na foafoaina e le Atua**

Aoao atu ma talanoaina le Mose 1:27–42.

- O ai na tusia le tala o le Fofoaga i le Kenese? (Tagai Mose 1:40; 2:1.) Aisea na tusia ai e Mose lenei tala? (Tagai Mose 1:40–41.) O a mea ua mafai ona tatou aoao mai i le Mose 1:27–39 e uiga i le mana o le Atua? O a mea ua mafai ona tatou aoao mai e uiga i le alofa o le Atua mo ana fanau?
- E faapefea ona eseese tusitusiga o le Fofoaga o loo maua i le Kenese, Mose ma le Aperaamo? (Na vaai Aperaamo ma Mose i se faaaliga i le faatulagaina o lenei lalolagi ma tusitusia ai loa a la faaaliga. E tofu lava mea itiiti e eseese ai. O le tala i le Kenese sa tusia muamua e Mose, ae sa leiloa le atoatoa o ana tusitusiga. O lenei atoatoa ua tuuina mai i le tusi a Mose.)

### **2. Ua aoaoina e Mose na faia e le Atua mea uma.**

Aoao atu ma talanoaina le Mose 2:1–25; 3:1–14.

- O ai na faia le lalolagi? (Tagai Mose 1:32; 2:1; ma tagai Ioane 1:1–3, 14; Eperu 1:1–2; Mosaea 3:8; MFF 14:9.) Aisea ua taua ai ia i tatou le iloa o Le Fofoaga?
- O le a le mea ua faaaliga mai e le Atua e uiga i le faamoemoega o le Fofoaga? (Tagai Mose 1:39; Aperaamo 3:24–25; tagai foi 1 Nifae 17:36; 2 Nifae 2:11–15. O le faamoemoega o le Fofoaga o le iai o se nofoaga e mafai e fanau faaleagaga a le Tama Faalelagi ona o mai e maua ai le tino faaletino ma ia tofotofoina ai po o le faataitai ai ina ia iloa ai pe o le a latou usisutai ia te ia ina ua latou o ese mai ma lona afioaga. O i latou o e faamaoni o le a mauaina le olaga faavavau. Atonu e te manao e faaali atu e ui lava i le iai o le tala o le Fofoaga i le tusi o Kenese, o le faamoemoega ma le taua o le Fofoaga ua nao faaaliga i aso e gata ai o loo faamalamalama mai ai.)
- O a ni auala e saunia ai i tatou i le olaga faalelalolagi mo le olaga faavavau? (Tali e aofia ai: Tatou te maua ai tino faaletino, aoao e faaoga lo tatou filifiliga saoloto, maua le atamai, ia iai aiga, maua sauniga, ma osi feagaiga.)
- O le a le fetalaiga a le Alii e uiga i le tino mai o le fofoaga? (Tagai Mose 2:4, 10, 12, 18, 21, 25, 31; 3:2. E faavalu ona tau mai i le tala puupuu o le Fofoaga le faapea mai o le Atua ua lelei ana galuega.) O le fea o mea na foafoaina e le Atua ua aupito sili ona matagofie ia te oe? Aisea o le a tatou maua ai le lelei i le iloa i aso taitasi o le matagofie o le fofoaga?
- Pe na faia ea le lalolagi mai le leai o se mea? (Tagai Aperaamo 3:24; 4:1.)

1 Na saunoa mai le Perofeta o Iosefa Samita e faapea: “O le upu foafoa e sau mai le upu [Eperu] *barau* ma e le o lona uiga le faia mai le leai o se mea; o lona uiga o le faatulagaina; e pei o se tagata e faatulagaina mea e fai ai ma fausia se vaa. O lea tatou te faauiga ai sa iai ni mea na faatulaga ai e le Atua le lalolagi mai le soona nunumi—mea e lei faatulagaina” (*Teachings of the Prophet Joseph Smith*, sel. Joseph Fielding Smith [1976], 350–51).

- E faapefea e le tala o le Fofoaga ona aafia ai ou lagona agai i le Tama Faalelagi ma Iesu Keriso? E faapefea e mea na fofoaina ona “molimau ia mea uma” i le Atua? (Tagai Mose 6:63, Alema 30:44.) E faapefea ona tatou faaalua le loto faafetai mo le meaalofo o le Fofoaga?

### 3. Ua aoaoina e Mose na faia tane ma fafine i le faatusa o le Atua.

Aoao atu ma talanoaina le Mose 2:26–31; 3:7, 15–25.

- O le faatusa o ai ua faia ai i tatou? (Tagai Mose 2:26–27.)

Ua saunoa mai le Au Peresitene Sili e faapea: “O alii ma tamaitai uma ua foliga i le Tama ma le Tina faalelagi, ma o i latou moni lava o ni atalii ma ni afafine o le Atua” (*The Origin of Man, “Improvement Era*, Nov. 1909, 78).

- E faapefea e le malamalama ua faia i tatou i le faatusa o le Atua ona faamanuiaina ai o tatou olaga? E faapefea ona aafia ai a tatou fesootaiga ma isi tagata?
- O a mea o loo aoao mai e upu a Enoka i le Mose 7:30 e uiga i le tausiga a le Atua o i tatou taitoatasi? O a mea o aoao mai ia i tatou e uiga i lo tatou Tama Faalelagi ma Iesu Keriso?
- O a mea o e manatu o loo faatatau i ai le saunoaga a le Alii ina ua ia tau mai ia i tatou ia pule i mea ua ia fofoaina i le lalolagi? (Tagai Mose 2:26. E tatau ona tatou faaloalo ma tasi i mea ua fofoaina e le Atua.) E faapefea ona tatou faataunuaina i se tulaga sili atu ona lelei la tatou matafaioi o le pule i mea ua fofoaina?

---

Faaiuga

Molimau atu i le moni o mataupu faavae ua aoao atu. Valaaulia le vasega e faali mai o latou lagona e uiga i le Fofoaga.

---

### Manatu Faaopoopo e Aoao Atu Ai

O mataupu o loo taua i lalo e faaopoopo i le ootoga o le lesona fautuaina. Atonu e te manao e faaoga se tasi o nei manatu pe sili atu foi e avea o se vaega o le lesona.

#### O le umi o le Fofoaga

O le umi o le taimi manaomia mo le Fofoaga e le o iloa. O le upu *aso* i mau o le Fofoaga e le o tuuina mai o se taimi e 24 itula. O le upu Eperu *yom* e mafai ona faaliliuina i se “aso”, “taimi,” po o se “vaitaimi.” Sa faapea mai le Aposetolo o Peteru “e tusa i luma o le Alii le aso e tasi ma tausaga e afe” (2 Peteru 3:8; tagai foi Aperaamo 3:4).

# “Ua Pupula Ou Mata Ona O Lau Solitulafono”

## Lesona 4

Mose 4; 5:1–15; 6:48–62

---

**Faamoemoega** Ina ia fesoasoani i le vasega ia malamalama o le Pau o se vaega taua o le fuafuaga a le Tama Faalelagi mo i tatou.

---

- Sauniuniga**
1. Suesue ma le agaga tatalo mau nei:
    - a. Mose 4; 5:10–1; 6:48–49, 55–56. Ua sau Satani i le Faatoaga i Etena ma saili e faasese Eva. Ua ai e Eva ma Atamu le fua o le laau e iloa ai le lelei ma le leaga. (4:5–12). Ina ua la Pauu, na tuli ese Atamu ma Eva mai le faatoaga (4:13–31). Sa viia mulimuli ane e Atamu ma Eva faamanuiaga o le Pau (5:10–11). Ua aoao mai e Enoka aafiaga o le Pau (6:48–49, 55–56).
    - e. Mose 5:14–15; 6:50–54, 57–62. Ona o le Togiola a Iesu Keriso, ua faasaoina ai tagata mai le oti faaletino e ala i le Toetu ma atonu e faasaoina mai le oti faaleagaga e ala i le faatuatua, salamo, papatisoga, le meaalofa o le Agaga Paia, ma le usitai i tulafono.
    - i. Mose 5:1–9, 12. Ua amataina le olaga o Atamu ma Eva faaletino. Ua iai a la fanau ma ua aoao atu i latou i upu moni na la aoaoina. (5:1–4, 12). Ua osi atu e Atamu taulaga o le faatusa o le taulaga a le Alo e Toatasi na Fanaua e le Tama (5:5–9).
  2. Mau Faaopoopo: Kenese 2–3; 1 Korinito 15:20–22; 2 Nifae 2:5–30; 2 Nifae 9:3–10; Helamana 14:15–18; Mataupu Faavae ma Feagaiga 19:15–19, 29:34–44; Penina Tau Tele 1:2; “O le Pau o Atamu.” Bible Dictionary, page 670.
  3. Atonu e te manao e fesili atu i se tasi o le vasega ina ia saunia e ootoo mai le tala o le Pau o Atamu ma Eva (Mose 4:6–31) ma se isi e saunia e ootoo mai le tala o le osia e Atamu o taulaga (Mose 5:5–9).
  4. A fai o maua vitio o loo taua i lalo, atonu e te manao e faaaogaina e avea o se vaega o le lesona:
    - a. “The Fall,” o se vaega e lima minute mai le *Old Testament Video Presentations* (53224).
    - b. O le ata o Atamu ma Eva (62461; Taga o Ata o le Talalelei 101).
- 

### Faalautelega Fautuaina o le Lesona


Gaoioiga e  
Faatosina Mai Ai

Atonu e te manao e faaaoga se tasi o gaoioiga nei (po o sa oe lava gaoioiga) e amata ai le lesona.

Ia tusi le faataitaiga o loo i le itulau 13 i luga o le laupapa. Tau atu i le vasega na saunoa mai Elder Bruce R. McConki e mafai ona maua lo tatou faaolataga ona o ni “mea paia se tolu na tutupu—o poutu e tolu o le faavavau” (*A New Witness for the Articles of Faith* [1985], 81). Ona tuuina atu lea o fesili nei:



- O a ni mea taua tele na tutupu e ono avea ma “poutu o le faavavau” e mafai ai ona oo mai le faaolataga? (Ua saunoa mai Elder McConkie o nei poutu o le Fofoaga, o le Pau, ma le Togiola o vaega uma o le fuafuaga a le Atua mo lo tatou faaolataga. Tusi upu *Fofoaga, Pau*, ma le *Togiola* i poutu e tolu i luga o le laupapa.



Ia faamalamalama atu o lenei lesone e fesoasoani ina ia tatou malamalama ai o le Pau o se vaega tatau o le fuafuaga a le Tama Faalelagi ina ia faataunuu le faafuina o le tagata i le tino ola pea ma le ola faavavau (Mose 1:39).

Mau Talanoaina  
ma le Faaogaina

A o e aoaoina atu nei mau, ia talanoaina pe faapefea ona faaoga i le olaga i aso taitasi. Uunai le vasega e faamatala ni aafiaga e faatatau i mataupu ua taua i le mau.

### 1. O le Pau o Atamu ma Eva ma lona aafiaga mo i laua ma i tatou

Aoao atu ma talanoaina le Mose 4; 5:10–11; 6:48–49, 55–56.

I le Faatoaga i Etena, na faatonuina ai e le Atua Atamu ma Eva ina ia “fanafanau ma uluuluola ma faatumuina ai le Lalolagi” (Mose 2:28). Na ia faatonuina foi i laua e aua la te aai i fua o le laua e iloa ai le lelei mai le leaga (Mose 3:17). I lo la le aai i fua o le laua faasaina o le a tumau ai pea i laua i le faatoaga ma o le a le oo ia i laua le oti. Ae o le a la le usitaia ai foi le faatonuga ia uluuluola (Mose 5:11; 2 Nifae 2:23). Na tuuina atu ia i laua le filifiliga saoloto e filifili ai i ia faatonuga e lua.

Ia toe faamatala faapuupuu le tala i le Pau o Atamu ma Eva mai le Mose 4:6–31, po o le faatonuina o se tasi o le vasega e faia lea tulaga.

- O a taunuuga o le Pau mo Atamu ma Eva—ma i tatou? (Tagai Mose 4:22–29; 5:10–11; 6:48–49, 55–56; 2 Nifae 2:22–23; 9:6; Kenese 3:16–23.) Atonu e te manao e lisi i luga o le laupapa nisi nei o taunuuga. Faailoa atu o le tele o nei upumoni e uiga i le Pau ua toe fuataina e ala mai i le Perofeta o Iosefa Samita ma e le o iloa lautele e le lalolagi.
  - a. Na mafai e Atamu ma Eva ona maua ni fanau, na mafai ai e i laua ona o mai i le lalolagi ma maua tino faaletino (Mose 5:11; 6:48; 2 Nifae 2:23, 25).
  - e. Tatou te mauaina foi le oti faaletino, po o le tuu eseina o le tino faaletino mai le agaga (Mose 4:25; 6:48; 2 Nifae 9:6).
  - i. Tatou te mauaina foi le oti faaleagaga, po o le vavaeeseina mai o i tatou mai luma o le Atua (Mose 4:29; 6:49; 2 Nifae 9:6).

- o. Tatou te lagonaina le faigata ma le tiga (Mose 6:48; Kenese 3:16–17).
- u. Tatou te mafai ona agasala (Mose 6:49, 55; 2 Nifae 2:22–23).
- f. Ua fetuuina le eleele ma manaomia ai ona tatou galulue (Mose 4:23–25; Kenese 3:17–19).
- g. E mafai ona tatou aoao ia iloa le lelei ma le leaga (Mose 4:28; 6:55–56; 2 Nifae 2:23; Kenese 3:22).
- l. E mafai on tatou mauaina le olioli i le olaga nei (Mose 5:10; 2 Nifae 2:23, 25).
- m. E mafai ona tatou iloa le olioli o lo tatou togiolaina (Mose 5:11).
- n. E mafai ona tatou maua le olaga faavavau (Mose 5:11)

Ao talanoaina ia taunuuga o le Pau, ia faamamafa atu pe faapefea ona aoga le Pau ia i tatou. Ua faamanino mai e faaaliga i aso e gata ai, i le i ai ao lei faia le foafoaga, na manatu ai le Atua o lo tatou olaga i le lalolagi o se taimi o le tofotofoga ma le faaitaiga ina ia o tatou pei ai o ia. (Aperaamo 3:24–26). Na manaomia ai le i ai o tatou tino faaletino, mafai ona aoao e filifili le lelei ma le leaga, o mea ia ua mafai ona o le Pau.

- E mafai faapefea e le atoatoa o le malamalama i le Pau ona fesoasoani ia i tatou ao tatou iai i le olaga faaletino?
- Aisea e taua ai ona malamalama, na muai vaai le Atua i le Pau, ma o se vaega manaomia o lana fuafuaga mo lo tatou faaolataga?
- Na faamoemoe Satani o le mafai ona aai o Atamu ma Eva i le fua o le laau faasaina, o le a le mafai ai ona faataunuu fuafuaga a le Atua. (Mose 4:6). O le a le mea ua aoao mai ia i tatou e le tala i le Pau e uiga i le malosi o Satani e faaleaogaina le faamoemoe o le Atua? (Tagai MFF 3:1– 2.)

## **2. O le Togiola a Iesu Keriso ua faasoina ai i tatou mai le oti faaletino ma le faaleagaga.**

Aoao atu ma talanoaina le Mose 5:14–15; 6:50–54, 57–62.

O le Pau o Atamu ma Eva na oo mai ai le oti faaletino ma le faaleagaga i le lalolagi. O le oti faaletino o le tuueseeseina o le tino ma le agaga e oo mai i le iuga o o tatou ola faaletino. O le oti faaleagaga o le vavaeeseina mai luma o le Atua na tupu ina ua tuli ese Atamu ma Eva mai le faatoaga. Faamatala atu e le mafai ona tatou manumalo i le oti ona o i tatou lava. O le mafuaaga lenei na auina mai ai e le Tama Faalelagi Lona Atalii e Toatasi na Fanaua e faaola i tatou mai le oti e ala i lana taulaga togiola (Alema 22:14).

- A aoao mai e perofeta le Pau o Atamu ma Eva, latou te aoao soo mai ai foi e uiga i le Togiola a Iesu Keriso (Mose 5:10–15; 6:48–62; 2 Nifae 9:6–10). Aisea e taua ai le aoao atu o le Togiola faatasi ma le Pau? (O le Pau na manaomia ai i le fuafuaga a le Atua le Togiola mo lo tatou Faaolataga. O le aoao faatasi atu o le Togiola ma le Pau e fesoasoani lea ia i tatou ina ia malamalama pe faapefea ona faaola i tatou mai le oti faaletino ma le faaleagaga.)

Na saunoa mai Peresitene Ezra taft Benson e faapea: “O le fuafuaga o le faaolataga e tatau ona amata i le tala o le pau o Atamu. I upu a Moronae, ‘O Atamu foi na pau ai le tagata. Ona o le pau foi o le tagata na afio mai ai Iesu Keriso, . . . ma ona o Iesu Keriso foi ua oo mai ai le togiolaina o tagata’ (Mamona 9:12). E faapei ona le manao le tagata i se meaai seiloga ua fiaai, e faapena foi ona ia le manao i le faaolataga a Keriso seiloga ua ia iloa le mafuaaga e na te manaomia ai Keriso. E le mafai e se tasi ona iloa lelei atoatoa pe aisea na te manaomia ai

Keriso seiloga ua ia malamalama ma talia le mataupu faavae o le Pau ma lona aafiaga i tagata uma” (Lipoti o le Konafesi, Ape 1987, 106; po o le *Liahona*, Iulai 1987, 85).

- E faapefea ona faasaoina i tatou mai le oti faaletino? (Tagai 1 Korinito 15:20–22; 2 Nifae 2:8; 9:6. O le a toe faatuina i tatou talu le Togiola a Iesu Keriso.)
- E faapefea ona faasaoina i tatou mai le oti faaleagaga? (Tagai Mose 5:14–15; 6:50–52, 59; Helamana 14:15–18; MFF 19:15–19. Ona o le Togiola, ua mafai ona faamamaina ma faagavaaina i tatou e mau faatasi ma le Atua e ala i le faatuatua ia Iesu Keriso, salamo, papatisoga, le meaalofo o le Agaga Paia, ma le usiusitai i tulafono.)

Ua fiafia le perofeta o le Tusi a Mamona o Iakopo i le Togiola mai le oti ua ala mai le taulaga togiola a le Faaola (2 Nifae 9:10). Atonu e te manao e faitau lenei fasi fuaitau ma faaso atu lau molimau ma ni ou lagona e uiga i faamanuiaga tatou te maua e ala mai i le Togiola. Valaaulia le vasega e faia foi lea mea e tasi.

### **3. Ua amata ona ola faaletino Atamu ma Eva, ua maua fanau, aoao i latou i le talalelei, ma tapuai ma usitai i le Atua.**

Aoao atu ma talanoaina le Mose 5:1–9, 12.

- O a mea a Atamu ma Eva na fai ina ua tuli ese i laua mai le Faatoaga i Etena? (Tagai Mose 5:1–5, 12.) O a ni ala e tali tutusa ai olaga o Atamu ma Eva ma o tatou olaga i aso nei? O a mea ua tatou aoao mai le Mose 5:1–9, 12 e uiga i le faamoemoe o tatou olaga faaletino?
- Toe oototo le tala i le Mose 5:5–9, po o le tuu atu i se tasi o le vasega e faia le oototoga. O le a le tulafono na tuuina atu e le Atua ia Atamu? (Tagai Mose 5:5.) Aisea na osi ai e Atamu taulaga e ui ina ona le iloaina mafuaaga ua faia ai? (tagai Mose 5:6.)

Na saunoa mai le Perofeta o Iosefa Samita e faapea: “Soo se mea lava e manao-mia e le Atua e sao, . . . e ui ina tatou leiloa le mafuaaga o lea mea ae faatoa iloa ina ua mavae se taimi umi lava talu ona tupu” (*Teachings of the Prophet Joseph Smith*, sel. Joseph Fielding Smith [1976], 256).

- Aisea e taua ai le usitai i tulafono a le Alii e ui ina tatou le malamalama i mafuaaga uma o ia mea? Ua faapefea ona faamanuiaina oe i le tausia o se poloaiga e te lei malamalama atoatoa i ai?
- O le a le faamoemoe o taulaga na osi e Atamu? (Tagai Mose 5:7–9. O ni faatusa o le taulaga a le Atua na faia i lona Atalii Pele e Toatasi Na Fanau. O le osiaina o ia taulaga o se faamanatu ia Atamu ma ana fanau o tagata uma e mafai ona faaolaina mai le Pau e ala i le Togiola a Iesu Keriso.) O a faamanatu ua tuuina mai ia i tatou i lenei matupu faavae? E faapefea ona faaali atu lo tatou loto faafetai mo le Pau ma le Togiola?

Faaiuga

---

Toe faitau le molimau a Eva o faamanuiaga o le Pau (Mose 5:11). Ia tuuina atu le loto faafetai mo galuega a Atamu ma Eva, mo le Pau, ma le Togiola a Iesu Keriso.

## Manatu Faaopoopo e Aoao Atu Ai

O mataupu o loo taua i lalo e faaopoopo i le ootootoga o le lesona fautuaina. Atonu e te manao e faaoga se tasi o nei manatu pe sili atu foi e avea o se vaega o le lesona.

### 1. O le ai i le fua o le laau faasaina e le o se agasala

I le fesoasoani e faamalamalama atu o Atamu ma Eva e lei agasala ina ua la aia le fua o le laau faasaina, ia faitau le faamatalaga lenei mai ia Elder Dalin H. Oaks:

“O Eva na muamua solitulafono i tulafono faavae o tu ma aga o le Faatoaga i Etena ina ia amatalia ai tulaga faaletino. O lana faatinoga po o le a lava le itu-aiga, o se faatulagaga aloaia o le solitulafono ae i le fuafuaga faavavau a le Atua o se mamalu manaomia e tatala ai faitotoa agai i le olaga e faavavau. Na faaalua e Atamu lona faautauta i lona faia foi o le mea lava lea e tasi . . .

“. . . Tatou te viia le galuega a Eva ma faamamaluina lona atamai ma lona lototele i lenei vaega maoae o le Pau . . . na saunoa mai Elder Iosefa Filitia Samita e faapea: ‘Ou te le taua lava o se agasala le vaega a Eva na fai i le Pau, ou te le tuuaia foi Atamu i se agasala. O lenei mea o le solitulafono, ae le o se agasala’ . . .

“Ua ta’u mai ai i lenei mea le eseesea i le va o le *agasala* ma le *solitulafono*, e faamanatu mai ia i tatou le faaupuina faaeteete i le mataupu faavae o le faatuatua lona lua: “Matou te talitonu e faasalaina tagata ona o a latou lava *agasala* ae le o le agasala a Atamu“. O loo toe tuuina mai ai se eseesea masani i le tulafono. O nisi o aga e pei o le fasioti tagata, o solitulafono ona o le matua sese lava. O nisi o aga, e pei o le faagaoioia e aunoa ma se laisene, o ni soligatulafono pe a fai o loo faasaina e le tulafono. I lalo o nei eseesea o le faatinoga na oo mai ai le Pau—ua matua sese lava—ae o le solitulafono—sese ona sa faasaina aloaia. O nei upu e le o faaogaina i taimi uma e tau atu ai se isi mea ese, ae o le eseesea e peiseai e tele sona uiga i le faatatau atu i le Pau” (Lipoti o le Konafesi, Oke 1994, 98; po o le *Liahona*, Ianuari, 1994).

### 2. O le eseesea o le taunuuga ma le tiutetauave mo le Pau

O fanau uma a Atamu ma Eva ua tauavea le *taunuuga* o le Pau, e aofia ai le oti faale tino ma le faaleagaga, ae le o le *tauaveina* o le *tiute* mo le Pau. O loo aoao mai le mataupu faavae o le faatuatua lona lua faapea: “e faasalaina tagata ona o a latou lava agasala ae le o agasala a Atamu.” Tagai foi i le Moronae 8:5–23.

### 3. “Ia uai atu lou manao i lau tane”

Atonu e fesoasoani nei saunoaga o loo taua i lalo i le vasega ia malamalama i le saunoaga a le Alii ia Eva ina ua ia faapea mai, “Ia uai atu lou manao i lau tane e pule foi o ia ia te oe” (Mose 4:22).

Na saunoa mai Peresitene Spencer W. Kimball e faapea: “E i ai lau fesili e uiga i le upu *pule*. E tuuina atu se uiga sese. Ou te loto ina ia faaoga le upu *pule faamalumu* aua o le mea lena na te faia. O se toalua amiotonu na te pule faamalumu i lana ava ma le aiga” (“The Blessings and Responsibilities of Womanhood,” *Ensign*, Mar. 1976, 72).

Na saunoa mai Elder M. Russell Ballard e faapea: “Ua faaalua mai e le Atua e ala mai i ana perofeta e tatau i tane ona maua le Perisitua, avea ma tama, ma i le alofa moni, malu ma le le faaoleole latou te taitaia ma tausia o latou aiga i le amiotonu faapei ona taitaia e le Atua le Ekalesia (Tagai Efeso 5:23)” (“Equality through diversity,” *Ensign*, Nov. 1993, 90).

Lesona  
**5**

# “Afai E Lelei Mea E Te Faia O Le A Talia Oe”

Mose 5–7

---

**Faamoemoega**

Ina ia fesoasoani i le vasega ia malamalama o filifiliga e mulimuli ia Iesu Keriso e tau atu i le saolotoga, manuia, ma le ola faavavau, ao filifiliga e mulimuli ia Satani e tau atu i le faanoanoa ma le nofopologa.

---

**Sauniuniga**

1. Suesue ma le agaga tatalo mau nei mai le Penina Tau Tele:
  - a. Mose 5:16–41. Ua sili ona alofa Kaino ia Satani nai lo le Atua ma sa ia usitai ai i le faatonuga a Satani e osi se taulaga i le Alii (5:16–19). Ua teena e le Alii le taulaga a Kaino ma poloaiina Kaino ia salamo (5:20–25). Ua osi feagaiga Kaino ma Satani ma fasiotia ai Apelu (5:26–33). Ua fetuaina e le Alii Kaino ma ua faasaina ai o ia mai luma o le Alii (5:34–41).
  - e. Mose 6:26–63. O Enoka o se atalii o le augatupulaga e fa o fanau a Atamu ua valaauina e talai atu le salamo i tagata (6:26–36). Ua usitai Enoka i le faatonuga a le Alii ma aoao atu tagata (6:37–63).
  - i. Mose 7:13, 17–21, 23–47, 68–69. Ua malosi tele le faatuatua o Enoka, ua aveeseina ai mauga, ua suia ala o vaitafe, ma ua matua matatau lava iai atunuu uma (7:13, 17). Ua faanoanoa le Alii ma Enoka i le amioleaga o tagata oi le lalolagi (7:23–47). O tagata i le nuu o Enoka ua loto gatasi ma ua tasi le manatu ma le Alii, ma ua aveolaina ae le nuu i le lagi (7:18–21, 68–69).
2. Mau faitau faaopoopo: Mose 5:42–55; 6:10–23; 7:14–16, 59–64; 2 Nifae 2:25–27; Kenese 4:1–16.

---

**Faalautelega  
Fautuaina o  
le Lesona**

Gaoioiga e  
Faatosina Mai Ai

Atonu e te manao e faaoga se tasi o gaoioiga nei (po o sa oe lava gaoioiga) e amata ai le lesona.

Ao lei amataina le vasega, ia tusia seti e lua o faamatalaga o loo taua i lalo i le laupapa:

<i>Seti 1</i>	<i>Seti 2</i>
“O ai ea le Alii e tatau ai ona ou iloa o ia?”	“O ia o lou Atua ma lo outou Atua”
“Ua ou saoloto”	“Aisea ua outou taupulepule ai ia te outou lava ma teena le Atua o le lagi?”
“O Au ea o se leoleo o lou uso?”	“O outou o ou uso”

Tau atu i le vasega o saunoaga i lisi e lua o ni saunoaga a ni tagata se toalua o le a o latou aoao i ai i le lesona. Ia fesili atu i le vasega pe o le a se mea ua latou maua mai e uiga ia i laua taitoatasi e faavae i luga o ia saunoaga. (Atonu e te manao e vaevae le vasega i ni vaega se lua e talanoaina ai saunoaga. A maea ona talanoaina saunoaga mo le lima po o le 6 minute, ona aumai lea o se tagata se toatasi mai i vaega taitasi e ootoo mai talanoaga a le vaega lava latou mo le vasega.)

A maea ona tuuina mai manatu o le vasega, faamalamalama atu o saunoaga i le seti muamua o saunoaga a Kaino, o le na filifili e mulimuli ia Satani. O saunoaga i le seti lona lua o saunoaga a Enoka, o le na filifili e mulimuli i le Alii. O saunoaga a i laua taitoatasi, o loo atagia ai manatu o le tagata lava ia agai i le Atua.

Mau Talanoaina  
ma le Faaaogaina

A o e aoaoina atu nei mau, ia talanoaina pe faapefea ona faaoga i le olaga i aso taitasi. Uunai le vasega e faamatala ni aafiaga e faatatau i mataupu ua taua i le mau.

### 1. O Kaino ua osi feagaiga ma Satani, faasiotia Apelu, ma ua fetuuina e le Atua.

Aoao atu ma talanoaina le Mose 5:16–41

- Na faamoemoe Atamu ma Eva o le la atalii o Kaino o le a mulimuli i le Alii e pei ona la faia. Ao Kaino ua “le uai atu” i ona matua ma le Alii ma ua fesili. “O ai ea le Alii e tatau ai ona ou iloa o ia?” (Mose 5:16). E mafai faapefea e lenei fesili ona faailoa mai manatu o Kaino agai i le Atua? O le a le mea e tatau ona tatou faia ina ia tatou iloa le Atua? (Tagai Alema 22:17–18.)
- Aisea na fai ai e Kaino le taulaga i le Alii? (Tagai Mose 5:18.) O le a le taulaga na osi e Kaino? (Tagai Mose 5:19.) Aisea na talia ai e le Alii le taulaga a Apelu ae teena le taulaga a Kaino? (Tagai Mose 5:5, 20–23. Na poloaiina e le Atua Atamu ma Eva ma a la fanau ina ia osi taulaga i uluai manu pepeti o lafu. Ua usitai Apelu, ao Kaino ua faalogo i upu a Satani ma osi atu le taulaga i fua o le fanua.) Aisea e taua ai le faia o taulaga i le auala na faatonu mai e le Atua?

Na aoao mai Iosefa Samita e faapea: “Na osia e Apelu se taulaga na talia, o uluai manu pepeti o lafu. Na osia e Kaino se taulaga i fua o le fanua ma na le taliaina ona ua ia le faia i le faatuatua . . . O le faamaligiina o le toto o le Atalii e Toatasi e togisala mo tagata . . . o se fuafuaga o le faaolataga; . . . ma i le faia o le taulaga o se vaega ina ia iloa ai e le tagata le taulaga sili na saunia e le Alii; i le faia o se taulaga e ese mai ai, o le le faaaogaina lea o le faatuatua. . . . o lea e lei i ai se faatuatua ia Kaino; ma o le a lava se mea e aunoa ma le faatuatua, o le agasala lea” (*Teachings of the Prophet Joseph Smith*, se. Joseph Fielding Smith [1976], 58).

- Na faapefea ona tali atu Kaino ina ua teena e le Atua lana taulaga ma valaau atu ia te ia ia salamo? Tagai Mose 5:21, 26.) Aisea i nisi o taimi e faigata ai ia i tatou ona salamo? E faapefea ona tatou atinae ia faamallosia le agaga salamo?
- Ina ua maea ona ia fasiotia lona uso o Apelu, na faapea mai ai Kaino “ua ou saoloto” (Tagai Mose 5:33). O le a le mea e te manatu na talitonu Kaino ua ia saoloto mai ai? E faapefea e le le usitai o tulafono a le Atua ona faaitiitia lo tatou saoloto? E faapefea e le usitai ona faaopoopo lo tatou saoloto?

- Na faapefea ona tali atu Kaino ina ua fesili le Alii po o fea Apelu? (Tagai Mose 5:34.) O le a le uiga o le avea o oe ma leoleo o ou uso? (Tagai 1 Ioane 3:11, 17–18.) O a ni ala e mafai ona avea ai i tatou ma leoleo o o tatou uso ma tuafafine.
- Na saunoa mai Bishop Robert L. Simpson e faapea: “O le lalolagi i le taimi nei o loo tauina atu ia te oe e tuu ai pea lau uo ia na o ia. E iai lana aia ma e saoloto e sau ma toe alu i soo se mea. E tau atu e le lalolagi ia te oe o le faatau-anau atu e auai i lotu, po o le lotu perisitua, po o le tiai o se masani leaga e ono agai atu ai i se tulaga faaleaogaina ma tele ai fua le faaopoopo avega; ae ou te toe tuuina atu le upu a le Alii: O oe o le leoleo o lou uso, ma pe afai ua liua mai oe, e iai lou tiute e faamalosi lou uso” (Lipoti o le Konafesi, Oke. 1971, 114; po o le *Liahona* Novema, 1972, i 23)

## 2. Ua aoao atu e Enoka le salamo i tagata.

Aoao ma talanoaina le Mose 6:26–63.

- Na faapefea ona tali atu Enoka ina ua valaauina o ia e le Alii e talai atu le salamo i tagata? (Tagai Mose 6:31.) O le a le mea na folafola atu e le Alii ia Enoka pe a fai e alu atu e pei ona poloaiina ai o ia? (Tagai Mose 6:32–34.) O a mea tatou te aoao mai le tala a Enoka e uiga i le ala e filifilia ai e le Alii ona taitai? (Tagai foi 1 Samuelu 16:7.) O a mea ua mafai ona tatou aoao mai ia Enoka e uiga i le auauna atu i le Alii e ui ina tatou lagona le le gafataulimaina?
- I lou manatu aisea ua faamanualia ai finagalo o tagata ina ua amata e Enoka ona aoao atu le salamo? (Tagai Mose 6:37; tagai foi 1 Nifae 16:2; Mosaea 13:7.) Aisea na latou faalogo ai ia te ia e ui ina faamanualia o latou loto? (Tagai Mose 6:38–39). Muamua lava, na latou fiailoa, ae ona latou iloaina ai lea o ia o se tagata o le Atua.) E faapefea ona tatou maua se molimau o le perofeta soifua o se tagata o le Atua? E faapefea e lenei molimau ona fesoasoani ia i tatou ia mulimuli i le perofeta e ui o ana aoaoga e le o fiafia i ai le toatele o tagata.
- O a mataupu faavae o le talalelei na aoao atu e Enoka ao ia valaau atu i tagata ia salamo? (Tagai Mose 6:47–63. A fai na talanoaina nei fuaiupu i le lesona 4, atonu e te le toe manaomia ona toe faamanatu.)
- Ua tuuina mai e le Alii “ia faitalia lava i tatou” (Tagai Mose 6:56). O le a le uiga o lenei mea? Ua ia i tatou le malosi e filifili ai.) Aisea e manaomia ai le filifiliga saoloto i le fuafuaga a le Atua mo lo tatou faaolataga? (Tatou te manaomia le filifiliga saoloto ina ia i ai ia i tatou le tiute mo a tatou filifiliga.) O a tanuuuga o le filifili e mulimuli ia Satani? O a taunuuga o le filifili e mulimuli i le Alii? (Tagai 2 Nifae 2:25–27.)

## 3. O tagata i le nuu o Enoka ua loto gatasi ma ua tasi le manatu ma le Alii, ma ua aveolaina ae le nuu i le lagi.

Aoao atu ma talanoaina le Mose 7:13, 17–21, 23–47, 68–69.

- O a vavega na faia e le Alii ona o le faatuatua tele o Enoka? (Tagai Mose 7:13.) O a vavega e faia e le Alii i aso nei ona o le faatuatua o tagata?
- Na faapefea ona faamanuiaina tagata o e na faalogo i upu a Enoka ma salamo i a latou agasala? (Tagai Mose 7:17–18.) Aisea na faaigoa ai lo latou nuu o Siona? (Tagai Mose 7:18.) O le a le uiga o le “loto gatasi ma ma le manatu e

tasi”? O le a le mea e tatau ona tatou faia ina ia tatou maua ai le loto gatasi ma tasi le manatu ma le Alii? i totonu i otatou aiga? i totonu o le Ekalesia?

- O le a le mea na mulimuli lava tupu ia Enoka ma tagata o lona nuu? (Tagai Mose 7:19–21, 69)
- I le Mose 7:28, na vaai Enoka o tutulu le Alii. Aisea na tutulu ai le Alii? Aisea na fesiligia ai e Enoka le tutulu o le Alii? (Tagai Mose 7:29–31.) O le a le tali a le Alii? (Tagai Mose 7:32–33, 36–37.) O a ni ou lagona e uiga i le Alii ao e faitau i ia fuaiupu?
- Ina ua vaai e Enoka le amioleaga o tagata, sa tutulu ai foi ia? (Mose 7:41, 44). Na faapefea ona faamafanafana atu e le Alii Enoka? (Tagai Mose 7:44–47.)

Atonu e te manao e tau i le vasega o lesona o lumanai e talanoaina ai le toe faatulagaina o Siona i aso e gata ai (e aofia ai ma le Ierusalem Fou), o le Afio Faalua mai o le Faaola, ma lona nofo tupu i le lalolagi i le meleniuma lea na vaai i ai Enoka i le Faaaliga (Mose 7:62–65).

## Faaiuga

Ia faailoa atu o Kaino na filifili e mulimuli ia Satani ma aoao atu ana faiga leaga i ana fanau ma e mulimuli ai. O e na tupuga mai ia Kaino ua tutupu ae i le amioleaga ma ua fetuuina e le Atua i lo latou le amiotonu. Ao le eseesega, ua filifili Enoka e mulimuli i le Alii. O le taunuuga o le filifiliga a Enoka o le usitai ma aoao atu le talalelei ia i latou uma o e na faalogo, o se nuu atoa na avea ma e amiotonu na aveese mai ai i latou mai le lalolagi ina ia mau faatasi ma le Atua.

Molimau atu o filifiliga tatou te fai ina ia mulimuli ia Iesu Keriso o le a fesoasoani ia tatou latalata atu ia te ia ma taitai atu i tatou i le saolotoga, manuia, ma le olaga faavavau.

## Manatu Faaopoopo e Aoao Atu Ai

O mataupu o loo taua i lalo e faaopoopo i le oototoga o le lesona fautuaina. Atonu e te manao e faaaoga se tasi o nei manatu pe sili atu foi e avea o se vaega o le lesona.

### 1. Tausiaina o faamaumauga o aiga

- Aisea ua taua ai le tausia e Atamu ma Eva ma a la fanau o se tusi faamanatu ma se tala o gafa? (Tagai Mose 6:5–8, 45–46.) Aisea e taua ai mo i tatou le tausia o ia faamaumauga i nei aso? Ua faapefea e tala tusitusia o olaga o lou tupuaga ona fesoasoani ia te oe? E faapefea e se tala tusia o lou olaga ma lou faatuatuga ona fesoasoani i tagata o lou aiga?
- E mafai faapefea e tusitusiga paia ona avea ma faamaumauga faaleaiga? E mafai faapefea ona faaaogaina atoatoa e matua ma faiaoga tusitusiga paia e aoao ai fanau?


### 2. Faatusatusaina o Enoka ma Kaino

Ia tusia i luga o le laupapa seti sitepu e lua, e tasi e alu i luga ae tasi e alu i lalo (tagai i le faataitaiga o loo i le itulau e 21). Faaigoa sitepu alu i luga “*O uiga e taitai atu ai i tatou i le Atua*, ma tusi le igoa o Enoka i luga o le sitepu muamua. Faaigoa sitepu alu i lalo “*O uiga e taitai atu ai i tatou i le faafanoga*, ma tusi le igoa o Kaino i luga o le sitepu muamua.



Ia faitau e le vasega le fuaiupu muamua o loo i luga o sitepu a Enoka (Mose :59) ma le fuaiupu muamua o loo i luga o sitepu a Kaino (Mose 5:16). Ona tusi lea o ni nai upu i luga o sitepu talafeagai i luga o le laupapa. Ia faia foi mo sitepu o loo totoe. A maea ona faitauina fuaiupu uma, tusi i le faaiuga o sitepu a Enoka *Mau faatasi ma le Atua*, ma tusi i le faaiuga o sitepu a Kaino *O le faafanoga faaleagaga*. Talanoaina pe faapefea e upu a Enoka ma ana galuega ona fesoasoani ia te ia i le tuputupu faalatalata atu i le Atua, ao upu ma galuega a Kaino o loo faalatalata atu ai o ia i a Satani.

- O a auala e mafai ai ona tatou mulimuli i faaitaiga a Enoka ma ola latalata atu ai i le Atua?



### 3. “Uu ou mata . . . ona e pupula ai lea” (Tagai Mose 6:35)

Na faamalolo e Iesu Keriso i se tasi taimi se tagata tauaso i le uuina o ona mata i le elelee (Ioane 9:1–7). O Enoka, ao lei atinae lona malosi faaleagaga o lea ua tauaso faaleagaga ai o ia i nisi mea, ua faatonu o ia e “uu [ona] mata i le elelee, ma fufulu” (Mose 6:36.) O le a le mea ua aoao mai i a i tatou e le faatusa o le fufulueseina o le elelee?

- O a mea e mafai ona tatou faia ina ia matala atili ai o tatou mata i mea tau le Atua? E mafai faapefea ona tatou faaleleia lo tatou suesueina o mau ina ia tatou iloa ai le tamaoaiga o loo iai.

#### 4. O e pele ua faaseseina

- E ui lava ina aoao atu le talalelei e Atamu ma Eva i a la fanau (Mose 5:12), o Kaino ma isi ua filifili e ola le amiotonu. E mafai faapefea ona tatou fesoasoani tatou i a i tatou lava e tauave le tiga pe a faaseseina se ua pele ia i tatou? E mafai faapefea ona tatou fesoasoani atu i a i latou ia ua pele.

Na fautua mai Elder Richard G. Scott e faapea:

“E toatele outou o loo i ai ni faanoanoaga, po o ni tiga tele ona o se atalii po o se afafine, tane po o le ava, o se ua liliuese mai le amiotonu ma faia le leaga. O lau savali e mo outou.

“O loo faatumulia lou olaga i le tiga, ma le le atoatoa o le faamoemoe i nisi taimi. O le a ou tau atua le ala e mafai ai ona faamafanafanaina oe e le Atua.

“Muamua, e tatau ona e iloa mataupu faavae e lua:

1. E ui lava ina tele mea e mafai ona e faia mo se ua pele o loo manaomia e fesoasoani, e i ai mea e tatau ona faia e le Alii.
2. Ma lenei, e leai se faaleleiga e tupu ma faaauau pea e aunoa ma le faaaogaina i le amiotonu o le filifiliga saoloto. Aua le taumafai e aveesea le filifiliga saoloto. E oo lava i le Alii e na te le faia lena mea. O le usitai faamalosi e le maua ai ni faamanuiaga (tagai MFF 58:26–33).

“O le a ou tuuina atu ni auala se fitu e mafai ai ona e fesoasoani.

“Muamua, ia e alofa atu e aunoa ma se mea e gata mai ai. . . . Lua, aua nei faaletauaina le soligatulafono, a ia faaali atu i ai faamoemoega uma ma le lagolago atu i le ua solitulafono. . . . Tolu, aoao atu le upumoni. . . . Fa, faamagalo atu ma le faamaoni i taimi uma lava e manaomia. . . . Lima, tatalo ma faamoemoe o le a tali mai le Alii. ‘Ua aoga tele. . . le tatalo faatauanau a le tagata amiotonu’ (Iakopo 5:16) . . .

“Ono, ia fetuutuunai manatu. . . . Afai ua faia mea uma e mafai ona e faia, taatia le mataupu i aao o le Alii ma aua loa nei toe popole. Aua nei e manatu ua e leaga ona ua e le mafai ona faia nisi mea. Aua le faamaimauina le malosi i le popole e leai se aoga. E sau lava le taimi e te lagona ai manatu ma iloa pe faapefea ona tuuina atu fesoasoani faapoopo. O le a e mauaina le filemu ma le manuia, o le a e le tiai i a i latou o loo manaomia oe, ma o le a mafai ona e tuuina atu fesoasoani sili ona o lena manatu e faavavau. . . .

“O se fautuaga mulimuli—Aua le taofia le taumafai e fesoasoani atu i se ua pele, aua!” (Lipoti o le Konafesi, Ape. 1988, 69–71; po o le *Liahona*, Iulai 1988)

# “Noa . . . Na Fausia le Vaa e Ola ai Lona Aiga”

*Mose 8:19–30; Kenese 6–9; 11:1–9*

---

**Faamoemoega** Ina ia fesoasoani i le vasega ia mananao e ola agavaa ma alo ese mai mealeaga o le lalolagi.

---

**Sauniuniga**

1. Suesue ma le agaga tatalo mau nei:
  - a. Mose 8:19–30; Kenese 6:5–22; 7:1–10. Ua talai atu e Noa le talalelei ae ua le faalogo tagata (Mose 8:19–25). Ona o le amioleaga o tagata, na tautino mai ai e le Atua o le a ia faaumatia ese mai le lalolagi tagata ma mea uma lava (Mose 8:26–30); Kenese 6:5–13). Ua poloiaina Noa e le Alii e fau le vaa ma ave i totonu lona aiga ma mea ola e tai lua i mea uma. (Kenese 6:14–22; 7:1–10).
  - e. Kenese 7:11–24; 8; 9:8–17. E 40 aso 40 po o timu (7:11–12). O tagata ma mea ola uma e lei i ai i luga o le vaa ua faaumatia ma ua ufitia le lalolagi i le vai mo le 150 aso (7:13–24). Ina ua mau le vai, o Noa, o lona aiga ma manu uma ua tuua le vaa (8:1–19), ma ua osi e Noa taulaga i le Alii (8:20–22). Ua faatumauina e le Alii lana feagaiga ma Noa ma faatulagaina le nuanua e fai ma faailoga o le feagaiga (9:8–17, ia manatua o le faaliliuga a Iosefa Samita o le fuaiupu e 15 o loo tau mai ai o le feagaiga na faia i le va o le Atua ma Noa ae le o le va o le Atua ma mea ola uma).
  - i. Kenese 11:1–9. Ina ua mavae nisi o tupulaga talu le lolo, ua taumafai tagata e fausia se olo e tau i le lagi (o le olo o Papelu). Ua faeseeseina e le Alii a latou gagana ina ia aua nei malamalama le tasi i le isi ma ua faataapepeina i latou i le lalolagi atoa.
2. Mau faaopoopo: Eperu 11:7; Mose 7:32–36.
3. Afai o maua vitio o loo taua i lalo, atonu e te manao e faaaogaina e avea o se vaega o le lesona:
  - a. O se vaega puupuu mai le “Noa ma le Lolo.” vaega 2 o le kaseti vitio o le, *The Beginnings/Abraham* (53150).
  - e. O ata o le Fausiaina o le Vaa (62053; Taga Ata o le Talalelei 102); O Noa ma le vaa faatasi ma manu (62305; Taga Ata o le talalelei 103); ma le Fofoaga—o meaaola (62483; Taga Ata o le talalelei 100).

---

**Faalautelega  
Fautuaina o  
le Lesona**

Gaoioiga e  
Faatosina Mai Ai

Atonu e te manao e faaaoga se tasi o gaoioiga nei (po o sa oe lava gaoioiga) e amata ai le lesona. Filifili le gaoioiga ua aupito talafeagai mo le vasega.

1. Afai e lava le tele o le potu aoga, ia fai i nisi o le vasega e tutu faatasi i se laina sao, ma faasao o latou lima ia pai atu o latou tumutumulima i tumutumulima o se tasi o sosoo ai ma i latou. Ia faamatala atu pe a ma le 85 tagata e tutu faapenei i se laina sao ona maua lea o le umi o le vaa na fau e Noa.

2. Faaali atu le siata i le faaiuga o le lesona e fesoasoani ai i le vasega e manatunatu ai i le tele o le vaa o Noa e faatusatusa i ni vaa o loo tatou masani ai.

Mau Talanoaina  
ma le Faaogaina

A o e aoaoina atu nei mau, ia talanoaina pe faapefea ona faaogaina i le olaga i aso taitasi. Uunai le vasega e faamatala ni aafiaga e faatatau i mataupu ua taua i le mau.

### 1. Ua teena e tagata le valaau atu a Noa e salamo; ua fau e Noa le Vaa.

Aoao atu ma talanoaina le Mose 8:19–30 ma le Kenese 6:5–22; 7:1–10. (Afa'i e i ai ni fesili a le vasega e uiga i meaola "mama ma le le mama, atonu e te mana'o e faasino i latou i le Levitiko 11:1–31.)

- Na faapei le lalolagi ina ua valaau atu le Alii ia Noa e talai le talalelei? (Tagai Mose 8:20–22.) O a ni mea e talitutusa ai tagata o aso o Noa ma tagata o aso nei? E faapefea e tagata o aso o Noa ona aloese mai le malaia? (Tagai Mose 8:23–24.) E mafai faapefea e le faalogo atu, mulimuli i perofeta ona fesoasoani ia i tatou ina ia aloese mai le faafanoga faaletino ma le faaleagaga?
- Aisea na fau ai e Noa le vaa? (Tagai Eperu 11:7.) Ua fautuaina i tatou e taitai o le Ekalesia, ina ia "fau se vaa mo le tagata lava ia." W. Don Ladd, i le Lipoti o le Konafesi, Oke. 1994, 36; po o le *Ensign*, Nov, 1994, 29). O a mea e mafai ona tatou faia e puipuia mai ai faaleagaga i tatou ma o tatou aiga? O a tulafono ua e manatu e taua tele i le puipuia o i tatou i nei ona po? (Atonu e te mana'o e faaogaina le tamai tusi *Mo le Malosi o le Autalavou* [34285] i a outou talanoaga.)
- O a mea e mafai ona tatou faia ina ia saunia ai faaletino mo le oo mai o se mala tele, po o se isi mea manaomia? (Tagai i upusii o loo i lalo ma le upusii mai se saunoaga a Elder L. Tom Perry i le itulau e 54.) Aisea e faatamala ai le toatele o i tatou e saunia mea o loo manaomia? E faapefea ona tatou loto atu atili i le saunia nei?

Ua saunoa mai Peresitene Ezra Taft Benson e faapea: "O le faaaliga e sauni ma faaputu mea taumafa atonu o se tulaga manaomia mo lo tatou manuia faaletino i nei ona po faapei ona manaomia e tagata le ulu atu i le vaa i ona po o Noa" (Lipoti o le Konafesi, Oke 1987, 61; po o le *Liahona*, Ianuari 1988, 49).

Ua aoao mai Elder W. Don Ladd e faapea: "Ina ua amata ona timu, ua tuai ona amata le fauina o le vaa . . . E tataua ona tatou faalogo i sui o le Alii. E manaomia lo tatou agai atu ma le filemu i luma ma saunia mo mea o le a oo mai. E le tataua ona tatou fefefe pe atuatuva'e, aua afa'i ua saunia i tatou faaleagaga ma le faaletino o le a mafai ona faasaoina i tatou ma o tatou aiga mai soo se lolo. O le a opeopea o tatou vaa i luga o le sami o le faatuatua pe a fai o a tatou galuega o loo agai atu malie i le saunia mo le lumanai" (Lipoti o le Konafesi, Oke.1994, 37; po o le *Liahona*, Ianuari. 1995, 29).

- O a ni uiga na faaaliga e Noa a o fausiaina le vaa? (O tali e aofia ai faatuatua, usitai, ma le galue malosi.) E faapefea ona tatou faamalosi ia uiga ia i tatou lava? Na faamalamalama mai e Peresitene Spencer W. Kimball ina o fausia e Noa le vaa e faapea, "E le o mautinoa se timu ma se lolo . . . o ana lapataiga sa manatu nisi o ni manatu valea . . . E valea le fau o le vaa i luga o le eleele matutu, faatasi ma le susulu o le la ma o loo agai atu pea i luma le olaga e pei ona masani ai! Ae ua leai se taimi. Ua maea ona fau le vaa. Ma ua oo mai

le lolo. O e na faalogogata ma fouvale ua malelemo. O le vavega o le vaa na mulimuli mai i le faatuatua i lona fausiaina” (*Faith Precedes the Miracle* [1972], 5–6).

## 2. Ua faamamaina e le Alii le lalolagi i le lolo.

Aoao atu ma talanoaina le Kenese 7:11–24; 8; ma le 9:8–17.

- O le a le mea na tupu ina ua oo mai le lolo? (Kenese 7:23.) O a ni “vaa” ua i ai i nei ona po e mafai ona fesoasoani i le faasaoina mai o i tatou mai amioleaga ua siosiomia ai i tatou? (Atonu e te manao e tusia tali i luga o le laupapa ma valaaulia le vasega e tau mai pe faapefea e nei “vaa” ona fesoasoani e puipuia i latou. O nisi o tali e aofia ai o tatou fale, aiga, uo, malumalu, seminale, fonotagata faale-Ekalesi, tatalo, o tusitusiga paia, ma perofeta soifua.) E faapefea ona tatou fesoasoani i isi ina ia maua le lafitaga o ia “vaa”?
- Ina ua maea le timu, aisea na tuli atu ai e Noa le lupe mai le vaa? (Tagai Kenese 8:8.) O le a mea na tupu i taimi muamua e lua na ia tuli atu ai i fafo le lupe? (Tagai Kenese 8:8–11.) O le a le mea na tupu i le lona tolu o taimi? (Tagai Kenese 8:12.)
- O le a mea muamua na faia e Noa ina ua alu ese ma le vaa? Tagai Kenese 8:20.) E faapefea ona tatou faaalua lo tatou loto faafetai i le Alii ina ua ia fesoasoani mai ia i tatou i se tulaga faigata?
- O le a le mea na tuuina e le Atua i le lagi ina ua mavae le lolo? (Tagai Kenese 9:13.) O le a le mea na saunoa mai le Atua e faatatau i ai le nuanua? (Tagai Kenese 9:12–13, 16–17.) O le a le feagaiga na faia e le Atua ma Noa? (Tagai Kenese 9:8–11, 15; tagai foi i le faaliliuga a Iosefa Samita, Kenese 9:21–22, 24.)

## 3. Ua fausia e tagata le olo o Papelu.

Aoao atu ma talanoaina le Kenese 11:1–9.

- Aisea na tonu ai i le fanau a Noa e fau le olo? (Tagai Kenese 11:4.) O le a sou manatu o le a le mea na mananao ia taunuu ia “ta’ua ai” i latou lava? O le a le eseese o le ta’ua o i tatou lava ma le tauaveina i o tatou luga o le suafa o Keriso? O a tiute tatou te tauaveina i o tatou luga pe a tatou tauaveina le suafa o Keriso? (Tagai Mosaea 18:8–10.)
- O le a le taunuuga na maua mai i le fausiaina o le olo i le lagi? (Tagai Kenese 11:5–9.) Aisea e le mafai ai ona tatou oo atu i le lagi i a tatou lava taumafaiga po o metotia faale-tagata? O le a le auala a le Atua mo i tatou e oo atu ai i le lagi?

Faaiuga

---

Faamatala atu o tagata na fausia le olo o Papelu na faasalaina ona ua latou taumafai e oo atu i le lagi i auala faalelalolagi. Ao lona tuufaafegai, o Noa ma lona aiga na faasaoina mai le lolo ona o lo latou ola ai e tusa ai ma poloaiga a le Atua.

Molimau atu pau lava le auala mo i tatou e oo atu ai i le lagi . . . toe foi atu e nonofo faatasi ma le Tama Faalelagi . . . o le ala atu lea i le talalelei a Iesu Keriso. E tataua ona tatou ola amiotonu e pei ona faia e Noa, i le faatuatua ia Keriso, salamo i a tatou agasala, mauaina o sauniga paia, ma tumau e oo i le iuga o o tatou ola. Afai tatou te faia nei mea o le a mafai ona tatou manumalo i mea leaga ma mafai ona toe foi atu i luma o le Atua.

**Manatu Faaopoopo  
e Aoao Atu Ai**

**O mataupu o loo taua i lalo e faaopoopo i le otootoga o le lesona fautuaina. Atonu e te manao e faaoga se tasi o nei manatu pe sili atu foi e avea o se vaega o le lesona.**


**1. Ua vaaia e Enoka i se faaaliga aso o Noa**

O Enoka, le tuua o Noa, ua vaai i se faaaliga i le amioleaga o le tupulaga a Noa ma le iuga o le lolo (Mose 7:41–52). Ua lagona e Enoka le faanoanoa ona o le amioleaga ma sa ia tagi atu ai i le Alii ina ia faalia lona alofa tunoa mo Noa ma ana fanau. Ua folafola atu e le Alii ia Enoka o le a ia le toe faaumaina lava le lalolagi i se lolo (Mose 7:51). Ua folafola atu foi e le Alii ia Enoka o Noa o le a avea ma ana fanau, ma o lea o fanau a Enoka o le a faaauau pea lava i le lalolagi pe a mavae le lolo (Mose 7:52; 8:2, 6, 8–9). Ua faafouina e le Alii lea feagaiga ma Noa ina ua mavae le lolo (Kenese 9:8–17; ia manatua o le faaliliuga a Iosefa Samita o le fuaiupu e 9 ma le 11 o loo faatatau i le feagaiga a le Alii ma Enoka.)

**2. Ua faasaoina e le Alii e amiotonu.**

E pei lava ona faasaoina Noa ma lona aiga mai le lolo ona o lo latou amiotonu, na faapena foi ona puipuia e le Alii tagata amiotonu i le taimi o le olo o Papelu. Ia talanoaina i se taimi puupuu le tala ia Iareto ma lona uso, o loo maua i le Eteru 1:1–5, 33–37, ma le mafuaaga na ala ai ona le faeseeseina le latou gagana.

**Faatatau o le tetele o vaa eseese (tagai gaioiga e faatosina mai ai)**



*Aperaamo 1:1–4; 2:1–11; Kenese 12:1–8; 17:1–9*

---

**Faamoemoega** Ia fesoasoani i le vasega ia malamalama i faamanuiaga ma matafaioi o le feagaiga FaaAperaamo.

---

**Sauniuniga**

1. Suesue ma le agaga tatalo le Aperaamo 1:1–4; 2:1–11; Kenese 12:1–8; 17:1–9. Ua saili atu Aperaamo ina ia amiotonu ma ola agavaa mo faamanuiaga a le Atua. Ua osi feagaiga le Atua ma Aperaamo, i le folafolaina atu o le a ia mauaina fanau e toatele ma o le o latou mauaina le nuu o le folafolaga ma faamanuiaga o le perisitua ma le talalelei.
2. Mau faaopoopo: Kenese 15; Mataupu Faavae ma Feagaiga 132:19–24, 29–32.
3. Afai o maua vitio o loo taua i lalo, atonu e te manao e faaogaina e avea o se vaega o le lesona:
  - a. O se vaega puupuu mai le “Abraham—The Journeys” or “Abraham—The Promise,” vaega 3 ma le 4 o le vitio *Beginnings/Abraham*(53150).
  - e. Ata o faifeautalai (62611) ma se malumalu i lo outou atunuu.

---

**Faalautelega  
Fautuaina o  
le Lesona**

Gaoioiga e  
Faatosina Mai Ai

Atonu e te manao e faaoga se tasi o gaoioiga nei (po o sa oe lava gaoioiga) e amata ai le lesona. Filifili le gaoioiga ua aupito talafeagaiga mo le vasega.

- O le a le faamanuiaga faapeteriaka?

Ua saunoa may le Au Peresitene sili e faapea: “O faamanuiaga faapeteriaka o se folafolaga musuia o le gafa o lē e ona le faamanuiaga, ma lenei, afai e uunaia e le agaga, o se musumusuga ma se faamatalaga faaperofeta o le misiona a lea tagata, faatasi ai ma ia faamanuiaga, o lapataiga ma apoapoaiga o loo musuia ai le peteriaka e tuuina atu . . . O le faataunuuina o faamanuiaga ua folafola mai e faalagolago lea i le faamaoni i le talalelei a lo tatou Alii” (tusi i peresitene o siteki, 28 Iuni 1957; o loo ta’ua i le tusi a Bruce R. McConkie, *Mormon Doctrine*, 2nd ed. [1966], 558).

- E toafia outou ua maua o outou faamanuiaga faapeteriaka? O le a le uiga o le tau mai e le peteriaka o lo tatou tupuaga i se faamanuiaga? (A tau mai e se peteriaka lo tatou tupuaga, ua ia faaalua mai ia i tatou o i tatou e tupuaga mai i le perofeta o Aperaamo e ala mai ia Efaraima, Manase, po o se isi tupuaga o Aperaamo.)

Faamalamalama atu o lenei lesona e talanoaina ai faamanuiaga e mafai ona tatou maua ma matafaioi ua i a i tatou i le avea ai ma e tupuaga mai ia Aperaamo.

A o e aoaoina atu nei mau, ia talanoaina pe faapefea ona faaoga i le olaga i aso taitasi. Uunai le vasega e faamatala ni aafiaga e faatatau i mataupu ua taua i le mau.

### 1. Ua osi feagaiga le Atua ma Aperaaamo.

Aoao atu ma talanoaina le Aperaaamo 1:1–4; 2:1–11; ma le Kenese 12:1–8; 17:1–9.

- Ao talavou Aperaaamo, sa ia manao ina ia amiotonu, ma ola agavaa mo faamanuiaga a le Atua. I le Aperaaamo 1:2–4, o a faamanuiaga na manao i ai Aperaaamo?
- Na faatonuina e le Atua Aperaaamo ma lona aiga ina ia tuua lo latou fale i Uria ma malaga atu i le nuu ua latou faaigoaina o Arana (Aperaaamo 2:1–4.) O iina na tatalo ai Aperaaamo ma ia maua ai se faaaliga lea na osia ai e le Atua le feagaiga e faamanuia o ia ma ana fanau. Ua taua leni o le feagaiga faa-Aperaaamo. O a faamanuia na folafola atu e le Atua ia Aperaaamo i leni feagaiga? (Tagai Aperaaamo 2:6–11; Kenese 12:1–8; 17:17:1–9. Atonu e te manao e faailoa atu o Aperaaamo na faatali mo le tele o tausaga faatoa faataunuaina nisi o nei faamanuiaga na folafola mai, ma o loo faataunuaina pea lava nisi i aso nei.)

O le siata o loo i lalo e mafai ona fesoasoani ia te oe i se aotelega o faamanuiaga o le feagaiga faa- Aperaaamo. Atonu e te manao e tusia se siata puupuu i luga o le laupapa, ma tuu se avanoa e faaopoopo ai se vaega ua taua o le “Matafaioi” e pei ona faaaliga i le leni lesona

Faamanuiaga ma Matafaioi o le Feagaiga FaaAperaaamo			
Faamanuiaga Faaletino	O se nuu ua folafola mai e ola ai (Aperaaamo 2:6, 19; Kenese 12:7; 17:8)	O se fanau toatele (Aperaaamo 2:9–10; Kenese 12:2–3; 17:2, 4–6)	O le talalelei a Iesu Keriso ma le perisitua mo Aperaaamo ma ana fanau (Aperaaamo 2:9–11; Kenese 17:7)
O faatusatusaga Faavavau	O le malo selesitila (MFF 88:17–20)	Faaipoipoga e faavavau ma le uluola e faavavau (MFF 132:19–22)	Faaeaga ma le ola faavavau (MFF 132:23–24)

### 2. O i tatou o suli mo faamanuiaga ma matafaioi o le feagaiga FaaAperaaamo.

Faamalamalama atu o tagata uma o le Ekalesia o “fanau a Aperaaamo,” o lona uiga tatou te tupuga mai ia te ia. Na saunoa mai Elder Iosefa Filitia Samita e faapea: “O le toatele o i latou o e avea ma tagata o le Ekalesia e tupuga mai ia Aperaaamo e ala mai ia Efaraima le atalii o Iosefa. O i latou o e le tupuga mai ia Aperaaamo ma Israelu, e tatau ona avea i latou ma e tupuga mai ia Aperaaamo, ma a fai e papatisoina ma faamauina i latou ua avea ma vaega o le laau ma ua latou mauaina aia tatau uma o le avea ai ma suli” (“How One May Become of the House of Israel,” *Improvement Era*, Oke. 1923, 1149).



- I le avea ai ma fanau a Aperaaamo, o tagata o le Ekalesia o suli mo faamanuiaga ma matafaioi o le feagaiga FaaAperaaamo. E faapefea ona avea i tatou ma suli o lenei feagaiga? (Pe a papatisoina i tatou i totonu o le Ekalesia, ua faafouina ia i tatou le folafolaga o le *faaolataga* o le feagaiga faaAperaaamo. Pe a faamauina i tatou i le malumalu sa, ua faafouina ia i tatou le folafolaga o le *faaeaga* o le feagaiga faaAperaaamo. Mo le mauaina o faamanuiaga o le feagaiga, e tatau ona tatou faataunuuna uma matafaioi ma ola agavaa.)

Na faamalamala mai e Elder Brue R. McConkie e faapea:

“Na muamua maua e Aperaaamo le talalelei i le papatisoga (o le feagaiga lea o le faaolataga); ona faaee atu lea ia te ia o le perisitua maualuga, ma ua ia faia se faaiipoipoga selesitila (o le feagaiga lea o le faaeaga), ma mauaina se tautinoga o le a faaauau ai pea ona ia maua le faaopoopoga faavavau; i le ma le mulimuli, ua ia maua se folafolaga o nei faamanuiaga uma o le a ofoina atu i ana fanau faaletino. (Ape. 2:6–11; MFF 132:29–50.) O loo aofia ai i folafolaga paia na tuuina atu ia Aperaaamo se tautinoga o Iesu Keriso o le a tupuga mai i lona gafa, ma le tautinoga o fanau a Aperaaamo o le a latou mauaina ni filifiliga patino, o ni nuu o le folafolaga o se tofi e faavavau (Ape. 2; Ken. 17; 22:15–18; Kal. 3.)

“O nei folafolaga tuufaatasi ua faaigoaina o *feagaiga FaaAperaaamo*. O lenei feagaiga na faafouina ma Isaako (Ken. 24:60; 26:1–4, 24) ma na faafouina foi ma Iakopo. (Ken. 28; 35:9–13; 48:3–4.) *O ni vaega o lenei feagaiga e faatatau i le faaeaga o le tagata lava ia, ma le faaauau pea o le faaopoopoga faavavau, o le a faafouina ma le tagata lava ia o le fale o Isaraelu o e faataunuuna le faatulagaga o le faaiipoipoga selesitila; e ala atu i lenei faatulagaga o e o lo o osi feagaiga e avea ma o latou faamanuiaga uma o Aperaaamo, Isaako ma Iakopo. (MFF 132; Rom. 9:4; Kal. 3:4.)*” (*Mormon Doctrine*, 2nd ed. [1966], 13).

- O a faamanuiaga e mafai ona tatou maua e ala mai i le feagaiga FaaAperaaamo? E mafai ona tatou mauaina uma faamanuiaga na maua e Aperaaamo, e pei ona tuuina atu i le siata ua tea atu. O nei faamanuiaga e aofia ai le talalelei, le perisitua, faaeaga, ma fesootaiga o aiga e faavavau.)
- O a o tatou matafaioi i le avea ai ma suli o le feagaiga FaaAperaaamo? (Tagai Aperaaamo 2:9, 11; Kenese 18:19. E ao ona tatou fesoasoani i fanau uma a le Atua, o e o loo ola ma e ua oti, ia latou maua faamanuiaga atoatoa o le talalelei. E ao foi ona tatou usitai i poloaiga uma a le Atua.)

Afai ua e tusia i luga o le laupapa le siata o lo o i le itulau e 28, ia faaopoopo atu i ai se vaega i lalo o le siata, lisi atu ai a tatou matafaioi nei:

Matafaioi	Fesoasoani i fanau uma a le Atua ia maua faamanuiaga atoatoa o le talalelei (Aperaaamo 2:9, 11)	Usitai i poloaiga a le Atua (Kenese 18:19)
-----------	---	--

- E faapefea ona tatou fesoasoani atu i isi ina ia maua le talalelei? (I le faia lea o galuega faafaifeautalai, i le faia lea o sauniga o le malumalu mo e ua oti, ma le avea ma faataitaiga o le amiotonu. Atonu e te manao e faaali atu se ata o le malumalu ma ni ata o ni faifeautalai.)

Sa saunoa mai Peresitene Ezra Taft Benson e faapea: “{O le matafaioi a le fanau a Aperaamo, o i tatou ia, o le avea ma faifeautalai e molimau atu lenei galuega ma le Perisitua i atunuu uma’ (Aperaamo 2:9)” (Lipoti o le Konafesi, Ape. 1987, 107, po o le *Liahona*, Iulai 1987, 85).

Na faia e Elder Boyd K Packer le faatusa lenei e faamamafa atu ai la tatou matafaioi i le faasoaa atu o le talalelei i isi:

Mafaufau faapea, ua tofia i tatou e lo tatou Epikopo e fuafuaina se pikiniki mo le uarota. Ia avea o se gaoioiga aupito sili i le talafaasolopito o le uarota, ma aua nei popole i le faatupeina o le gaoioiga. Ua uma ona faatonu se fanua tau pikiniki matagofie i le atunuu. Ma o le a na o i tatou e faaogaina.

Ua oo mai le aso ma ua saunia mea uma. Ua seti lelei laulau ma ua matagofie lava le aiga. A o sauni atu mo le faamanuiaina o meaai, ae afe mai loa se taavale i le fanua pikiniki ma pe ai le afi. Ua susue e se tamaloa popole le afi o le taavale ma ua pusa mai ai se asu. Ua feosoi mai i fafo o le taavale ni tamaiti. Ua ave i fafo e le tina se pusa ma tuu i luga o se laulau lata ane. Ua ia tuuina i luga o le laulau ni toe meaai, ma taumafai e faia o se meaai mo lana fanau fia aai. Ae ua le lava.

Ona iloa mai lea e le teine laitii o la tatou laulau. Ua ia toso mai lona tuagane laititi i le mea o loo tatou i ai, ma ua taufaaofi mai i lo ta va. Ua ta soso i tua. Ua fai mai le teineitiiti, “Sei vaai, pe faapei le tofo o le la mea.”

O le a se mea o le a tatou fai? O le a tatou le amanaia ea tagata po o le fai atu i ai e filemu? Pe o le a tatou toe faasino atu latou i le latou laulau ma avatu i ai nisi o meaai tatou te le o manaomia? Po o le a tatou valaaulia i latou e o mai e faatasi ma i tatou, e nonofo i o tatou tafatafa ma aai faatasi, ma tatou fesoasoani ia faaleleia le latou taavale ma avatu i a i latou se mea mo la latou malaga?

Ua fesili Elder Packer e faapea: “Pe i ai ea se isi fiafia atoatoa e sili atu nai lo le vaai atu i le tele o se mea e mafai ona tatou mafaia e aai ai ia tamaiti? Pe i ai se isi mea faalotomalie e sili atu nai lo le taofia o a tatou gaoioiga ae fesoasoani atu ia i latou e faaleleia le latou taavale?”

“. . . O loo i ai tagata i le lalolagi atoa ma nisi foi o loo lata mai ia i tatou—o o tatou tuaoi, o a tatou uo, o nisi i o tatou lava aiga—o e o loo vaivai i le tulaga faaleagaga. O nisi o i latou ua toeitiiti lava a matelaina! Afai tatou te taofia nei mea uma mo i tatou, e leai se eseese ma le aai i luma o e o loo fia aai” (Lipoti o le Konafesi, Ape. 1984, 59–61; po o le *Liahona* Iulai 1984, 41–42).

- O le a se mea ua aoao mai e lenei faatusa e uiga i la tatou matafaioi ia fesoasoani atu i isi ia maua faamanuiaga o le talalelei? (Ua faamanuiaina i tatou i le atoaga o le talalelei, o se aiga aupito tele ua iloa e le lalolagi [MFF 58:8–12]. E finagalo le Atua ia tatou faasoaa atu lea faamanuiaga i isi, i latou o e ua mali-liu ma e loo soifua.)
- E faapefea e le tautinoga o le gafa o loo i totonu o lo tatou faamanuiaga faapeteriaka ona faatusa o se valaau ina ia faataunuu la tatou matafaioi i le avea ai ma suli o le feagaiga FaaAperaamo? (I lo tatou tuuina atu lea o i tatou o le fanau a Aperaamo, o tatou faamanuiaga faapeteriaka o loo toe faamamafa mai ai la tatou aia tatau ina ia maua faamanuiaga o le feagaiga FaaAperaamo ma lo tatou tiute ia faataunuuina ona matafaioi.)

**Manatu Faaopoopo  
e Aoao Atu Ai**

O mataupu o loo taua i lalo e faaopoopo i le ootoga o le lesona fautuaina. Atonu e te manao e faaoga se tasi o nei manatu pe sili atu foi e avea o se vaega o le lesona.

**O le lui o le aumau ai i le lalolagi**

Faamalamalama atu o i latou o Isaraelu anamua sa siosiomia e le tele o atunuu o o latou tagata e lei talitonu i le Atua moni. O nei atunuu e aofia ai tagata Asuria, tagata Papelonia, tagata Aikupito, ma isi.

- Aisea e te manatu ai na tuu ai e le Atua tagata o le feagaiga i le ogatotonu o le lalolagi tuai a e le o se mea e ona tuua ai na o i latou? Tagai Teuteronome 4:6–8. Ua finagalo o ia, ina ia faia se faataitaiga mo isi ma ia faataunuuina le feagaiga FaaAperaamo ina ia faamanuia ai atunuu uma.)

Faamatala atu o le tele o tala o i totonu o le Feagaiga Tuai o loo faaali mai ai le manuia po o le le mafaia e tagata o le Alii ona tausia o a latou feagaiga ma faaaafia ai isi mo le agai atu i le amiotonu. O Aperaamo, Iosefa, Tanielu ma Eteru ma le tele o isi o i latou o e i ai aafiaga amiotonu. Samasoni, Aapo, le fanauga a Isaraelu na taase i le vaomatua, ma isi na faatagaina le lalolagi e faaaafiaina i latou.

E pei ona ia faia ia Isaraelu anamua, ua tuuina e le Alii i tatou o ana fanau o le feagaiga i nei aso e gata ai i le ogatotonu o le lalolagi. O la tatou lui o le faaaafiaina lea o le lalolagi i ni ala amiotonu ae le o le faatagaina o le lalolagi e faaaafiaina i tatou i ni ala e le amiotonu.

# Ola Amiotonu i Se Lalolagi Leaga

## Lesona 8

Kenese 13–14; 18–19

---

**Faamoemoega** Ia faamallosia manatu o tagata taitoatasi o le vasega ia tumau i tulaga amiotonu i taimi o le faateleina o le amioleaga.

---

- Sauniuniga**
1. Suesue ma le agaga tatalo mau nei. Ia manatua: Kenese 17:5 o loo tau mai ai le suiina e le Alii o le igoa o Aperamo i a Aperamo. O le igoa *Aperamo* o loo faaaogaina i lenei lesona.
    - a. Kenese 13. Ina ua mavae le taimi na aumau ai i Aikupito mo sina taimi ona o le oge i le nuu o Kanana, ona toe foi lea o Aperamo ma lona aiga i Kanana. Ua mau Aperamo i Heperona, ao Lota ua mau o ia e lata ane i Sotoma.
    - e. Kenese 14:1–2, 8–24. Ua aveina faatagata-o-tauaina Lota i le taimi o taua o tupu ma ua laveai o ia e Aperamo (14:1–2, 8–16). Ua totogi atu e Aperamo sefuluai ia Mekisateko ma ua ia le taliaina oloa o le taua mai le tupu o Sotoma (14:17–24).
    - i. Kenese 18:16–33; 19:1–29. Ua folafola e le Alii o le a ia faaumatia Sotoma ma Komoro ona o le amioleaga o tagata (18:16–22). Ua aioi Aperamo i le Alii ina ia faasaoina ia nuu pe a fai e na te mauaina ni tagata amiotonu o loo ola ai i ia nuu (18:23–33). Ua poloaiina Lota ma lona aiga ia o ese ma Sotoma (19:1–23); manatua o le faaliliuga a Iosefa Samita, Kenese 19:11–13 o loo taua mai ai e *lei* tuuina atu e Lota ona afafine i tamaloloa o Sotoma; ae ua ia taumafai e puipui i ona afafine mai tamaloloa). Ua faaumatia e le Alii Sotoma ma Komoro (19:24–29).
  2. Mau faaopoopo: Kenese 12; Faaliliuga a Iosefa Samita, Kenese 14:25–40; 19:9–15.
  3. Afai e te faaaogaina gaoioiga e faatosina mai ai, aumai se nusipepa lata mai i le vasega.
  4. Atonu e te manao e faaali se vaega puupuu mai le “Abraham—The Promise” po o le “Abraham—Sodom and Gomorrah,” vaega 4 ma le 5 o le Beginnings/Abraham videocassette (53150), o se vaega o le lesona.
- 

### Faalautelega Fautuaina o le Lesona

Gaoioiga e  
Faatosina Mai Ai

Atonu e te manao e faaoga se tasi o gaoioiga nei (po o sa oe lava gaoioiga) e amata ai le lesona.

Faaali atu se nusipepa lata mai i le vasega. E aunoa ma le tumau ai i se faamatalaga mai le nusipepa, ia fai atu sau faamatalaga e uiga i le siomia o i tatou e aafiaga le amiotonu. Faamatala atu o lenei lesona o loo faatatau i le taua o le amiotonu e ui ina siomia i tatou e le amioleaga.

---

Mau Talanoaina  
ma le Faaogaina

A o e aoaoina atu nei mau, ia talanoaina pe faapefea ona faaoga i le olaga i aso taitasi. Uunai le vasega e faamatala ni aafiaga e faatatau i mataupu ua taua i le mau.

## 1. O Aperaaamo ma lona aiga ua nonofo i Heperona ao Lota ma lona aiga ua nonofo i Sotoma.

Aoao atu ma talanoaina le Kenese 13.

Atonu e te manao e tuuina atu se aotelega puupuu o femalagaiga a Aperaaamo e oo mai i lea taimi o lona olaga. Na ola ae o ia i le nuu o Uro, i Kalataia, ona taitai atu lea o ia e le Alii e nofo i Karana (Kenese 11:31; Aperaaamo 2:1–5). Mulimuli ane ua taitai ese mai o ia e le Alii mai Karana e o atu i le nuu o Kanana ma folafola atu, “Ou te tuuina atu i lau fanau lenei laueleele” (Kenese 12:7). Ona o le oge i Kanana, na malaga atu ai Aperaaamo ma lona aiga i Aikupito (Kenese 12:10). E amata le Kenese 13 i le toe foi mai o Aperaaamo ma lona aiga i Kanana mai Aikupito.

- Aisea na le mafai ai e Aperaaamo ma Lota ma o la aiga ona nonofo faatasi ina ua toe foi i Kanana mai Aikupito? (Tagai Kenese 13:5–7.) O a ni mea ua tatou aoao mai e uiga i ana saunoaga o loo i le Kenese 13:8–9? E faapefea ona tatou mulimuli atu i faataitaiga pe a tatou i ai i ni fevesiaiga ma nisi o tatou aiga po o nisi?
- O fea na filifili Lota e nofo ai? (Tagai Kenese 13:10–12.) Ia faailoa atu o tagata o Sotoma o ni tagata leaga (Kenese 13:13), ao Lota ua filifili e nofo lata ane i ai. O le a le mea na silisili ona fiafia i ai Lota e uiga i le fanua e lata ane i Sotoma? (Tagai Kenese 13:10. E tele ai le vai ma e matagofie.)
- Muamua lava, “sa nofo Lota i totonu o aai laugatasi,” i fafo lava o Sotoma, ae ua faatu lona fale ie e faasaga atu i Sotoma” (Kenese 13:12). Mulimuli ane, ua nofo o ia i totonu o le aai o Sotoma lava. (Kenese 14:12). O a ni mea tatou te ono faia faaleagaga e faatusatusa i le faatuina o o tatou fale ie faasaga atu i Sotoma? (Atonu tatou te fegalegaleai ma mea leaga nai lo le fultua i ai, po o lo tatou faatagaina o i tatou lava ina ia faia agasala laiti e aunoa ma le mafaufau o na mea e ona taitai atu ai i le faia o ni agasala tetele.) E faapefea ona tatou suia a tatou amio ao lei avea ni faafitauli po o ni agasala laiti ma ni agasala tetele?
- E pei o Lota, o tagata o le Tupu o Peniamina i totonu o le Tusi a Mamona, sa faatu foi o latou fale ie e faasaga atu i se itu patino. O a mea na faasaga atu i ai a latou fale ie? (Tagai Mosaea 2:6.) E faapefea ona faasaga atu o tatou aiga i le malumalu a e le o nofoaga faalelalolagi?

## 2. Ua laveai e Aperaaamo Lota, totogi atu le sefuluai i a Mekisateko, ma lē taliaina oloa o le taua mai le tupu o Sotoma.

Aoao atu ma talanoaina le Kenese 14:1–2, 8–24.

- A o ola ai Lota i Sotoma, ua amata ona fetauai tupu o ni aai o le tasi i le isi e aofia ai Sotoma ma Komoro (Kenese 14:1–2, 8–9). O le a le mea na tupu ia Lota ao faia lenei taua? (Tagai Kenese 14:10–12.) Na faapefea ona fesoasoani atu Aperaaamo ia Lota ina ua ave faatagata o taua o ia? (Tagai Kenese 14:13–16.)
- O ai na feiloai atu i ai Aperaaamo ina ua mavae ona laveaiina Lota? (Tagai Kenese 14:17–18.) O ai Mekisateko? (Tagai Kenese 14:18; tagai foi MFF 107:1–2.) O le a le mea na ave e Aperaaamo ia Mekisateko? (Tagai Kenese 14:20.)
- Aisea na tetee ai Aperaaamo na te le taliaina e oo i se filo e maua o se tauai mai le tupu o Sotoma? (Tagai Kenese 14:21–24. E na te lei manao e mauaina se mea e mai se tupu e le amiotonu.) O le a se mea ua faatatau i ai le “filo” o le amioleaga i le lalolagi i lenei taimi? Faamata o le a le “filo o le faamaoni?

E faapefea i nisi o taimi ona faamaulaloina o tatou tulaga i le aofai o le le amiotonu ua tatou naunau e talia i faafiafiaga ua tatou sailia? Aisea ua taua ai ona tatou le faatagaina e oo i se mea itiiti o ala faalelalolagi ona ofi mai i totonu o o tatou olaga? (Tagai Nifae 28:20-21.)

- O a mea ua tatou aoao mai e uiga i tautinoga a Aperamo i le Alii pe a faatusatusa ana mea na fai ia Mekisateko ma le tupu o Sotoma?

### 3. Ua faaumatia e le Alii Sotoma ma Komoro.

Aoao atu ma talanoaina le Kenese 18:16–33; 19:1–29.

- Ona o le amioleaga o tagata i Sotoma ma Komoro, na fuafua ai e le Alii e faaumatia ia aai (Kenese 18:20–21). O le a mea na fesili atu ai Aperamo i le Alii ina ua ia iloa lea fuafuaga? (Tagai Kenese 18:23–32.) O le a le mea ua tatou aoao mai i lenei upu moni, na naunau le Alii e faasaoina ia aai pe a fai o i ai i totonu ni tagata amiotonu?
- Aisea na faatonuina ai Lota e alu ese mai Sotoma? (Tagai Kenese 19:12–13,15.) Na faapefea ona faali mai lagona o atalii faaletulafono o Lota ina ua ia uunai i latou e o? (Tagai Kenese 19:14.) Aisea e tetee ai nisi tagata e o ese mai aafiaga leaga e ui ina latou iloa e ono afaina ai?
- O le a le fautuaga na tuuina mai e agelu ina ua o ese atu Lota ma lona aiga mai le aai? (Tagai Kenese 19:17.) Faailoa atu ua tuuina mai foi e le Faaola sea fautuaga i i ona soo (Luka 9:62; 17:29–32; MFF 133:14–15). O le a le faailoga o le toe tepa i tua? (Musu e tuu ese mea ua manaomia mai i a i tatou; le loto atoatoa le tautino atu e mulimuli ia Keriso.) E faapefea i nisi o taimi ona tatou toe tepa i tua?
- O le a le mea na tupu i le toalua o Lota ina ua ia tepa i tua ia Sotoma? (Tagai Kenese 19:26.) O le a le mea ua mafai ona aoao mai i le tala i le toalua o Lota e uiga i le Salamo? Mo le salamo, e tatau ona suia o tatou loto, ma a tatou amio. Ina ia faia lea mea, e tatau i nisi o taimi ona tatou filifilia se siosiomaga fou ma ni uo fou.)
- O le a le mea na le maua e Lota ina ua ia “faatu lona fale ie e latalata i Sotoma”? O a mea atonu tatou te le maua pe a tatou tuu i tatou lava i tulaga ua tatou iloa e ono faasoosoina ai i tatou? E faapefea ona aafia i tatou pe a fai tatou te faatagaina i tatou lava e siomia e le leaga, e ui tatou te le i ai i ni tulaga agasala?
- O le a le fesoasoani a le Kenese 19:29 i le mafuaaga o le faasaoina o Lota ina ua faaumatia Sotoma ma Komoro? Ua manatua e le Alii le amiotonu o Aperamo. E faapefea e lo tatou amiotonu ona avea ma mea lelei mo isi?

Ua saunoa mai Peresitene Spencer W. Kimball e faapea: “O lo tatou lalolagi i le taimi nei, ua tutusa lava ma aso o le perofeta Sa Nifae o le na faapea mai: ‘. . . ana le seanoa talosaga a tagata amiotonu . . . po ua asiasia nei lava outou ma le faafanoga atoatoa . . .’ (Ale.10:22.) E moni e toatele tele lava e ua sao ma amiotonu o loo ola i tulafono uma, o o latou olaga ma talosaga o loo taofia ai nei le lalolagi mai le faaumatia” (Lipoti o le Konafesi, Ape. 1971, 7; po o le *Liahona*, Iulai 1971, 16).

Molimau atu i le taua o le tausia o i tatou lava ia saoloto mai le agasala, e ui ina o loo siomia i tatou e le amioleaga. Uunai le vasega ina ia taumafai e avea i latou ma se aafiaga amiotonu i le lalolagi a e le o le faatagaina o mea faalelalolagi ia aafia ai i latou.

Atonu e te manao e faaiu i le saunoaga lenei mai ia Elder M. Russell Ballard:

“I totonu o le Ekalesia, e masani ona tatou tuuina atu nei faaupuga e lua, ‘Ia outou i ai i le lalolagi, ae le o outou o le lalolagi.’ A o tatou matamata i ata faaalia i le televise o loo faia ai le palauvale, o ata malolosi tele, ma ua avea o ni mea fai soo ma le matagofie, tatou te manatu i le tele o taimi pe ana mafai lava i se auala ona tapuni ese atu le lalolagi ae tuua ai na o o tatou aiga. . . .

“Atonu e tatau ona tatou tuuina atu faaupuga e lua o ni apoapoiga eseese. Muamua, ‘Ia outou i ai i le lalolagi.’ Ia outou aafia ai; Ia outou iloa mea o loo tutupu; Ia outou taumafai ia malamalama ma onosaia ma iloa le eseese o tagata o latou aganuu, o auala o o latou mafaufauga ma olaga. Ia outou tuuina atu se auaunaga ogaoga i o outou alalafaga e ala atu i le tautua ma le avea ma se tasi o loo aafia ai. Lua, ‘Ae le o outou o le lalolagi.’ Aua tou te mulimuli i ala sese pe suia o outou tulaga faavae, pe taliaina mea e le sao.

“O tagata o le Ekalesia, e tatau ona avea ma aafiaga lelei mo isi tagata e sili atu nai lo le aafia mai isi tagata. E tatau ona tatou galulue ina ia taofia le siisii pea i luga o le agasala ma le amioleaga ae le o le faatagaina pea o le agasala ma le amioleaga ia alualu i luma e aunoa ma le taumafai ina ia taofia. E tatau i a i tatou taitoatasi ona fesoasoani ia faaleleia le faafitauli a e le o le alo ese po o le faataga le iloa” (Lipoti o le Konafesi, Ape. 1989, 100-101; po o le *Liahona*, Iulai 1989, 80).

## Manatu Faaopoopo e Aoao Atu Ai

O mataupu o loo taua i lalo e faaopoopo i le oototoga o le lesona fautuaina. Atonu e te manao e faaoga nei manatu e avea o se vaega o le lesona.

### 1. O agasala a Sotoma ma Komoro

E pei ona fautuaina mai i le Kenese 19:4–11 ma i le Faaliliuga a Iosefa Samita o le Kenese 19:9–15, o tagata o Sotoma ma Komoro ua latou amio a’i i le faia o agasala mataga faalefeusuai. A o nei agasala, e le gata ina matuia, ae le nao le pau lea o ni agasala ua faafanoina ai aai. Ia faitau leotele mai e se tasi o le vasega le Esekielu 16:49–50 ma talanoaina faatasi ma le vasega isi agasala na faia e isi tagata i Sotoma ma Komoro. Fesoasoani atu i le vasega ina ia malamalama e mafai ona faaumatia i tatou e agasala laiti, e faapena foi ona faaumatia i tatou e agasala tetele.

### 2. Taitai e ala i faataitaiga

Ina ia faailoa atu o se tasi o auala e mafai ai e le Au Paia o Aso e Gata Ai ona avea ma aafiaga mo le lelei mo isi, ae le o le aafia mai e le lalolagi, atonu e te manao e faali atu le “Leading by Example”, o se vaega e fitu minute mai le *Old Testament Video Presentations* (53224). I lea vaega, o se faataitaiga amiotonu a se tasi o tamaitai talavou na fesoasoani lea i se uo e liliu mai ai i le talalelei a Iesu Keriso.

# “O Le A Saunia E Le Atua se Tamai Mamoe”

## Lesona 9

*Aperaamo 1; Kenese 15–17; 21–22*

---

**Faamoemoega** Ia fesoasoani i le vasega ina ia malamalama atili i le taulaga a le Tama Faalelagi i le ofoina atu o lona Alo a o latou aoao i le naunau o Aperaamo e tuuina atu Isaako o se taulaga.

---

- Sauniuniga**
1. Aoao ma le agaga tatalo mau nei. Ia manatua o le Kenese 17 o loo taua mai ai le suia e le Atua o le igoa o Aperamo ia Aperaamo ma le suia o le igoa o Sarai ia Sara. (tagai fuaiupu 5, 15). O igoa o *Aperamo* ma *Sara* o loo faaoga i lenei lesona.
    - a. Aperaamo 1:1, 5–20. Ao talavou o ia, na sauaina ai Aperaamo e faitaulaga pepelo a Farao. Ua latou taumafai e faaoga o ia e osi ai le taulaga, ua laveaiina o ia e Ieova.
    - e. Kenese 15–17; 21. Mulimuli ane i lona olaga, na manao Aperaamo i se fanau ma ua folafola mai i ai (15:1–6). Ua tuuina atu e Sara ia Akara ia Aperaamo e fai ma ana ava; ua fanaua e Aka ia Isamaeli (16:1–16.) Ua toe talanoa mai le Atua e uiga i lana feagaiga ma Aperaamo, ua folafolaina atu o le a avea o ia ma tama o nuu e tele (17:1–14; tagai lesona 7). O le fanau mai o Isaako o le na faaauau ai pea le feagaiga ua faailoa mai (17:16–22). Ua fanaua e Sara Isaako (21:1–12).
    - i. Kenese 22. Ua poloaiina e le Atua ia Aperaamo e fai ma taulaga mu (22:1–2). Ua saunia Aperaamo e fai Isaako ma taulaga mu, ae peitai ua saunia e le Atua le tamai mamoe e fai ma taulaga (22:3–19).
  2. Mau faaopopo: Eperu 11:8–19; Iakopo 2:21–23; Iakopo 4:5; Mataupu Faavae ma Feagaiga 13 2:34–36.
  3. Afai e te faaaogaina le gaoioiga e faatosina mai ai lona lua, e tatau ona le i lalo mai ole vaiaso ao lei faia le lesona, e te faatonu ai nisi o le vasega e saunia e faamatala mai ni taimi na faamanuiaina ai i latou ona o lo latou naunau e faia se taulaga.
  4. Afai o maua vitio o loo taua i lalo, atonu e te manao e faaaogaina e avea o se vaega o le lesona:
    - a. O ata: Ua Laveai e le Agelu Aperaamo (62607; Taga o Ata o le Talalelei 104) ma le: Ua Aveina e Aperaamo Isaako e osi ai le Taulaga (62054; Taga o Ata o le Talalelei 105).

---

### Faalautelega Fautuaina o le Lesona

Gaoioiga e Faatosina Mai Ai Atonu e te manao e faaoga se tasi o gaoioiga nei (po o sa oe lava gaoioiga) e amata ai le lesona. Filifili se gaoioiga ua aupito sili ona talafeagai mo le vasega.



1. Talosaga atu i tagata o le vasega ina ia latou mafaufau i se tasi ua latou alolofa tele i ai po o se mea totino ua taua tele ia i latou.
  - Faamatala o le a sou lagona pe a fai e talosaga atu ia te oe le Atua e te tuuina atu po o le osi o se taulaga i lea tagata po o lea mea totino? O le a lau mea o le a fai?
2. Ia vaalaulia nisi o le vasega e tau atu se taimi na faamanuiaina ai i latou ona o lo latou loto e osi le taulaga.

A maea se tasi o nei gaoioiga, faamatala atu na poloaiina e le Atua Aperaaamo e tuuina atu lona atalii o Isaako, o le sa alofa tele i ai Aperaaamo. E ui lava ina ua mulimuli ane ua le manaomia Aperaaamo e osia lea taulaga, o lona loto e fai lea “ua tuuina atu ia te ia mo le amiotonu” (MFF 132:36). Ona o le amiotonu o Aperaaamo, o lea na faamanuiaina tele ai o ia ma ana fanau.

Mau Talanoaina  
ma le Faaogaina

A o e aoaoina atu nei mau, ia talanoaina pe faapefea ona faaoga i le olaga i aso taitasi. Uunai le vasega e faamatala ni aafiaga e faatatau i mataupu ua taua i le mau.

**1. Ua toeitiiti lava a faia le taulaga ia Aperaaamo e ositaulaga pepelo a Farao.**

Aoao atu ma talanoaina le Aperaaamo 1:1, 5–20. O se vaega o lenei lesona o loo agai tonu i le poloai atu a le Atua ia Aperaaamo ia osi le taulaga ia Isaako. Ina ia fesoasoani atu i le vasega ia malamalama i le taua o lenei poloai ma le loloto o le faatuatua o Aperaaamo, o loo amataina le lesona i se talanoaga puupuu e uiga i se aafiaga na oo ia Aperaaamo ao laitiiti o ia i le toeitiiti lava a fai o ia ma taulaga e se ositaulaga pepelo a Farao.

- O a tulaga sa i ai i Kaletaia i le taimi o nofo ai Aperaaamo? (Tagai Aperaaamo 1:1, 5–8.) O a ni mea na taumafai ositaulaga pepelo a Farao e fai ia Aperaaamo? (Tagai Aperaaamo 1:7, 12). Na faapefea ona faasaoina mai Aperaaamo mai i ia ositaulaga pepelo? (Tagai Aperaaamo 1:15–16, 20.)
- Faapefea e le aafiaga na oo ia Aperaaamo i luga o le fatafaitaulaga a ositaulaga pepelo ona saunia o ia mo tofotofoga o lumanai? E faapefea e tofotofoga e oo mai i a i tatou ona saunia i tatou mo ni mea faigata i le lumanai?

**2. Ua mauaina e Aperaaamo fanau e ala mai ia Akara ma Sarai.**

Aoao atu ma talanoaina le Kenese 15–17; 21.

- O le a le folafolaga na tuuina atu e le Alii ia Aperaaamo e uiga i tamaiti? (Tagai 15:1–6.) Aisea na tuuina atu ai e Sarai Akara ia Aperaaamo e fai e pei o sana ava? (Tagai Kenese 16:1–3; MFF 132:34–35.) O le a le folafolaga na tuuina atu e le Alii ia Akara? (Tagai Kenese 16:10–11.)
- O le a le mea na faaali atu e le Atua ia Aperaaamo i le Kenese 17:15–16, 19 ma le 21? Na faapefea ona tali mai Aperaaamo? Tagai Kenese 17:17. Manatua e ui lava ina faapea mai le Tusi Paia na “ataata” Aperaaamo ina ua ia faalogo atu o le a fanaua e Sarai se atalii, o se isi faaliliuga o le upu Eperu o le “fiafia”. O loo faapea mai le faaliliuga a Iosefa Samita o le Tusi Paia, ua “fiafia” Aperaaamo i le tala.)
- O le a le mea ua tatou aoao mai i le faaaliga a Aperaaamo ma Sarai o le a la fanaua se atalii e uiga i le ala e faataunuaina ai e le Atua ana folafolaga? (E Faataunuaina e le Atua ana folafolaga, e ui lava ina le faataunuaina i le

auala po o le taimi ua tatou manatu ua tatau ai. Ia faailoa atu o Aperaaamo ma le toatele o nisi o loo taua mai i mau na latou faatalitali ma le faamaoni mo le tele o tausaga faatoa tuuina mai ai lea o faamanuiaga na folafola mai.)

- E faapefea ona eseese folafolaga na faia e le Atua e uiga ia Isaako mai folafolaga na ia faia e uiga ia Isamaeli? (Tagai Kenese 17:19–21.)

### 3. Ua poloiaina e le Atua Aperaaamo ina ia fai Isaako ma taulaga.

Aoao atu ma talanoaina le Kenese 22.

- Aisea na fai atu ai le Atua ia Aperaaamo e fai Isaako ma taulaga? (Tagai Kenese 22:1.) Aisea ua fai ai lenei ma se tofotofoga faigata mo Aperaaamo? (E le gata o Isaako o lona atalii, ae ua folafola mai e le Atua o le feagaiga FaaAperaaamo o le a faaauau e ala ia Isaako ma ana fanau [Kenese 17:19]. O le isi mafuaaga o lenei faigata o le taimi o talavou o ia, na toeitiiti lava a fai o ia ma taulaga e ositaulaga pepelo a Farao [Aperaaamo 1:1, 5–20].)

- Na faapefea ona tali atu Aperaaamo i le poloai a le Atua e fai Isaako ma taulaga (Tagai Kenese 22:2–3.) O a mea e mafai ona tatou aoao mai ia Aperaaamo e uiga i le faatuatua ma le ususitai? (Tagai Eperu 11:17–19; Iakopo 2:21–23.)

- Na faapefea ona tali atu Isaako i lea tulaga? (Tagai Kenese 22:3–10. E le o i ai se faailoga na teena e Isaako le faamoemoe o Aperaaamo e fai o ia ma taulaga.)

Na faamatala mai e Elder Dallin H. Oaks e faapea: “Ina ua latou taunuu mau i le mea ua faatulagaina, ona fausia lea e Aperaaamo o se fatafaitaulaga ma tuu ai i luga fafie. Ona faapea mai lea o le Tusi Paia, ‘ua na fusifusi foi i lona atalii o Isaako, ma faaee ia te ia i le fata i luga o le fafie’ (Kenese 22:9). O le a le mea na manatu i ai Isaako ina ua fai e Aperaaamo lea mea uiga ese? O le o taua mai e le Tusi Paia se fitivale po o se tetee. O le le tautala o Isaako e mafai ona faamalamalaina i le tulaga o lona faatuatua ma le usitai i lona tama’ (Lipoti o le Konafesi, Oke. 1992, 51; po o le *Liahona*, Ianuari 1993, 37).

- O le loto i ai o Aperaaamo e fai Isaako ma taulaga o se faatusa o le finagalo i ai o le Tama Faalelagi e fai lona Alo Pele e Toatasi na Fanaua ma taulaga (Iakopo 4:5; Kenese 22:8, 13). O a ni mea talitutusa i le va o mea na oo ia Aperaaamo ma Tama Faalelagi? O le a le eseese sili?

- O le a le ala e mafai ai ona faatusa i tatou ia Isaako? Afai o loo sui Isaako ia i tatou, o ai o loo sui i le tamai mamoe ua lavelave i le laau filifili? E faapefea e nei faatusatusaga ona fesoasoani ia te oe ia malamalama atili ai i le tele o le alofa o lo tatou Tama Faalelagi mo i tatou i le fai o lona Atalii ma taulaga?

Ua saunoa mai Elder Dallin H. Oaks e faapea: “O lenei tala o loo faaalai ai le agalelei o le Atua i le puipuia o Isaako ma le tuuina mai o le mea e sui ai ina ia aua nei oti o ia. Ona o a tatou agasala ma lo tatou olaga faaletino, o i tatou faapei o Isaako, ua faasalaina i le oti. Ina ua leai lava se isi faamoemoe, ua tuuina mai e lo tatou Tama i le Lagi le Tamai Mamoe a le Atua, ma ua laveai ai i tatou e lana taulaga” (Lipoti o le Konafesi, Oke. 1992, 51; po o le *Liahona*, Ianuari 1993, 37).

- O le a le mea na faamaonia e Aperaaamo i lea tofotofoga? (Tagai Kenese 22:11–12.) Fai i tagata o le vasega ina ia tau atu nisi tulaga o loo taua mai i mau po o i latou lava na i ai nisi na tofotofoina na ave ma se avanoa e faamautu ai lo latou faamaoni. Ia fai atu foi i tagata o le vasega e tau atu tulaga o le fiafia ma faamanuiaga ua maua e ala i le faamaonia o le faatuatua.

- Aisea ua taua ai Isaako i le Kenese 22:16 ua nao ia le atalii o Aperaaamo? (O Isaako o le atalii o le a ala atu ai le faaauuina o le feagaiga. O lenei foi tulaga o loo faamalosia mai ai le felatai o le va o Isaako ma lo tatou Faaola, le Atalii Pele e Toatasi na fanaua a le Tama.) O a faamanuiaga ua tautino mai ia Aperaaamo ona o lona faamaoni? (Tagai Kenese 22:15–18.) O a faamanuiaga ua folafola mai ia i tatou e ala mai i le feagaiga FaaAperaaamo? (Tagai Lesona 7.) O a tatou matafaioi i le avea ma sulii o le feagaiga FaaAperaaamo?

Faaiuga

Ia tau atu lou iloa o le lelei o faaitaiga o le faatuatua ma le usiusitai na faia e Aperaaamo. Molimau atu o le loto i ai o Aperaaamo e fai Isaako ma taulaga o le faatusa lea o le finagalo i ai o lo tatou Tama Faalelagi e fai lona Atalii Pele e Toatasi na fanaua ma taulaga. Fai i tagata o le vasega e tuuina mai o latou lagona e uiga i le Togiola ma le tele o le alofa o lo tatou Tama Faalelagi ma Iesu Keriso mo i tatou.

## Manatu Faaopoopo e Aoa Atu Ai

O mataupu o loo taua i lalo e faaopoopo i le ootoga o le lesona fautuaina. Atonu e te manao e faaoga se tasi o nei manatu pe sili atu foi e avea o se vaega o le lesona.

### 1. Aoa mai tofotofoga

- Ua saunoa mai Peresitene Hugh B. Brown e faapea, na poloaiina Aperaaamo e le Atua e fai Isaako ma taulaga ona “na manaomia e Aperaaamo lona aoa mai se mea e uiga ia Aperaaamo” (i le Truman G. Madsen, *The Highest in Us* [1978], 49). Faamata o le a se mea e ono aoa mai e Aperaaamo e uiga ia te ia lava mai lenei mea na tupu? O a ni mea ua e aoa mai i o oe lava tofotofoga?
- Na faaalua mai e le Alii e tataua ona tofotofoina i tatou “faapei o Aperaaamo” (MFF 101:4). Aisea ua e manatu ai ua tataua lea tulaga? (Tagai MFF 101:5, 35–38; 122:5–7.) O a mea e mafai ona tatou faia nei ina ia saunia ai i tatou mo ni taulaga e ono manaomia mai e le Alii mai i a i tatou?

### 2. Fausiaina o se fesootaiga malosia ma le Atua

O loo faamatala mai i le Aperaaamo 1 ma le 2 fesootaiga na faia e Aperaaamo ma lona tama ma le Atua. Na liliu atu le tama o Aperaaamo i le Atua i taimi o puapuaga, ae na ia liliu atu i le ifo i tupua pe a sologa lelei olaga (Aperaaamo 1:5, 30; 2:5). A o Aperaaamo ua ia saili atu pea i le Atua (Aperaaamo 1:2, 4; 2:12).

- E mafai faapefea ona tatou saili le Atua, i le faatulagaina lea o lo tatou fesootai atu ia te ia i taimi uma lava ia le na o taimi tatou te lagona ai ua tatou manaomia o ia? E mafai faapefea ona tuuina atu atoa i taimi uma lava lo tatou manatu i le Atua ina ia tatou saili ia te ia i taimi o le toafilemu ma le mafanafana faapea foi i taimi o tofotofoga?

# Faamanuiaga o le Tofi; Faaipoipoga i Totonu o le Feagaiga

Lesona  
**10**

*Kenese 24-29*

---

**Faamoemoega** Ina ia faamalosiā le naunautai o tagata o le vasega ia ola agavaa i o latou faamanuiaga o tofi ma faaipoipoga faavavau.

---

- Sauniuniga**
1. Suesue ma le agaga tatalo mau nei:
    - a. Kenese 24. Na faamamafaina e Aperaamo le taua o le faaipoipoga i totonu o le feagaiga (faaipoipoga faavavau) e ala atu i le filifiliina o se ava agavaa mo Isaako.
    - e. Kenese 25:20–34. Ua mauaina e Repeka le faaaliga e uiga i lana masaga tama ao lei fanau mai (25:22–23). Ina ua matutua nei atalii, ua faatau atu e Esau lona tofi ia Iakopo (25:29–34).
    - i. Kenese 26–29. Ua folafola atu ia Isaako ma ana fanau faamanuiaga o le feagaiga FaaAperaamo (26:1–5). Ua faaipoipo Esau i fafo atu o le feagaiga ma ua aumaia ai le faanoanoa i ona matua (26:34–35). Ua faamanuia atu e Isaako Iakopo e pulea tagata ma malo (27:1–46). Ua faaee atu e Isaako ia Iakopo faamanuiaga o le feagaiga FaaAperaamo ma auina atu o ia e saili se ava agavaa (28:1–10). Ua faaipoipo atu Iakopo ia Lea ma Rasela i totonu o le feagaiga (29:1–30).
  2. Afai e te faaaogaina le gaoioiga e faatosina mai muamua, ia aumaia se ipu poo se taga pepa ua tumu i popcorn po o se fasi fualaaaina suamalie.
  3. Afai o e aoaoina le autalavou po o le autalavou matutua nofofua, manatunatu e faaaogaina le manatu faaopoopo e aoao atu ai lona lua, o le “o se faaipoipoga sao e amata i faamasaniga sao.”
  4. Afai o maua vitio o loo taua i lalo, atonu e te manao e faaaogaina e avea o se vaega o le lesona:
    - a. “Marriage in the Covenant,” o se vaega e fa minute mai le *Old Testament Video Presentations* (53224).
    - e. O le ata o Repeka i le Vai Eli (62160).

---

## Faalautelega Fautuaina o le Lesona

Gaoioiga e  
Faatosina Mai Ai

Atonu e te manao e faaaoga se tasi o gaoioiga nei (po o sa oe lava gaoioiga) e amata ai le lesona. Filifili se gaoioiga ua aupito sili ona talafeagai mo le vasega.

1. Faaali atu se ipu po o se taga pepa tumu i popcorn po o se fasi fualaaaina suamalie ma fesili atu i le vasega i fesili nei:
  - Afai e te faia se filifiliga i le va o le ipu popcorn (po o se fasi fualaaaina suamalie) i le taimi nei po o le folafolaga o ni popcorn e leai se mea e gata

mai ai (po o se fualaaauaina) i se taimi mulimuli mai pe a maea ona toto, tausia ma faamama, ma selesele fua (po o fualaaauaina suamalie), o le fea e te filifilia? Aisea?

Ia faamalamalama atu, e masani ona feagai i tatou ma ni filifiliga i le va o mea e faigofie ona tatou mauaina i le taimi nei po o mea e tatau ona tatou galue ma faatali i ai. O nisi o taimi ua tatou filifilia mea e maua mai ai le faamalieina (o le mea e fiafia ai po o le lotomalie), e ui o le filifiliga e galue ma faatali o le a maua mai le faamanuiaga e sili atu. O le filifiliga e faaoga popcorn (po o le fualaaauaina suamalie) i le taimi nei po o se isi taimi mulimuli mai e le o se iuga taua. E ui lava i na mea, tatou te feagai ma nisi filifiliga o le olaga—e pei o filifiliga e uiga po o ai e tatau ona tatou faaipoipo atu i ai ma le nofoaga e faaipoipo ai—i le filifilia o le faamalieina o le loto i le taimi nei e ono faafitia ai faamanuiaga tumau ma mamalu.

2. Ia fesili atu i le vasega i fesili nei:

- Na e faaluina tupe po o taimi i ni taimi ua mavae e maua mai ai se mea, ae mulimuli ane ua le talafeagai le tupe na faaluina?

Tofi nisi o le vasega e tau mai ni taimi na latou totogiina ai se tupe sili atu mo se mea na latou manatu sa latou manaomia (atonu e te manao e tau atu se mea na tupu ia te oe lava).

Ia faamalamalama atu, o le mea lava e tasi e ono tupu i le faaleagaga. I le faia o ni filifiliga e le tonu, atonu ua tatou faatau atu ai faamanuiaga e faavavau mo mea aupito le taua. I lo tatou ola ai i se olaga amiotonu, o le a mafai ai ona tatou maua uma faamanuiaga ua saunia e le Tama Faalelagi mo i tatou.

Mau Talanoaina  
ma le Faaagaina

---

A o e aoaoina atu nei mau, ia talanoaina pe faapefea ona faaoga i le olaga i aso taitasi. Uunai le vasega e faamatala ni aafiaga e faatatau i mataupu ua taua i le mau.

### 1. Ua faamamafaina e Aperamo le taua o le faaipoipoga i totonu o le feagaiga (faaipoipoga faavavau).

Aoao atu ma talanoaina le Kenese 24. A o e talanoaina le taua o le faaipoipoga faavavau, ia manatu i lagona o le vasega o e lei faaipoipo i totonu o le malumalu po o i latou o i ai matua e lei faaipoipo i le malumalu.

- Aisea na matua manao ai Aperamo ina ia faaipoipo atu Isaako i se fafine mai lona lava aiga i nai lo se isi mai sa Kanana, o e ana eleele sa nonofo ai Aperamo ma Isaako? (Na manao Aperamo ia Isaako e faaipoipo atu i se tasi o lona faatuatuga ina ia mafai ai ona ia faaipoipo i totonu o le feagaiga. Na manaomia lenei tulaga ina ia mafai ona tuuina atu faamanuiaga o le feagaiga FaaAperamo i fanau a Aperamo.) Aisea ua taua ai ona tatou faaipoipo i totonu o le feagaiga? (Afai e tatau ai, faamalamalama atu o nei ona po, o faaupuga nei e pei o le faaipoipoga i totonu o le feagaiga, faaipoipoga faavavau ma le faaipoipoga faalemalumalusa o loo faaogaina tutusa o latou uiga.)
- O le a le umi talu ona ave le faaipoipoga i totonu o le feagaiga ma se tulafono a le Atua? (O se sauniga faavavau na ave ma faatonuga a le Alii i augatupulaga uma a o i ai le atoaga o le talalelei i le lalolagi. O Atamu ma Eva na muamua lava oo mai i totonu o lena sauniga.)

- Na auina atu e Aperamo lana auauna e saili se toalua mo Isaako (Kenese 24:2). O a ni mea na faagaetia ai oe e uiga i le auauna a Aperamo? (Tagai Kenese 24. Atonu e eseese ni tali ae e mafai ona aofia ai, o ia o se tagata faamaoni, tumau i lona matai, mafuta i le tatalo ma faatuatua. E tusa lava pe a maea se malaga umi, e le 'ai lava o ia sei iloga ua maea ona ave le feau mo Aperamo. Nai lo le nofo ai mo aso fiafia faamanatu e 10, ae ua ia manao e ave Repeka ma foi atu ia Aperamo.) O a mea e mafai ona tatou aoao mai i le auauna a Aperamo e fesoasoani i a i tatou ina ia faataunuina i se tulaga sili atu matafaioi ua tuuina mai e le Alii i a i tatou?
- Na faapefea ona mafai ona iloa e le auauna a Aperamo o Repeka o se toalua lelei mo Isaako? (Tagai Kenese 24:15–20, 58. O Repeka o se tagata agalelei, ma e loto ina fesoasoani atu i isi e pei ona faaaliga i lona asuina o le vai mo le auauna a Aperamo ma ana kamela. Atonu e te manao e faailoa atu o le kamela e mafai ona inuina vai e oo atu i le 30 kalone i le aso e tasi, o lona uiga na matua tele lava le asuga vai a Repeka e faamaliega ai kamela e 10. Na loto foi i ai Repeka e tuua lona aiga e faaipoipo atu ia Isaako, ma ona sa i a te ia le faatuatua tele ma ia iloa ai, o le finagalo o le Alii lona faaipoipo atu ia Isaako.)
- O a ni uiga e te manao ia i ai i lou toalua? Aisea e taua atu ai uiga faaleagaga i nai lo le vaiga faaletino? O a uiga e tataua ona tatou atinaeina (e tusa lava pe ua tatou faaipoipo pe leai) o le a mafai ona avea ai i tatou ma toalua lelei?
- O a fea e tataua ai ona amata saunia le tagata mo le faaipoipoga faavavau? O a nisi mea e mafai ona fai e le fanau laiti ma le autalavou e saunia ai mo le faaipoipoga faavavau? E mafai faapefea e matua ma isi tagata matutua ona fesoasoani atu i fanau laiti ma le autalavou e saunia e faaipoipo i totonu o le malumalusa?

Ua saunoa mai Peresitene Howard W. Hunter e faapea: “Ia tatou fuafua mo le aoaoina ma aioi atu i a tatou fanau e faaipoipo i totonu o le Maota o le Alii. Ia tatou toe faamautuina atili ia sili atu nai lo taimi ua tuanai le taua o le mea e te faaipoipo ai ma le pule ua faaee atu ai le avea o oulua ma tane ma le ava” (Lipoti o le Konafesi, Oke. 1994, 118; po o le *Liahona*, Ianuari 1995, 88).

## 2. Ua faatau e Esau lona tofi ia Iakopo.

Aoao atu ma talanoaina le Kenese 25:20–34.

- O le a le faaaliga na maua e Repeka e uiga i lana masaga tama ae lei fanau mai? (Tagai Kenese 25:22–23.) Aisea ua taua ai le saunoaga a le Alii “e nofo pologa foi le ulumatua i le uii” o se faaaliga uiga ese? (O le tofi e masani lava ona tuuina mai e le tama i le atalii ulumatua. O le mauaina o lea tofi o lona uiga o le a maua e le atalii matua ni vaega se lua o le tamaoaiga o le aiga ma o le a ia pule faamalumalu i le aiga ma ia vaia lona tina ma ona tuafafine pe a maliu lona tama. O le uiga o le saunoaga “e nofo pologa foi le ulumatua i le uii” i le faaaliga a le Alii ia Repeka, o loo faapea mai ai i lea tulaga, o le uii o le a ia maua le tofi ma o ana fanau o le a avea ma tagata o le feagaiga.)
- O a foi lagona na lagonaina e Esau le ulumatua e uiga i lona tofi i le feagaiga na faia i le va o lona tama matua o Aperamo ma le Alii? (Tagai Kenese 25:29–34). O le loto i ai o Esau e aveesea lona tofi e faamaliega ai lona fia ai faaletino o loo faaaliga ai lona le faatauaina o lona tofi.)

- I le avea ai ma uso o le Ekalesia, e tofi lava i tatou ma le tofi faaleagaga mai o tatou matua faalelagi. O a faamanuiaga o loo aofia i totonu o lo tatou tofi? (O tali atonu e aofia ai le perisitua, faamanuiaga faale-malumalu sauniga, faaaliga ma le avanoa mo le faaolataga.)
- E faapefea e le nofoaga na tatou faaipoipo ai ona aafia lo tatou malosi e maua ai faamanuiaga o tatou tofi? (Tatou te oo atu i le vaega o le feagaiga FaaAperaamo e faatatau i le faaolataga ma avanoa faaopoopo i le faia ma tausiana o feagaiga o le malumalu, faaeega ma faaipoipoga faavavau).
- E faapefea ona faaaliga e a tatou upu ma aga le tulaga taua ua tatou tuuina i lo tatou tofi? E faapefea ona mafai e nisi o i tatou ona faia ni sese faapei o Esau, le filifiliina o mea e oo vave mai ai le lotomalie nai lo mea taua faavavau?
- I le faia o se faaiuga mo se suli o le feagaiga na filifilia ai e le Alii Isaako mai lona uso o Isamaeli (Kalatia 4:22–23), Iakopo mai lona uso o Esau, Iosefa mai lona uso o Reupena (1 Korinito 5:1–2), ma Efaraima mai lona uso o Manase (Kenese 48:17–20). O le a le mea o loo fautuaina mai e lenei tulaga e uiga i le ala e mafai ai ona tatou maua le agavaa mo valaauga ma faamanuiaga a le Atua?

### 3. Ua faaipoipo atu Iakopo ia Lea ma Rasela i totonu o le feagaiga ma ala atu ai ia te ia le faaauau o le feagaiga FaaAperaamo.

Aoao atu ma talanoaina le Kenese 26–29.

- O le a le mea ua tauina mai ia i tatou e le filifiliina o ava a Esau e uiga i mea o loo i ai lana faamuamua? (Tagai Kenese 26:34–35; 28:6–9.) O le a le mea ua mafai ona tatou aoao mai e uiga ia Iakopo ma lona taumafai ina ia faaipoipo i totonu o le feagaiga? (Tagai Kenese 28:1–5. Tasi le mea e mafai ona tatou aoao mai, o le faaipoipoga i totonu o le feagaiga sa matua taua ia Iakopo. Na ia faia se malaga umi lava e saili se fafine faamaoni e faaipoipo i ai. Ona ia galue lea mo Lapana mo le 7 tausaga a o lei faaipoipo atu ia Rasela ma sa faaauau pea ona galue mo ia mulimuli ane.) E faapefea ona tatou faaali atu o le faaipoipo i totonu o le feagaiga e taua ia i tatou?

Na faamatala mai e Peresitene Gordon B. Hinckley se aiga na liliu mai i le Ekalesia i Ausetalia ma na faatauina uma a latou mea totino ia mafai ai ona latou malaga atu i Niu Sila ma faamauina lo latou aiga. Na faapea mai le tama o lenei aiga: “E lei mafai ona matou o mai i le malumalu ona o le lava o le seleni. O a matou mea totino faalelalolagi sa na o se taavale tuai, o meaafale ma ni ipu. Na ou fai atu i lo matou aiga, ‘E le tatou ona le mafai ona tatou o. Afai ua tuuina mai e le Alii ia te au le malosi, e mafai ona ou faigaluega ma maua ia lava se tupe mo se isi taavale, meaafale ma ipu, ae afai e leiloa ia te au o e pele, o le a ou mativa lava i lenei olaga ma le faavavau” (*Be Thou an Example* [1981], 138).

- A maea ona faaipoipo i laua i totonu o le malumalu, o a mea e tatau ona la faia ina ia faamautinoa ai ua ia te i laua se faaipoipoga faavavau? E faapefea ona mafai e le tane ma le ava ona faamautuina ma faaleleia fesootaiga faa-ulugalii ina ia mafai ai ona faataunuuna feagaiga ma faamanuiaga na folafola mai i le malumalu sa? Atonu e te manao e valaaulia nisi o le vasega e tau atu ni faataitaiga o se mea na faia e lona toalua po o matua e aumaia ai le agaga selesitila i le mafutaga faale-ulugalii.)





faavae. O eseesea i mataupu tau le Atua e iloa ai o loo i ai ni feteenaiga lautele. E teena e isi Ekalesia, ma aiga le faamaoni o isi Ekalesia ma aiga. E lagonaina e le fanau le faaleaogaina o o latou olaga. Atonu o se tasi e le auai i le talalelei ua tali tutusa lava le lelei, aoaoina lelei, ma aulelei, ma atonu ua ia te ia foi ni uiga tau-saafia, a e afai e leai se faatuatuaga tutusa, e iai tiga i le lumanai. E iai vaega ua le tonu ai lenei tulaga, ae o le tele o taimi o loo iloa ai le tigaina ma le le fiafia o lenei tulaga. (*O Le Vavega o le Faamagalo Atua* [1969], 240).

- O le a le mea e mafai ona e faia e fesoasoani ia mautinoa ai o le tagata o le a e faaiipoipo atu i ai o se tasi e mafai ona e maua ai se faaiipoipoga faavavau? E faapefea ona avea au mafutaga ma faiga uo o loo faia nei e aafia ai lou olaga ma le faavavau?

Na faaauau ona saunoa mai Peresitene Kimball e faapea: “E manino lava, o le faaiipoipoga sao e amata mai i fesoataiga tonu. E faaiipoipo lava le tagata i se tulaga lautele mai le lio o e o loo ia fesoatai atu i ai. O lea o lenei apoapoiga o loo tuuina atu i se tulaga faamamafaina tele. Aua e te tuuina atu se avanoa e faauo ai i nisi e le auai i le talalelei po o nisi e auai i le talalelei ae lei aoaoina ma le faamaoni. Atonu e ono fai mai se tamaitai, ‘E le o i ai sou manatu e faaiipoipo atu i lea tagata. Ua na o ni tafaoga lava. A e le tataui se tasi ona aveina se avanoa e gaualofa ai i se tasi atonu e le ono taliaina lava le talalelei. E moni e laitiiti le pasene o i latou o e ua papatisoina ina ua maea ona faaiipoipo atu i uso o le talalelei. . . . E toaitiiti ua faamanuiaina. . . . A o le toatele e lei liliu mai i le Ekalesia . . . o feteenaiga, faaleaogaina ma le tetea o loo iloga ai le tele o a latou faaiipoipoga” (*O Le Vavega o le Faamagalo Atua*. 241–42).

### 3. E tuuina atu e le Atua faaaliga i tamaitai faapea foi alii

O faamaumauga o faaaliga i tusitusiga paia o loo tau mai ai fesoataiga a le Atua ma taitai o le perisitua o ni alii. E ui i lea, i le Kenese 25:22–23 o loo tauina mai ai le tuuina atu e le Atua o se faaaliga i se tamaitai.

E uiga i le tatalo a Repeka, na saunoa mai ai Elder Bruce R. McConkie e faapea: “Sei ou tuuina atu lo tatou tuua tuufaatasi o Repeka, o se fua mo mea e mafai ona faia e ona afafine i totonu o le talalelei i nei aso? . . . Ina ua faatuatuvaleina Repeka ma ia fia mauaina ai se taitaiga faale-agaga, na ia tuuina atu ai le mataupu i le Alii, ma ia tali atu ai ia te ia. E tuuina atu e le Alii faaaliga i tamaitai o e tatalo atu ia te ia i le faatuatua” (Lipoti o le Konafesi, Tahiti Area Conference 1976, 16).

- E mafai faapefea e alii ma tamaitai faapea ona saunia i latou lava e talia faaaliga tau le tagata lava ia?

### 4. O le faaaliga ia Iakopo o le apefai e tau atu i le lagi

- A o malaga atu Iakopo i Kanana le eleele o lona aiga e saili se ava ma sola ese mai ai mai le ita o Esau, na ia malolo ai mo le po ma ia maua ai se miti ese le matagofie (Kenese 28:10–19). O le a le mea na iloa e Iakopo i lenei miti? (Tagai Kenese 28:13–15. O faamanuiaga ia o le feagaiga FaaAperaamo, na faafouina ia Iakopo i lana miti; tagai Lesona 7.) O le a le mea o loo faatusa i ai le apefai?

Na saunoa mai Elder Marion G. Romney e uiga i lea miti e faapea: “Na iloa aiai e Iakopo o le feagaiga ua ia faia ma le Alii . . . o sitepu ia i luga o le apefai e tataui ia te ia ona ia ae ai ina ia mauaina mai faamanuiaga ua folafola mai—faamanuiaga o le a agavaa ai o ia e ulu atu ai i le lagi ma fesoatai atu ai ma le Alii (“Temples—The Gates to Heaven” *Liahona*, Aokuso 1971, 16).

# “Pe Faapefea ona Ou Faia Lenei Mea Leaga Tele”

Lesona  
**11**

*Kenese 34; 37–39*

---

**Faamoemoega** Ina ia fesoasoani atu i le vasega (1) e aoao ia iloa ona faaaogaina uma tomai ma mea tutupu ia galulue faatasi mo lo latou lelei ma faamalosia lo latou loto ia usitaia le faatulagaga a le Alii e uiga i le ola mama.

---

**Sauniuniga**

1. Suesue ma le agaga tatalo mau nei:
  - a. Kenese 37. O Iosefa le atalii lona 11 o Iakopo ua itagia e ona uso ma ua faatau atu e fai ma pologa.
  - e. Kenese 39. Ua manuia Iosefa o se pologa ae ua tausalaina o ia i le ola le mama ma ua tuuina atu ai o ia i le falepuipui. (Kenese 39:1–20). Ua tuuina atu e le o loo vaaia le falepuipui ia Iosefa le tiute o le vaaia o isi pagota (39:21–23).
  - o. Kenese 34:1–12; 35:22; 38:1–30. O le agasala o le le ola mama e i ai taunuuga faanoanoa i le aiga o Iakopo—Tina, lona afafine (34:1–12); Reupena, lona atalii matua (35:22); ma Iuta, o se tasi foi o ona atalii (38:1–30).
2. Mau faitau faaopoopo: Kenese 34:13–31.
3. Afai o vitio o loo taua i lalo, atonu e te manao e faaaogaina e avea o se vaega o le lesona:
  - a. O ata o O Iosefa o loo Faatau atu e ona Uso (62525; Taga o Ata o le Talalelei 109) ma le Tetee atu e Iosefa o le ava a Potifara (62548; Taga o Ata o le Talalelei 110).

---

## **Faalautelega Fautuaina o le Lesona**

**Gaoioiga e  
Faatosina Mai Ai** Atonu e te manao e faaaoga se tasi o gaoioiga nei (po o sa oe lava gaoioiga) e amata ai le lesona.

Fesili atu i le vasega e tau mai ni igoa o ni ata tifaga, ata televise, tusi po o ni mekasini o loo fiafia i ai le toatele o tagata o la outou eria.

- O a ni tulaga o le ola mama o loo tuuina mai i nei auala faasalalau o loo fiafia i ai le toatele o tagata? E faapefea ona ese mai nei tulaga mai tulaga a le Alii e pei ona aoao mai i totonu o tusitusiga paia ma taitai o le Ekalesia?

Ia faamalamalama atu o le ola mama a le lalolagi e tele ina ese mai i le tulaga ola mama ua faatulagaina e le Alii. O tulaga a le lalolagi e mafai ona suia a o tulaga a le Alii e tumau.

O lenei lesona e talanoaina ai mea na tutupu i se tagata na mulimuli i tulaga o le ola mama a le Alii faapea ma isi tagata o e e lei mulimuli ai. O lenei lesona e talanoaina ai foi taunuuga o le mulimuli po o le le mulimuli i tulaga a le Alii.

---

A o e aoaoina atu nei mau, ia talanoaina pe faapefea ona faaogaina i le olaga i aso taitasi. Uunai tagata o le vasega e faamatala ni aafiaga e faatatau i mataupu ua taua i le mau.

### 1. Ua faatau atu Iosefa e ona uso e fai ma pologa

Aoao atu ma talanoaina le Kenese 37.

Ua faaipoipo atu Iakopo ia Lea ma Rasela, o afafine o le tuagane o lona tina o Lapana ma faaipoipo atu foi i a latou auaua fafine o Selepa ma Pila. Na fanaua e ava a Iakopo mo ia ni atalii e toasefulu ma le toalua o e na avea ma amataga o ituaiga e toasefulu ma le toalua o Isaraelu (Na suia e le Alii le igoa o Iakopo i a Isaraelu; tagai Kenese 32:28). O Iosefa o le atalii lona sefulu ma le tasi o Iakopo; I le avea ai ma ulumatua a Iakopo ma Rasela, na mauaina ai e Iosefa le tofi ina ua le amiotonu Reupena le ulumatua a Iakopo ma Lea (1 Nofoaiga Tupu 5:1–2)

- Aisea na lotoleaga ai uso o Iosefa ia te ia? (Tagai Kenese 37:3–8.) E faapefea ona e talia ni uiga le lelei e fai atu e lou aiga ia te oe, pe a sili atu foi ona faia lelei i latou nai lo oe? E faapefea ona tatou manumalo i lagona o le lotoleaga po o le ita i tagata o lo tatou aiga po o uo?
- Na faapefea ona tali atu Iosefa i lona tama ina ua ia fai atu ia te ia e alu atu i Sekema e vaai po o a mai ona uso? (Tagai Kenese 37:13–14. Manatua o Sekema e 45 maila le mamao.) O le a le mea na faia e Iosefa ina ua ia le mau i Sekema ona uso? (Tagai Kenese 37:15–17. Manatua o Totana e le i lalo mai o le 12 maila le mamao.) O a mea ua tatou aoao mai leni tala e uiga ia Iosefa? (O tali e ono aafia ai lona usitai i lona tama ma lona le faavaivai e faataunuu le mea na faatonuina ai o ia e lona tama.)
- O le a le mea na taupulepule uso o Iosefa e fai ina ua sau Iosefa i le mea o loo latou fafagaina ai mamoe? (Tagai Kenese 37:12–18.) E faapefea ona ese mai manatu o Reupena mai manatu o Iuta i le faasaoina o Iosefa (Tagai Kenese 37:21–22, 26–27.) O le a le mea na mulimuli ane fai e uso ia Iosefa nai lo le fasiotia o ia? (Tagai Kenese 37:28, 31–33.)

### 2. Ua teena e Iosefa le “agasala ai i le Atua.”

Aoao atu ma talanoaina le Kenese 39.

- Na faapefea ona faamanuiaina e le Alii Iosefa ina ua faatau atu o ia o se pologa? (Tagai Kenese 39:1–4.) Aisea na faatuatuaina tele ai Iosefa, o se pologa e Potifara le auaua sili a Farao? (Tagai Kenese 39:5–6.)
- O le a le mea na faia e Iosefa ina ua taumafai le ava a Potifara e faaosoosoina o ia ina ia faia le mea sese? (Tagai Kenese 39:11–12. Ia faailoa atu na ave ese mai e Iosefa ia lava mai lea mea.) E faapefea ona tatou mulimuli i le faaitaiga a Iosefa pe a faaosoosoina i tatou?
- Faamata o a ni faamatalaga e ono faaogaina e Iosefa pe ana manao o ia e faia le mea na manao i ai le ava a Potifara? O a ‘alofaga e tuuina mai e tagata i nei aso e tau ufiufi ai le faia o le solitulafono o le le ola mama? Aisea ua le avea ai nei faamatalaga ma ni mafuaaga tata?
- Na faapefea ona faasalaina Iosefa i lona amiotelele ina ua faalatalata atu ia te ia le ava a Potifara? (Tagai Kenese 39:12–20. Na ave ese mai o ia mai le avea ma se tasi e vaia le aiga o Potifara ae avea ma se pagota.) I le lalolagi i le taimi nei,

e faapefea ona faia e isi tagata i latou ua amio lelei? (Atonu e eseese ni tali. O tagata ua amiolelei, o nisi o taimi ua tauemua ma faaeese mai i ni faamasaniga, ae o le tele o taimi e faaaloologia i latou.) Atonu e te manao e talanoaina le faatosinaga a le lalolagi ina ia aua nei ola mama o loo feagai ma le autalavou ma pe faapefea ona mafai e le autalavou ona tetee atu i lea faatosinaga.

- O loo faamamafa mai e mau, sa faatasi atu le alii ia Iosefa ao i ai o ia i le falepuipui (Kenese 39:21–23). O le a le mea ua faaalua mai e lenei mea e uiga ia Iosefa? (Sa ia faaaauu pea lava lona faatuatua nai lo le fesiligaina po o le tuuaiina foi o le Atua i le falepuipui o ia ona o lona amiolelei.) O a mea e mafai ona tatou aoao mai ia Iosefa e uiga i le avea o ni aafiaga ma ni mea leaga na tutupu e avea ma ni mea lelei. (Atonu e te manao e faitau le Roma 8:28 i le taimi o lenei talanoaga.)

Na faamalamalama mai e Elder Hartman Rector Jr. e faapea: “O le loto e mafai ai ona liua mea uma e avea ma se mea lelei e aliali mai o se uiga faaleatua. O lo tatou Tama Faalelagi e mafai lava ona ia faia lea mea. O mea uma lava, po o le a lava lona leaga, e avea lava ma manumalo i le Alii. O Iosefa, e ui lava o se pologa ma o se tulaga sa le tataua ona oo ia te ia, sa tumau o ia i le faamaoni i le Alii ma faaaauu ona ia ola poloaiga ma faia se mea lelei mai le tulaga maualalo sa iai. O tagata faapenei e le mafai ona faatoilaloina” (Lipoti o le Konafesi, Oke. 1972, 170; po o le *Liahona*, Ianuari. 1973, 130).

### 3. Sekema, Reupena, ma Iuta ua faia agasala sili o le amioleaga

Aoao atu ma talanoaina le Kenese 34:1–12; 35:22; ma le 38:1–30. Aua le talanoaina umi agasala a ia tagata; ia faaaoga i latou e faatusatusa atu ai i le faamaoni o Iosefa.

- Ia faailoa atu e lei totoa uma tagata o le aiga o Iosefa ma e latou te masani e pei o le toa o Iosefa ina ua feagai ma faaososoga. Na faapefea ona talia e Sekema, Reupena, ma Iuta faaosoga o le tuinanau o le tino?
- Maitau le gagana i le Kenese 34:3 o loo faamatala mai ai lagona o Sekema mo Tina; “Ua matua manao o ia ia Tina . . . ma le alofa lava i le teine.” Aisea ua le tataua ai lenei faamatalaga ma le aga a Sekema? (Ana fai e moni le alofa o Sekema ia Tina semanu e na te le faaleaogaina o ia. Ia faaososoga atu i le vasega ina ia malamalama, o le tele o taimi e faaaogaina ai e tagata le faamatalaga “Ua ia maua le alofa o le tasi i le isi” e faia ai se gaoioiga le tonu, ae o tagata ua moni le alofa o le tasi i le isi, latou te le faatupuina i le tasi le lagona o le tigaina ma le puapuaga e faamalie ai lagona ma manaoga o le tino. O aga ma ni uiga e maua e faigata ai ona tatalo, e lagonaina ai e tagata le le agavaa e ulu atu i le malumalu sa, pe faamalepe ai foi aiga e le o ulu ai le alofa.)
- Ina ua faamanuiaina taitoatasi e Iosefa ona atalii i le faaiuga o lona olaga na ia taua ai le solitulafono a Reupena ma ia faamatalaina mai a o Reupena “ua e osovale e pei o le vai” (Kenese 49:3–4). E faapefea ona moni lenei faatusaga? O le a le mea na tau atu e Iakopo ia Reupena o le a oo mai e tusa ai ma le “ua e osovale e pei o le vai”?
- Ia faatusatusa le tau na totogi e Iosefa mo le faia o le amiolelei ma le tau na totogi e Reupena mo le faia o le amioleaga. O le a le mea na maimau a Reupena ona o le le ola mama? (Tagai 1 Nofoaiga a Tupu 5:1–2.) O a iuga faaleagaga ma le faaletino o le agasala i le tino i aso nei? Aisea ua faamamafa mai ai e le Alii le taua o le ola mama?

Ua aoao mai pea lava e taitai o le Ekalesia o le usiusitai i poloaiga a le Atua o le saolotoga moni lea. E faapefea ona tatou iloa lea mea i le olaga o Iosefa? Na faapefea e le le usiusitai ona oo i se iuga o le faaitiitia o le saolotoga mo Sekema, Reupena ma Iuta? E mafai faapefea ona mafai e lo tatou filifili e tausia poloaiga ona faasaolotoina atili i tatou nai le filifili e soli poloaiga? (Tagai Ioane 8:31–36.)

Faaiuga

Molimau atu, o le faatasi ai ma le fesoasoani a le Alii, o a tatou aafiaga ma mea tutupu e mafai ona galulue faatasi mo lo tatou lelei. Ia molimau atu foi i le taua o le tumau ai i le ola mama. Ia luiina le vasega ia faia se suesuega o ata tifaga, mekasini ma isi mea faasalalau ma ia faaaogaina na o mea o loo faaalua ai tulaga o le ola mama ua faatulagaina mai e le Alii. Uunai tagata o le vasega ina ia latou tumau ai e pei o Iosefa i le usitaia o le tulafono o le ola mama.

## Manatu Faaopoopo e Aoao Atu Ai

O mataupu o loo taua i lalo e faaopoopo i le ootootoga o le lesona fautuaina. Atonu e te manao e faaoga se tasi o nei manatu pe sili atu foi e avea o se vaega o le lesona.

### 1. Peteli—o le fale o le Atua

- Ao malaga atu Iakopo mai Kanana mo le nuu o lona aiga, na ia malolo ai mo le po ma na ia faia ai se miti ese o le apefai e tau atu i le lagi (Kenese 28:19). O le a le nofoaga e tutusa igoa i nei aso? (O le malumalu o loo faaigoa o le maota o le Alii.)

Na tuuina mai e Elder Marion G. Romney e faapea: “O malumalu ia i tatou a o Peteli ia Iakopo” (Temples—The Gates to Heaven.” *Ensign*, Mat.1971, 16).

- I le Kenese 35:1–15, Ua ave e Iakopo lona aiga ma toe foi atu i lenei nofoaga paia. O le a le mea na tau atu e Iakopo i lona aiga ina ia faia e saunia ai e toe foi atu i Peteli, le “Maota o le Atua”? (Tagai Kenese 35:2.) E faatusatusa faapefea nei mea i sauniuniga tatou te faia e oo atu i le maota o le Alii? O a “atua ese atonu o lo i ai ma i tatou?

Na saunoa mai Peresitene Spencer W. Kimball e faapea:

“Ua faamanuiaina i tatou e le Alii o ni tagata ua i ai se tamaoaiga e lei ausia e ni tausaga ua tuanai. O risosi ua tuuina mai ia i tatou, o ni mea lelei ma e manao-mia i la tatou galuega i le lalolagi. A e ua ou fefe ona o le toatele o i tatou ua sili atu mea ua tatou maua o lafu manu o fanua ma fale ma le tamaoaiga ma ua amata ona tatou atua i ia mea o ni atua pepelo, e leai so latou mana e pulea ai i tatou. O ia i tatou ea nei mea lelei e tele e sili atu nai lo le mea e mafai ona gafatia e lo tatou faatuatua? . . .

“E ui i lo tatou fiafia e tau atu o tatou o ni tagata e lata mai ona po nei, ma lo tatou matele atu i le manatu o le malamalama i le upu e lei i ai i ni tagata i taimi ua tuanai—e tusa lava i nei mea, o i tatou i se tulaga lautele o ni tagata ifo i tupua—o se tulaga ua aupito sili ona inosia i le Alii” (“The False Gods We Worship,” *Liahona*, Aokuso 1977, 6).

- E mafai faapefea ona tatou tuu ese atu o tatou atua ese . . . ma ia tatou mama” ma agavaa e ulufale atu i malumalu? (Tagai Kenese 35:2; Salamo 24:3–4; 2 Korinito 7:1; Moronae 10:30,32.)

## 2. Ua toe faatasia Iakopo ma Esau

- I le toe foi atu i le nuu o Kanana, na iloa ai e Iakopo o le ia toe feiloai ai i lona uso o Esau (Kenese 32:3–23; 33:1–17). Aisea na fefe ai Iakopo e vaai ia Esau? (Tagai Kenese 33:4, 8–11.) O a mea e mafai ona tatou aoao mai ia Iakopo ma Esau e uiga i le foia o faafitauli faaleaiga?

## 3. O palake i taimi o le Feagaiga Tuai

I le Kenese 35:22, o Pila, se tasi o le auauna fafine a Rasela, o loo taua o se tasi o palake a Iakopo. Na tuuina mai e Elder Bruce R. McConkie le faamatalaga leni i le faaaogaina o le upu *palake* i totonu o le Feagaiga Tuai:

“Mai le faasologa uma mai i lalo o le tala faasolopito o fesootaiga a le Atua ma ona tagata e aofia ai ma i latou o le aiga o Isaraelu, o palake o ni ava faaletulafono ua faaiipoipo atu i a latou tane i totonu o le feagaiga fou e faavavau o le faaiipoipoga. . . . I aso anamua sa taua ai i latou o ni *ava tulaga lua*, o ni ava e le tulaga tutusa ma le faatulagaga aloaia sa i ai i ia taimi e pei o ava e lei ta’ua o ni palake” (*Mormon Doctrine*, 2nd ed. [1966], 154).

---

**Faamoemoega**

Ina ia fesoasoani i le vasega ia malamalama afai tatou te faamaoni ma usitai, o le a faapaiaina ou puapuaga e fai mou manuia e le Atua.

---

**Sauniuniga**

1. Suesue ma le agaga tatalo mau nei:
    - a. Kenese 40–41. I totonu o le falepuipui, na sao ona faaliliu e Iosefa miti a auauna a Farao. Ona ia faaliliuina lea o miti a Farao e uiga I le povi ma saito. Ua fai Iosefa ma pule I le nuu uma o Aikupito i lalo o le pule a Farao, ma sauniaina tagata mo le oge o le a oo mai.
    - e. Kenese 42–45. Ua auina atu faalua e Iakopo i Aikupito ona atalii e faatau mai saito. Ua faaalua e Iosefa ia lava i ona uso, ma ua faamagalo atu ia i latou, ma ua latou fiafia faatasi.
  2. Mau faitau faaopoopo: 2 Nifae 2:2; Mataupu Faavae ma Feagaiga 64:8–11; 122:5–9.
  3. Atonu e te manao e fai atu i se tasi o le vasega e sauni e tuuina mai se ototoga o le Kenese 42–43.
- 

**Faalautelega  
Fautuaina o  
le Lesona**

Gaoioiga e  
Faatosina Mai Ai

Atonu e te manao e faaoga se tasi o gaoioiga nei (po o sa oe lava gaoioiga) e amata ai le lesona.

Fai atu i le vasega e mafaufau faapea ua oti i latou ma ua ulu atu i le lalolagi o agaga ma ua faia ai se iloiloga o mea na tutupu i o latou olaga faaletino. Faamalamalama atu o le a e fai atua ni fesili se fa e fesoasoani ia i latou e mafaufau ai e uiga i aafia o latou olaga i puapuaga. A maea ona fesiliina fesili uma e fa, valaulia tagata o le vasega e faali mai manatu i soo se fesili lava latou te mananao ai.

- O a nisi o tofotofoga sa lua feagai i le olaga faaletino?
- O a lesona ua e aoao mai mai tofotofoga o lenei olaga?
- Afai e mafai ona e toe ola mai i lou olaga, o le a le mea o le a e suia e uiga i le auala na e feagai ai ma ou tofotofoga.
- E faapefea ona mafai ona e faaogaina i se tulaga sili atu mea na tutupu i le olaga?

Ia faamatala atu o lenei lesona e faatatau ia Iosefa, le atalii o Iakopo, ma le ala o lona faamaoni, ma le usitai e oo lava i tofotofoga tetele.

---

Mau Talanoaina  
ma le Faaogaina

Ao e aoaina atu nei mau, ia talanoaina pe faapefea ona faaoga i le olaga i aso taitasi. Uunai tagata o le vasega e faamatala ni aafiaga e faatatau i mataupu ua taua i le mau.

## 1. Ua faaliliu e Iosefa miti a le tautu uaina, le fai meaai, ma Farao. Ua fai e Farao ia Iosefa ma pule i le nuu uma o Aikupito.

Aoao atu ma talanoaina Kenese 40–41.

Ia toe iloilo e le vasega le lesona na sei mavae atu i le faalauina mai o nisi o tofotofoga na aafia ai Iosefa i le vaitaimi muamua o lona olaga (Kenese 37; 39).

Atonu e te manao e lisi tali a le vasega i luga o le laupapa. O tali e ono aofia ai:

- a. Na itagia o ia e ona uso (Kenese 37:4).
- e. Na taupulepule ona uso e fasioti o ia ona faatau atu lea o ia o se pagota nai lo le fasiotia (Kenese 37:18–28).
- i. Na tuu seseina o ia i le falepuipui ina ua ia teena e fai le leaga (Kenese 39:20).
- Na faapefea ona tali atu Iosefa i ona tofotofoga? Na faapefea ona faamanuia e le Atua Iosefa i lona amiotonu e oo lava i taimi o tofotofoga?
- Ua faatasi atu ma Iosefa i le falepuipui ia le tautu uaina a Farao, ma lana fai meaai, o i laua uma na faia ni miti la te lei malamalama i ai. Ina ua faaliliu e Iosefa le miti a le tautu uaina, o le a le mea na ia fai atu i le tautu uaina e fai mo ia? (tagai Kenese 40:14–15.) O le a le mea na tupu ina ua magalo mai le falepuipui le tautu uaina? (Tagai Kenese 40:21, 23.) Aisea na avea ai lenei mea ma se tasi o tofotofoga mo Iosefa? (Tagai Kenese 41:1, 14. Ua toe nofo ai o ia i le falepuipui mo le isi 2 tausaga.)
- Aisea na magalo mulimuli ai Iosefa mai le falepuipui? (Tagai Kenese 41:1, 8–15) O le a le tali a Iosefa ina ua faapea mai le Farao ua ia faalogo e mafai e Iosefa ona faaliliu miti? (Tagai Kenese 41:16.) E mafai faapefea ona tatou tuuina atu i se tulaga tatau le faailoa aloaia o le faafetai i le Alii mo a tatou taleni ma mea-alofa? (E mafai ona tatou faaogaina ia mea e viia ai le Atua ma faamanuia ai isi, ia le mo so tatou viiga.)
- 1O le a le miti a Farao? (Tagai Kenese 41:1–7; 17–24.) O le a le faaliliuina o le miti a Farao? (Tagai Kenese 41:25–32.) Ina ua maea ona tuuina atu e Iosefa le faaliliuga, o le a le mea na ia fautua atu e fai e Farao? (Tagai Kenese 41:33–36; tagai foi i le manatu faaopoopo e aoao atu ai lona lua.) Na faapefea ona tali atu Farao i le fautuaga a Iosefa ina ia saunia mo le oge? (Tagai Kenese 41:37–43.)

## 2. Ua faailoa atu e Iosefa ia lava i ona uso ma faamagalo ia i latou.

Aoao atu ma talanoaina Kenese 42–45. Atonu e te manao e tofi se tasi o le vasega e ootoo mai faapuupuu le aotelega o le Kenese 42–43.

- Aisea na o mai muamua ai uso o Iosefa i Aikupito? (Tagai Kenese 42:1–3.) Aisea na latou toe foi atu ai i Aikupito i le taimi lona lua? (Tagai Kenese 42:33–34; 43:2.) Aisea na le loto ai Iakopo e faataga Peniamina e o atu i Aikupito ma ona uso? (Tagai Kenese 42:36, 38.) Aisea na ia malie ai mulimuli ane e faataga Peniamina e alu? (Tagai Kenese 43:3–5, 11–14.)
- I le tuuina atu o Peniamina e o ma ona uso i Aikupito, na manatu Iakopo o le a aveesea foi ma ia se tasi atalii (Kenese 42:36). Na faapefea ona suia e le Alii se tofotofoga e avea ma faamanuiaga mo Iakopo?
- Ina o laitiiti Iosefa, na ia faia ai se miti na valoia ai o le a ifo mulimuli ane ona uso ia te ia (Kenese 37:5–11.) Na faapefea ona faataunuuna lenei miti? (Tagai Kenese 42:6; 43:26–28.) Na faapefea e lenei faataunuuga na manatu uso o le a avea ma tofotofoga tele, ona liua e avea ma faamanuiaga?



- E silia ma le 20 tausaga talu ona latou faatau atu Iosefa o se pologa, ao lagonaina pea e uso le mafatia ona o le mea na latou faia (Kenese 42:21.) E mafai faapefea e le lagona mafatia ona avea ma malosiaga lelei i o tatou olaga? E mafai faapefea ona avea ma malosiaga lelei? E faapefea e le salamo atoatoa ona aafia lagona mafatia? (Tagai Enosa 1:4–6.)
- Na faapefea ona faaalua e le uso o Iosefa o Iuta ua sili atu lona agalelei talu le taimi mulimuli na ia vaai ai ia Iosefa? (Tagai Kenese 44:18, 30–34. Ia faamanatu atu i le vasega o le manatu o Iuta le faatau atu o Iosefa o se pologa.)
- Aisea e te manatu ai na popole uso o Iosefa ina ua faaalua e Iosefa o ia ia te i latou? (tagai Kenese 45:1–3.) Na faapefea ona faaalua e Iosefa ua ia faamagalo atu i ona uso? (Tagai Kenese 45:4–11, 14–15.) E faapefea ona e iloa o le faamagalo atu a Iosefa na fesoasoani i le siitia o ona uso i le faale-agaga?
- O le a le mea ua tau mai ia i tatou e le lalolagi e tataua ona fai pe afai ua sese ona fai e se tasi ia i tatou e pei ona fai e uso o Iosefa ia te ia? O le a le mea ua tau mai ia i tatou e le Atua ia tatou fai? (Tagai MFF 64:8–11.) Ua faapefea ona faamanuiaina oe ina ua e faia lelei i isi o e na latou le faileleia oe? E mafai faapefea ona tatou maua pea le loto faamagalo atu?
- Na faapefea e le falepuipuiina o Iosefa i Aikupito, o se tofotofoga mo ia na avea ma faamanuiaga mo ia, lona aiga ma Aikupito atoa? (Tagai Kenese 45:4–8.) E mafai faapefea ona tatou mulimuli atu i le faataitaiga a Iosefa i le feagai ai ma mea e luina ai ma tofotofoga ai tatou?
- I le Feagaiga Fou, na tau atu i tagata Roma e le Aposetolo o Paulo “e galulue faatasi mea uma e lelei ai i latou e ua alofa atu i le Atua” (Roma 8:28). Ua faapefea ona moni lea tulaga i lou olaga? Vaalaulia le vasega e tau mai se mea na tupu na muamua iloa ai e le lelei ae mulimuli ane avea ma faamanuiaga.

## Faaiuga

Ia faamanatu atu i le vasega, o le gasologa o le tele o ona tofotofoga, na tumau ai pea Iosefa i le faamaoni. Na ia faamagalo i ona uso mo le faatauina o ia o se pologa. Ona o lona amiotonu, na faamanuiaina tele ai Iosefa. Ia molimau atu afai tatou te faamaoni, o le a faamanuia i tatou e le Atua i le faia o mea uma ia galulue faatasi mo lo tatou lelei.

## Manatu Faaopoopo e Aoao Atu Ai

O mataupu o loo taua i lalo e faaopoopo i le oototoga o le lesona fautuaina. Atonu e te manao e faaoga se tasi o nei manatu pe sili atu foi e avea o se vaega o le lesona.

### 1. O le Iosefa maoae o aso e gata ai

I le faaliliuga a Iosefa Samita o le Kenese 50:24–38 o loo i ai valoaga na valoia e Iosefa e uiga i se tasi o lona aiga o se o le a avea ma “tagata vaai fili-filia.” O le perofeta o le Tusi a Mamona o Liae na ia toe tauina mai ia valoaga i le 2 Nifae 3:5–15. O se tasi o le aiga o loo tau mai i totonu o ia valoaga o le perofeta o Iosefa Samita.

Ia talanoaina pe faapefea e nei valoaga na valoia e Iosefa o Aikupito, ona faatau-nuuina i le olaga o Iosefa Samita:

- a. O se tasi o le aiga o Iosefa o le a avea ma “tagata vaai filifilia” (Faaliliuga a Iosefa Samita, Kenese 50:26; 2 Nifae 3:6).
- e. O lenei tagata vaai o le a faaaloaloina tele e isi tagata o le aiga o Iosefa (Faaliliuga a Iosefa Samita, Kenese 50:27; 2 Nifae 3:7).
- i. O le a ia aoao i latou i feagaiga na faia e le Atua ma o latou tuua (Faaliliuga a Iosefa Samita, Kenese 50:28; 2 Nifae 3:7).
- o. O le a ia usitai i le Atua (Faaliliuga a Iosefa Samita, Kenese 50:28; 2 Nifae 3:8).
- u. O le a avea o ia ma se perofeta sili, e pei o Mose (Faaliliuga a Iosefa Samita, Kenese 50:29; 2 Nifae 3:9).
- f. O le a avea o ia ma meafaigaluega e oo mai ai tusitusiga paia fou (o le Tusi a Mamona) o le a avea ma lagolago ma galue faatasi ma tusitusiga paia ua i ai (o le Tusi Paia) (Faaliliuga a Iosefa Samita, Kenese 50:30–31; 2 Nifae 3:11–12).
- g. E ui lava o le a vaivai o ia, ae o le a faamalositia o ia e le Alii (Faaliliuga a Iosefa Samita, Kenese 50:32; 2 Nifae 3:13).
- l. O ia ma lona tama o le a igoa ia Iosefa (Faaliliuga a Iosefa Samita, Kenese 50:33; 2 Nifae 3:15).

## 2. Sauniuniga mo le oge

- Na fautuaina e Iosefa ia Farao ina ia faaoga le 7 tausaga o le tele o mea e saunia ai Aikupito mo le 7 tausaga o le oge o le a mulimuli mai (Kenese 41:29–30, 34–36). O le a le fautuaga a o tatou taitai o le Ekalesia ua tuuina mai e uiga i le saunia mo taimi o oge po o isi faigata?

Ua aoao mai Elder L. Tom Perry e faapea:

“E pei lava ona taua lo tatou saunia faale-agaga, e tatau foi ona saunia i tatou mo mea tatou te manaomia faaletino. . . . Ua faatonuina i tatou i le tele o tausaga ia mulimuli i mea moomia e fa mo le saunia mo mea o le a oo mai.

“Muamua, ia maua se tulaga aoaoina lelei. Ia aoaoina se tomai po o se poto faapitoa ina ia mafai ai ona e maua se galuega lelei e mafai ai ona maua se totogi e lava e totogi ai mea o loo moomia mo oe lava ma lou aiga. . . .

“Lua, ia ola ai e tusa ma tupe maua ma tuuese se mea mo aso timu. Ia avea ma vaega o outou olaga le pulea o mea tautupe, mea ia ua faamanuiaina ai oe e le Atua. E faapei ona e totogiina soo lau sefuluai, ia tuu ese se vaega tupe mo mea o ono moomia e le aiga i le lumanai. . . .

“Tolu, aloese mai le faia o ni aitalafu tetele. O ni aitalafu moomia e ono faia pe a maea ona tatalo ma le manatu faaeteete ma pe a maea ona mauaina fautuaga sili. Tatou te manaomia le faautauta ina ia mautinoa o loo tatou ola e le sili atu ma le mea tatou te gafatia ona totogi. . . .

“Fa, ia maua mai ma faaputu meaai faaleoleo ma mea manaomia e mafai ai ona faaaauina le ola [pe a fai e faatagaina e tulafono i o outou atunuu le faaputuina o mea]. Ia maua mai lavalava ma ia faia se tusi tupe faavae i le faautauta ma le fuafuaina lelei e mafai ai ona faaoga i taimi e tutupu faalavelave faafuasei. E pei lava ona umi ona ou manatuaina ua uma ona aoaoina i tatou e saunia mo le lumanai ma ia maua mea faaleoleo manaomia mo se tausaga se tasi. O lau faatatau, o tausaga o le tele o le mau e mafua ai ona tatou tuuese lenei fautuaga. Ou te talitonu ua oo mai le taimi e tatau ai ona le toe faaleo-gaina lenei fautuaga. O mea o loo tutupu i le lalolagi i aso nei, e tatau ona manatunatu ma le loto gauai atoa i ai” (Lipoti o le Konafesi, Oke. 1995, 46–47; po o le *Liahona*, Ianuari 1996, 36).

- I le taimi o le oge, “Ua o mai foi nuu uma i Aikupito e faatau saito ia Iosefa” e faatau meaai aua na o Aikupito lava le nuu na saunia mo le oge (Kenese 41:54–57). E mafai faapefea e le saunia ona aumai se avanoa e auauna atu ai i isi?

### 3. O atalii o Iosefa

- Ina ua mavae ona tofia Iosefa e Farao e avea ma pule o Aikupito, ona faaipopo atu lea o Iosefa i le fafine e igoa ia Asenati, ma ua la maua ni atalii se toalua (Kenese 41:45, 50). O a igoa na faaigoa ai e Iosefa ma Asenati o la atalii? (Tagai Kenese 41:51–52.) Aisea na avea ai nei igoa ma ni igoa talafeagai mo atalii o Iosefa? (Atonu e te manaomia ona tau atu i le vasega o le uiga o *Manase* o le “faagaloina” ma *Efaraima* o le “faauluolaina.”)

# Nofopologa, Paseka, ma le Malaga

Lesona  
**13**

*Esoto 1–3; 5–6; 11–14*

---

**Faamoemoega** Ina ia uunai le vasega ia (1) faamoemoe i le Atua e faataunuaina ana folafolaga, (2) faateleina lo latou viia o le taulaga togiola a le Faaola, ma le (3) ia faatauaina atili le faamanatuga i o latou olaga.

---

## Sauniuniga

1. Suesue ma le agaga tatalo mau nei:
  - a. Esoto 1–3. Ua fai le fanau a Isaraelu ma pologa e tagata Aikupito (1:1–14). Ua faatonuina e Farao ia fasiotia tama tane uma e fanau mai e le fanauga a Isaraelu. (1:15–22). Ua fanau mai Mose ma ua tausia e le afafine o Farao (2:1–10). Ua faasiotia e Mose le Aikupito ma ua sola ai i Mitiana, le mea na ia faaipoipo atu ai ia Sepora (2:11–22). Ua faaali le Alii ia Mose i le afi mumu i totonu o le laau talatala ma valaauina o ia e aumaia Isaraelu mai le nofopologa (3:1–22; manatua i le Faaliliuga a Iosefa Samita o le Tusi Paia, O le faaupuga “O le agelu a Ieova” i le Esoto 3:2 ua suia i le “o e afioaga o Ieova”).
  - e. Esoto 5–6. Ua fai atu Mose ma Arona ia Farao e faasaoloto Isaraelu, ae ua le talia e Farao ma ua faamamafa atili avega i luga o tagata (5:1–23). Ua folafola mai e le Alii le faataunuaina o le feagaiga na ia faia ma Aperaamo (6:1–8). (Manatua: Mataupu 7–10 o loo tau mai ai le oo atu o Mose ia Farao i le tele o taimi ma talosaga atu ia te ia ia faasaoloto Isaraelu. E ui lava i le tele o faailoga, mea ofoofogia ma mala, sa teena lava e Farao. (O le Faaliliuga a Iosefa Samita o nei mataupu o loo faamalamalama mai ai le faamaaaina o le loto o Farao)
  - i. Esoto 11–13. Ua folafola mai e le Alii o le a toe tuuina atu se isi mala e tasi i luga o Aikupito o le oo atu lea o le oti i ulumatua uma lava o aiga (11:1–10). Ua faatonuina e le Atua Mose i le saunia o le Paseka, o le a puipuia ai Isaraelu mai le mala (12:1–20). Ua fasiotia ulumatua uma o Aikupito (12:29–30). Ua tau atu e Farao ia Mose e ave ese ona tagata mai Aikupito, ma ua o ese le fanauga a Isaraelu (12:31–42). Ua tau atu e Mose i le fanauga Isaraelu ia tausii i le Tausamiga o le Areto e le Faafefeteina i le lumanai e avea ma faamanatu o lo latou faasaolotoina (13:1–16). Ua alu atu le Alii i o latou luma i le tolauapiga a Isaraelu i le ao faaniutu i le ao ma le afi faaniutu i le po (13:17–22). (Manatua o ulutala o le “Tausamiga o le Paseka” ma le “Tausamiga o le Areto e le Faafefeteina” o le tele o taimi o loo faaogaina tutusa lava o la uiga; o le Paseka o le aso muamua o le Tausamiga o le Areto e le Faafefeteina.)
  - o. Esoto 14. Ua tuliloa atu e Farao ma ana au le fanauga Isaraelu (14:1–9). Ua fefefe tagata, ma ua alaga atu Mose i le Alii mo se fesoasoani (14:10–18). Ua faasaoloto mai le fanauga Isaraelu mai le au tau ma savalia ai le sami ulaula i le elele matutu le iliti tai; Ua tuliloa atu i latou e tagata a Farao ma ua malelemo i latou (14:19–31).
2. Mau faitau faaopoopo: Esoto 4; 7–10; 15.
3. Ia fai atu i se tasi o le vasega e sauni e tuuina atu se aotelega puupuu o le Esoto 1 ma le 2.

4. Ia sauni ni vaega taitasi o upu o le *Paseka* ma le *Faamanatuga*.
5. Afai e maua vitio o loo taua i lalo, atonu e te manao e faaaogaina e avea o se vaega o le lesona:
  - a. “Animal Sacrifice and the Atonement,” o se vaega e iva minute mai le *Old Testament Video Presentations* (53224).
  - e. O ata o Iesu le Keriso (62572; Taga Ata o le Talalelei 240); Mose i le Vaovao (62063; Taga Ata o le Talalelei 107); ma le Savalia o le Sami Ulaula (62100).

## Faalautelega Fautuaina o le Lesona

Gaoioiga e  
Faatosina Mai Ai

Atonu e te manao e faaaoga se tasi o gaoioiga nei (po o sa oe lava gaoioiga ) e amata ai le lesona.

Ia fesili atu i le vasega pe na i ai se taimi na laveaiina mai ai i latou mai se tulaga faigata. Ia valaau atu i se tasi po se toalua e tau atu faapuupuu se mea na tupu ia i latou po o le tau atu o se mea na tupu ia te oe. Ia fesili atu i le vasega pe na faapefea o latou lagona agai ia i latou o e na laveaiina i latou.

Faamalamalama atu o lenei lesona e faatatau i se laveai matautia na tupu—o le faasaolotoina

mai o le fanauga a tagata mai le mala o le oti ma le pologa mai i Aikupito. Ia faamalamalama atu foi i le tele o auala o lenei laveai o loo fai ma faatusa o se laveai sili atu—o lo tatou lava faasaolotoina mai le agasala ma le oti e ala i le taulaga togiola a le Faaola.

Mau Talanoaina  
ma le Faaogaina

A o e aoaoina atu nei mau, ia talanoaina pe faapefea ona faaaoga i le olaga i aso taitasi. Uunai tagata o le vasega e faamatala ni aafiaga e faatatau i mataupu ua taua i le mau.

Ina ua mavae le oo atu i Aikupito o Iakopo ma lona aiga sa nonofo ai i lea mea le fanauga Israelu mo le 430 tausaga. I lea taimi, na tulai se Farao o le na faapologaina i latou ma tuuina atu ni avega mamafa ia i latou. E pei ona valoia e Iosefa, ua faatuina mai e le Alii Mose ina ia faasaolotoina mai le fanauga a Israelu (2 Nifae 3:10).

### 1. Ua valaauina e le Alii Mose e faasaoloto Israelu mai le nofopologa.

Ia tuuina atu i le tagata o le vasega na tofiaina e tuuina atu se aotelega puupuu o le Esoto 1 ma le 2; ona aoao atu lea ma talanoaina le Esoto 3.

- Na faapefea ona valaauina Mose e faasaoloto Israelu mai le nofopologa (Tagai Esoto 3:1–4). O le a le mea na tau atu e le Alii ia Mose ao valaauina o ia? (Tagai Esoto 3:5–10.) O le a le mea ua mafai ona tatou aoao mai e uiga i le Atua i lona valaauina o Mose? (O tali e ono aofia ai, e iloa e le Atua ona tagata, e alofa mutimutivale ia i latou, e finagalo e faamanuia i latou, ma tausia ana folafolaga ua tuuina atu ia te i latou.)
- Ia valaaulia le vasega e mafaufau faapea o i latou o le fanauga a Israelu o loo nonofo i Aikupito. Mo le tele o augatupulaga na aoaoina i latou o i latou o

tagata o le feagaiga a le Atua ma o le a la faataunuuina folafolaga na ia faia ia Aperamo. A o lenei o i latou o ni pologa o loo ola i faasauaga ma le nofopologa. O le a le mea e mafai ona tatou aoao mai i lenei tulaga e mafai ona fesoasoani ia i tatou pe a tatou feagai ma puapuaga? (E le faagaloina i tatou e le Atua i o tatou puapuaga, e pei ona ia faaalua i le valaauina o Mose ma le faasaolotoina Isaraelu. Ae e masani ona ia le faasaolotoina mai i tatou i lena lava taimi mai o tatou tofotofoga. Po o le a lava le umi o le tofotofoga, e tatau ona tatou tatalo atu pea ia te ia, faatuatua e alofa o ia ia te i tatou ma o le a ia galueaina mea uma mo lo tatou lelei pe a tatou usitai ia te ia. Tagai MFF 90:24; 98:3; Mosaea 24:14–15.) Na faapefea ona e maua le mafanafana ma le fesoasoani mai le Alii i taimi o puapuaga?

- O le a le tala a Mose na fai mai ina ua valaauina o ia e le Atua e faasaoloto Isaraelu? (Tagai Esoto 3:11; 4:1, 10.) O a ni ala na lagona ai e Mose lona le atoatoa? O a faamafanafanaga na tuuina atu e le Alii ia te ia? (Tagai Esoto 3:12; 4:11–12.) O a ni lagona e te maua pe a e mauaina se valaauga mai le Alii? Faamata o a ni lagona lelei o le le atoatoa? Na faapefea ona fesoasoani le Alii ia te oe mo valaauga na e lagona ai le le atoatoa?
- O le a le mea na taulagaina e Mose ina ua ia taliaina le valaau e taitai ona tagata? (Tagai Eperu 11:24–26.) O a mea tatou te taulagaina i le taliaina o le valaau e auauna i le Alii? Aisea e taua ai lo tatou loto i ai i le taulaga mo le Alii?

## 2. Ua tuuina atu e le Alii mala i luga o Aikupito

Aoao atu ma talanoaina le Esoto 5–6. Aotnu e te manao foi e tuuina atu se aotelega puupuu o le Esoto 7–10, ma faamalamalama atu na oo atu soo Mose ia Farao ma talosaga ia te ia ia faasaoloto Isaraelu. E ui i faailoga, o mea ofoofogia ma mala, na teena lava e Farao. E le tatau ona faaluina taimi o le vasega e iloilo taitasi ai faailoga, mea ofoofogia, ma mala.

- Na faapefea ona tali mai Farao i le taimi muamua na talosaga atu ai Mose ma Arona ia te ia e tuu le fanauga a Isaraelu e o? (Tagai Esoto 5:1–9.) Na faapefea ona tali mai le fanauga a Isaraelu i lea tofotofoga? (Tagai Kenese 5:15–21.) Na faapefea ona tali atu i ai Mose? (Tagai Esoto 5:22–23.) O le a le mea e mafai ona tatou aoao mai le tala? (Tasi le mea tatou te aoao mai o le manaomia o le onosai i puapuaga. O le a faataunuuina e le Alii ana folafolaga, atonu o le a ia le faia i lea lava taimi po o le a ia le faia foi ise auala ua tatou manatu e ono faia ai.)
- Ina ua maea ona faaopoopo atu e Farao avega a Isaraelu, na toe tuuina atu e le Alii ana folafolaga ia Mose. O a nei Folafolaga? (Tagai Esoto 6:9.) Aisea e le toe faalogo ai nisi o i tatou i perofeta ma le toe talitonu ai i folafolaga a le Alii i taimi o tofotofoga? E mafai faapefea ona tatou faatumauina le faatuatua i le Atua i taimi o puapuaga?
- Na faapefea ona tali mai Mose ina ua talosaga atu le Alii ia te ia ia toe oo atu i luma o Farao i le taimi lona lua e toe talosagaina le faasaoloto o Isaraelu? (Tagai Esoto 6:10–12.) Ia faailoa atu atonu i nisi o taimi tatou te lagonaina ai le faale loto e fai le mea ua fai mai ai le Alii ona o le fefe pe ona ua tatou manatu e le mafai ona faataunuuina. Na faapefea e le Alii ona fesoasoani ia te oe ina ua e lagonaina le masalosalo ma le fefe?

### 3. Ua faatonuina e le Alii Mose i le Saunia o le Paseka.

Aoao atu ma Talanoaina Esoto 11–13

- O le a le faamoemoega o le Paseka muamua? (Tagai Esoto 12:12–13, 22–23.) Aisea na manao ai le Atua ia faaauau pea e Isaraelu i tausaga o lumanai ona tausia le Tausamiga o le Paseka? (Tagai 12:24–27, 42; 13:1–10.)
- Ia famalamalama atu e le gata i le faamanatu atu ia Isaraelu o le Atua na pui-puia i latou mai le mala o le oti ma faasaoloto mai i latou mai tagata Aikupito, o le Paseka foi ua avea ma faailoga o se mea taua o le a tupu i le lumanai. O le a lenei mea? (O le taulaga togiola a Iesu Keriso, le Mamoe a le Atua, e faasaolotoina i tatou mai le agasala ma le oti. Tagai 1 Koronito 5:7.) Pe faapefea ona avea le Paseka ma faailoga o le Togiola?

Atonu e te manao e faaali atu mea nei e talitutusa ai le Paseka ma le taulaga togiola a Iesu Keriso:

- a. Na tatau ona faaaogaina e le fanauga Isaraelu se uluai mamoe poa ua lelei atoatoa i le Paseka (Esoto 12:5). O Iesu Keriso o le uluai Atalii o le Atua, le Tamai Mamoe a le Atua lē pona, e leai foi sona leaga (1 Peteru 1:19).
  - e. Na tatau ona sausau e le fanauga a Isaraelu pou o faitotoa i le toto o le mamoe e faasao ai a latou ulumatua mai le oti (Esoto 12:7, 22–23). O le toto o le Alii Faaola, lea na ia faamaligi i Ketesemane ma luga o le satauro, e faamamaina ai e faamaoni ma laveai ai latou mai le oti faaleagaga (Mosaea 4:2).
  - i. Na tatau ona aai le fanauga Isaraelu i le areto e lei faafefeteina (Esoto 12:8, 15–20). “O le fefete sa vaai i ona po anamua o se faailoga o le leaga ona e faigofie lava ona faaleaogaina ma leaga ai. . . . Mo le fanauga a Isaraelu, o le aai ai i le areto e lei faafefeteina o se faailoga o lo latou aai i le areto e leai se leaga po o se le mama, o le Areto o le Ola, o Iesu Keriso lea (tagai Ioane 6:35)” *Old Testament Student Manual; Kenese 2–Samuelu* [1981], 119). O le aveeseina o le fefete o loo tau mai ai le salamo, po o le aveesea o le agasala mai le olaga o se tagata.
  - o. Na tatau ona aai vave le fanauga a Isaraelu i le aiga o le Paseka (Esoto 12:11). Faapei o le fanauga a Isaraelu, e manaomia lo tatou tali naunau atu ma ia vave i le faasaolotoga ua ofo mai e le Faaola ia i tatou.
- Le talisuaga mulimuli, na faatulaga ai e le Faaola le faamanatuga e sui tulaga i le Paseka (Mataio 26:19, 26–28). Ia faaalia le ata o le Faaola, ma faapipiina le upu *Paseka* i le itu tauagavale ma tuu le upu *Faamanatuga* i le itu taumatau. O a mea e talitutusa ai le Paseka ma le faamanatuga? (Tagai Esoto 12:14; 13:9–10; MFF 20:75–79.)

Na aoao mai Elder Howard W. Hunter e faapea, i le tausamiga o le Paseka lea ua iloa nei o le talisuaga mulimuli, “o le vai ma le uaina”, nai lo manu ma laau oona, ua avea ma mea e fai ma faatusa o le tino ma le toto o le Tamai Mamoe sili, o faatusa e tatau ona ai ma inu ma le faaaloalo ma ia faia mo lona faamanatuga e faavavau.

“I lenei uiga faigofie ae taua naua, na faatulagaina ai e le Faaola le sauniga lea ua iloa nei o le faamanatuga o le Talisuaga a le Alii. I le puapuaga o Ketesemane, le taulaga o Kalevario, ma le toetu mai i le tuugamau o le togalaau o Ketesemane: Tagai Mataio 26:36 o le taulaga o Kalevario o lona uiga “o lana taulaga” na faataunuaina e Iesu le tulafono anamua ma aumai ai loa le tisipenisione fou e faavae i luga o se malamalamaaga maualuga ma le paia o le tulafono o le taulaga.

O le a le toe manaomia ai le tagata e ofo atu le mamoe ulumatua o le lafu, aua o le Ulumatua a le Atua na oo mai e ofo atu ia lava o se taulaga e leai se mea e gata mai ai ma le faavavau” (Lipoti o le Konafesi, Ape. 1985, 22; po o le *Liahona*, Iulai 1985, 19).

- Na faapea mai Elder Howard W. Hunter e faapea, e pei lava ona avea le Paseka ma feagaiga o le puipuiga mo Isaraelu anamua, o le faamanatuga o le feagaiga o le saogalemu” mo i tatou (Lipoti o le Konafesi, Ape, 1974, 24; po o le *Liahona*, Iulai 1974, 18). E faapefea ona avea le faamanatuga ma feagaiga o le saogalemu mo i tatou? (O le faamanatuga e faamanatu mai ai ia i tatou le taulaga togiola a le Faaola, e aumaia le saogalemu faavavau i le faasaolotoina o i tatou mai noataga o le agasala ma le oti. O feagaiga tatou te faafouina ao tatou fetagofi atu i le faamanatuga e fesoasoani foi ia i tatou i le aumaia o le saogalemu e faavavau.

Na fesili Elder Jeffrey R. Holland e faapea:

“Tatou te vaai ea i [le faamanatuga] o lo *tatou* paseka, faamanatuga o lo tatou saogalemu ma le faasaolotoga ma le faaolataga?

“I le tele o mea e ono maua mai pe leiloa foi, o lenei sauniga e faamanatuina ai lo tatou sao mai le agelu o le pogisa e tatau ona manatu atoatoa i ai nai lo le tulaga o loo i ai i nisi taimi. E tatau ona avea ma se taimi o manatunatuga loloto ma le faaaloalo tele. E tatau ona uunai ai lagona ma vaaiga faale-agaga” (Lipoti o le Konafesi, Oke. 1995, 68).

- I lenei faatonuga e uiga i le Paseka, na faamamafa mai ai e le Alii le manaomia o le aoao atu e matua o a latou fanau e uiga i lona taua (Esoto 12:26–27; 13:8, 14). Aisea e taua ai i matua o fanauga a Isaraelu ona faia lea tulaga? Faamata e faapefea ona faaaogaina lea tulaga i o tatou nei aso? (E faapei o Isaraelu anamua, e tatau ona tatou aoao ia tatou fanau le taua o le faamanatuga ma isi sauniga o loo faamanatu mai ai ia tei tatou le aao o le Alii i le faasaolotoina mai o i tatou mai le agasala ma le oti.)

#### 4. Ua savalia e le fanauga a Isaraelu le Sami Ulaula.

Aoao atu ma talanoaina le Esoto 14.

- Ina ua mavae ona tuuina atu e Farao le fanauga a Isaraelu e o ese atu ma Aikupito, ona ia faasagatau atu lea ia tei latou i le tuuina atu o lana vaegaau e tuliloa i latou (Esoto 14:5–9). O le a le mea na fai e le fanauga Isaraelu ina ua latou vaai atu ua lalata mai le vaegaau? (Tagai Esoto 14:10–12.) O le a le mea na tau atu e Mose i le fanauga a Isaraelu ina ua faaletonu lo latou faatua-tua? (Tagai Esoto 14:13–14.) E mafai faapefea ona tatou atinae le faatua-tua e lava lona malosi e lagolagoina i tatou pe a tumu i tatou i le fefe?
- Na faapefea ona faasaoina e le Alii le fanauga Isaraelu mai le lalata mai o le vaegaau a Aikupito? (Tagai Esoto 14:21–31.) E mafai faapefea e lenei tala ona fesoasoani ia i tatou i taimi o tofotofoga?

Faaiuga

Molimau atu e pei ona faataunuuina e le Alii lana folafolaga e faasaoloto le fanauga a Isaraelu ma le nofopologa, o le a ia faataunuuina foi lana folafolaga ia i tatou. Uunai le vasega ina ia faaopoopo lo latou agaga faafetai mo le taulaga togiola a le Faaola ma ia fetagofi atu i le faamanatuga ma le agavaa ma le mafau-fau atoa i ai, ia tausia le feagaiga o le “manatua pea o ia” (MFF 20:77).



---

## Manatu Faaopoopo e Aoa Atu Ai

O mataupu o loo taua i lalo e faaopoopo i le ootoga o le lesona fautuaina. Atonu e te manao e faaoga se tasi o nei manatu pe sili atu foi e avea o se vaega o le lesona.

### 1. O le faafoliga sese e Satani o le mana o le Atua

- O le a le mea a Farao na fai ao faaali atu ia te ia e Mose ma Arona faailoga o le mana o le Atua? (Tagai Esoto 7:8–12, 17–22.) O le a le mea e mafai ona tatou aoao mai e uiga ia Satani mai nei fuaiupu?
- O a nisi o ala a Satani e faafoliga sese ai le mana ma faamanuiaga a le Atua i aso nei? O a meaalofa ua tuuina mai ia i tatou e le Alii e fesoasoani ia i tatou ina ia iloa le lelei mai le leaga? E mafai faapefea ona tatou siitia lo tatou tomai e iloa le lelei mai le leaga?

### 2. O mala

- Aisea na aumaia ai e le Alii mala i luga o Aikupito? (Tagai Esoto 7:5, 17; 8:10; 9:14, 29; 10:2; 14:4.) O le a le faalogona o Farao i mala? (Tagai, mo se faataitai-iga, Esoto 8:8, 15, 25, 28, 32.) Aisea na le afaina ai le fanauga Isaraelu i mala? (Tagai Esoto 9:4–6, 23–26; 10:22–23; 11:4–7.)

### 3. O le Paseka

A o e aoao atu le avea o le Paseka ma faailoga o le Togiola a Iesu Keriso, atonu e te manao e maua mai mea nei e i lalo e faamalamalama atu ai faailoga o le Paseka.

- a. Ata o se mamoe ma se faitotoa.
- e. Tortilas, po o masi, (e fai ma faataitai o falaoa le faafefeteina mafolafola).
- i. Latisi lau uumi matolutolu (mo laau oona).
- o. O se pea seevae (e fai seevae o le fanauga a Isaraelu ma aai, e faamanatu ai lo latou faanatinati ese mai Aikupito).

### 4. “Na papatisoina uma i le . . . ao ma le sami” (1 Korinito 10:2)

Atonu e te manao e faitau 1 Korinito 10:1–4, o loo aoao mai ai Paulo o le fanauga a Isaraelu na papatisoina i totonu o le ao ma totonu o le sami. I le faamalamalama o le taua o leni mea, na saunoa mai ai Elder Bruce R. McConkie e faapea, “O loo faapea mai [Paulo] e oo lava ia Isaraelu ina ua latou pasi atu le Sami Ulaula, ua latou o ese mai le faalelalolagi o Aikupito, ma e faapena foi o latou fanau Kerisiano, e ala atu i le papatisoga, ona faafitia le manao o le tino ma ia ola i olaga atua” (*Doctrinal New Testament Commentary*, 3 vols. [1966-73], 2:355).

# “E Fai Outou ma Oloa Taua Mo’u”

## Lesona 14

Esoto 15–20; 32–34

---

**Faamoemoega** Ina ia uunai le vasega ia fetagofi atu i le vai faale-agaga ma le falaoa a le Alii; lagolagoina ana taitai filifilia, ma usitai i ana poloaiga ina ia mafai ona ia faia i latou ma “nuu paia” (Esoto 19:6).

---

- Sauniuniga**
1. Suesue ma le agaga tatalo mau nei:
    - a. Esoto 15:22–27; 16:1–31; 17:1–7. Ua muimui le fanauga a Isaraelu ona ua latou fia feinu ma fia aai, ma ua tuuina atu e le Alii vai, manai, ma salu (quails).
    - e. Esoto 17:8–13; 18:13–26. Ua sau Amaleka e tau ma Isaraelu. Ua malo Isaraelu ao sii i luga lima o Mose, ua malo Amaleka ina ua lelava Mose ma tuu i lalo ona lima. Ua taofi i luga lima o Mose e Arona ma Huro ma ua manumalo ai Isaraelu i le taua (17:8–13). Ua mulimuli Mose i le fautuaga a Ietero ia tofia-ina ni faamasino ma faasafua atu i ai le pule ia i latou (18:13–26).
    - i. Esoto 19–20. Ua feiloai le Alii ma Mose i luga o le Mauga o Sinai ma tuuina atu ia Isaraelu Poloaiga e sefulu.
    - o. Esoto 32–34. Ua mauaina e Mose papa maa o loo i ai faatonuga mai le Alii, ae ua taeia ina ua ia foi mai Sinai ma vaaia tagata ua ifo atu i se povi auro (31:18; 32:1–24). Ua aveeseina mai e le Alii sauniga o le Perisitua Mekisateko mai ia Isaraelu ma tuuina atu ia i latou le tulafono maualalo, o le tulafono a Mose (Faaliliuga a Iosefa Samita, Esoto 34:1–2). Ua taina e Mose papa maa fou e sui ai papa muamua na ia taeia, ae o papa maa fou ua le aofia ai “upu o le feagaiga faavavau o le perisitua” (Esoto 34:1–5; Faaliliuga a Iosefa Samita, Teuteronome 10:2). Ua osia feagaiga e tagata ia usitai i le tulafono a Mose (34:10–35).
  2. Mau faitau faaopoopo: Salamo 78; 1 Korinito 10:1–11; Mataupu Faavae ma Feagaiga 84: 84:19–27.
  3. Aumai i le vasega ni tusi po o nisi mea mamafa pe afai e te faaaogaina le lesona o mea o loo i itulau 64–65.
  4. Afai o maua le *Old Testament Video Presentations* (53224), atonu e te manao e faaali le “Modern Idolatry,” e 7 minute, o se vaega o le lesona.
- 

### Faalautelega Fautuaina o le Lesona

Gaoioiga e  
Faatosina Mai Ai

Atonu e te manao e faaaoga se tasi o gaoioiga nei (po o sa oe lava gaoioiga) e amata ai le lesona.

- Mafaufau faapea e tatau ona e malaga atu i se vaomatua e te lei oo muamua i ai ma e le o i ai i se faafanua. E faapefea ona e saunia mo lenei malaga? (Atonu e eseese tali, ae tasi se sauniuniga fesoasoani o le maua lea o se taiala.)

- O a ni tomai e te mana o ia mau e se taiala o le a taitaiina oe i vaega o le vaomatua. (Atonu e eseese tali, ae o le taiala e tataua ona iloa le vaega o le vaomatua, ma ia faatuatuaina.)
- O ai le taiala mo Mose ma le fanauga Isaraelu ina ua latou tuua Aikupito ma oo atu i le vaomatua? (O le Alii.)

Ia faailoa atu o mea na tutupu i le fanauga a Isaraelu ao latou malaga i vaomatua e mafai ona aoao mai ia i tatou ni lesona taua ao tatou malaga atu i le olaga faaletino. O se tasi o lesona taua o le e mafai ona tatou faatuatua i le Atua e taitai ma vaaia i tatou e pei ona ia faia i le fanauga Isaraelu.

## Mau Talanoaina ma le Faaogaina

A o e aoaoina atu nei mau, ia talanoaina pe faapefea ona faaoga i le olaga i aso taitasi. Uunai tagata o le vasega e faamatala ni aafiaga e faatatau i mataupu ua taua i le mau. Ona e faigata ona fesili i fesili uma ma talanoaina vaega uma o lenei lesona, ia filifili ma le agaga tatalo le mea e sili ona talafeagai ma mea o loo manaomia e tagata o le vasega.

### 1. Ua tuuina mai e le Alii vai, manai ma le salu (quails) mo le fanauga Isaraelu

Aoao atu ma talanoaina le Esoto 15:22–27; 16:1–31; ma le 17:1–7.

Ina ua mavae le savalia e le fanauga a Isaraelu o le Sami Ulaula, na faatonuina ai e le Alii Mose ia taitai atu i latou i le nuu o le folafolaga. Ae muamua ona tofotofa e le Alii le faatuatua o le fanauga Isaraelu i le vaomatua. O le toatele o tagata e lei i ai se faatuatua, faitio atu i le Atua nai lo le liliu atu ia te ia. Ae ui i lea, na tuuina mai e le Atua le vai mo lo latou fia inu, ma le manai ma le salu pe a fiaai.

- O le a le faafitauli na feagai ma le fanauga Isaraelu i le Esoto 15:22–24 ma le 17:1–3? Na faapefea ona tali atu Mose ina ua muimui tagata ia te ia? (Tagai Esoto 15:25; 17:4. Na ia liliu atu i le Alii mo se fesoasoani.) O le a le mea e mafai ona tatou aoao mai i le tali a Mose? Na faapefea ona tali atu le Alii i le tatalo a Mose mo se fesoasoani? (Tagai Esoto 15:25–26; 17:5–7.)
- Na tuuina atu e le Alii le vai faaletino ma le vai faaleagaga mo le fanauga Isaraelu. O le vai faaletino na maua mai le papa na ta e Mose; O le “vai inu faaleagaga” na maua mai le “Papa faaleagaga,” o Keriso lea (1 Korinito 10:4). O le a le vai faaleagaga e puna mai ia Keriso? (Tagai 1 Nifae 11:25.) E mafai faapefea ona tatou inu i lena vai? O le a le folafolaga ia i latou o e inu i lea vai? (Tagai Ioane 4:14; MFF 63:23.)
- O a faafitauli na feagai ma le fanauga Isaraelu i le Esoto 16:2–3? Na faapefea ona tali mai le Alii? (Tagai Esoto 16:4, 11–15.) E le gata i le faamalieina o le fia ai o tagata o a nisi faamoemoega o le tuuina mai o le manai?
  - a. O le a faali atu i le Alii pe o le a usitai ona tagata ia te ia (Esoto 16:4, 16–31).
  - e. O le a tuuina atu i tagata i aso taitasi le faamanatu o le mana o le Atua ma lona alofa (Esoto 16:12).
  - i. O le a aoao ai tagata e le na o “meaai e ola ai, a o mea uma e tulei mai i le fofoga o Ieova” (Teuteronomie 8:3).
  - o. O le a faamaulalo ai tagata ma fesoasoani mo le mauaina o le faolataga (Teuteronomie 8:16).
- E faapefea ona e manatu o le tuuina mai o le manai o le a fesoasoani i le faataunuaina o nei faamoemoega? E faapefea ona faataunuaina e le Alii nei faamoemoega i o tatou olaga?

- E faapea ona faatusa le manai ia Keriso? (Tagai Ioane 6:35.) O le a le eseesega o le areto o le ola ma le manai? (Tagai Ioane 6:48–51.) E faapefea ona tatou tagofia i aso uma le areto o le ola a Keriso?
- Sa manaomia e Isaraelu le faaputuina o le manai i aso uma mo le tausia o lo latou malosi. E faapefea ona faatusa lenei mea i mea e tatau ona tatou faia ina ia faatumauina ai lo tatou malosi faaleagaga? (E pei ona tatou moomia i aso uma taumafa mo le faatumauina o lo tatou malosi faaletino, e faapena foi ona tatou moomia taumafa i aso uma mo le faatumauina o lo tatou malosi faaleagaga. E le mafai ona tatou maua taumafa faaleagaga pe afai na o lo tatou aoao i tusitusiga paia ma tatalo i ni mea faapitoa.)
- O le a le mea e masani ona tupu pe a faamoea e Isaraelu le manai? (Tagai Esoto 16:19–20.) O le a le mea e tupu pe a o latou faamoea le manai e sauniuni mo le Sapati? (Tagai Esoto 16:22–25.) E faapefea ona tatou faaogaina lenei mataupu i a tatou sauniuniga i vaiaso taitasi mo le Sapati?
- O le a le mea e tupu i tagata Isaraelu pe ana o latou taumafai e malaga i le vao e aunoa ma le fesoasoani a le Alii? O le a se mea e tupu ia i tatou pe a o tatou taumafai e malaga i lenei olaga e aunoa ma le fesoasoani a le Alii?

**2. Ua sii i luga e Arona ma Huro lima o Mose ina ia malo ai Isaraelu i le taua ma Amaleka. Ua mulimuli Mose i fautuaga a Ietero e filifili ni faamasino ma tuuina atu le pule ia i latou.**

Aoao atu ma talanoaina le Esoto 17:8–13 ma le 18:13–26. Faamanino atu o nei tala e lua o lo o aoao mai ai ia i tatou le taua o le lagolagoina o taitai o le Ekalesia.

- Sa tau tagata Amalekia ma le fanauga a Isaraelu mo le tele o tausaga, e amata mai i le taimi o Mose. Sa faapefea ona faatoilaloina e Isaraelu tagata o Amaleka i le taua e pei ona faamatalaina i le Esoto 17:8–13? (Ina ua lagolagina e Arona ma Huro Mose e ala i lo la siiina i luga o ona lima, sa manumalo Isaraelu i le taua.) O a ituaiga o taua faaleagaga o lo o tatou tauina i lenei vaitaimi? E faapefea e le lagolagoina o le perofeta ona fesoasoani ina ia o tatou manumalo mai nei taua?

Sa saunoa mai Peresitene Ezra Taft Benson: “Ou te manatua ai le tala e uiga i le nofo o Mose i luga o le mauga ma sii i luga ona lima ina ia malo le autau a Isaraelu. A sii pea i luga ona lima, ua malo Isaraelu, a e a tuu i lalo ina ua vai-vai, ona malo lea o au a le fili. Ona o atu lea o Arona ma Huro ma ‘taofi i luga ona lima, o le tasi i le isi itu, ma le tasi i le isi itu,’ ona manumalo ai lea o Isaraelu (Esoto 17:12). O le a faapea foi ona tatou manumalo pe a tatou sii a’e i luga lima o auauna filifilia a le Atua” (Lipoti o le Konafesi, Aperila, 1986, 98; po o le *Liahona*, Iulai 1986, 67).

- O le a le popolega o Ietero ina ua ia vaaia tagata o o atu ia Mose i le aso atoa ma le po? (Tagai Esoto 18:13–18.) O le a le mea na fautuaina ai e Ietero Mose e fai? (Tagai Esoto 18:19–23.)
- O le a le matafaioi a se perofeta o lo o taua i le Esoto 18:16–20?

Atonu o le a e manao i se tagata o le vasega na te sailia nei matafaioi i fuaiupu ia, ona tusia lea o tali i luga o le laupapa. Atonu foi e te manao e faaoga le lesona faatino lea: Tofi se tagata o le vasega e faaloloa ona lima. A taua le matafaioi muamua, ona tuu lea o se tusi po o se mea mamafa i luga o lima o lea tagata. Ia faaopoopo atu se tasi tusi po o se mea mamafa ao faitau mai nei matafaioi taitasi.

- a. Avea ma faamasino i tagata (Esoto 18:16).
  - e. Avea ma sui o tagata i luma o le Atua (Esoto 18:19).
  - i. “Faamalamalama atu ia te i latou faatonuga ma tulafono” (Esoto 18:20).
  - o. “[Faailoa] atu ia te i latou le ala latou te savavali ai” (Esoto 18:20).
  - u. “[Faailoa] atu ia te i latou. . . galuega e tatau ona latou faia” (Esoto 18:20).
- E faapefea ona tatou siitia o tatou lima ma faamama i avega a o tatou perofeta ma aposetolo i lenei vaitaimi? (Tagai MFF 21:4–5; 107:22. Ao tuuina mai ni fautuaga a tagata o le vasega, ia aveese nisi o tusi po o mea mamafa o lo o i luga o lima o le tagata o lo o uuina tusi.)
  - E faapefea ona tatou lagolagoina taitai o le Ekalesia i o tatou nofoaga? (E tatau ona aafia i tali ni talanoaga lelei e uiga ia i latou, galue ma le faamaoni i o tatou valaauga i le Ekalesia, ma avea ma ni faiaoga o aiga lelei ma ni faiaoga asiasi lelei.)
  - O faapefea ona faamanuiaina oe i lou lagolagoina o taitai o le Ekalesia? (Atonu e te manao e faaoga le MFF 21:6 i lenei talanoaga.)

### **3. Sa Feiloai le Alii ma Mose i le Mauga o Sinai ma Tuuina atu i ai Tulafono e Sefulu.**

Aoao atu ma talanoaina le Esoto 19–20.

I le tolu masina a o i ai tagata Isaraelu i le vao, sa finagalo le Alii e faatuina lana feagaiga ma i latou (Esoto 19:5–6). I se vaega o lenei feagaiga, sa ia faali atu Tulafono e Sefulu ia Mose.

- A o tolauapi le fanauga a Isaraelu i le Mauga o Sinai, o le a le mea na folafola atu i ai e le Alii pe afai latou te usiusitai? (Tagai Esoto 19:3–6. O le a avea i latou ma “oloa taua, . . . ma malo o le ositaulaga, ma nuu paia.”) O a uiga o nei folafolaga? E faapefea ona faaoga nei folafolaga ia i tatou i lenei vaitaimi?  
O le uiga o nei folafolaga, o le a avea Isaraelu ma tagata o le feagaiga a le Alii, e fiafia i ai nuu uma ma filifilia e tuuina atu le perisitua ma le talalelei i tagata uma (tagai foi i le Teuteronome 7:6; 14:1–2; 1 Peteru 2:9).
- O a ni aafiaga na finagalo le Alii e oo i ona tagata i le Mauga o Sinai? (Tagai Esoto 19:9, 11, 16–17; MFF 84:23.) O le a le mea na finagalo le Alii e faia e ona tatou ae latou te le i feiloai? (Tagai Esoto 19:19, 14.)
- O le Mauga o Sinai o se nofoaga paia sa finagalo le Alii e feiloai ai ma ona tagata ma fetalai atu ia i latou. O a ni nofoaga paia ua ia saunia tatou te maua ai ia lava faamanuiaga? (Malumalu, tagai MFF 97:15–16; 109:12–13.) Tofi ni tagata o le vasega e faamatata pe faapefea ona fesoasoani le malumalu latou te faalagoina ai le siufofoga o le Alii ma lagona lona faatasi ma i latou.
- O tulafono muamua e fa i le Esoto 20 o lo o aoao mai ai le va o i tatou ma le Atua (Esoto 20:3–11). O faapefea ona faali mai ia i tatou i lenei vaitaimi le tulafono o le tapuai i le Alii ma ia leai ni atua ese i ona luma? O a ni atua sese o lo o tapuai i ai nisi tagata i ona po nei? (Tagai 1 Samuelu 15:23; Efeso 5:5; MFF 1:15–16.)

Sa saunoa mai Peresitene Spencer W. Kimball:

“O le ifo i tupua o se matuai agasala lava . . . O tupua i ona po nei e mafai ona faamatalaina i lavalava, aiga, pisinisi, masini, taavale, vaa e fiafia i ai, ma le tele o isi mea faaletino o lo o aveesea i tatou mai le ala o le Atua. . . .

“O mea tatou te mafaufauina e mafai ona avea ma atua sese po o tupua ia i tatou. O tikeri ma faailoga e mafai foi ona avea ma tupua. . . .

“O le toatele o tagata latou te faamuamua ona fausia ma faatauina meaafale ma taavale—ona le mafai ai lea ona totogi a latou sefuluai. O ai o lo o latou tapuai i ai? E mautinoa lava e le o le Alii o le lagi ma le lalolagi. . . .

“O nisi o lo o latou tapuai atu i fanafanaga, i fagotaga, i aso malolo, i tafaoga ma fiafiaga i faaiuga o vaiaso. O nisi o lo o avea ma tupua taaloga, peisipolo, lakapi, ma tagapolo. . . .

“E le gata i lea, o se tasi o tupua o lo o tapuai i ai tagata o le malosia lea ma le mamalu . . . O nei atua o le malosia, tamaoaiga ma ona aafiaga o lo o alu ai le tele o lo tatou taimi e pei lava o povi auro a le fanauga a Isaraelu i le vao” (*O Le Vavega o le Faamagalō Atu* [1969], 40–42).

- O a nisi auala o lo o ta’u fua ai e tagata le suafa o le Atua? Aisea e taua ai lo tatou le ta’u fuaina o lona suafa?
- Aisea e taua ai ia i tatou le tausia o le Sapati ina ia paia? (Tagai Esoto 20:8; 31:16–17; Isaia 58:13–14; MFF 59:9–10.) E faapefea ona tatou filifilia ni gaoioiga lelei mo le Sapati? E faapefea ona faamanuina oe i lou tausia o lena aso ina ia paia?
- Ia talanoaina le tulafono e ono o lo o faaalua ai le popolega i lo tatou va ma isi tagata (Esoto 20:12–17). E faapefea ona faaleleia lo tatou va ma isi i lo tatou usitaia o nei tulafono? (Atonu e te mana’o e taula’i atu i tulafono taitasi, i le faamatalaina o o latou uiga ma talanoaina i taimi e tatau ai.)

#### 4. Ua faamatalaina e le Alii tulafono a Mose

Aoao atu ma talanoaina le Esoto 32–34.

Ina ua talanoa le Alii ma Mose i le Mauga o Sinai, sa ia faaali atu se tulafono o lo o aofia ai sauniga o le Perisitua Mekisateko (MFF 84:19–23). E ui i lea, o amioga ifo i tupua a tagata Isaraelu, ua faaalua ai lo latou le saunia e ola i le atoatoaga o le talalelei (Esoto 32:1–9; MFF 84:24). Ona ua o latou vave faagaloina le Alii, o lea na ia aveesea ai le Perisitua Mekisateko ia i latou ma faaalua ia i latou se tulafono laitiiti—o le tulafono a Mose. (Faaliliuga a Iosefa Samita, Esoto 34:1–2; MFF 84:25–27).

O le tulafono a Mose e le o suitulaga i tulafono, feagaiga, po o mataupu o le talalelei. Nai lo lena, ua saunia “o se tulafono o taulaga ma sauniga, o le tulafono latou te tauti tonu i ai i lea aso ma lea aso, ina ia latou manatu pea i le Atua, ma mea e tatau ona latou faia ia te ia” (Mosaea 13:30). O le tulafono a Mose ua aoaoina tagata e tau atu a latou agasala, toe faia mea lelei, mulimuli i tulafono i le ofoina atu lea o manu mo taulaga, ia tausia o latou tino i le soifua maloloina, lagolagoina le galuega a le Alii, tuuina atu le faafetai, ma ia faalelei ma le Atua.

- Aisea na tuuina atu ai e le Alii le tulafono a Mose i le fanauga a Isaraelu? (Tagai Kalatia 3:23–24; Mosaea 13:29; Alema 25:15–16; MFF 84:19–27.) E faapefea ona fesoasoani lena tulafono i le faapaiaina o Isaraelu ma aumaia i latou ia Keriso? (Tagai Mosaea 13:30; Alema 34:14–15.)
- O anafea na faataunuaina ai tulafono a Mose? (Tagai 3 Nifae 15:4–10.) I le taimi nei e le o toe manaomia e le Alii ni taulaga i manu, lea sa avea ma tulaga taua i tulafono a Mose, ao a tulaga ua ia moomia tatou te faia? (Tagai 3 Nifae 9:19–22.) O le a le uiga o le tuuina atu o le loto momomo ma le agaga salamo?

Ua aoao mai Elder M. Russell Ballard e faapea:

“E ui lava ina faataunuaina le tulafono a Mose, o mataupu o le tulafono o le taulaga o lo o faaauau pea ona avea ma vaega o mataupu o le Ekalesia.

“Ao faaauau pea ona avea le faamoemoega autu o le tulafono o le taulaga ma tofotofoga o i tatou e omai ia Keriso, e lua ni suiga na faia ina ua maea le taulaga a Keriso. Muamua, o sauniga o le faamanatuga ua suitulaga i sauniga o [manu] taulaga, ma le lua, ua suia le taulaga mai le manu a le tagata i le tagata lava ia. I se isi tulaga, ua suia le taulaga mai le mea na ofoina atu i le tagata na ofoina . . .

“. . . Ina ua maea lana galuega i le lalolagi, sa suia e Keriso le tulafono o le taulaga i se vaega fou. . . . Mai le moomia e le Alii o se manu a le tagata po o fua o ana faatoaga, ua finagalo nei o ia e tiai uma uiga e le o ni uiga faale-atua. O se faaitaiga mauuluga lenei o le tulafono o le taulaga; e pai atu i totonu o le agaga o le tagata” (*The Law of Sacrifice* [address delivered at the Church Educational System Symposium, 13 Aug. 1996], 5).

---

Faaiuga

Molimau atu i tagata o le vasega afai latou te tagofia le vai ma le areto paia a le Alii, lagolagoina ona taitai filifilia, ma usitai i tulafono, o le a ia valaaulia i tatou i lona mauga paia—o le malumalu. O iina e mafai ai ona latou fetai ai ma ia, maua ai ana tulafono, maua lona mamalu, ma faamamaluina e avea ai faapei o ia.

---

## Manatu Faaopoopo e Aoao Atu Ai

O mataupu o lo o taua i lalo o se ootoga o le lesona fautuaina. Atonu e te manao e faaoga se tasi o nei manatu pe sili atu foi e avea o se vaega o le lesona.

### 1. O Tulafono e Sefulu

Ia iloa o Tulafono e Sefulu o lo o taua mai foi i le Teuteronome 5:5–21, Mosaea 12:33–36 ma le 13:12–24, ma le MFF 42:18–27 ma le 59:5–16. Talanoaina fuaitau nei mo nisi malamalamaaga i Tulafono e Sefulu.

### 2. O le povi auro

Atonu e te manao e talanoaina le tala o le fausia ma le tapuai i le povi auro e pei ona taua i le Esoto 32. E tele ni mataupu taua e mafai ona maua mai i lenei tala e pei o le lua o lo o taua i lalo:

- a. O auala tuai o talitonuga e faigata ona tuu. E ui lava ina tuua e Isaraelu Aikupito i le faaletino, ae e le i faasaolotina faaleagaga lava mai ona aafiaga. Ina ua maea ona faalogoina e Isaraelu le siufofoga o le Atua o tuuina mai Tulafono e Sefulu mai Sinai, sa vave ona latou solia tulafono e lua muamua.
- e. E taua tele le teena o uunaiga sese a a tatou uo. Sa faamatuu atu Arona i manaoga lē tonu o le fanauga a Isaraelu. I nisi taimi, o taitai ma matua e tatau ona faapea mai “leai,” e ui lava ina aafia ai ni lagona o e o loo latou latou vaai.

# “Vaai i le Atua ma Ola Ai”

## Lesona 15

Numera 11–14; 21:1–9

---

**Faamoemoega** Ina ia uunaia tagata o le vasega e faatoilalo manaoga faalelalogagi ae taula’i atu i le Faaola ma ana perofeta mo taitaiga.

---

### Sauniuniga

1. Suesue ma le agaga tatalo mau nei:
  - a. Numera 11. Ua muimui Isaraelu e uiga i le manai, ma ua mananao e faaoga aano o manu (11:1–9). Sa fesili atu Mose i le Alii mo se taitaiga ma se fesoasoani i le aveeseina o avega mamafa o lo o ia te ia (11:10–15). E pei ona faatonuina e le Alii, sa faapotopoto e Mose ni alii se 70 e fesoasoani ia te ia (11:16–17, 24–30). Sa tali atu le Alii i manaoga o Isaraelu i aano o manu e ala i le tuuina atu o salu (quails) e tele ma fasia i latou i mala ona o lo latou mana o lasi (11:18–23, 31–35).
  - e. Numera 12. Ua muimui Miriama ma Arona ia Mose ona o le fafine Kuso na ia faaipoipo atu i ai, ma ua luiina o ia e fai ma o latou pule faamalumalu (12:1–3). Ua aoaiina ma faasalaina e le Alii Miriama ma Arona ona o lo laua taumuimui (12:4–16).
  - i. Numera 13–14. Ua faatonuina e Mose ni alii se toa 12 e saili le laueleele o Kanana (13:1–20; ia manatua o “Iosua [Jehoshua] o loo ta’ua i le fuaiupu e 16 o Iosua lava lena). Sa latou toe foi atu ma ni lipoti matagofie o mea e maua i le eleele, ma sa matatau i latou uma ma sa mananao e toe foi atu i Aikupito, se i vagana ai Iosua ma Kalepo (13:21–14:10.) Sa tau atu e le Alii ia Mose, o i latou uma o le fanauga a Isaraelu sa muimui ma lē faatuatua, o le a feofea’i ai lava i le vao mo le 40 tausaga, se ia maliliu tupulaga matutua uma ae vagana ai Iosua ma Kalepo (14:11–39).
  - o. Numera 21:1–9. Sa faaumatia e Isaraelu tagata Kanana na faasagatau mai ia i latou (21:1–3). Ona auina mai lea e le Alii o gata uogo, ma utia ai Isaraelu sa muimui (21:4–6). Sa fausia e Mose se gata uogo, ma tuu ae i luga i se laau, ma tau atu i tagata afai latou te vaai atu i ai, o le a faaolaina i latou (21:7–9).
2. Mau faitau faaopopo: Ioane 3:14–16; 1 Nifae 17:41; Alema 33:18–22; 37:46–47; Helamana 8:13–15.
3. Afai e te faaogaina le gaioiga e faatosina mai ai, ia tusia i se pepa lautele upu nei: *O le Nuū Folafolaina*.
4. Afai e maua le ata o Mose ma le Gata Uogo, atonu o le a e manao e faaoga i le taimi o le lesona (62202).

---

### Faalautelega Fautuaina o le Lesona

Atonu e te manao e faaoga se tasi o gaioiga nei (po o sa oe lava gaioiga) e amata ai le lesona.

Tusi le upu *Aikupito* i luga o le laupapa. Ia faapipii le pepa lautele o loo tusia ai upu: *O le Nuū Folafolaina* i le isi itu o le potu. Ia uunaia se tagata o le vasega e savali mai le laupapa e agai atu i le pepa lautele, ao vaai i ona tauau i le upu *Aikupito*.



Afai e faigata i le tagata o le vasega ona pai atu i le ata, ona fai atu lea o le fesili lenei:

- Aisea e faigata ai ona e savali sao i luma a o e faasaga i tua?

Afai e faigofie i le tagata o le vasega ona pai atu i le ata, ona fai atu lea o le fesili lenei:

- O le a se mamao e mafai ona e alu ai e aunoa ma lou savali mai le laina sao? Aisea e faigata ai ona e savali sao i luma a o e faasaga i tua?

Faamatala atu o lenei vaaiga, e mafai ona faatusatusa i le malaga a le fanauga a Isaraelu mai Aikupito. E ui lava i faamanuiaga na maua mai e le fanauga a Isaraelu mai le Alii, ae o lo latou popole ma le lē lava o le faatuatua e mafua ai i le tele o taimi ona latou moomoo maimau pe ana latou le tuua Aikupito. O lo latou matap-e'ape'a i mea i Aikupito, na tuai ai ona taunuu la latou malaga i le nuu folafolaina.

Mau Talanoaina  
ma le Faaagaina

A o e aoaoina atu nei mau, ia talanoaina pe faapefea ona faaoga i le olaga i aso taitasi. Uunai tamaiti o le vasega e faamatala atu ni aafiaga e faatatau i mataupu o lo o taua i le mau. Talu ai ona e faigata ona fai atu ni fesili taitasi e aafia ai vaega uma i le lesona, ia filifili ma le agaga tatalo ni fesili o le a sili atu ona fetai ma manaoga o tagata o le vasega. Atonu e te manao e fesui ai nisi fesili ina ia fetai ma aafiaga o tagata o le vasega.

### **1. Ua tali atu le Alii i manaoga o Isaraelu mo ni aano o manu i le tuuina atu le o salu ma taia i latou i se mala.**

Aoao atu ma talanoaina le Numera 11.

- E ui lava o le manai o se faamanuiaga sili lea mai le Alii, sa amata ona muimui ai Isaraelu (Numera 11:6). O le a le mea na mafua ai lo latou muimui? (Tagai Numera 11:4–5; ua amata ona o latou mafaufau ma manaonao i meaai sa latou faaagaina i Aikupito.) O le a le leaga o le manao i mea e sili atu nai lo mea ua tatou maua?
- Ua sili atu ona mananao Isaraelu i aano o manu ma ua leiloa ai lo latou taula'i atu i le nuu folafolaina ma ua amata ona moomoo ana iloa e le tuua Aikupito (Numera 11:4–6). O a ni faataitaiga i ona po nei o le tuua e tagata o faamanuiaga silisili mo le faamalieina i manaoga faavavevave? Aisea e faia ai e tagata lea mea? E faapefea ona tatou faatoilaloina ia faaososoga?
- Sa faapefea ona tali atu le Alii i manaoga o Isaraelu i aao o manu? (Tagai Numera 11:18–20; 31–33.)
- Ua matuai mafatia Mose i agasala a Isaraelu o lea na ia fai atu ai i le Alii e aveese lona ola (Numera 11:14–15). Sa faapefea ona tuu atu e le Alii ia te ia se mapusaga? (Tagai Numera 11:16–17. E toa fitusefulu ni alii sa tofia e fesoasoani ia te ia.) O a ni faamanuiaga sili sa maua e nei alii? (Tagai Numera 11:24–29.)

### **2. Ua aoaiina e le Alii Miriama ma Arona i lo laua muimui ia Mose.**

Aoao atu ma talanoaina le Numera 12.

- Sa fai upu Miriama ma Arona ia Mose i le avea ma o latou pule faamalumalu, ia faamanino atu na o laua maua foi faaaliga (Numera 12:2). O le a le tali a le Alii i lo laua faitio? (Tagai Numera 12:5–9.) O a ni tuaoi o lo tatou aia tatau i le mauaina o faaaliga?

Sa saunoa mai Elder James E. Faust: “O perofeta, tagata vaai, tali faaaliga ua ia i latou le matafaioi o le mauaina ma le folafolaina atu o le finagalo o le Atua i le lalolagi. O tagata taitoatasi, matua, ma taitai ua ia i latou le aia e maua ai faaaliga i a latou lava matafaioi ae leai so latou tiute po o se aia e folafola atu ai le finagalo o le Atua e silia ma tuaoi o o latou tiutetauave” (Lipoti o le Konafesi, Oketopa 1989; po o le *Liahona*, Ianuari, 1990).

- Sa aoaiina e le Alii Miriama ma Arona i lo laua fai upu ia Mose i lona faaipopo atu i le fafine Kuso (Numera 12:1, 9–10). E faapefea ona aafia i tatou pe a tatou faitiaina taitai o le Ekalesia? E faapefea ona aafia o tatou aiga ma uo i a tatou faitioga i taitai o le Ekalesia?
- O lo o faapea mai le Numera 12:3 “Na matua agamalu lava Mose.” O le a le uiga o le agamalu?

Sa saunoa mai Peresitene Gordon B. Hinckley, “O le agamalu e moomia ai le agaga o le lotofaafetai e pei o se faafeagai o le uiga o le manatu faaletagata lava ia e mafai ona ia faia mea uma e aunoa ma le moomia o se fesoasoani, o se malosi sili atu nai lo se isi, o le iloa o le Atua, ma le taliaina o ana tulafono” (“With All Thy Getting Get Understanding,” *Ensign*, Aug. 1988, 3–4).

- E faapefea ona faaaliga e Mose lona agamalu ina ua faasalaina Miriama i le muimui ia te ia? (Tagai Numera 12:13–15. Nai lo lona fiafia i lana pule e vaaia ai lona tuafafine, ae sa ia ole atu i le Alii e faamalolo ia te ia. Sa tolopo la latou malaga ma ona tagata seia malosi o ia.) E faapefea ona tatou agamalu, e ui lava ina faifai mai tagata ia i tatou? E fesoasoani faapefea ia i tatou le tali atu i faitioga ma le agamalu?

### 3. Ua faatonuina e Mose ni alii se toa 12 e saili le laueleele o Kanana.

Aoao atu ma talanoaina le Numera 13–14

- Ina ua taunuu atu Isaraelu i le tuaoi o le nuu o Kanana, sa tuuina atu e Mose ni alii se toa 12 e saili le laueleele, mea o lo o maua ai, ma ona tagata (Numera 13:17–20). O le a se lipoti na o latou aumaia o mea o lo o maua i le laueleele? (Tagai Numera 13:23–27.) O le a se lipoti a alii e toa 10 na tuuina atu e uiga i tagata o lo o nonofo i Kanana, sei vagana ai Kalepo ma Iosua? (Tagai Numera 13:28–33.) E faapefea ona tatou faia lenei mea sese e tasi e pei o nei alii e toa 10?

Sa saunoa mai Peresitene Gordon B. Hinckley:

“Peitai, e toasefulu tagata matavao sa fasia i latou i lo latou lava masalosalo ma le matatau. Sa latou tuu atu se lipoti le lelei e uiga i le toatele ma le maualuluga o tagata Kanana . . . Sa latou faatusa i latou lava o ni sē i tagata maualuluga o le nuu sa latou vaai i ai . . .

“Ua tatou vaai i le toatele ua siomia ai i tatou ua le kea e uiga i le lumana’i o lenei galuega, o e ua le mautonu, ua tautatala i le faatuaioia, o e ua ua faaaliga le matatau, ua faama’umau lo latou taimi e ‘eli ma tusi ai e uiga i mea ua latou manatu o vaivaiga a e ua le o ni mea taua moni. Ona o lo latou masalosalo e uiga i le taimi ua tuana’i, ua le maua ai se vaaiga e uiga i lona lumana’i” (Lipoti o le Konafesi, Oketopa 1995, 93–94; po o le *Liahona*, Ianuari, 1996, 84).

- O le a le eseesega i le lipoti a Kalepo ma Iosua ma lipoti a isi alii e toa 10? (Tagai Numera 13:30; 14:6–9.) Aisea na le matatau ai Kalepo ma Iosua i tagata o le nuu o Kanana? (Tagai Numera 14:9.) O a nisi auala tatou te mulimuli ai i faaitaiga a Kalepo ma Iosua pe a o tatou feagai ma ni tulaga faigata?

Sa saunoa mai Peresitene Gordon B. Hinckley:

“Ua leai se nofoaga i lenei galuega mo i latou o e ua na o le talalelei o le malaia ma le faafanoga ua talitonu i ai. O le talalelei o se tala fiafia. O se savali o le manumalo. O se savali e ao ina opogi ma le naunautai.

“E le i fetalai mai lava le Alii o le a leai ni faafitauli. Ua iloa e o tatou tagata puapuaga eseese mai e na tetee ia i latou. Peitai, sa latou faaalua le faatuatua i o latou faanoanoaga uma. Ua alu pea i luma lenei galuega ma e lei la’ a lava i tua talu mai lona amataga . . .

“O se vaitaimi lenei o le masalosalo. O la tatou misiona o se misiona o le faatuatua. I o’u uso ma tuafafine i soo se mea, ou te valaau atu ia te outou ia toe faamautuina lo outou faatuatua, ia tau’ave i luma lenei galuega i le lalolagi atoa. E mafai ona outou faamalosi i le ala o lo o outou ola ai” (Lipoti o le Konafesi, Oketopa 1995, 94–95; po o le *Liahona*, Ianuari, 1996, 84–85).

- O a ni uiga na faaalua e tagata o le faapotopotoga i upu a Kalepo ma Iosua? (Tagai Numera 14:10.) Sa faapefea ona faasalaina e le Alii Isaraelu i lo latou tomumumu ma lo latou naunau e toe foi atu i Aikupito? (Tagai Numera 14:22–23, 26–35.) Sa faapefea ona ia faasalaina alii e toa 10 sa tuuina atu se lipoti sese e uiga ia Kanana? (Tagai Numera 14:36–37.) Sa faapefea ona faamanuiaina Kalepo ma Iosua mo lo la faatuatua? (Numera 14:24, 38.)

#### **4. Sa fausia e Mose se Gata Apamemea ma tau atu i tagata a latou vaai atu ia te ia, o le a faaolaina i latou.**

Aoao atu ma talanoaina le Numera 21:1–9.

- E ui lava ina fesoasoani le Alii i a Isaraelu faatoilaloina le osofaiga a tagata Kanana, sa faaauau pea ona tomumumu i latou. Sa faapefea ona faasalaina i latou e le Alii? (Tagai Numera 21:6.) Sa faapefea ona tali atu Isaraelu i lenei faasalaga? (Tagai Numera 21:7.)
- O le a le mea na tau atu e le Alii ia Mose e fai ina ua fai atu Mose ia te ia e aveese gata uogo? (Tagai Numera 21:8–9.) O a mea e tatau ona fai e tagata taitoatasi ina ia faasaoina mai le u a gata uogo?
- Sa tau mai e ni perofeta se toalua o le Tusi a Mamona, o Nifae ma Alema, e toatele Isaraelu sa feoti ona o lo latou le vaai atu i le gata apamemea. Aisea na latou le vaai atu ai? (Tagai 1 Nifae 17:41; Alema 33:18–20.)
- O ai o lo o faatusa i ai le gata uogo? (Tagai Ioane 3:14–16; Helamana 8:13–14.)
- E pei ona manaomia e le fanauga a Isaraelu ona vaai atu i le gata apamemea ma ola ai, tatou te moomia le vaai atu ia Iesu Keriso mo le mauaina o le ola e faavavau (Alema 37:46–47; Helamana 8:15.) O le a le uiga o le vaai atu ia Keriso? E faapefea e tagata i ona po nei ona faia lea sese e tasi e pei ona faia e Isaraelu sa le vaai atu i le gata apamemea? (Tagai Alema 33:20. Latou te le i vaai atu ia Iesu Keriso, aua latou te le talitonu o le faia o lena mea e faasaoina ai i latou.)
- Na saunoa mai Elder Carlos E. Asay: “O i tatou e pei o Isaraelu anamua, e tatau ona taulai atu o tatou mata ma mafaufau i luga. . . ia Keriso pe afai e tatou te faamoemoe e maua mai ai le ola e faavavau . . . E le tatau ona faatagaina la tatou vaai e tilotilo solo i le auala po o le tagai atu i mea leaga o le lalolagi . . . O le mata . . . e tatau ona aoaoina ina ia vaai i luga. E tatau ona tatou vaai i le Atua ma ola ai!” (Lipoti o le Konafesi, Oketopa 1978, 81; po o le *Liahona*, Mati, 1979, 98).

- Sa aoao mai e Alema, e pei o le faigofie o le auala e faamalolo ai mai le gata uogo, e faapena le faigofie o le auala i le ola e faavavau (Alema 37:46) O le a le tulaga e faigofie ai le ala i le ola e faavavau? Aisea e taumafai ai isi tagata e faafai-gata le ala i le ola e faavavau? (Tagai Iakopo 4:14. O lo o latou vaavaai i luga atu o mea faigofie, o mataupu faavae o le faasaoina, o le faatuatua ia Iesu Keriso, salamo ma le usitai.) E faapefea ona faatumauina lo tatou taula'i atu i le faatuatua ia Keriso?

---

## Faaiuga

Ia uunaia tagata o le vasega e faatuanai i mea a le lalolagi ma ia aua nei fefefe i le "sauai" o lo o taumafai e aveese i tatou mai mea e sili ona taua. Molimau atu afai tatou te 'vaai atu i le Alo o le Atua ma le faatuatua' (Helamana 8:15) ma mulimuli i ana perofeta, o le a faamanuiaina i tatou i le olaga lenei ma le olaga o le a sau.

---

## Manatu Faaopoopo e Aoao Atu Ai

O mataupu o lo o taua i lalo e faaopoopo i le ootoga o le lesona fautuaina. Atonu e te manao e faaoga se tasi o nei manatu pe sili atu foi e avea o se vaega o le lesona.

### 1. "Tatou foi atu i Aikupito" (Numeru 14:4)

- O le a se tali a le fanauga a Isaraelu ina ua:
  - a. Punitia i le va o Aikupito ma le Sami Ulaula? (Tagai Esoto 14:10–12.)
  - e. Tuuina atu na o le manai e aai ai? (Tagai Numeru 11:4–6, 18–20.)
  - i. Luitauina i latou e faatoilalo le nuu o Kanana? (Tagai Numeru 14:1–4.)
  - o. Faavaivaiina i le faigata o le malaga i le vao? (Tagai Numeru 21:4–5.)
- Aisea e te manatu ai ua faigata ia Isaraelu ona tuua Aikupito? O a ni mea e faigata ona tatou tuua i ona po nei? E faapefea ona tatou faamalosi atu i isi ao tatou taumafai e liliuese mai uiga tuai po o uiga faalelalolagi?

### 2. O le mea e saili i ai mo se taitaiga

O lo o aoao mai i le tusi a Numeru le mea tatou te saili i ai mo se taitaiga. Atonu e te manao e faamanino atu nei aoaoga e ala i lou tusi o mataupu taitasi o lo o i lalo i luga o le laupapa ao e aoaoina atu tala faatusi paia:

- a. Tagai i le perofeta (Numeru 12).
- e. Tagai i le nuu folafolaina—mo i tatou, le malo selesitila (Numeru 13–14).
- i. Tagai i le Faaola (Numeru 21:4–9).

**Faamoemoega**

Ina ia uunaia tagata o le vasega e usitai i le finagalo o le Atua e aunoa ma le faatuai.

**Sauniuniga**

1. Suesue ma le agaga tatalo mau nei:

- a. Numera 22:1–21. Palako, le tupu o Moapi, ua faapopoleina i le oo mai o le fanauga a Isaraelu. Na ia ofoina atu ia Palaamo ni tau pe afai e sau o ia i Moapi ma fetuu i le fanauga a Isaraelu. Na poloaiina e le Atua Palaamo e aua nei ona taliaina, ma na usitai Palaamo (22:1–14). Na ofoina atu e Palako ia Palaamo le mamalu faapoopo ma le tamaoaiga pe afai e sau o ia i Moapi e fetuu ia Isaraelu. Na ta’u atu e le Atua ia Palaamo e mafai ona alu pe a manao ai, ae e tatau ona tautala atu tau lava o upu e tuuina atu e le Atua ia te ia (22:15–21). Na tonu ia Palaamo o le a alu. (Ia manatua foi o le faaliliuga a Iosefa Samita o le Numera e 22:20 o loo faapea mai ai e mafai e Palaamo ona alu ma ave tagata pe a manao ai.)
- e. Numera 22:22–35. Ua toatamai le Atua ia Palaamo ona ua alu i Moapi, ma lona faamoemoe mo se tau mai ia Palako. A o agai atu o ia i le ala, sa iloina e Palaamo le matautia o le le fiafia o le Atua ina ua tautala mai lana asini ma se agelu ia te ia.
- i. Numera 22:36–24:25. Ua feiloai Palaamo ma Palako (22:36–23:2). E faatolu ona talosaga atu Palako ia te ia e fetuu Isaraelu, ae na usitai Palaamo i le Atua ma faamanuia Isaraelu i taimi taitasi (23:3–24:9). Ona ia fetuu ai lea o Moapi ma valoia Iesu Keriso (24:10–25).
- o. Numera 31:1–16. Sa faatamaia e Isaraelu Mitiana ma faapologa Palaamo. Sa faamatala mai e Mose sa fautuaina e Palaamo Mitiana e tuu atu Isaraelu e fai le agasala. (O le faasologa o fesoasoani o Palaamo o lo o faamatalaina i le Numera 25:1–3. E ui lava e le i fetuuina e Palaamo Isaraelu, sa ia manao i se tau mai ia Palako o lea na ia fautuaina ai Isaraelu e fai le agasala, ua mafua ai ona latou le mauaina le puipuiga a le Atua.)

2. Mau faitau faapoopo: 2 Peteru 2:15–16; Faaaliga 2:14.

**Faalautelega  
Fautuaina o  
le Lesona**

Gaoioiga e  
Faatosina Mai Ai

Atonu e te manao e faaoga se tasi o gaoioiga nei (po o sa oe lava gaoioiga) e amata ai le lesona.

Fai atu i tagata o le vasega e faalogologo lelei i faamatalaga o lo o taua i lalo ma mafaufau i le ituaiga o tagata e i ai latou:

“Afai e foai mai [e le tupu] ia te au o ario ma auro e tumu ai lona fale, ou te le mafai ona soli le afioga a Ieova lo’u Atua” (Numera 22:18).

“O mea uma e fetalai mai ai Ieova, o mea ia ou te faia” (Numera 23:26).

“Ou te le mafaia ona soli le afioga a Ieova, e fai se mea lelei po o se mea leaga i lo’u lava loto a o le upu e fetalai mai ai Ieova ou te fai atu ai lava” (Numerā 24:13).

- O le a le ituaiga o tagata e i ai le tagata na te faia ia upu? (O ia faamatalaga e iloa ai se tagata, usitai, faatuatua ma le lotomaulalo.)

Faamatala atu o nei faamatalaga sa faia e se tagata e igoa ia Palaamo, sa ia aoaoina le usiusitai a o lona loto o lo o naunau i viiga faalelalolagi. O lenei lesona o lo o faaalā ai le manatu e faia mea uma i lo tatou manaō ina ia faataunuu ai viiga ma manaoga faalelalolagi.

Mau Talanoaina  
ma le Faaogaina

---

A o e aoaoina atu nei mau, ia talanoaina pe faapefea ona faaoga i le olaga i aso taiasi. Uunai tamaiti o le vasega e faamatala ni aafiaga e faatatau i mataupu ua taua i le mau.

### **1. Sa Teena e Palako le tau i sa Ofoina atu i le fetuuina o Isaraelu.**

Aoao atu ma talanoaina le Numerā 22:1–21.

- O Palako le Tupu o Moapi ua faapopoleina i le oo mai o Isaraelu, ma ua ia auina atu ni avefeau e ofoina atu se tau i Palaamo pe a o mai i Moapi ma fetuuina Isaraelu (Numerā 22:5–7). O le a se tali atu a Palaamo i lea ofo? (Tagai Numerā 22:8–14.) O a ni tau tatou te ofoina atu i nisi o taimi e fesui ai ma le lē usiusitai i le Atua?
- Ina ua faafitia e Palaamo le alu atu i Moapi, sa auina atu e Palako se vaega o alii, e sili atu ona lelei nai lo alii muamua, e tauanau mai o ia. O le a le mea na ofoina atu e Palako ia Palaamo? (Tagai Numerā 22:15–17.) Sa faapefea ona tali atu Palaamo? (Tagai Numerā 22:18–19.) Aisea e te manatu ai sa ia manaō e toe fesili atu i le Alii? (Sa manatu Palaamo atonu o le a suia le finagalo o le Alii ma faapea mai e talia le ofo ua tuuina mai e Palako.) O le a le leaga o le sailia o mea e faafitia ai tulafono ma fautuaga a le Atua?
- Sa tuuina atu e le Alii le faatagaga ia Palaamo e o atu ai ma auauna a Palako pe a ia manaō i ai. Ona le fiafia ai lea o le Alii ia Palaamo i lona alu atu (Numerā 22:20–22). O le a se fautuaga o le toatamai o le Alii e uiga i le mea sa i le loto o Palaamo? (Tagai 2 Peteru 2:15; Isaia 29:13.)

### **2. Sa faaalā e le Alii le matautia o le valea o Palaamo i le faia o le mea sa ia manaō i ai.**

Aoao atu ma talanoaina le Numerā 22:22–35

- I le ala a o ia malaga atu i Moapi, sa taumafai faatolu Palaamo e taitai lana asini i luma (Numerā 22:22–30). O le a se auāla ua tutusa ai lenei mea ma le sootaga a Palaamo ma le Alii? (Sa manaō Palaamo e faia e le asini ma le Alii le mea o lo o ia manaō e fai. Atonu e te manaō foi e faailoa atu sa vaaia e le asini se agelu, ae le i vaaia e Palaamo. I se faatusatusaga, sa vaaia e le Alii le tele o mea sa le i vaaia e Palaamo.)
- O a ni faatusatusaga i ona po nei faaletagata lava ia po o ni vaega valea foi o lo o taumafai e fai le mea o lo o latou mananaō i ai nai lo le faia o le finagalo o le Atua, fautuaga amiotonu a matua po o taitai?

Atonu e te manaō e talanoaina nisi nei o faaitaiga:

- a. O se tamaitiiti, e le o fiafia i se tali na tuuina mai i se tasi o ona matua, ua alu atu i le isi, ma se faamoemoega o le a aumaia se tali e ese ai.
  - e. O se tagata o le Ekalesia, e le o fiafia i se fautuaga a se taitai perisitua, ua alu atu i se tasi taitai perisitua.
  - i. O se tagata o le Ekalesia ua ia fatuina ni mafuaaga e le talafeagai ai le tulafono ma ia, e pei o isi tagata?
- Sa faasalaina e le Alii Palaamo e ala mai i le agelu ma le asini. Sa faapefea ona tali atu Palaamo i upu faasala a le agelu? (Tagai Numera 22:31–35.) Aisea e faasalaina ai e le Alii lana fanau? (Tagai MFF 95:1.) E faapefea ona avea le aoaiga po o le sasa a le Alii ma faamanuia ia i tatou?

### 3. Sa musu Palaamo e fetuu Isaraelu.

Aoao atu ma talanoaina le Numera 22:36–24:25.

- Ina ua taunuu atu Palaamo i Moapi, sa faatolu ona fai atu Palako ia te ia e fetuu Isaraelu. O taimi taitasi na fai atu ai le Alii ia Palaamo e faamanuia Isaraelu, ma sa usitai Palaamo. O le a le malosi sa faaaliga e Palaamo i lea tala? (Tagai Numera 22:38; 23:8, 19–20; 24:1, 12–13.) O le a se vaivaiga sa tumau pea ia Palaamo? (Tagai Numera 22:41; 23:1–3, 13–15, 27–30. E ui lava ina teena e Palaamo le manao o Palako e fetuu Isaraelu, ae sa ia naunau lava e mulimuli atu ia Palako mai lea nofoaga i lea nofoaga i ona manaoga e ui lava ina ia iloa e sese ona manaoga.) O le a le leaga o le faalogo i fautuaga le sao (mai uo, po o leitia, televise, ata tifaga, ma tusiata, mo se faataitaiga) pe afai tatou te iloa e sese ia mea?

### 4. Sa faatamaia e Isaraelu Mitiana ma faapologaina Palaamo.

Aoao atu ma talanoaina Numera 31:1–16.

- Aisea na tau ai Isaraelu ma Mitiana? (Tagai Numera 31:1–3; ua le fiafia le Alii ia Mitiana ona o le faia o agasala, e pei ona tusia i le Numera 25:1–3.) O ai na fautuaina Mitiana e faaosooso i fanau a Isaraelu e auai i le tapuai atu i tupua ma mea o le lalolagi? (Tagai Numera 31:16.) Aisea na tuuina atu ai e Palaamo lea fautuaga? (E ui lava ina usitai Palaamo i le faatonuga a le Alii e faamanuia Isaraelu nai lo le fetuuina, a o lona loto sa ia manao pea i viiga ma tau i le lalolagi. Mo le mauaina o nei tau, sa ia fautuaina le faaosoosina o Isaraelu e fai le agasala, ua mafua ai ona latou le mauaina puipuiga a le Atua.) O le a le mea na tupu ia Palaamo i le taimi o le taua a Isaraelu ma Mitiana? (Tagai Numera 31:8.)
- E toatolu ni tusitala o le Feagaiga Fou o lo o faasino ia Palaamo (2 Peteru 2:15–16; Iuta 1:11; Faaaliga 2:14). O a ni a latou faamatalaga e uiga ia te ia?
- O le a se lesona ua tatou aoaoina mai lenei tala? (O tagata o le Ekalesia o lo o saili i tau faalelalolagi ma viiga, o lo o sailia ni tuusaunoaga mai fautuaga ma poloaiga a le Atua, po o lo o taumafai e faailoa atu ni manatu faalelalolagi, aga, po o tulaga i le Ekalesia, o loo mulimuli i faataitaiga lē tonu a Palaamo. O lo o taua lea o “mataupu a Palaamo” i le Faaaliga 2:14.)

Ua saunoa mai Elder Bruce R. McConkie:

“Faauta i se tala ina a matagofie! O se perofeta lenei a le Atua o le ua matua tonu i lona manatu ina ia tau atu na o le mea e faatonuina ai o ia e le Alii i le lagi. Ua leai ma se tulaga e tuuina mai na i ai se faaletonu i lona mafaufau e uiga i le ala sa tataua ona ia ui ai. Ua avea o ia ma sui o le Alii, ma ua le mafai

ona avea se fale e tumu i auro ma siliva po o ni tulaga maualuluga foi e pei ona sa ofo ina atu ia te ia e le tupu, ma mea e mafai ona se ese ai o ia ma le ala na tonu i lona loto e mlimuli ai. . . .

“Peitai sa tofotofoina pea o ia ona o lona matapeapea i oloa faapea ma lona tui-nanau i le mamalu. E maeu le matagofie [mo ia] pe a mauoa ma na maua le mana tele . . . Atonu pe o le a faatagaina o ia e le Alii e toe fetuunai lona tulaga faatonuina ma faapea ona maua ai e ia ni oa faalelalolagi faapea foi ma le mana . . . Ou te tau manatunatu pe faafia ona maua e nisi o i tatou le taitaiga mai le Ekalesia, ona pei ai lea o Palaamo, le ole atu mo ni tau faalelalolagi. . . .

“Sa le maua e Palaamo, . . . le perofeta o le sa musuia ma malosi i se taimi mua-mua, lona agaga i le faaiuga ona sa pupu lona loto i mea o lenei lalolagi nai lo oa o le faavavau” (O le Tala E Uiga i le Valea o se Perofeta,” o le *Liahona*, Aokuso, 1979, 37).

- Toe manatu i le faamatalaga i le gaoioiga e faatosina mai ai. Ia faamanino atu e ui lava ina faafoliga mai e usiusitai Palaamo, a o le naunauga o lona loto, o le mauaina lea o viiga ma oa faalelalolagi. O le a se mea o lo o aoao mai e lenei tala e uiga i le taua o le tausia o manaoga o o tatou loto ina ia mama? E faapefea ona tatou tausia ia mama manaoga o o tatou loto?

Faaiuga

Molimau atu ana faamaualalo Palaamo ma faia le finagalo o le Atua, o le a ave-esea agasala ma mafatiaga e tele mai ia te ia ma Isaraelu. Ia uunaia tagata o le vasega e faia le finagalo o le Atua ae le o o latou loto—ma saili e mulimuli i le finagalo o le Alii ae le o le teena po o le suia.

## Manatu Faaopoopo e Aoao Atu Ai

O mataupu o lo o taua i lalo e faaopoopo i le ootoga o le lesona fautuaina. Atonu e te manao e faaoga se tasi o nei manatu pe sili atu foi e avea o se vaega o le lesona.

### 1. Usiusitai i le Alii

E mafai ona tatou aoaoina mai ia Palaamo le usiusitai i le Alii. E mafai foi ona tatou aoaoina lenei mea mai faataitaiga lelei a le tele o alii ma tamaitai i tusitusiga paia. Atonu o le a e manao e toe tepa i faataitaiga nei:

- a. O le Faaola, ia manatua tiga na oo ia te ia i Ketesemane ma le satauro, “ua tootuli i lalo ma tatalo atu, Tama, afai ua e finagalo ai, ia aveese lenei ipu; a ia aua nei faia lo’u loto, a o lou finagalo” (Luka 22:41–42).
- e. Ina ua poloaiina Aperaamo e tuuina atu lona atalii o Isaako e osi ai le taulaga, sa ia “tulai i le taeao” e amata lana malaga i le Mauga o Moria (Kenese 22:3).
- i. Ina ua poloaiina Maria o le a avea ia ma tina o le Alo o le Atua, sa ia tali atu, “Faauta, o a’u nei o le auauna a le Alii, ia faia ia te au e tusa ma lau fetalaiga” (Luka 1:38).
- o. Ina ua faatonuina Nifae e toe foi atu i Ierusalema mo le aumaia o papatusi auro mai ia Lapana, sa ia tali vave atu, “Ou te alu ma faia mea ua poloaiina ai a’u e le Alii” (1 Nifae 3:7).
- u. O atalii o Helamana sa faamanuina i le taua aua “ua latou usiusitai ma anaana ma le sa’o i poloaiga uma” (Alema 57:21).



## 2. “Na taofia oe e Ieova nei faamalualiiia oe” (Numera 24:11)

- Ina ua faafiti Palaamo e fetuu Isaraelu ma maua le tau ma viiga mai ia Palako, sa fai atu Palako ia te ia, “Ua taofia oe e Ieova nei faamalualiiia oe” (Numera 24:11). E faapefea e lo tatou mulimuli i le Alii ona taofia i tatou i nisi o taimi mai le mauaina o viiga ma mamalu faalelalolagi? O le a le mea na folafola mai e le Alii nai lo tau faalelalolagi? (Tagai MFF 81:6.)

# “Ia Oe nei Galo ia te Oe Ieova”

Lesona  
**17**

*Teuteronomie 6; 8; 11; 32*

---

**Faamoemoega** Ina ia uunaia tagata o le vasega e (1) manatua le Alii ma feagaiga sa latou osia ma ia (2) ia latou fausia se siosiomaga o le a fesoasoani ia i latou.

---

**Sauniuniga**

1. Suesue ma le agaga tatalo i mau nei:
  - a. Teuteronomie 6:1–9; 11:18–21. Sa tuuina atu e Mose faatonuga i le fanauga a Isaraelu e fesoasoani latou te manatuaina ai a latou feagaiga. Sa ia faatonuina matua e aoao ana upu i a latou fanau.
  - e. Teuteronomie 6:10–12; 8:1–20. Sa faamanatu e Mose i le fanauga a Isaraelu faamanuiaga a le Atua mo i latou. Sa ia fautuaina o le a fano i latou pe a latou le usitai i tulafono a le Atua ma manatua pea o Ia.
  - i. Teuteronomie 32:1–4, 15–18, 30–40, 45–47. Sa fautuaina e Mose Isaraelu ina ia manatua le Papa o lo latou olataga (Iesu Keriso).
2. Mau faitau faaopoopo: Teuteronomie 4; 7:1–4; 13:1–8; 34.
3. Afai e te faaaogaina le gaoioiga e faatosina mai ai muamua, ia aumaia mea o lo o taua i lalo o le “Gaoioiga e Faatosina Mai Ai.”

---

## Faalautelega Fautuaina o le Lesona

Gaoioiga e  
Faatosina Mai Ai


Atonu e te manao e faaaoga se tasi o gaoioiga nei (po o sa oe lava gaoioiga) e amata ai le lesona. Filifili le gaoioiga e sili atu ona talafeagai mo le vasega.

1. Ia faaali atu mea sa aumaia i le fale e faamanatu mai ai ia te oe le Alii ma feagaiga sa e osia ma ia. (O nei mea e aofia ai tusitusiga paia, ata, tusi, ma ni musika ua pueina.) Tau atu i tagata o le vasega le mafuaaga o le taua o nei mea ia te oe. Faamatala atu o se vaega o lenei lesona o lo o faatatau lea i mea faaletino sa faaaoga e Isaraelu anamua e faamanatu ai ia i latou le Alii ma feagaiga sa latou osia ma ia. Faamanino atu o mea faaletino e mafai foi ona avea ma faamanatuga mamana ia i tatou.

2. Ia tusia upu nei o lo o i lalo i luga o le laupapa:

*Faaseseina, faaoleole, faaumatia, mailei, ai, faapele ia te oe, faaosooso, faamoe, faaita, faatauaso, pepelo, faaoleole, faatamaia.*

- O le a se mea e tutusa ai nei upu? (O le mea e tutusa ai e latou te faamatalaina Satani i ana taumafaiga e taitai seseina i tatou mai le Alii.)
- Tuu atu i se tagata o le vasega e faitau mai le MFF 76:28–29. Faamatala atu o nei fuaiupu o ni faaaliga na tuuina atu ia Iosefa Samita ma Sini Rikitone. O le a se mea tatou te faia ina ia puipua ai i tatou mai aafiaga a Satani? (Atonu e te manao e faaaoga ata nei e faamatala ai nisi o mea e mafai ona tatou faia e puipua ai i tatou mai faaosoosoga a Satani.)



Faamatala atu i le tusi a Teuteronomie, sa aoao ai e Mose Isaraelu i le auala e fausia ai se siosiomaga e fesoasoani ia i latou mo le teteina o faaosoosoga a Satani. O lenei lesona o lo o talanoaina ai fautuaga a Mose ma talanoaina auala e mafai ai ona faatatau ia i tatou i aso nei.

Mau Talanoaina  
ma le Faaogaina

Ao e aoaoina atu nei mau, ia talanoaina pe faapefea ona faaoga i le olaga i aso taitasi. Uunai tamaiti o le vasega e faamatala ni aafiaga e faatatau i mataupu faavae ua taua i le mau.

Ina ua maea ona tofotofoina, faasalaina ma aoaoina Isaraelu i le vao mo le 40 tausaga, sa faapea mai le Alii ua latou saunia e ulu atu i le nuu o le folafolaga. Ae e i ai ni ana faatonuga mo i latou. Sa tuuina atu e Mose nei faatonuga i ni lauga se tolu o lo o faamauina i le Teuteronomie.

I nei lauga sa toe faamanatu atu ai e Mose le i ai o Isaraelu i le vao mo le 40 tausaga, ma iloa le fesoasoani a le Atua i mea latou moomia. Sa talanoaina foi e Mose matafai oi a Isaraelu o ni tagata filifilia o le Atua. Sa ia faamanino atu e tatau ona latou usitai i tulafono a le Atua, aemaise lava le tulafono o le manatua o Ia ma aloese mai le tapuai i tupua. Sa manatunatu Mose, e tusa lava pe ua saunia le fanauga a Isaraelu e ulu atu i le nuu o le folafolaga, ae a latou toe foi atu i le leaga, o le a avesea lo latou faamanuiga ma faataapepeina.

**1. Sa tuuina atu e Mose faatonuga i le fanauga a Isaraelu e fesoasoani ai latou te manatua a latou feagaiga.**

Aoao atu ma talanoaina le Teuteronomie 6:1–9 ma le 11:18–21.

- O lo o taua i le Teuteronomie upu mulimuli a Mose i Isaraelu. Afai o le a e tuuina atu se savali mulimuli i au uo ma lou aiga, o le a lena savali?
- O le a le mea na faatonuina e le Alii Isaraelu e fai i le Teuteronomie 6:5–7? E mafai faapefea ona tatou maua upu mai tusitusiga paia i o tatou loto? E faapefea ona aoao atu e matua le talalelei ia latou fanau ma fesoasoani ina ia latou fiafia i tusitusiga paia?

- O le a le mea na fautuaina ai e Mose Isaraelu e fai i le Teuteronomie 6:8–9 ma le 11:18–20? (Ia faamanino atu o fusi, “o fasiie ia na tusia ai mau e tolu . . . ma taai ma fusi . . . i o latou muauulu ma faataamilo i o latou ogalima” [Bible Dictionary, “Frontlets,” 676]).
- O le a sou manatu i le ala na faatonuina ai e Mose tagata e faamuamua tusitu-siga paia i o latou mata, i o latou lima, i pou o o latou fale, ma luga o a latou pa? E faapea ona aafia a tatou amioga i nei mea faamanatu? O le a se mea tatou te faia i o tatou aiga e faamanatu mai ai ia i tatou le Alii, ana afioga, ma a tatou feagaiga ma ia? Pe faamanatu mai ea e ata o lo o faapiipii i puipui o o tatou fale, tusi o loo tatou faitauina, ma tifaga ma ata televise o lo o tatou matamata i ai, ia le Alii, po o lo o fautua mai i mea faalelalolagi?

Sa saunoa mai Peresitene Ezra Taft Benson o tagata o lo o “taitaia e Keriso o le a faatumulia ia Keriso. . . . Ulufale atu i o latou fale, ma ata o lo o i puipui o o latou fale, o tusi o lo o i a latou fata tusi, o musika, ma musika o lo o siomia ai, o a latou upu ma galuega e faaali mai ai o i latou o ni Kerisiano” (Lipoti o le Konafesi, Oketopa, 1985, po o le *Liahona*, Ianuari, 1986).

## 2. Sa fautuaina e Mose le fanauga a Isaraelu e usitai i le tulafono a le Atua ma manatua pea o Ia.

Ia aoao atu ma talanoaina le Teuteronomie 6:10–12 ma le 8:1–20.

- O a savali taua a Mose o lo o i le Teuteronomie 6:10–12 ma le 8:1–20? O le a le uiga o le faagalo o le Alii? (Tagai Teuteronomie 8:11.) O a ni auala o le faagaloina o ia? (Tagai Teuteronomie 8:19.) E faapefea ona tatou mautinoa tatou te le o faagaloina le Atua?
- O a ni tulaga sa taua e Mose e mafua ai ona faagalo e tagata le Atua? (Tagai Teuteronomie 6:10–12; 8:10–20.) Aisea e faagalo ai e nisi tagata le Alii ina ua uma ona ia faamanuiaina i latou? (Tagai Teuteronomie 8:17.)

Sa saunoa mai Peresitene Polika Iaga: “O le mea o loo sili ona ou popole i ai e uiga i o tatou tagata, o lo latou mauoa i le laueleele leni ma galo ai ia i latou le Atua ma ona tagata, a e puputa ai i le paie ma latou tulieseai ai i latou lava mai le Ekalesia ma o atu ai i seoli. O le a mafai e le nuu leni ona tetee atu i tagata taupulepule leaga, ma le gaoi, ma le mativa, faapea foi ma ituaiga sauaga uma, ma tumau pea i le faamaoni. Ae o le mea e sili ona ou fefe i ai, o le lē mafai lea ona latou pulea ma le poto o le ‘oa; peitai, e tatau lava ona tofotofoina i latou i le ‘oa, aua o le a avea i latou ma tagata e aupito sili ona mauoa i le lalolagi” (*Upumoni Toefuataiina*, [117]).

- O ai le tupuaga o oloa tatou te maua? (Tagai Teuteronomie 8:18.) E faapefea ona tatou faaaogaina a tatou oa e faalautele ai le galuega a le Alii? (Tagai Teuteronomie 8:18; Iakopo 2:18–19.)

## 3. Sa fautuaina e Mose Isaraelu e manatua le Papa o lo latou olataga (Iesu Keriso).

Aoao atu ma talanoaina le Teuteronomie 32:1–4, 15–18, 30–40, 45–47.

- O ai le Papa o lo o taua i le Teuteronomie 32:3–4? (Iesu Keriso; tagai foi i le fuaiupu e 15, 18, ma le 30–31.) Aisea e te manatu ai o Iesu Keriso e taua o le Papa i isi taimi? (Tagai Helamana 5:12.)

- Ua taua e Mose o lo “latou papa” (o atua sese o le amioleaga) “e le o lo tatou Papa” (Teuteronomie 32:31). E faapefea ona ese lo “latou Papa” mai i lo “tatou Papa”? (Tagai Teuteronomie 32:37–40.)
- O le a le uiga o le fausia i luga o le Papa? (Tagai Teuteronomie 32:46–47; Mataio 7:24–27; MFF 50:44.) E mafai faapefea ona tatou faia lea mea? (Tagai Teuteronomie 18:18–19; lea o lo o valoia mai ai le afio mai o Keriso, o lo o faamatala mai ai foi le moomia o le faalogo i ana upu.)

## Faaiuga

Tuuina atu lau molimau i le Faaola, ma faaali atu lou agaga faafetai mo feagaiga ua e osia ma ia. Faamanino atu le taua o le manatua o le Atua ma le tausia o feagaiga ua osia ma ia. Molimau atu o mea uma o lo o siomia ai i tatou—e pei o ata, tusi, ma musika—e mafai ona avea ma faamanatuga malosia o feagaiga ua tatou osia ma le Alii. Ia faamanino atu o lo tatou faamoemoega i le siomia o i tatou e nei mea e tutusa ma le faamoemoega o Isaraelu anamua i le laeiina o fusi: e fesoasoani e fausia i luga o le Papa—e fesoasoani e manatua ai ia mulimuli i le Alii.

## Manatu Faaopoopo e Aoao Atu Ai

O mataupu o lo o taua i lalo e faaopoopo i le ootoga o le lesona fautuaina. Atonu e te manao e faaoga se tasi o nei manatu pe sili atu foi e avea o se vaega o le lesona.

### 1. “Ia e tusi ai foi i pou o lou fale” (Teuteronomie 6:9)

Ia tofi se tagata o le vasega e lisiina mai ata vali, pepa lautetele o tusia ai ni faamatatalaga, (posters), musika pueina, ma isi mea mai o latou fale. Ia tuu atu latou te faailogaina mea taitasi e pei o se “+” (e faailoa ai o lo o taitaiina i latou e lea mea e manatua le Alii) po o le “-” (e faailoa ai o lo o taitaieseina o latou loto mai le Alii). Atonu e te manao e fautuaina tagata o le vasega e faia lea mea faatasi ma o latou aiga i afiafi faaleaiga.

### 2. “E na te le faagaloina oe” (Teuteronomie 4:31)

- Ina ua maea ona valoia o Isaraelu o le a liliuese ma tapuai atu i isi atua ma o le a faataapepeina (Teuteronomie 4:25–28), sa ofoina atu e Mose ni upu o faamoemoega. O le a le mea na ia folafola atu ia i latou e sailia le Alii ma o latou loto atoa? (Tagai Teuteronomie 4:29–31; Isaia 49:14–16.) O faapefea ona faatau-nuina lea folafolaga i lou olaga? O le a le mea e tatau ona tatou faia e sailia ai le Alii ma o tatou loto ma agaga atoatoa?

### 3. Aloese mai faatosinaga sese a isi

- O le a le leaga o lo o fautuaina mai e Mose i le Teuteronomie 13:6–8? E mafai faapefea ona tatou iloa o loo taumafai se tasi e aveesea i tatou mai le Alii? E faapefea ona tatou tali atu i lea ituaiga tagata?

### 4. “Aua foi nei iloa se isi i luma o Ieova ua leai sana mea” (Teuteronomie 16:16)

- O le nofoaga o lo o taua i le Teuteronomie 16:2, 11, ma le 16 o le tapeneko, o se malumalu e mafai ona feaveai mo tagata Isaraelu. I se sauniuniga mo se taumafataga i le tapeneko, sa faatonuina ai e Mose tagata “e aua nei iloa atu se isi i luma o Ieova e aunoa ma se mea” (Teuteronomie 16:16.) E faapefea ona

faatatau lea mea i lo tatou auai atu i le malumalu? E faapefea ona tatou saunia i tatou lava mo le auai atu i le malumalu, ina ia aua nei na o le auai atu ae leai se uiga? E faapefea ona fesoasoani leni mea ia i latou “e viia ai le Alii” i le malumalu? (Teuteronomie 16:11).

- Na fautuaina i tatou e Peresitene Howard W. Hunter e faapea: Ia avea i tatou ma ni tagata-auai i le malumalu. Ulu soo atu i le malumalu e tusa ma avanoa e te maua. Ia tautau se ata o le malumalu i o outou fale e mafai ona vaai i ai a outou fanau” (Lipoti o le Konafesi, Oketopa 1994, 8; po o le *Liahona*, Ianuari 1995, 9). Aisea e taua ai lo tatou ulu soo atu i le malumalu? Aisea e taua ai le tuu o se ata o le malumalu i o tatou fale?

##### 5. “E le iloa e se tagata lona tuugamau” (Teuteronomie 34:6)

O le tusitala na tusia le tusi o Teuteronomie sa na o ia na iloa o Mose ua leai ma ua ia manatu ua maliu o ia, ua tanumia e le Alii, ma e leiloa e se tasi le mea o lo o i ai lona tuugamau. E ui i lea, tatou te iloa o Mose sa liua. (Mo se faamatalaga o le vaega o le liua, tagai 3 Nifae 28:7–9, 37–40.) O le Lomifefiloi o le Tusi Paia o lo o taua ai ni faamatalaga e uiga i le liua o Mose:

“E faapea foi le tulaga na oo i ai le tele o perofeta anamua, sa faalautele le galuega a Mose i luga atu o tuaoi o lona olaga faaletino. Sa faatasi ma Elia, i le Mauga na Liua Ai ma toefuatai ai ki o le perisitua ia Peteru, Iakopo, ma Ioane (Mataio 17:3–4; Mareko 9:4–9; Luka 9:30; MFF 63:21; *History of the Church*, 3:387). Mai lea mea, lea sa tupu a o le i faasatauroina Iesu, sa o tatou malamalama o Mose sa liua ma e le i oti e pei ona tusia i le Teuteronomie 34 (Alema 45:19). Ua alagatatau lona liua, mo le mauaina o le tino o aano ma ivi i le taimi o le liua, talu ai e lei oo mai le toetutu i lea taimi. Pe sa na o ia ea o se agaga, e le mafai ona ia faataunuuina le galuega i luga o le mauga o le tuuina atu lea o ki faaletino ia Peteru, Iakopo ma Ioane (faatatusa i le MFF 129)” (Bible Dictionary, “Moses,” 735).

---

**Faamoemoega**      Ia uunaia tagata taitoatasi o le vasega ina ia malolosi ma lototetele e ola i le tala-lelei a Iesu Keriso.

---

- Sauniuniga**
1. Suesue ma le agaga tatalo i mau o lo o i lalo:
    - a. Iosua 1. Ua valaauina e le Alii ia Iosua e suitulaga ia Mose ma poloaiina o ia ia faamalosi, lototele, ia suesue i mau, ma tausia poloaiga. Ua saunia e Iosua Israelu mo le nofoia o le laueleele sa folafola mai e le Alii mo i latou.
    - e. Iosua 3–4; 6. Ua sopoia e Israelu le Vaitafe o le Ioritana i le elelee matutu ma ua tuuina maa e 12 e avea ma faamanatuga o lo latou sopoia o le vaitafe. Ona o le faatuatua o Israelu, ua faaumatia ai Ieriko.
    - i. Iosua 23; 24:14–31. Ua osi feagaiga Iosua ma ona tagata e auauna atu i le Alii.
  2. Tusi faaopoopo e faitau i ai: Iosua 7; 14.
  3. Ia fai atu i se tagata o le vasega e saunia e faamatala mai le tala e uiga i le taua i Ieriko ia pei lava na vaai moni i ai o ia (Iosua 6). Ia fai atu i se isi tagata po o ni tagata e toalua o le vasega e saunia e faamatala mai se mea na tupu na faamanatu mai ai ia i laua le mana ma le alofa o le Atua.
  4. Afai e te faaaogaina le Gaoioiga e Faatosina mai ai, ia saunia se pepa, mea faapipii po o se pa’u, ma se tusi. Afai e te faaaogaina fesili o lo o i mailei, atonu e te manao e aumaia se mailei itiiti, e pei o se fana isumu, e faamalalama ai le talanoaga.
- 

**Faalautelega  
Fautuaina o  
le Lesona**

Gaoioiga e  
Faatosina Mai Ai

Atonu e te manao e faaaoga le gaoioiga o lo o i lalo (po o sa oe lava gaoioiga) e amata ai le lesona.

Ia faamatala atu o lenei lesona e faatatau lea ia Iosia, le perofeta o le na taitaiina le fanauga a Israelu i la latou taumafaiga ina ia maua le laueleele o le folafolaga. Ina ua valaauina Iosua e avea ma perofeta, sa poloaiina e le Alii o ia, “Ia e faamalosi ma lototele” (Iosua 1:6). Ia tusia lenei fasi fautau i luga o le laupapa. Ia faaali atu se pepa ma se tusi. Ia fai atu i se tagata o le vasega e alu ane e faatu le pepa i lona pito ma taumafai e faapaleni le tusi i luga a’e o lea pepa.

A maea ona faataitai e le tagata o le vasega lenei mea, ia faamatala atu o lo o i ai se auala e avea ai le pepa ma se mea malosi mo le tietie ai o le tusi i luga. Ia taai le pepa ma ia faamau i se pau pe faapipii. Ia faatu i luga le taaiga pepa i luga o se mea mafolafola lelei. Ia tuu malie le tusi i ona luga. (Atonu e te manao ia faataitai ona faia lenei mea a o le i amataina le vasega.)

Ia faamatala atu na malosi Iosua ina ua ia faatagaina le Atua e faaleleia lana amio. E faapea foi i tatou, afai tatou te faatagaina le Atua e faatonutonuina la tatou amio, e mafai ona avea i tatou ma ni tagata malolosi ma faataunuuna mea e finagalo le Alii ia i tatou e fai.

Mau Talanoaina  
ma le Faaaogaina

---

A o e aoaoina atu nei mau, ia talanoaina pe faapefea ona faaaoga i le olaga i aso taitasi. Uunai tamaiti o le vasega e faamatala ni aafiaga e faatatau i mataupu ua taua i le mau.

I le gasologa o le 40 tausaga o le malaga a Isaraelu i le vao, sa tuuina atu e Mose ia i latou le tulafono a le Atua, avea o ia ma fofoga o le Atua, ma avea foi o ia ma o latou taiala. Sa na o ia lava le taitai sa iloa e le augatupulaga uma o Isaraelu. Peitai sa aveina a'e o ia e le Alii i le faaiuga o le latou malaga—e pei lava o le feagai o i latou ma se tofotofoga sili. A o manatua ana folafolaga ia Isaraelu, sa faatulaiina e le Alii se taitai fou, o Iosua lea, o le na mafai ona ia taitaiina i le manumalo ma le nofoia o le laueleele o le folafolaga.

### 1. Ua valaauina e le Alii Iosua.

Aoao atu ma talanoaina le Iosua 1.

- O a ni lu'i ua e manatu sa feagai ma Iosua i le taimi na valaauina ai o ia e le Alii e sui ia Mose i le taitaiina o Isaraelu? (Sa taitaiina e ia Isaraelu i le faatoilaloina ma le nofoia o Kanana, ma o lea mea o se galuega tele. Sa sui tulaga foi o ia i se taitai tautaua.) O le a se mea mautinoa sa tuuina atu e le Alii ia Iosua a o saunia Iosua e ulufale atu i le laueleele o le folafolaga? (Tagai Iosua 1:5.) Pe mafai faapefea e lenei mea mautinoa ona fesoasoani ia i tatou i ni valaauga fou po o ni lu'i? Pe ua faapefea ona fesoasoani le Alii ia te oe i ni tulaga faapena?
- O le a se poloaiga sa fetalai atu ai faatolu le Alii ia Iosua 1:6–9? O le a se mea na fetalai mai le Alii e manaomia ai e Iosua le lototele ma le malosi e fai? (Tagai Iosua 1:7. Ia faamalamalama atu e ui lava ina sa moomia e Iosua le lototele e tau ai i le tele o taua, ae sa manaomia foi e ia le lototele i le ola mama—o le lototele lea e fai le mea sao.) O a ni lu'i tau ua tatou feagai i aso nei e manaomia ai le faamalosi ma le lototele i le ola mama? O a ni faaitaiga o le lototele i le ola mama ua e iloa?
- O le a le mea na tau mai e le Alii e fai e Iosua ina ia “manuia ai o ia”? (Vaai Iosua 1:8. Ia faamatala atu o le tusi o tulafono o Tusitusiga Paia ia.) Aisea ua e manatu ai o le suesue i tusitusiga paia e taua mo Iosua ina ia manuia i lona valaauga? Pe ua faapefea ona fesoasoani lo tatou suesue e le aunoa i tusitusiga paia?

### 2. Ua sopoia e Isaraelu le Vaitafe o Ioritana i le elele matutu; ona o lo latou faatuatua, na faaumatia ai Ieriko.

Aoao atu ma talanoaina le Iosua 3–4 ma le 6.

- I le taimi na manaomia ai le sopoia o le Vaitafe o le Ioritana e Isaraelu, sa tumu osooso le vai i ona auvai. Pe sa faapefea ona faaali atu e le Alii i le fanauga a Isaraelu o lo o faatasi o ia ma Iosua e pei ona sa faatasi o ia ma Mose? (Tagai Iosua 3:7–8, 14–17; 4:14. Afai ua tatau ai, ia faamatala atu o le atolaau o le feagaiga o se atolaau lea sa mafai ona feaveai o lo o i ai i totonu ni tusitusiga paia, e aofia ai ma tusitusiga a Mose faapea ma papa maa o loo i ai Tulafono e Sefulu.) E faapefea ona faaali mai e le Alii ia te i tatou na te taitaiina ma musuia perofeta soifua e pei ona ia faia i perofeta ua mavae?



- O le a le mea sa tatau ona fai e faitaulaga o e na tauaveina le atolaau a o le i taofia le tafe o vai o le Vaitafe o le Ioritana? (Tagai Iosua 3:13–17. Sa tatau ona latou laa atu i le Vaitafe o lo o tafe a o latou tauaveina atu le atolaau.) Pe ua faapefea ona fetalai mai le Alii i nisi taimi ia i tatou e fai ni mea faapea?

Sa faapea mai Elder Boyd K. Packer:

“O le taimi lava na valaauina ai a’u e avea ma se tasi o le Au Pulega Aoao, sa ou alu atu ia Elder Harold B. Lee mo se fautuaga. Sa faafofoga ma le faaeteete o ia i lo’u faafitauli ma sa ia fautua mai ina ia ou alu atu e vaai Peresitene Tavita O. Makei. Sa fautuaina au e Peresitene Makei i le mea e ao ona ou fai. Sa ou matua naunau ia usiusitai peitai sa ou iloa e leai se auala e mafai ai e au ona faia o mea na ia fautuaina ai au e fai.

“Sa ou toe foi atu ia Elder Lee ma tau atu ia te ia e leai se auala ou te iloa e mafai ona ou agai atu ai i le itu na faasino mai ia te au ou te alu atu ai. Sa ia faapea mai, ‘O le faalavelave ia te oe o lou manao lea e iloa po o le a le taunuuga o le a oo i ai a o le i e amataina.’ Sa ou tali atu ou te manao ina ia ou vaai atu ua faia se laasaga e tasi pe lua agai i luma. Sa ia aoao mai ia te au se tasi o lesona sili ona taua i lo’u olaga. ‘E tatau ona e a’oa’o e savali agai atu i le pito o le malamalama, ona faia lea o nai laasaga agai atu i le pogisa; ona susulu mai lea o le malamalama ma faaali mai ia te oe le auala e te savali ai’” (“The Edge of the Light,” *BYU Today*, Mar. 1991, 22–23).

- Aisea na faia ai e Isaraelu se maa faamanatu e aofia ai ni maa se 12 ina ua uma ona latou sopoa le Vaitafe o le Ioritana? (Tagai Iosua 4:1–9 ina ia avea ma molimau o le mana o le Alii i augatupulaga o lumanai, e faamanatu atu ai ia te i latou o le a faamanuiaina i latou e le Alii e pei ona sa ia faia i o latou augatama.) O a ni maa faamanatu ua ia te oe lava e faamanatu ai ia te oe le mana o le Atua ua ia faaalia i lou olaga? (E mafai ona aofia i tali le faamanatuga; ata o Keriso, malumalu, ma Perofeta; o Tusitusiga Paia; ma mea faaleagaga na e oo i ai ua faamaumauina i tusi o talaaga o lou olaga). Pe ua mafai faapefea e nei maa faamanatu ona faamanuiaina olaga o isi tagata? (Tagai Iosua 4:21–24.)

Ia molimau atu o le a tali mai le Atua i tatalo, tuuina mai faamanuiaga, tuuina mai faaaliga, ma faia galuega ofoofogia mo augatupulaga fou taitasi. Ia fai atu i tagata na tofia talu ai o le vasega e faaali mai mea na oo ia i latou ua faamanatu mai ai ia i latou le mana ma le alofa o le Atua.

- Ia fai atu i le tagata o le vasega na tofia talu ai e faamatala mai le pa’u o Ieriko e pei lava na vaai moni i ai o ia (Iosua 6). O le a le mafuaaga na soloia ai pa o Ieriko? (Tagai Eperu 11:30.) O le a le pogai na avea ai amioga na faaalia e Isaraelu ma se faailoga o le faatuatua?
- O ai tagata o Ieriko na faasaoina? (Tagai Iosua 6:17, 22–25; tagai foi i le Iosua 2:1–15.) O le a se mea e mafai ona tatou aoaoina mai le faasaoina o Raava ma lona aiga?

### 3. Ua osi feagaiga Iosua ma ona tagata e auauna atu i le Alii.

Ia aoao atu ma talanoaina le Iosua 23 ma le 24:14–31.

- I le faaiuga o lona olaga, sa faamanatu atu e Iosua i Isaraelu mea na faia e le Atua mo i latou. Sa fautuaina foi i latou e Iosua e uiga i le aloese mai mailei. Afai na e aumaia se mailei laititi, ia faataitai atu lona faaaogaina. Afai e te le i

aumaia se mailei laitiiti, ia faamatala se mailei e te iloa. O a nisi o mea e tatau ona tatou faia ina ia aloese mai le maua i se mailei? (E tatau ona tatou muai iloa o lea mea o se mailei ona tatou aloese ai lea.)

- I lana fautuaga mulimuli, sa apoapoai atu Iosua ia Isaraelu ina ia “pipii atu ia Ieova” ae le o le “pipii atu i e o totoe o [sa Kanana]”. Pe mafai faapefea ona tatou “pipii i le Alii” ae le o le pipii i le lalolagi? Pe faapefea ona avea le pipii i Sa Kanana ma se mailei ia Isaraelu? O a nisi o mailei o le lalolagi o lo o feagai ma i tatou i aso nei?
- O le a se fautuaga taua sa tuuina atu e Iosua i le faaiuga o lona olaga? (Tagai Iosua 24:14–15.) O ai na osi feagaiga Iosua ma Isaraelu e auauna atu i ai? (Tagai Iosua 24:15–18, 21–25, 31.) Pe aisea e le mafai ai e se tagata ona auauna atu i le Atua moni ma atua o le lalolagi i lea lava taimi e tasi?
- Aisea ua taua ai le filifili i le aso nei e auauna atu i le Alii? Pe mafai faapefea ona tatou faaalua ua tatou filifili e auauna atu ia te ia?

Sa saunoa mai Elder Marvin J. Ashton: “Ua faamanatu mai e Iosua ia i tatou le taua o le faia vave loa o filifiliga: ‘Ina filifilia ia outou i le aso nei po o ai tou te auauna i ai; a o a’u ma lo’u aiga, matou te auauna ia Ieova’ (Iosua 24:15). E le o a taeao, e le seiloga tatou te saunia, e le o le taimi e faigofie ai, peitai ‘o le aso nei.’ O le faia loa lava, ia filifili po o ai e te auauna i ai. O le ua vaalau mai tatou te mulimuli atu ai o le a i ai i o tatou luma e le aunoa ma lona Agaga ma taitai i le ala. Ua uma ona ia tusia ma faailogaina le ala, tatala faitotoa, ma faaalua le ala. Ua ia valaau mai ia i tatou ina ia tatou o atu ia te Ia, ma o le taimi sili ona lelei e olioli ai i lona mafuta mai o le taimi nei lava. E sili ona lelei le ui i le auala ma tumau i le ala i le faia lea o mea na fai e Iesu ma ia faia se tautinoga atoatoa ina ia faia le finagalo o lona tama; (Lipoti o le Konafesi, Aperila 1983, 41; po o le *Liahona*, Iulai 1983, 30–31).

## Faaiuga

O le fautuaga mulimuli a Iosua ia Isaraelu ua aofia ai le poloaiga lava lea e tasi na tuuina mai e le Alii ina ua ia valaauina o ia e avea ma se perofeta ina ia faama-losi ma ia lototele (Iosua 23:1–6). E faatatau tonu lava lea poloaiga i aso nei e pei ona talafeagai ma lena taimi aua o lo o feagai i tatou uma ma le taua faaleagaga, i le va o le lelei ma le leaga.

Sa saunoa mai Elder Ezra Taft Benson e faapea e lua mataupu faavae e manaomia mo le mauaina o le saogalemu ma le filemu: “muamua, faalagolago i le Atua; ma lona lua, o le faia o se tautinoga ina ia tausia poloaiga, ia auauna atu i le Alii, ia faia le mea sao . . . ua faamanino mai e le Alii i faaaliga e faapea e ui lava ina avea taimi ma tulaga matautia, e ui lava foi ina siomia i tatou i faaososoga ma le agasala, e ui lava foi ina maua se lagona o le le mautonu, e ui ina faaletonu loto o alii ua tumu o latou loto i le popole, afai e na ona tatou faalagolago i le Atua ma tausia ana poloaiga e le tatau ona tatou fefefe” (Lipoti o le Konafesi, Oketopa 1950, 146).

## Manatu Faaopoopo e Aoao Atu Ai

O mataupu o lo o taua i lalo e faaopoopo i le ootoga o le lesona fautuaina. Atonu e te manao e faaoga se tasi o nei manatu pe sili atu foi e avea o se vaega o le lesona.

## 1. O le suitulaga i se taitai faamanuaiaina

- E toatele tagata, e pei o Iosua ma Polika Iaga, na valaauina e sui tulaga i ni taitai tautaua. O a ni lu'i atonu sa ia i latou? O le a se mea e te manatu na fesoasoani ia i latou e faamanuaiaina ai a latou taumafaiga? O le a se mea e mafai ona tatou fai e fesoasoani ai ia i tatou e faamanuaiaina a tatou taumafaiga pe a tatou sui tulaga i se tasi o le na maoa'e, e tusa lava po o le galuega, lotu, aoga, po o le aiga?

## 2. O le mea e oo i isi tagata ona o agasala a se tagata e toatasi.

- Aoao atu le tala ia Akana i le Iosua e 7. Talu ai le le usitai o Akana, o lea na faatoilaloina ai le fanauga a Isaraelu e le nuu o Ai (Iosua 7:1–5). O le a le mea na faia e Akana na mafua ai lenei mea? (Tagai Iosua 7:20–21). Ua ia aumaia le toasa o le Alii ia Isaraelu e ala i lona le usitai ia te ia, i lona aveina lea o lava-lava ma tupe mai Ieriko.

O a taunuuga o le agasala a Akana o lo o ta'u mai ai e uiga i le afaina o isi tagata ona o a tatou agasala? O le a le mea ua sese ai le manatu e faapea o mea tatou te faia e fitoi tonu ia i tatou ae le afaina ai fua se isi tagata? (Atonu e te manao e faaoga faataitaiga e uiga i le ala e mafai ona afaina ai isi ona o mea e fai e se isi tagata: o se faalavelave tupu faafuasei e mafua ona o se tagata ave-taavale ona e mafai ona afaina ai olaga o tagata le sala o e ua manunua. O se tagata e faalavelave i se vasega a le Aoga Sa e faigata ai i isi ona faasagatonu o latou mafaufau ma maua le Agaga. O se tagata e faia agasala feusuai, pe le tausia le Upu o le Poto na te aumaia le tiga ma le mafatiaga i isi tagata. O se toalu o le ua le faamaoni e mafai ona lepetia ai le aiga ma faatupuina ai le tiga tele i isi tagata le sala o se aiga. O tagata taitoatasi o le ekalesia o e ua le mulimuli i le Alii atonu e taofia ai isi tagata uma o le ekalesia mai le maua o faamanuiaga mai le Alii.)

Sa saunoa mai Elder James E. Faust: “O filifiliga a le tagata lava ia e le fitoi tonu ia te ia lava, e i ai ni ona taunuuga e aafia ai isi tagata . . . o lo tatou sosaiete o le aofaiga lea o mea e faia e le faitau miliona ma miliona o tagata i o latou olaga patino ia i latou lava. O lona aofaiga o amioga a le tagata lava ia e i ai sona taunuuga i tagata uma o le lalolagi e matua tele naua. E leai ni filifiliga e matua fitoi tonu i le tagata lava ia” (Lipoti o le Konafesi, Aperila 1987, 101; po o le *Liahona*, Iulai 1987, 80).

## 3. Ua Maua e Kalepo le Laueleele o Heperona

- O lo o faamatalaina i le Iosua e 14 le maua e Kalepo o le laueleele o Heperona mai ia Iosua. Aisea na maua ai e Kalepo le laueleele o Heperona? (Tagai Iosua 14:6–14. Ia iloa o le fuaitau “matua mulimuli atu ia Ieova” o lo o taua soo i le fuaiupu 8, 9 ma le 14.)

Sa faaalua e Peresitene Spencer W. Kimball lona fiafia ia Kalepo ma sa fautua mai nisi o lesona e mafai ona tatou aoaoina mai ia te ia:

“Ua tatou iloa mai i le faataitaiga na faia e Kalepo ni lesona taua lava. E pei lava ona sa tatau ia Kalepo ona taumafai ma tumau i le faamaoni ma le faatua-tua ina ia maua lona tofi, ua faapea foi ona tatau ona tatou manatua, ua folafola mai e le Alii ia i tatou se nofoaga i lona malo, e tatau ona tatou taumafai atu i ai e le aunoa ma faamaoni ina ia agavaa i tatou mo le maua o lea tauai.

“Sa faaiuina e Kalepo lana fuaitau faagaetia loto i se talosaga ma se lui ou te matuai ioe i ai. Sa nofoia pea e sa Anaki, o ni tagata maualuluga, le laueleele o le folafolaga, ma sa tatau ona faatoilaloina i latou. Sa faapea mai Kalepo, o le sa valusefulu lima tausaga lona matua i lea taimi, ‘Ia e tuuina mai ia te au lenei mauga’ (Iosua 14:12).

O lou lagona lea mo le galuega i lenei taimi. O lo o i ai ni lu’i tetele o lo o i o tatou luma, o ni avanoa tetele e tatau ona tatou manumalo ai. Ou te talia ma le faafetai lena mea o lo o tulai mai ma ou te lagona le faapea atu i le Alii, ma le loto maualalo, “ia e tuuina mai ia te au lenei mauga ia tuuina mai ia te a’u nei lui” (Lipoti o le Konafesi, Oketopa, 1979, 115; po o le *Liahona*, Ianuari, 1979, 79).

#### **4. “Ina Filifilia Outou i le Aso Nei Po o Ai Tou te Auauna I Ai”**

Afai e maua *Vitio o le Feagaiga Tuai* (53224), atonu e te manao e faaali atu le “Ina Filifilia Outou i le Aso Nei Po o Ai Tou te Auauna I Ai” o se vaega lea e ono minute le umi e uiga i le tofotofoina o le ususitai o le solofanua Arapi i se taimi o le fiaai ma le fiainu.

---

**Faamoemoega** Ia uunaia tagata o le vasega ina ia saili mo faatosinaga o le a faamalosia ai i latou ia ola i le talalelei i se lalolagi o faafitauli.

---

- Sauniuniga**
1. Suesue ma le agaga tatalo i mau nei:
    - a. Faamasino 2:6–23. O le faataamilosaga o le liliuese e amata ina ua lafoai e le fanauga a Isaraelu le Alii ae ifo i tupua a tagata na latou ola faatasi.
    - e. Faamasino 4:1–16. Ua poloaiina Parako e faasaoloto Isaraelu mai pulega a Iapino, o le tupu o Kanana (4:1–7). Ua malie o ia e alu atu pe afai la te o atu faatasi ma Tepora (4:8–9). Ua faasaoina e Tepora ma Parako Isaraelu mai Sa Kanana (4:10–16).
    - i. Faamasino 6–7. Ua poloaiina Kitiona ina ia laveaiina Isaraelu mai sa Mitiana (6:1–24). Ua faaumatia e ia ma isi tagata e toasefulu le fata faitaulaga a Paala i le po (6:25–35). Ua faamautinoa atu e le Alii ia Kitiona le maua o se fesoasoani e ala i le tuuina atu ia te ia o faailoga e lua (6:36–40). Ua faasaoina e Kitiona ma le 300 o isi tagata Isaraelu mai sa Mitiana (7:1–25).
    - o. Faamasino 13–16. Ua faatonuina e se agelu matua o Samasoni ina ia avea o ia ma Naseri (13:1–25). Ua faaalua e Samasoni lona malosi tele peitai ua solia e ia le tele o ana tautoga i le avea ma Naseri (14–15). Ua gauai atu Samasoni i faatosinaga a Talila; ua oti lona lauulu, ma ua avea o ia ma se tagata vai-vai, ua pue faatagata o tauaina e tagata Filisitua, ma ua oti a o talepeina e ia lo latou malumalu (16:1–31).
  2. Atonu e te manao e fai atu i tagata o le vasega ina ia saunia e tauloto se mau e tasi po o le sili atu o lo o i lenei lesona.
- 


**Faalautelega  
Fautuaina o  
le Lesona**

Gaoioiga e  
Faatosina Mai Ai

Atonu e te manao e faaoga le gaoioiga o lo o i lalo (po o sa oe lava gaoioiga) e amata ai le lesona.

Sa faamatala e Peresitene Gordon B. Hinckley se taimi ina o toto e ia se laau itiiti i lona fanua peitai sa le faaaogaina e ia ni laau e fesoasoani e tee ai ina ia ola sa’o ae lenei laau. I se tasi taimi, sa pio agai i le isi itu le laau. Sa iloa e Peresitene Hinckley ana se’i nonoa e ia le laau i ni laau e faalagolago ai, semanu e sa’o le ola a lea laau seia oo ina lava lona malosi e tetee atu ai i le matagi. (Lipoti o le Konafesi, Oketopa, 1993, 77–78; po o le *Liahona*, Ianuari, 1993, 59.)

Ia faamatala atu e faapea atonu e pei i tatou i nisi taimi o le laau laitiiti, e le mafai ona tetee atu i le matagi (O faaosoosoga ia a Satani). I le tusi a Faamasino ua tatou iloa mai ai nisi o “laau” e mafai ona lagolago ai i tatou. Ia tusi i le laupapa se ata o se laau laitiiti o lo o nonoa i ni laau se fa e lagolago ai. Afai e oo atu i tala faatusi paia e fa o lo o i le lesona, ia tusia upu nei i laau e fa e faapea:



## Mau Talanoaina ma le Faaogaina

A o e aoaoina atu nei mau, ia talanoaina pe faapefea ona faaoga i le olaga i aso taitasi. Uunai tamaiti o le vasega e faamatala ni aafiaga e faatatau i mataupu ua taua i le mau.


Ina o taitaiina e Iosua, sa faatoilaloina e Isaraelu se vaega tele o le laueleele o le folafolaga. Ina ua maliu Iosua, sa le tuufaatasia Isaraelu i se taitai e tasi sei oo i ona po o le perofeta o Samuelu ma le tupu o Saulo. I le faagasologa o lenei taimi, sa avea faamasino e 12 ma e e taitaia Isaraelu ma avea foi ma taitai o vaega au. Sa faanoanoa se vaega tele o le latou nofoaiga a o agai atu Isaraelu i le taamilosaga o le liliuese, nofo pologa, salamo, ma le laveaiina i le tele o taimi.

Ina ia tau foia vaega faanoanoa o lenei talafaasolopito o lo o i ai ni tala e uiga i ni tagata o e sa tumau i le faamaoni, ma latou faia ni faataitaiga malosi e uiga i le auala e faaoga ai le faatuatua ma le loto tele a o i ai i se lalolagi o le liluese. Sa avea Tepora ma Kitona ma ni faamasino amiotonu o e na faatula'i a'e e le Alii e faasaoina Isaraelu. O le faatuatua o Tepora na mafua ai ona laveaiina Isaraelu mai se vaega au a Sa Kanana. Sa avea le faalagolago o Kitona i le Alii na mafai ai e lana vaega au o ni alii e 300 ona faatoilaloina Sa Mitiana.

### 1. O le Malosi o Matua Amiotonu ma Taunuuga o le Lafoaia o o Latou Ala.

Ia aoao atu ma talanoaina le Faamasino 2:6–23.

- I le tusi a Faamasino, na oo ai le fanauga a Isaraelu i ni vaega o taamilosaga o le amiotonu ma le liliuese (tagai i le “taamilosaga o le liluese o lo o i le Faamasino ma o lo o i ai le ata i le itulau e 89). Sa faapefea ona amataina e augatupulaga o e na tulai ae o Isaraelu le taamilosaga o le liliuese? (Ia tagai faapitoa lava i le Faamasino 2:10, 12, 17, 20, ma le 22. Ia fautua atu ina ia faailoga e le tagata o le vasega upu autu o lo o i ai i lenei mau. Ia faamalalama atu sa tuua e le fanauga a Isaraelu le Atua, ma tuua ala ma feagaiga a o latou matua.)
- Aisea e lafoaia ai e fanau aoaoga amiotonu faapea ma ala a o latou matua? Pe mafai faapefea e matua ona fesoasoani i a latou fanau ina ia faatuatua? Pe ua faapefea ona faamalosia oe ia ola amiotonu e ou matua po o isi tagata o lou aiga?
- Pe mafai faapefea ona tatou iloa faailoga i le amataga lava o le liliuese? Pe mafai faapefea e se tagata ona motusia le taamilosaga o le liliuese? Pe mafai faapefea ona tatou fesoasoani atu i se tagata o le aiga po o se uo o le e foliga mai ua pa'u ese atu mai le malamalama o le upu moni?



## 2. Tepora—o le malosi o se uo amiotonu

Ia toe faamanatu faapuupuu le tala e uiga ia Tepora ma Palako o lo o taua i le Faamasino 4:1–16, po o le alu ane o se tasi o le vasega ua tofia na te faia lea mea.

- O le a le mea na poloaiina e le Alii ina ia faia e Parako? (Tagai i le Faamasino 4:6–7.) O le a se lagona na oo ia Parako e tusa ai ma lenei poloaiga a le Alii? O le a le tulaga na malie ai Parako e alu atu e tau faasaga ia Sesera ma ana kariota e 900? (Tagai Faamasino 4:8). O le a le pogai ua e manatu ai o le a malie Parako e tau faasaga ia Sesera pe afai la te o atu faatasi ma Tepora?
- O le a se mea ua e lagona ai le lagona ootia ona o Tepora? O a ni uiga lelei sa ia te ia atonu sa le i ai ia Parako? (Tagai Faamasino 4:4–9.)
- O le a se mea e mafai ona tatou aoao mai ia Tepora e uiga i le avea o ia ma se uo faamaoni? (O se tasi o mea e mafai ona tatou aoaoina o uo faamaoni latou te uunaiina i tatou ina ia usiusitai i le Alii ma tuuina mai ia i tatou le malosi e faia ai le mea sao.) Pe ua faapefea ona fesoasoani au uo ia te oe e feagai ma ni tulaga faigata pe usiusitai i poloaiga a le Alii? Pe mafai faapefea ona avea i tatou ma ni uo sili atu ona lelei i isi tagata?

Ia fautua atu i tagata o le vasega ina ia tusi i lalo igoa o a latou uo ma ia fesili ifo ia i latou lava (1) pe o avea i latou e pei o Tepora i nei uo ma (2) pe o pei nei uo o Tepora.

## 3. Kitiona—o le malosi o le faatuatua i le Atua.

Ia faamanatu puupuu le tala e uiga ia Kitiona mai le Faamasino 6–7, po o le alu ane o se tasi o le vasega ua tofia e faia lea mea.

- O le a le mea na poloaiina e le Alii e fai e Kitiona? (Tagai Faamasino 6:14.) O le a le tali muamua a Kitiona? (Tagai Faamasino 6:15.)
- Pe sa faapefea ona tautino atu e le Alii ia Kitiona ua ia poloaiina o ia e laveai Isaraelu ma o le a faatasi pea ma ia ma fesoasoani ia te ia? (Tagai Faamasino 6:16–23, 36–40; 7:9–15.)
- Ina ua talitonu Kitiona ua poloaina moni o ia e le Alii e laveaiina Isaraelu, sa alu atu o ia ma le faatuatua. Aisea na finagalo ai le Alii ina ia faaitiitia le vaega au a Kitiona mai i le 32,000 tagata i le 300 i le taua ma Sa Mitiana? (Tagai Faamasino 7:2. Sa finagalo le Alii ia faalagolago Isaraelu ia te ia ma ia iloa lona malosi ae le

o lo latou malosi). Pe ua faapefea ona aoao mai e le Alii ia i tatou ina ia faalagolago ia te ia ma iloa lona malosi i aso nei?

- O le a le mea na tupu ina ua faafesagai Kitiona ma ona tagata e 300 ma Sa Mitiana? (Tagai Faamasino 7:16–23.) O le a sou manatu i le pogai na faatonuina ai e Kitiona ona tagata ina ia alalaga, “O le pelu a le Alii ma Kitiona?” (Tagai Faamasnio 7:20. Sa iloa e Kitiona ma sa manao o ia e iloa e ona tagata—o lo o faatasi le Alii ma i latou.)
- O le a se mea e mafai ona tatou aoaoina mai ia Kitiona? Pe ua faapefea ona fesoasoani le Alii ia te oe i le faia o se mea ua ia faatonuina ai oe e fai ma o lea mea e faigata? (A o faamatala mai e tagata o le vasega mea na oo ia i latou, ia molimau atu e faapea a poloaiina i tatou e le Alii e faia se mea, o le a fesoasoani mai o ia ia i tatou i le faataunuuna o lea mea.)

#### 4. Samasoni—o le malosi o feagaiga ma taunuuga o le solia o feagaiga.

Ia toe faamanatu puupuu le tala e uiga ia Samasoni mai le Faamasino 13–16, po o le alu ane o se tagata o le vasega na tofia na te faia lea mea.

- Pe sa faapefea ona iloa e le tina o Samasoni, o le sa le fanau, o le a fanau mai ia te ia se tama tama? (Tagai Faamasino 13:2–3.) O le a le mea na ta’u atu e le agelu i le tina o Samasoni e uiga i le tama o le a fanau mai ia te ia? (Tagai Faamasino 13:4–5. Ia faamatala atu o tagata e ave ma Naseri sa latou osi feagaiga ma le Alii ina ia tuu esea i latou lava mai mea o le lalolagi ma ia ave o ni tagata e paia ia te ia. O le feagaiga e osia e tagata e ave ma Naseri o lo o i ai lea i le Numera 6:2–6, 8.)
- O a faamanuiaga sa tuuina atu e le Alii ia Samasoni ina ia fesoasoani ia te ia i le faataunuuna o lana misiona o le laveiina lea o Isaraelu mai tagata Filisitia? (Tagai Faamasino 13:24–25; 14:5–6, 19; 15:14–15. Sa tuuina atu e le Alii ia te ia le malosi faaleagaga ma le malosi i le tino.)
- I le ave ma Naseri ma se tasi o le aiga o Isaraelu, sa osi feagaiga Samasoni ma le Alii. Ae ui i lea, sa le pine ae solia e ia le feagaiga faa-Naseri faapea ma ana feagaiga i le ave ma se tagata o le aiga o Isaraelu. O a tautoga ma feagaiga na ia solia? (O nisi o feagaiga na solia e Samasoni o lo o tusia i lalo.)
  - a. Sa faaipoipo o ia i fafo atu o le aiga o Isaraelu o e na osi feagaiga (Faamasino 14:1–3).
  - e. Sa ola le mama o ia faatasi ma se fafine talitane (Faamasino 16:1).
  - i. Sa oti lona lauulu (Faamasino 16:4–20).
- O a taunuuga o le solia e Samasoni o ana feagaiga? (Tagai Faamasino 16:17–21. Sa le maua e ia lona malosi faaleagaga ma le faaletino, ma sa faatauasoina o ia e tagata Filisitia ma saisai. Afai e tatau ai, ia faamatala atu e le o le malosi faaletino o Samasoni na i ai i lona lauulu. Ae ui i lea, sa ave lona lauulu ma se faailoga o lana feagaiga ma le Alii, ma ina ua oti lona lauulu, sa aveese e le Alii lona malosi faaletino ona ua solia le feagaiga.) O le a le mea e tupu pe a tatou solia la tatou feagaiga? O a faailoga tatou te maua o a tatou feagaiga e osia ma le Alii?
- O feagaiga tatou te osia ma le Alii e tatau ona ave ma pogai o lo tatou malosi, taitaiina, ma le tautinoga. O a feagaiga tatou te osia ma le Alii? Pe ua faapefea ona faamalosi oe i nei feagaiga? (O se tasi o ala e faamalosi ai i tatou e feagaiga o le fesoasoani lea ia i tatou e tetee atu i taumafaiga a Satani e faatauasoina pe noatia i tatou.)



- Sa i ai ia Samasoni le tele o mea e mafai ona ia fai. Sa fetalai mai le agelu o le na faailoa mai lona fanau mai o le a ia amata ona laveiina Isaraelu mai tagata Filisitia. Sa faamanuiaina o ia e le Alii i le tele o meaalofo, e aofia ai ma le malosi tautau faaletino. O le a se vaivaiga i totonu o le loto na ala ai ona pa'u o ia? (Tagai Faamasino 15:7; 16:1; MFF 3:4. O tali atonu e aofia ai le faamalievina o lona loto, ola le mama, taumafai e tau ma sui, ma le solia o feagaiga.) Pe mafai faapefea ona tatou manumalo i vaivaiga atonu e taofia ai i tatou mai le faataunuina o mea e mafai ona tatou fai?

## Faaiuga

Ia faamatala atu e faapea i le tusi a Iosua o lo o faamatala ai sa tau Isaraelu ma manumalo i le tele o taua faaletino ma Sa Kanana. Ae ui i lea, i le tusi a Faamasino sa amata ona faiaina ai Isaraelu i taua faaleagaga, ma ua faatagaina i latou lava e tosina atu i faiga faalelalolagi ma atua ese Sa Kanana. Ua feagai i tatou ma taua faaleagaga faapena. Ia molimau atu e mafai ona tatou manumalo i lea taua pe afai tatou te (1) mulimuli i ala o matua amiotonu ma augatama, (2) ia faia ni uo lelei, (3) ia faatupuina lo tatou faatuatua i le Alii, (4) ia tausia a tatou feagaiga.

## Manatu Faaopoopo e Aoa Atu Ai

O mataupu o lo o taua i lalo e faaopoopo i le ootoga o le lesona fautuaina. Atonu e te manao e faaoga se tasi o nei manatu pe sili atu foi e avega o se vaega o le lesona.

### 1. O le sao o matua i le faalelalolagi o fanau (Faamasino 1:28).

- O le toilalo o augatupulaga fai a'e o Isaraelu e tumau i la faatuatua, e le faapea ua na o i latou ua mafua ai. E tusa ai ma le Faamasino 1:21, 27–33, ma le 2:1–4, sa faapefea ona faataatia le faavae mo le toilalo o le fanau? (Sa faataatia ina ua le mafai e matua ona tuliese Sa Kanana. E ui lava ina sa lava le malosi o matua e tetee ai i faatosinaga a le lalolagi na siomia ai, ae sa le faapena a latou fanau.)
- Pe ua faapefea ona faatagaina e matua i aso nei a latou fanau ina ia feagai ma faatosinaga o le lalolagi, ma ua faapea ona latou faia lea lava mea sese e tasi e pei ona sa faia e tagata Isaraelu? (Ia uunaiina le vasega ina ia tuuina mai tali patino.)

### 2. O vavega i o tatou nei aso.

- Aisea ua lagona ai e nisi tagata, e pei foi o Kitona, e sili atu ona tele o vavega na faia e le Alii i augatupulaga ua mavae na i lo vavega ua ia faia i a latou fanau? (Tagai Faamasino 6:13.) O le a lo tatou tiute e tusa ma le faatupuina o ni vavega? (Tagai Moronae 7:35–38.) Pe ua faapefea ona e iloa o lo o faia e le Atua vavega i aso nei? Pe mafai faapefea ona tatou iloa atili vaega itiiti o lo o tutupu i o tatou olaga?

### 3. “Nei mitamita mai Isaraelu i o'u luma” (Faamasino 7:2).

- Aisea na poloaia ai e le Alii Kitona ina ia auina atu le toatele o ana vaega au i o latou aiga a o le i alu atu ma tau ma Sa Mitiana? (Tagai Faamasino 7:2.) Pe ua faapefea ona “mitamita mai” nisi o i tatou i aso nei? (Ua tatou le iloa o o tatou faamanuiaga ma malosiaga e mai le Alii, a ua faapea ane nisi o i tatou ua tatou maua mea uma ua tatou maua i lo tatou lava malosi). Pe mafai faapefea ona tatou manumalo i lenei faafitauli?

#### 4. O le tetee atu i Faaosoosoga

- Aisea na ta'u atu ai e Samasoni ia Talila le mea lilo e tupu ai lona malosi ina ua mavae ona iloa e Samasoni ua taumafai faatolu Talila e faalata ia te ia? (Tagai Faamasino 16:15–17.) Ia faatusatusa tali a Samasoni ia Talila ma tali a Iosefa i le ava a Potifara (Kenese 39:7–12). Pe mafai faapefea ona tatou tetee atu pe faatoilaloina faaosoosoga o loo oo mai pea?

# “Ua Iloa e le Aai Uma . . . O le Fafine Amio Lelei Lava Oe”

Ruta; 1 Samuelu 1

---

**Faamoemoega** Ia uunaia tagata o le vasega ina ia mulimuli i uiga lelei ma le amiotonu o Ruta, Naomi ma Hana.

---

**Sauniuniga**

1. Suesue ma le agaga tatalo i mau nei:
    - a. Ruta 1–2. Ina ua mavae le oti o lana tane, ua tuua e Ruta lona aiga ma o atu i Peteleema ma le tina o lana tane, o Naomi lea. I Peteleema, ua galue Ruta i le fanua o Poasa, o le na agalelei ia te ia.
    - e. Ruta 3–4. Ua taoto Ruta i vae o Poasa, ma ua folafola atu e Poasa la te faaipoipo. Ua faaipoipo i laua ma maua la laua tama. O e na tupuga mai ia i laua e aofia ai le Tupu o Tavita ma Iesu Keriso.
    - i. 1 Samuelu 1; 2:1–2, 20–21. Ua faamanuiaina Hana i se tama tama, o le na tuuina atu e Hana i le Alii e pei ona sa ia folafola atu. Sa faamanuiaina o ia i se taimi mulimuli ane i nisi tamaiti.
  2. Afai e te faaaogaina le gaoioiga e faatosina mai ai, ia aumaia se pepa ma se peni po o se penitala mo tagata taitoatasi o le vasega.
  3. Afai e maua *vitio o le Feagaiga Tuai* (53224), atonu e te manao e faaali atu le vaega ua ta’ua “O le Faatuatua o Hana,” o se vaega e tolu minute le umi, e ave a o se vaega o le lesona.
- 

**Faalautelega  
Fautuaina o  
le Lesona**

Gaoioiga e  
Faatosina Mai Ai

Atonu e te manao e faaaoga le gaoioiga o lo o i lalo (po o sa oe lava gaoioiga) e amata ai le lesona.

Ia tufa atu i tagata taitoatasi o le vasega se pepa ma se peni po o se penitala.

Ia faamatala atu e ui lava ina puupuu le tusi a Ruta, ae ua faaali manino mai ai o Ruta o se tamaitai amiotonu. Ona tuuina atu lea o fesili o lo o i lalo ma ia tusia e tagata taitoatasi o le vasega tali i luga o lana pepa:

- Afai e faamatalaina lau amio i ni nai upu itiiti, o a ni upu e te faaaogaina? O le a se mea e mafai ona e faia i lenei vaiaso ina ia talafeagai ai lau amio ma lena faamatalaga moomia?

Ia faamatala atu o lenei lesona o le a talanoaina ai uiga lelei ma le amiotonu o Ruta faapea ma isi fafine e toalua, o Naomi ma Hana.

---

Mau Talanoaina  
ma le Faaogaina

Ao e aoaoina atu nei mau, ia talanoaina pe faapefea ona faaaoga i le olaga i aso taitasi. Unai tamaiti o le vasega e faamatala ni aafiaga e faatatau i mataupu ua taua i le mau.

## 1. Ua tuua e Ruta lona aiga ae o atu ma Naomi i Peteleema.

Aoao atu ma talanoaina le Ruta 1–2.

- Aisea na o atu ai Naomi ma lona aiga i Moapi e nonofo ai? (Tagai Ruta 1:1–2.) Aisea na toe foi atu ai Naomi i Peteleema ina ua mavae le oti o lana tane ma lana fanau e toalua? (Tagai Ruta 1:6. O Peteleema sa i ai lona aiga, ma sa mavae le oge iina.)
- A o nonofo i Moapi, sa faaipoipo le fanau tama a Naomi ia Orepa ma Ruta, o e na taua o fafine o Moapi (Ruta 1:4). Sa faapefea ona faaalua e Naomi le alofa ma le popole i ava a ana tama ina ua ofo mai e toe foi atu ma ia i Peteleema? (Tagai Ruta 1:7–13.) O le a se mea e mafai ona tatou aoaoina mai le popole o Naomi i taitoalua o ana fanau tama e mafai ona fesoasoani ia i tatou ia tatou fegalegaleaiga faaleaiga?
- Sa toe foi atu se tasi o ava a le fanau a Naomi, o Orepa lea, i lona aiga, a o le isi, o Ruta lea, sa tauanau e foi atu ma Naomi i Peteleema. O le a se mea e mafai ona tatou aoaoina e uiga ia Ruta ona o lana folafolaga na faia ia Naomi i le Ruta 1:16–17? (Sa faaalua e ia le alofa, faamaoni, ma le naunau e fai mea mo isi ae tuu mea ua loto i ai.) Pe mafai faapefea ona tatou faaalua se faamaoni e sili atu i o tatou aiga? E mafai faapefea ona tatou faaalua se agaga le manatu faapito, e pei ona sa faia e Ruta?
- O a ni mea sa lafoai e Ruta ina ua o atu i Peteleema ma Naomi? (O tali e aofia ai lona nuu, aiga, uo, ma le lotu.) O le a le mea na maua e Ruta ina ua o atu ma Naomi? (O le Talalelei a Iesu Keriso; vaai i le uluai manatu faaopoopo e aoao atu.) O le a se mea e mafai ona tatou aoaoina mai ia Ruta e uiga i le faia o osigataulaga mo le talalelei?
- Ina ua o atu i Peteleema, o le a le mea na fai e Ruta ina ia maua ai ni meaai mo ia lava ma Naomi? (Tagai Ruta 2:2. Atonu e tatau ona e faamatala atu e faapea o se tagata e ao fua o le karite o se tagata lea ua faatagaina e ao mai ma tuu ma ia le saito sa totoe i fanua ina ua uma le seleselega.) O fanua o ai sa ao mai ai e Ruta fua o karite? (Tagai Ruta 2:1, 3.) Aisea na faagaetia ai Poasa ona o Ruta? (Tagai Ruta 2:5–7, 11. Sa iloa e Poasa o Ruta o se tamaitai galue malosi. Sa iloa foi e ia mea uma na faia e Ruta mo Naomi.) Pe sa faapefea ona faaalua e Poasa le agalelei ia Ruta? (Tagai Ruta 2:8–9, 14–16.)
- Pe sa faapefea ona faaalua e Ruta le le manatu faapito ina ua foi mai o ia mai le faaputupuina o karite? (Tagai Ruta 2:14, 17–18. Sa aumaia e Ruta le karite na ia aoina i lona aiga ia Naomi, sa aumaia foi e ia ni meaai mo Naomi na totoe mai lana aiga o le aoauli.) Pe ua faapefea ona faamanuiaina oe ona o galuega lē manatu faapito ua faia e isi tagata?

## 2. Ua faaipoipo Ruta ma Poasa ma ua maua sa la tama.

Aoao atu ma talanoaina le Ruta 3–4.

- E i ai se mea sa fautuaina ai Ruta e Naomi e fai na ia faamoemoe o le a oo ina faaipoipo ai Ruta ma Poasa (tagai Ruta 3:1–5). O le taoto i vae o Poasa, o lona uiga o le faailoa atu lea e Ruta o le fia faaipoipo ia Poasa. O le a se mea na faaalua i le usiusitai o Ruta i le fautuaga a Naomi e faaalua ai ona lagona e uiga ia Naomi?

- O le a se tali a Poasa ina ua ala ae o ia ma iloa o lo o taoto Ruta i ona vae? (Tagai Ruta 3:8–15. Ia tagai ina ua faapea atu Ruta, “faaafu maia lou pito ofu i la’u auauna fafine,” o lona uiga “ia e leoleo mai ia te a’u, puipui mai ia te a’u, tausai mai ia te au.”) O le a se tulaga na malie ai Poasa e faaipoipo ia Ruta? (Tagai Ruta 3:11–13. Ia faamatala atu ina ua oti le tane a Ruta, sa tataua ona faaipoipo Ruta i se alii e aiga lelei ma lona toalua. O Poasa e le o se tagata e aiga lelei ma le toalua muamua o Ruta, peitai sa malie o ia e faaipoipo ma Ruta pe a fai ua le manao se alii e aiga lelei ma le toalua muamua o Ruta e faaipoipo ia te ia.)
- O le a se tulaga o le tauleleia o Ruta i tagata o Peteleema? (Tagai Ruta 3:11.) Pe sa faapefea ona aoga lea tauleleia ia te ia i lo la va ma Poasa? Aisea e taua ai le iloa e tagata o o tatou aiga, uo, ma tuaoi o mea tatou te talitonu i ai ma po o a uiga lelei tatou te taumafai e lagolagoina?
- O le a le mea na fai e Poasa ina ua uma ona folafola atu e faaipoipo ma Ruta? (Tagai Ruta 3:15; 4:1–8.) Pe sa faapefea ona faaalua e Poasa o ia o se tagata amio sa’o? (Tagai Ruta 4:9–10, 13. Sa faataunuu e ia lana folafolaga ia Ruta ma sa faataunuu e ia lona tiute i le avefa ma tane e aiga i le tane ua maliu a Ruta (ia faaipoipo ma Ruta.)
- O ai le tupu ta’uta’ua o Isaraelu na tupuga mai ia Ruta ma Poasa? (O le Tupu o Tavita o se tasi lea o atalii o Poasa; tagai i le Ruta 4:17, 21–22.) O ai se isi tagata na tupuga mai ia Ruta ma Poasa? (O Iesu Keriso; tagai Mataio 1:5–16; Ioane 7:42.)
- Sa taua e Elder Thomas S. Monson e faapea o Ruta o se tamaitai toa (Lipoti o le Konafesi Aoao ia Oketopa 1974, 156 po o le *Liahona* Me 1975, 30.) O a ni auala ua e manatu ai o Ruta o se tamaitai toa? (Sa saunoa mai Elder Monson o Ruta o se faataitaiga o le faatuatua ma le faamaoni. Atonu e ta’u mai e tagata o le vasega nisi mea ua taua ai Ruta o se tamaitai toa.)

### 3. Ua faamanuiaina Hana i le fanau mai o se tama, o le na ia tuuina atu i le Alii e pei ona sa ia folafola atu.

Aoao atu ma talanoaina le 1 Samuelu 1.

- Sa le fanau Hana, le ava a Elekana. O tausaga taitasi i le malumalu e tagi o ia ma tatalo ina ia maua sana tama (1 Samuelu 1:1–7). O le a se folafolaga na faia e Hana i le Alii i le 1 Samuelu 1:11? O le a se mea e mafai ona tatou aoao mai e uiga ia Hana mai lenei folafolaga? (Sa avefa o ia ma se tamaitai e tele le faatuatua; atonu e fautua mai e tagata o le vasega nisi tali.)
- O ai na vaai ia Hana o tatalo i le Malumalu? (Tagai 1 Samuelu 1:9–12.) O le a se mea na ta’u atu e Eli ia Hana e uiga i lana folafolaga i le Alii? (Tagai 1 Samuelu 1:17.) O le a se lagona na oo ia Hana ina ua faalogo atu i upu a Eli? (Tagai 1 Samuelu 1:18.) Pe mafai faapefea ona fesoasoani taitai o le ekalesia ia i tatou pe a feagai i tatou ma puapuaga?
- Sa ta’u atu e Hana ia Eli e faapea sa ia “tuu atu lona loto ia Ieova” (1 Samuelu 1:15). Pe mafai faapefea ona fai ia sili atu ona faamaoni ma aoga a tatou tatalo?
- O le a le mea na tupu i le tali atu o Hana i lana folafolaga i le Alii? (Tagai 1 Samuelu 1:19–20.) Pe sa faapefea ona tausia e Hana lana folafolaga ina ua fanau mai Samuelu? (Tagai 1 Samuelu 1:21–28.) O a folafolaga tatou te osia i

le Alii? (Atonu e aofia ai i tali feagaiga tatou te osia ma ia i le papatisoga ma totonu o le malumalu.) O le a se mea e mafai ona tatou aoao mai ia Hana e fesoasoani ina ia tatou gauai ai i le tausia o nei folafolaga?

- O le a se lagona tou te manatu sa maua e Hana e uiga i le tuuina atu o Samuelu i le galuega a le Alii? O le a se mea ua fetalai mai ai le Alii ina ia tatou tuuina atu ia te ia? O le a se uiga tatou te faaalua pe a tuuina atu ia te ia? (E tataua ona tatou tuuina atu ma le loto malie, ma ia manatua o mea uma tatou te maua e mai le Alii.)
- Ina ua avatu e Hana Samuelu i le malumalu, sa faia e ia ni taulaga ma fai pesega i le Alii (1 Samuelu 1:24–25, 28; 2:1–2). Aisea ua taua ai le manatua ia faafetai atu i le Alii ona o faamanuiaga ua ia tuuina mai ia i tatou?
- E tele tausaga o faatali Hana a o le i faamanuiaina o ia i se tama (1 Samuelu 1:2; 2:21). O ai isi tagata o le Tusi Paia sa faamanuiaina ona o le faatalitali ma le onosai i le Alii? O le a se mea e fai mai ai le lalolagi e tusa ma mea tatou te maua ua tatou mananao i ai? O le a se fetalaiga ua ta'u mai e le Alii? Pe mafai faapefea ona tatou aoao ina ia faatali ma le onosai mo faamanuiaga o le a foai mai i le taimi ua finagalo ai le Alii?

Faaiuga

- O a uiga lelei ma le amiotonu sa faia e Ruta, Naomi ma Hana? (Ia tusia nei uiga lelei i luga o le laupapa.)

Ia uunaia tagata o le vasega ina ia faata'ita'i uiga lelei ma le amiotonu sa faaalua e Ruta, Naomi ma Hana. Ia molimau atu o le atinae o nei uiga lelei o le a aumai ai i tatou ia vavalalata atili ma lo tatou Faola, o Iesu Keriso.

## Manatu Faaopoopo e Aoao Atu Ai

O mataupu o lo o taua i lalo e faaopoopo i le ootoga o le lesona fautuaina. Atonu e te manao e faaoga se tasi o nei manatu pe sili atu foi e avea o se vaega o le lesona.

### 1. O le taliaina o Tagata o Nu'u Ese ua liliu mai i le feagaiga a Aperamo.

Ia faamatala atu o Ruta e le o se tagata Isaraelu moni. Ina ua tuua e ia Moapi ina ia o atu ma Naomi i Peteleema, sa tuua foi e ia lana lotu ae mulimuli atu i le Atua o Isaraelu, ma sa faapea atu ia Naomi, “e fai lou Atua mo'u Atua” (Ruta 1:16). O le faaipoipo atu o Ruta ia Poasa, na avea ai o ia ma se vaega o le aiga tau tupu o Isaraelu, o se tagata na tupuga mai ai le Tupu o Tavita ma Iesu Keriso.

- Pe na faapefea ona avea le liliu o Ruta ma le talia o ia i le aiga o Isaraelu ma mea na faaalua ai le finagalo o Keriso ia i latou o e ua mananao e auai i lana ekalesia? (Tagai 2 Nifae 26:33; Alema 19:36; 3 Nifae 21:6.) Pe mafai faapefea ona tatou fesoasoani atu i tagata fou faatoa liliu mai ina ia maua le lagona o le talia lelei o le ekalesia?

### 2. O le talafeagai o le faamasino atu.

- A o vaavaai atu Eli le ositaulaga ia Hana o tatalo i le malumalu, sa sese lana faamasinoga ia te ia, ma ua ia manatu “ua ona o ia” (1 Samuelu 1:13.) O le a le matautia o le faamasino o tagata i o latou foliga? E mafai faapefea ona tatou aloese mai lenei ituaiga o faamasino atu?

- Sa saunoa mai Peresitene Hugh B. Brown, “Afa i ou te faia ni mea sese i le faamasinoina o tagata, ou te mana o ia i latou ina ia i ai i le itu o le alofa mutimutivale” (in Eugene E. Campbell and Richard D. Poll, *Hugh B. Brown: His Life and Thought* [1975], 225). E mafai faapefea ona tatou faatinoina lena mataupu faavae?

### 3. O le foia o popolega ma atuatuvaega e ala i le alu atu i le malumalu.

- O fea sa fai ai e Hana lana folafolaga i le Alii? (Tagai 1 Samuelu 1:9–11.) Pe mafai faapefea ona avea le alu atu i le malumalu ma mea e fesoasoani ai ia i tatou i mea e popole ma atuatuvaega ai?

Sa saunoa mai Elder John A. Widtsoe: “ Ou te talitonu o le tagata o lo o galue . . . o lo o i ai mea e popole ai, e sili atu ona vave ona foia ona faafitauli i le maota o le Alii i lo se isi lava nofoaga. Afa i na te faia galuega o le malumalu mo ia lava ma ona tagata ua maliliu, o le a tuuina atu e ia se faamanuiaga sili i e ua maliliu ma se faamanuiaga mo ia lava; i se taimi na te le i faamoemoeina, i totonu po o fafo o le malumalu, o le a oo mai ai ia te ia e pei o se faaaliga, le tali i faafitauli o lo o mafatia ai lona olaga. O le faamanuiaga lena e oo mai i e ulu atu i le malumalu ma le mama” (upusii a David B. Haight, i se Lipoti o le Konafesi Aoao ia Oketopa 1990, 76; po o le *Liahona*, Ianuari, 1991, 62).

# O Le a Faasili e le Atua i Latou o e Faasili ia te Ia

Lesona  
**21**

1 Samuelu 2–3; 8

---

**Faamoemoega** Ina ia fesoasoani i tagata o le vasega ia malamalama i faamanuiaga o le faasili ma le faamalie o le Alii nai lo i latou lava, isi, po o le lalolagi.

---

## Sauniuniga

1. Suesue ma le agaga tatalo mau nei:
  - a. 1 Samuelu 2:12–17, 22–25. Ua faia e atalii o Eli ni solitulafono ma ua apoaiina e lo latou tama.
  - e. 1 Samuelu 2:27–36; 3:12–14. Ua lapataiina e se tagata o le Atua Eli e tusa ma taunuuga o le amio leaga i lona aiga.
  - i. 1 Samuelu 3. Ua valaauina Samuelu, ma ua talia e ia.
  - o. 1 Samuelu 8. Ua manao Isaraelu i se tupu ina ia “pei i latou o nuu uma.” Ua lapataiina e Samuelu i latou e uiga i le matautia o se filifiliga faapea.
2. Atonu e te manao e fai atu i se tagata e toatasi o le vasega ia saunia e otooto le faamatalaga e uiga i le valaauga o Samuelu (1 Samuelu 3 ae fai atu i se isi tagata o le vasega ia saunia e otooto mai le tala e uiga i le manaomia e Isaraelu o se tupu” 1 Samuelu 8.)
3. Afai e te filifili e talanoa e uiga i le tusi itiiti o le *Mo le Malosi o le Au Talavou* (34285) i lenei lesona, ia aumaia se kopi o lea tusi i le vasega.
4. Afai e te faaaogaina le gaoioiga e faatosina mai ai, ia aumai se ata o le Faaola (62572; Taga o Ata o le Talalelei 240). Afai e sili ia te oe le aua nei tusia ata i luga o le laupapa, ia aumai se faata, ma se mea e faatusa ai isi tagata, ma se faafanua, kelope, po o isi mea e fai ma faatusa o le lalolagi.
5. Afai e maua le ata o le Ua Valaauina Samuelu i le Alii, atonu e te manao e faa-aoga lea ata i le faagasologa o le lesona (62498; Taga o Ata o le Talalelei 111).

---

## Faalautelega Fautuaina o le Lesona

Gaoioiga e  
Faatosina Mai Ai


Atonu e te manao e faaaoga se tasi o gaoioiga nei, (po o sa oe lava gaoioiga) e amata ai le lesona. Filifili le gaoioiga e sili atu ona talafeagai mo le vaega.

A o le i amataina le vasega, faaali atu ma toe ufiufi le ata o le Faaola. Ia tusia ata e tolu i luga o le laupapa ma toe ufiufi (po o le faaali atu ma toe ufiufi mea e tolu o lo o lisiina i lalo o “Sauniuniga”). Faamatala atu o nei mea taitasi o lo o ufiufi e i ai se mea e faia ai ma le o lo o tatou faasiliina pe faamamaluina ma taumafai e faafiafia.

- E pei ona taua i le 1 Samuelu 2:30, o ai e faasili e le Alii?

Tau atu i tagata o le vasega o lenei lesona o le a talanoaina ai faamanuiaga mai lo tatou faasilia o le Alii. Faamatala atu o le a e faaalina mea o lo o ufiufi i se taimi tatau o le lesona.





**Mau Talanoaina  
ma le Faaogaina**

A o aoaina atu nei mau, ia talanoaina pe faapefea ona faaoga i le olaga i aso taitasi. Uunai tamaiti o le vasega e faamatala ni aafiaga e faatatau i mataupu ua taua i le mau.

**1. Ua faasilisilia e atalii o Eli i latou lava e sili atu i le Alii.**

Ia aoao atu ma talanoaina le 1 Samuelu 2:12–17; 22–25.

O Hofeni ma Fineaso o atalii ia o Eli, le faitaulagasili, ma o i laua sa avea foi ma faitaulaga. Ae ui i lea, sa amioleaga i laua. A oo ina o mai Isaraelu e ositaulaga i le falefetafai, e faamalosi ona ave e Hofeni ma Fineaso aano o manu e osi ai le taulaga a o le i faamuina vaega ga’oa i luga o le fatafaitaulaga. E ave foi e i laua se vaega o aano sa faavela e le tagata faitaulaga mo le aiga o le taulaga (1 Samuelu 2:12–17). Sa avea nei solitulafono ma ni solitulafono mamafa ua solia ai tulafono a le Atua, ma ua tutusa lava lea ma le faoa o mea a le Atua. Sa faia foi e atalii o Eli le agasala sili ona mamafa o le momoe lea ma fafine o e sa faapotopoto i le faitotoa o le falefetafai (1 Samuelu 2:22).

- O le a le mea na oo i isi tagata o Isaraelu ona o amioga a le fanau a Eli? (Tagai 1 Samuelu 2:17, 24.)
- O le a le mea ua faaali mai e amioga a atalii o Eli e uiga i e latou te filifili e faasili? (Ia susue ma faaali atu le ata muamua o se faata po o se faata moni.) O a nisi o vaega o o tatou olaga tatou te faasili i nisi taimi ma faamalie ai i tatou lava ae le o le Alii? Atonu e ta’u mai e tagata o le vasega ni vaega e pei o mea o lo o taua i lalo:
  - a. Faafiafiaga
  - e. Tausia o le Aso Sapati
  - i. O tafaoga faamasani po o evaga ma le ola mama
  - o. Anapogi
  - u. Valaauga i le ekalesia
- O le a sou manatu i le pogai tatou te filifili ai i nisi taimi e faamalie i tatou lava ae le o le Atua? O a taunuuga o le faasili o i tatou lava ae le o le Atua?

**2. Ua Faasili e Eli ona atalii ae le o le Alii.**

Aoao atu ma talanoaina le 1 Samuelu 2:27–36; 3:12–14.

- O le a le tiutetauave sa ia Eli ina ua ia iloa le amioleaga a ona atalii? O le a le mea na ia fai? (Tagai 1 Samuelu 2:22–25.) O le a le tali na faaalua e nei atalii e toalua? (Tagai 1 Samuelu 2:25.)
- Ina ua uma ona aoaoina ona atalii, sa le faia e Eli se isi lava mea ina ia faasa'o ai agasala mamafa i lona aiga faapea foi ma le falefetafai. Ona o lea, sa oo mai se tagata o le Atua ma aoaoina o ia, ma ta'u atu ia te ia ua faasili e ia ona atalii nai lo le Atua (1 Samuelu 2:27–29). O a auala sa faasili ai e Eli ona atalii nai lo le Atua? O le a le mea na fetalai mai le tagata o le Atua o le a tupu i le aiga o Eli? (Tagai 1 Samuelu 2:30–35.)
- O a ni auala ua tatou faasili ai i nisi taimi isi tagata i lo le Atua? (Susue le ata lona lua po o se mea e sui tulaga i isi tagata.) Atonu e fautua mai e tagata o le vasega ni auala e pei o lenei:
  - a. Tatou te faatagaina a tatou paaga e tauanau i tatou e fai se mea tatou te iloa e sese.
  - e. Tatou te faia se mea le faamaoni ona ua tatou fefefe i mafaufauga o tagata e uiga ia i tatou.
  - i. Tatou te le faasa'oina tagata o o tatou aiga po o uo ia latou mea sese ona ua tatou mananao e faatumauina lo tatou va lelei ma i latou.

Sa aoao mai e Peresitene Iosefa F. Samita se manatu e faapea: “E le tatau ona i ai so o se tasi o i tatou e le faautauta i le faatutuina o tapulaa ma tulafono, o le ua le manatunatu lelei ma ua itiiti se alofa e i ai mo a tatou fanau ma ua latou le taofia ai i latou mai le ala e se ese atu ai, i le faia o mea sese faapea ma lo latou alofa faavalea i mea o le lalolagi e sili atu nai lo mea o le amiotonu, ona ua tatou fefefe ina nei faatiga ia te i latou” (*Mataupu Faavae o le Talalelei*, mataupu 16).

- Pe mafai faapefea ona faataunuu e matua lo latou tiutetauave e tusa ma fanau ua se ese ma le ala i se agaga o le alofa? O le a le tiutetauave o fanau a o tau-mafai atu o latou matua e taitaiina i latou i le amiotonu?

### 3. Ua faasili e Samuelu le Alii.

Ia aoao atu ma talanoaina le 1 Samuelu 3. Atonu e te manao ia alu ane se tasi na tofia o le vasega e faamatala ootoo mai lenei mataupu. Ia faamanatu atu i tagata o le vasega sa galue le tama o Samuelu i totonu o le malumalu ina ua uma ona tuuina atu e lona tina, o Hana, o ia i le galuega a le Alii, e pei lava ona sa ia folafola atu ai (1 Samuelu 1).

- O ai na fetalai mai ai Samuelu i le po? (Tagai 1 Samuelu 3:4.) O ai le tagata sa muamua ona manatu Samuelu o lo o valaau mai? (Tagai 1 Samuelu 3:5–6, 8). Sa faapefea ona iloa e Samuelu o le Alii o lo o valaau mai? (Tagai 1 Samuelu 3:8–9.)
- Sa faapefea ona fesootai i tatou ma le Alii? (E sili ona masani ona fesootai mai o ia e ala i musumusuga a le Agaga Paia. Atonu e ta'u mai e le vasega nisi auala e fesootai ai o ia ma i tatou.) E mafai faapefea ona tatou saunia i tatou lava mo le maua ma le malamalama i fesootaiga mai le Alii?
- O a ni auala sa faasili ai e Samuelu le Alii? (Susue le ata o le Alii.) Atonu e te manao e talanoaina mau o lo o i lalo i la outou talanoaga:

“Ou te faatuina mo a’u se faitaulaga faamaoni, na te faia e tusa ma lo’u loto ma lo’u manatu” (1 Samuelu 2:35).

“Ona valaau lea o Ieova ia Samuelu; ua tali atu o ia, O a’u lenei” (1 Samuelu 3:4).

“Ona tali atu lea o Samuelu, fetalai mai ia, aua o lo o faalogologo atu lau auauna” (1 Samuelu 3:10).

- Sa folafola mai e le Alii o le a ia faasili i latou o e faasili ia te ia (1 Samuelu 2:30). Pe sa faapefea ona faasili e le Alii Samuelu? (Tagai 1 Samuelu 3:19.) O le a se auala ua e manatu o le a faasili ai i tatou e le Alii pe afai tatou te faasili o ia e pei ona sa faia e Samuelu?

#### 4. Ua faasili e Isaraelu le lalolagi.

Ia aoao atu ma talanoaina le 1 Samuelu 8. Atonu e te manao e alu ane se tasi o le vasega na tofia na te otooto maia lenei mataupu.

- O le a le ituaiga o malo sa i ai ia Isaraelu i le taimi o le galuega a Samuelu? (Tagai 1 Samuelu 8:1. Sa pulea Isaraelu e faamasino.) O ai sa manatu Isaraelu o le a avea ma o latou tupu? (Tagai 1 Samuelu 12:12).
- Aisea na mananao ai le fanauga a Isaraelu i se tupu? (Tagai 1 Samuelu 8:5, 20.) I lo latou ole atu mo se tupu “e pei o nuu uma,” o ai sa teena e Isarelu? (Tagai 1 Samuelu 8:7.) O le a le mea na faatonuina ai e le Alii Samuelu ina ia ta’u atu e uiga i faafitauli o le maua o se tupu? (Tagai 1 Samuelu 8:9–18.) O le a le tali sa faaalua e Isaraelu i lapataiga sa tuuina atu e Samuelu? (Tagai 1 Samuelu 8:19–22.)
- Ona o lo latou ole atu mo se tupu, o ai sa faasili e Isaraelu? (Susue le ata lona tolu po o se mea e fai ma sui o le lalolagi.)
- O a ni auala ua tatou mananao ai i nisi taimi ina ia avea “e pei o isi nuu uma”? (Tagai 1 Samuelu 8:5.)

Atonu e te manao e faaaoga le tusi laitiiti *Mo Le Malosi o le Autalavou* (34285) ina ia talanoaina tulaga ua faatuina e le Alii mo i tatou ina ia tatou le faia ni auala amioleaga o le lalolagi. Ia faamatala atu o nei tulaga faatonuina e faatatau lea i tagata matutua faapea foi ma le autalavou.

- O le Alii o Iesu Keriso o lo tatou tupu moni lava lea, e pei foi ona sa avea ma tupu moni o Isaraelu (Salamo 47:7; 89:18; 149:2). Pe tatau faapefea ona aafia a tatou amioga ona o lenei malamalama e tusa ma lagona tatou te maua e uiga i auala o le lalolagi? Pe faapefea i nisi taimi ona tatou teena le Alii i le avea ma o tatou tupu?

#### Faaiuga

Ia tosina manatu o le vasega i mea e fa sa faaali i le gasologa o le vasega. Ia faamatala atu e tatau ia i tatou uma lava i aso taitasi ona filifili po o ai o le a tatou faasilia. Ia molimau atu e uiga i faamanuiaga ma le olioli ua e maua a o e faasilia le Alii. Ia valaauina tagata o le vasega e faamatala mai ni tulaga na oo ia i latou lava po o ni molimau foi.

## Manatu Faaopoopo e Aoao Atu Ai

O mataupu o lo o taua i lalo e faaopoopo i le ootoga o le lesona fautuaina. Atonu e te manao e faaoga se tasi o nei manatu pe sili atu foi e avea o se vaega o le lesona.

### 1. O le taua o mea tatou te filifili e fai.

- O nisi taimi tatou te faafesui ai mea e tetele lo latou taua mo mea e itiiti le taua. O a ni mea sa le toe faia e Eli ma ona atalii ona o mea sa latou filifili e fai? O a nisi o mea sa ta’u atu e Samuelu ia Isaraelu o le a aveesea mai ia i latou ona ua latou mananao i se tupu? (Tagai 1 Samuelu 8:11–17.) O a nisi o mea ua taua tele tatou te le faia i nisi taimi ona o mea e itiiti lo latou taua?

### 2. “O e ua valaaulia e le Alii, o le a faagavaa e le Alii.”

Sa faia e Peresitene Thomas S. Monson le faamatalaga o lo o i lalo ina ia faaalai ai le ala e faasili ai e le Alii i latou o e faasili ia te Ia:

“Atonu o nisi o outou e matamumuli e ala i le tulaga masani, pe manatu foi ia te outou lava e le agavaa e tali atu i se valaauga. Ia manatua o lenei galuega e le o sa outou galuega po o sa’u foi. O le galuega lava a le Alii, ua agavaa i tatou mo le fesoasoani a le Alii. Ia manatua o le ua valaauina e le Alii, e faagavaaina e le Alii” (Lipoti o le Konafesi Aoao ia Aperila, 1996, 62; po o le *Liahona*, Iulai 1996, 52).

Sa faamatalaina e Peresitene Monson le tala lenei:

“Pe tatau ea ona tatou manatu ua faigata le tofiga pe tele le taimi e alu ai, sei ou faamatala se tala i se faiaoga faamaoni o aiga ma lana soa i le mea sa ta’ua i na ona po o Siamani i Sasa’e.

“O le uso o Johann Denndorfer na liliu mai i le Ekalesia i Siamani, ma ina ua mavae le Taua Lona Lua a le Lalolagi, sa ia iloa o lo o avea o ia o se pagota i lona lava laueleele—o le laueleele lea o Hanikeri i le aai o Debrecen. Sa manao tele o ia e fia maua ona faamanuiaga faaleagaga! O ana talosaga uma e fia malaga atu i le malumalu i Suiteselani sa le taliaina, ma sa toetoe lava oo ia te ia le faavaivai. O le taimi lena na asiasi atu ai lona faiaoga o aiga. O le Uso o Walter Krause na alu atu mai le itu i matu i sasa’e o Siamani, se’i oo atu lava i Hanikeri. Na ia fai atu i lana soa o aoaoga faaleaiga, “Pe e te fia alu faatasi ma a’u i aoaoga faaleaiga i lenei vaiaso?”

“Na fai mai lana soa, ‘O afea ta te o ai?’

“O taeao,” le tali a le Uso o Krause.

“O afea ta te toe fo’i mai ai?” o le fesili lea a lana soa.

“Oi, pe tusa o le vaiaso—pe sili atu fo’i!”

“Ma sa la o atu ai e asiasi i le Uso o Denndorfer. Sa le i maua e ia ni faiaoga o aiga a o le i faia le taua. Ma o lea ina ua vaai o ia i auauna a le Alii, sa lofituina o ia. Sa le lululima o ia ma i laua; ae sa alu atu o ia i lona potumoe ma aumaia mai se nofoaga lilo lana sefuluai lea sa ia teuina mai le aso na avea ai o ia ma se uso o le Ekalesia ma toe foi atu i Hanikeri. Sa ia tuuina atu le sefuluai i faiaoga o aiga ma faapea atu, ‘O lenei ua ou faatasi ma le Alii. O lenei la ua ou lagona le agavaa e lululima ma auauna a le Alii!’

“Sa fesili atu le Uso o Krause ia te ia e uiga i lona manao e ulu atu i le malumalu i Suiteselani. Na tali mai Uso Denndorfer, “Ua leai se aoga. Ua ou fiu e taumafai. Sa aveina e le malo a’u tusi o le Ekalesia, o a’u ‘oa sili ona taua.”

“O Brother Krause, o se peteriaka, sa ia tuuina atu ia Uso Denndorfer se faamanuiaga faapeteriaka. I le faaiuga o le faamanuiaga, na ia fai atu ia Uso Denndorfer, “Ia toe faafesootai le malo e uiga i lou alu atu i Suiteselani.” Ma sa toe tuuina atu ai e Uso Denndorfer le talosaga i taitai. I lea taimi na tuuina mai ai le faatagaga, ma le olioli na alu atu ai Uso Denndorfer i le Malumalu i Suiteselani ma sa nofo ai i le masina atoa. Sa maua ai e ia ona lava faaeega paia, sa faamauina lana ava ua maliu ia te ia, ma sa mafai e ia ona faataunuuna le galuega mo le selau ma selau o ona tuua. Sa toe foi mai o ia i lona aiga ua faafouina le tino ma le agaga” (Lipoti o le Konafesi Aoao, Aperila 1996, 64–65 po o le *Liahona*, Iulai, 1996, 54).

# “E Vaai Ieova i le Loto”

## Lesona 22

1 Samuelu 9–11; 13; 15–17

---

**Faamoemoega** Ia uunaia tagata o le vasega ina ia faalagolago i le Alii ae le o lo latou lava atamai.

---

### Sauniuniga

1. Ia suesue ma le agaga tatalo i mau nei:
  - a. 1 Samuelu 9–11. Ua saili Saulo mo se taitaiga mai le profeta o Samuelu (9:1–14, 18–24). Ua faaalua e le Alii ia Samuelu o Saulo e tataua ona avea ma tupu (9:15–17). Ua fautuaina Saulo e Samuelu ma ua faauuina o ia e avea ma uluai tupu o Isaraelu (9:25–27; 10:1–8). Ua toe fanauina Saulo faale-agaga, ma ua vavalalo o ia (10: 9–13). Ua tuuina atu Saulo e Samuelu i tagata (10:17–27). Ua taitaiina atu e Samuelu Isaraelu ma ua manumalo i se taua ma Sa Amoni (11:1–11). Ua musu o ia e faasala i alii o e na lē talitonu na te mafai ona taitai le nuu (11:12–15).
  - e. 1 Samuelu 13:1–14. Ua osia e Saulo se taulaga mu e aunoa ma le pule tataua.
  - i. 1 Samuelu 15. Ua poloaiina Saulo e faaumatia Ameleka ma a latou mea totino uma, peitai ua faasaoina e ia nisi o a latou manu e fai ma taulaga (15:1–9). Ua teena e le Alii Saulo i le avea ma tupu, ma ua ta’u atu e Samuelu ia Saulo e sili le usitai na i lo le taulaga (15:10–35).
  - o. 1 Samuelu 16. Ua filifilia Tavita e le Alii, o se tama talavou leoleo mamoe, e sui tulaga ia Saulo i le avea ma tupu (16:1–13). Ua alu ese le Agaga Paia mai ia Saulo, ma ua ulufia o ia e le Agaga leaga (16:14–16; ia tagai i le Faaliliuga a Iosefa Samita, o loo faasa’oina ai nei fuaiupu ma ta’u mai ai o le agaga leaga e *le* mai le Atua). Ua filifilia Tavita e Saulo e ta le kitara mo ia ma ia avea ma ana soatau (16:17–23).
  - u. 1 Samuelu 17. Ua fasiotia e Tavita Koliata i le malosia o Ieova.
2. Tusi faaopoopo e faitau i ai: 1 Samuelu 12; 14.
3. Atonu e te manao e fai atu i se tagata e toatasi o lau vasega ina ia sauni e ootoo mai le tala e uiga i le filifilia e Ieova o Tavita e avea ma tupu (1 Samuelu 16:1–13) faapea ma se isi tagata o le vasega e saunia e ootoo mai le tala e uiga i le fasiotia e Tavita o Koliata (1 Samuelu 17:1–54).
4. Afai e te faaaogaina se tasi o gaoioiga, ia tusia le mau leni i luga o le laupapa poo se pepa lautele: “Ia e faatuatua ia Ieova ma lou loto atoa, ae aua le faalagolago i lou lava atamai. Ia e manatua o ia i ou ala uma, ona faatonuina ai lea e ia lava ou ala” (Faataoto 3:5–6).
5. Afai o maua vitio nei, atonu e te manao e faaaoga ia mea e avea o se vaega o le lesona:
  - a. “O le a Laveaiina A’u . . . e le Alii,” o se vaega e fa minute le umi e uiga ia Tavita mai le ata *Vitio o le Feagaiga Tuai* (53224).
  - e. O le ata o le Fasiotia e Tavita o Koliata (62073; Taga o Ata o le Talalelei 112).

---

**Faalautelega  
Fautuaina o  
le Lesona**

Gaoioiga e  
Faatosina Mai Ai

Atonu e te manao e faaoga se tasi o gaoioiga nei (po o sa oe lava gaoioiga) e amata ai le lesona. Filifili le gaoioiga e sili atu ona talafeagai mo le vasega.

1. Ia faamatala atu o le taumate o se upu e le iloa lona uiga e le ese lea mai le faia o se faaiuga e faavae i lo tatou lava malamalama. Faaali atu upu o le Faataoto 3:5–6. Ia faamamafa atu e faapea o le saili atu i se pogai faatuatuaina ina ia iloa ai le uiga moni o le upu, ua tatau ai ia i tatou ona faalagolago i le Alii ma saili atu mo lona finagalo mo le faia o ni filifiliga sao i o tatou olaga. O lenei gaoioiga ua faatusaina i le mea na oo i tagata e toalua, o Saulo ma Tavita, ina ia aoao atu ai le taua o le faalagolago i le Alii ma saili atu mo lana taitaiga pe a tatou faia filifiliga.
2. Ia fai atu i tagata o le vasega e faamatala mai filifiliga taua sa latou faia talu ai nei. Ia fesili atu po o le a se mea na fesoasoani ia i latou i le faia o ia filifiliga.  
Faaali atu upu o lo o tusia i le Faataoto 3:5–6 (Atonu e te manao e tauloto e tagata o le vasega lenei mau). Ia faamatala atu o lenei lesona ua pei lava o le tulaga na oo i alii e toalua o Saulo ma Tavita, ina ia aoao atu ai le taua o le faalagolago i le Alii ma saili atu mo lana taitaiga pe a tatou faia filifiliga.

---

Mau Talanoaina  
ma le Faaogaina

A o e aoaoina atu nei mau, ia talanoaina pe faapefea ona faaoga i le olaga i aso taitasi. Uunai tamaiti o le vasega e faamatala ni aafiaga i mataupu ua taua i le mau. Talu ai ona e faigata ona faia fesili uma pe faamatala atu mea uma o lo o i le lesona, ia filifili ma le agaga tatalo fesili o le a sili ona talafeagai ma tulaga manaomia o tagata o le vasega. Afai e te manao e tausisi atu i le faamatalaga e uiga ia Tavita ma Koliata, mo se faataitaiga, e mafai ona e faaitiitia le taimi e talanoa ai e uiga i le olaga o Saulo.

**1. Ua saili atu Saulo mo se taitaiga mai ia Samuelu ma ua faauuina e avea ma tupu.**

Ia aoao atu ma talanoaina le 1 Samuelu 9–11.

- Sa manao Isaraelu i se tupu e pei o nuu sa siomia ai i latou. O le faamatuu atu i le talosaga a Isaraelu, o lea na ta'u atu ai e le Alii ia Samuelu ina ia faauuina Saulo ia avea ma tupu muamua o Isaraelu. O Saulo “o se taulealea aulelei, e leai se tasi o fanauga a Isaraelu e sili ona aulelei ia te ia” (1 Samuelu 9:2). O le a le mea na fai e Saulo a o le i faauuina o ia e avea ma tupu ma se taimi e le mamao na faaalua ai ona uiga lelei?
  - a. Sa ia te ia le agaga naunautai e saili asini na leiloa a lona tama (1 Samuelu 9:3–4).
  - e. Sa i ai ia te ia le agaga naunautai e faalogo ma mulimuli i le fautuaga lelei a le auauna a lona tama (1 Samuelu 9:5–10).
  - i. Sa faalagolago o ia i le Perofeta o Samuelu ma sa fesootai ma ia (1 Samuelu 9:18–25).
  - o. Sa ia te ia le lotomaulalo (1 Samuelu 9:20–21).
  - u. Sa toe fanauina o ia faaleagaga, ma sa vavalo atu (1 Samuelu 10:6–10).
  - f. Sa ia faamagalalo atu i e sa faitio ia te ia (1 Samuelu 11:11–13).

g. Sa iloa e ia le fesoasoani a le Alii i le manumalo a Isaraelu i le taua ma sa Amoni (1 Samuelu 11:13).

## 2. Ua osia e Saulo se taulaga mu e aunoa ma le pule tatau.

Ia aoao atu ma talanoaina le 1 Samuelu 13:1–14.

- I le lua tausaga talu ona faauuina Saulo e avea ma tupu, sa faapotopoto e tagata Filisitia se vaega au toatele e tau faasaga ia Isaraelu. Sa matua fefefe tagata ia Saulo o le mea lea na toatele ai i latou na lalafi ma faataapeapeina. O le a le pogai na manao ai Saulo ia sau ia te ia le perofeta o Samuelu i lenei taimi? (Tagai 1 Samuelu 13:7–8. Sa manao Saulo e osia e Samuelu taulaga i le Alii e fai ma sui o tagata.) O le a le mea na fai e Saulo ina ua le sau Samuelu i le taimi tuupoina? (Tagai 1 Samuelu 13:9. Sa osia e Saulo lava ia taulaga e ui lava ina sa le i ia te ia le pule o le perisitua e faia ai lea mea.)

Sa tusia e Elder James E. Talmage se faamatalaga e faapea, “sa saunia e Saulo lava ia taulaga mu, ma sa galo ia te ia e ui lava ina nofoia e ia le nofoalii, faia le pulou o le tupu, ma umia le tootoo o le tupu, [ae sa le ia te ia] se aia tatau e osia ai ia taulaga . . . i le Perisitua a le Atua; ma ona o le a faapea foi ma isi mea amioletonu na ia faia o le mea lea na teena ai o ia e le Atua ma avea le tasi ma tupu e suitulaga ia te ia” (*The Articles of Faith*, 12th ed. [1924], 185).

- O le a le tali a Samuelu e uiga i le osia e Saulo o se taulaga le faatagaina? (Tagai 1 Samuelu 13:10–14).
- O le a se mea na faaalua i le taulaga na osia e Saulo e aunoa ma le pule tatau e uiga ia te ia? (Sa le toe avea o ia “ma se tagata mona e tatau ma lona finagalo [1 Samuelu 13:14]. Sa tupu lona le onosai, ua le faalagolago i le Alii, ma ua le usitai. E le gata i lea, o lona manatu e faapea o ia te ia le pule e osia ai taulaga ua faaalua ai le manatu e sili atu ona taua o ia ma malosai nai lo le mea moni sa i ai o ia.) O a ni ala ua avea ai i tatou i nisi taimi ma ni tagata le onosai i le Alii po o ana auauna? O a ni taunuuga o lea le usitai? E mafai faapefea ona tatou faalagolago i le Alii i se tulaga atoatoa?

## 3. Ua le usitai Saulo ia Ieova i le taua ma Ameleka ma ua teena i le avea ai ma tupu.

Ia aoao atu ma talanoaina le 1 Samuelu 15.

- O le a le mea na poloai atu ai Ieova ia Saulo na te fai i Ameleka? (Tagai 1 Samuelu 15:1–3.) O le a le mea na fai e Saulo e ese mai i lea? (Tagai 1 Samuelu 15:4–9.) O le a le mea na faaalua i amioga a Saulo e uiga ia te ia? (Tagai 1 Samuelu 15:11. Sa mulimuli o ia i lona lava manao ae le o le faia o le finagalo o le Alii.)
- Pe na faapefea ona taumafai Saulo e ta’u amiotonuina lona le usiusitai i le faasaoina o manu sili ona lelei a Ameleka? (Tagai 1 Samuelu 15:13–15, 20–21, 24. Sa tuuaiina e ia ona tagata mo le manao e faasao manu.) E tusa ai ma le faamatalaga a Saulo, aisea na mananao ai ona tagata e faasao manu e sili ona lelei a Ameleka? (Tagai 1 Samuelu 15:15, 21.) O a ni auala tatou te taumafai ai i nisi taimi e tau amiotonuina lo tatou le usiusitai i le Alii? (Atonu tatou te faapea ifo ia te i tatou lava, “ua na o sina agasala laitiiti,” “o lo o ou usiusitai i le agaga o le tulafono ae le o le tusi o le tulafono.” “E le afaina ai se tasi,” “se i ou faataitai tasi ai,” “o lo o faia e isi tagata,” po o le “o lena poloaiga e le faatatau ia te au.”)



E mafai faapefea ona tatou manumalo i le mafuli atu e fai alofaga pe ta'u amio-tonu le agasala?

- O le a le tali a Samuelu i faamatalaga a Saulo mo le faasaoina o manu a Ameleka? (Tagai 1 Samuelu 15:22.) Pe mafai ona faatatau upu a Samuelu ia i tatou?
- A o aoaiina Saulo ona o le ua ma'aa ma le tetee i le afioga a le Alii, sa ta'u atu e Samuelu ia te ia, "o le finauvale e tusa ia ma le . . . tapuai i tupua' (1 Samuelu 15:23). Pe ua faapefea ona avea le finauvale e tusa ma le ifo i tupua? O le a le taunuuga o le fouvale ma le finauvale o Saulo? (Tagai 1 Samuelu 15:23, 26, 28.) Pe ua faapefea ona avea i tatou i nisi taimi ma tagata fouvale ma le finauvale? O a taunuuga o lo tatou fouvale ma le finauvale? Pe ua mafai faapefea ona tatou iloa ma manumalo i nei uiga?

#### 4. Ua filifilia e le Alii Tavita e fai ma tupu.

Ia aoao atu ma talanoaina le 1 Samuelu 16. Atonu e te manao e alu ane se tagata o le vasega na tofia na te faamatala ootoo mai lenei tala. Ia faamatala atu e ui lava ina sa tofia e Samuelu Tavita e avea ma tupu, ae sa le avea Tavita ma tupu seia oo ina oti Saulo i le tele o tausaga na mulimuli ane.

- O le a le mea na iloa e Samuelu a o taumafai e filifili po o ai o atalii o Iese e tatau ona avea ma tupu e sosoo ai? (Tagai 1 Samuelu 16:6–7.) Pe ua faapefea ona faatusatusa le auala o le filifilia e le alii o Tavita ma le auala e filifilia ai e ia taitai i aso nei? O le a se mea o lo o aoao mai le 1 Samuelu 16:7 e uiga i le auala e iloiloaina ai e le Alii i tatou? O le a se mea e sailia e le Alii i o tatou loto?

Sa saunoa mai Elder Marvin J. Ashton e faapea:

"E masani ona tatou fuaina isi i o latou foliga faaletino: lo latou aulelei, ma o latou tulaga faalevafealoa'i; aiga e tupuga mai ai; o latou tikeri i aoga; po o o latou tulaga tau i le tamaoaiga.

"Peitai, o le Alii e ese le tulaga na te fuaina ai se tagata. . . . Na te le aumaia se fuatoso e fua faataamilo ai i le ulu o se tagata ia iloa ai lona potu, pe na te faataamilo foi i lona fatafata e iloa ai lona malosi, ae na te fuaina lona lotu e iloa ai lona malosi ma lona agavaa e faamanuia atu i isi" (Lipoti o le Konafesi Aoao, Oketopa, 1988, 17; po o le *Liahona* Ianuari 1989, 16.)

- Aisea ua taua ai lo tatou vaai i tala atu o foliga i fafo ia tatou fegalegaleaiga ma isi ma ia vaai i le lotu? E mafai faapefea ona tatou faaleleia atili lo tatou tomai ma tautinoga i le faia o lenei mea?
- Talu ai ona sa le usiusitai Saulo, o le mea lea na afio ese ai le Agaga o le Alii mai ia te ia (1 Samuelu 16:14). Pe sa faapefea ona taumafai Saulo ia saoloto mai i le agaga leaga na oo mai ia te ia? (Tagai 1 Samuelu 16:15–23.) O a ni puna faalelalolagi e liliu atu i ai tagata i nisi taimi pe a taumafai e saili se mapusaga mai a latou agasala? O le a le ala a le Alii mo i tatou e maua ai le mapusaga mai a tatou agasala? (Tagai Mataio 11:28–30; MFF 58:42.)
- O ao ni uiga sa i ai ia Tavita na agavaa ai o ia e avea ma taitai? (Tagai 1 Samuelu 16:18.)

#### 5. Ua faaumatia e Tavita Koliata i le malosi o le Alii.

Ia aoao atu ma talanoaina le 1 Samuelu 17. Atonu e te manao ia alu ane se tagata ua uma ona tofia na te faamatala faapuupu mai lenei tala.

- O le a se mea e mafai ona manumalo ai pe faiaina ai Isaraelu i le taua ma Koliata? (Tagai 1 Samuelu 17:8–9.) Aisea na fefefe ai Saulo ma lana vaegaau e tau ma Koliata? (Tagai 1 Samuelu 17:4–11. Sa manatu i latou e le mafai ona latou faatoilaloina Koliata ona o lona maualuga ma le lapoa, malosi, ufi fatafata, ma aupega.)
- Pe sa faapefea ona maua e Tavita le lototele e tau ma Koliata? (Tagai 1 Samuelu 17:32–37, 45–47. Sa iloa e Tavita ua faasaoina o ia e le Alii mai se leona ma se urosa a o leoleo e ia mamoe a lona tama, ma sa faalagolago o ia i le Alii e fesoasoani mai ia te ia i le taua ma Koliata.)
- O le a le mea na fai atu ai Koliata ina ua vaai atu o sau Tavita la te tau? (Tagai 1 Samuelu 17:42–44.) O le a se mea na fai atu ai Tavita e tali atu ai ia Koliata? (Tagai 1 Samuelu 17:45–47.) Pe mafai faapefea i lo tatou manatua i le tali a Tavita ona fesoasoani ia te i tatou pe a ula mai tagata pe tau faamatau mai ia te i tatou?
- A o avea o ia ma se alii talavou, sa avea le manumalo o Tavita i se liona ma se urosa ma mea na saunia ai o ia e feagai ma le lu'i sili atu ona faigata o Koliata lea. O a ni lu'i atonu o lo o tatou feagai i le taimi nei e saunia ai i tatou mo lu'i sili atu ona tetele? Pe mafai faapefea ona avea lo tatou tali atu i nei lu'i ma mea e maua ai lo tatou malosi e tau faasaga atu ia Koliata atonu e mulimuli mai? Ia molimau atu e faapea a o tatou faatoilaloina liona ma urosa i o tatou lava olaga, o le a tatou faatupuina atili lo tatou mautinoa, amio, ma le faatua-tua e faatoilalo ai o tatou Koliata.
- O a ni Koliata o lo o feagai ma i tatou i aso nei? O le a se mea e mafai ona tatou iloa mai ia Tavita e uiga i auala tatou te faatoilaloina ai nei mea? (Tagai 1 Samuelu 17:45; Efeso 6:11–18.) Pe ua faapefea ona fesoasoani mai le Alii ia te oe i le faatoilaloina o Koliata atonu o lo o oulua feagai i le taimi nei?

Ua saunoa mai Peresitene Gordon B. Hinckley:

“E toatele Koliata ua siomia ai outou, o ni tagata tino ese ua faamoemoe e faaumatia outou. E le o ni tagata e iva futu le maualuluga. O mea ia e foliga mai e lelei ae ua leaga, ua auina ai e le fili e luitauina ma faavaivai ma faaumatia ai outou. O ia mea e aofia ai pia ma ava malolosi ma tapaa. Ua faia ia mea e tagata ma faapotopotoga faitogafiti ua mananao e faapologa outou i le faaaogaina o ia mea ua latou faia. E le masino le tele o fualaau oona ua tau mai ia te au ua faigofie lava ona maua i le tele o aoga i le vaitaimi nei. Ia i latou ua faasalalauina ia mea, o se pisinisi tele lea e miliona ma miliona tupe e maua ai, o se mailei leaga tele. O i ai foi tusi ma ata mataga. Ua avea foi ma se pisinisi leaga tele le faia o tusi ma ata mataga ua fuafua e avea ai a outou tupe, taitai atu ai outou i tulaga e faaumatia ai outou.

“O tagata tino ese ua faaosoina ia mea, o ni tagata malolosi ma atamamai foi. Ua latou maua foi le poto masani tele i ia mea, i le galuega leaga tele ua latou faia. Ua latou mananao e faapologa outou.

“Ua toetiiti lava le mafai ona tatou aloese mai ai. Ua outou vaai i ia mea i soo se mea. A e e le tatau ona tatou matatau, pe a tatou umia le maata o le upu moni. Ua uma ona lapataia, ma aoaoina, ma apoapoia outou. Ua ia te outou maa o le mama, ma le mamalu, ma le faamaoni e tetee atu ai i fili ua mananao e pule ia te outou. Ou te fai atu ia te outou, ia tau tonu lava i le muaulu la outou togi. E mafai ona outou manumalo ia i latou i lo outou

aloese mai ai. E mafai ona outou fai atu ia i latou faapei ona fai atu Tavita ia Koliata, 'Ua e sau ia te a'u ma le pelu, ma le tao, ma le tao leoleo; a o a'u, ou te alu atu ia te oe i le suafa o Ieova o 'au, o le Atua o le itu taua a Isaraelu ua e faifai i ai.'

"E a outou le manumalo. . . . Ua ia te outou lona mana e puipuia ai outou. Aua nei o outou fefefe ia Koliata. Ia outou tumau ma le toa, ona outou manumalo lea. A mavae tausaga, o le a outou toe manatunatu ifo ma le fiafia i lo outou manumalo i taua na oo mai i o outou olaga" (Lipoti o le Konafesi, Aperila, 1983, 66; po o le *Liahona*, Iulai, 1983, 80–81).

---

## Faaiuga

Ia uunaia tagata o le vasega ina ia faalagolago ma usiusitai i le Alii. Ia folafola atu o le faia o lea mea o le a maua ai e i latou le malosi ma maua le talitonu i le Alii e faapea o le a ia fesoasoani mai ia i latou ina ia manumalo i Koliata a le tagata lava ia. Ia faamanatu atu i tagata o le vasega e silasila le Alii i o tatou loto, ae le o le silasila i lo tatou tamaoaiga po o tulaga lauiloa.

---

## Manatu Faaopoopo e Aoao Atu Ai

O mataupu o lo o taua i lalo e faaopoopo i le ootoga o le lesona fautuaina. Atonu e te manao e faaoga se tasi o nei manatu pe sili atu foi e avea o se vaega o le lesona.

### 1. O le taufaauifi o agasala

Atonu e aoga le upusii leni mai ia Elder Spencer W. Kimball a o e talanoaina le le usita'i o Saulo e tusa ai ma sa Ameleka.

"Sa taufaauifi Saulo. Sa faigofie ia te ia ona usiusita'i nai lo le aveesea o tupu, aua o le a le aoga o tupu e pulea e isi malo? Aisea le mea e le tuu ai mamoe ma povi lapopo'a? Pe le sili ea lana faamasinoga tau tupu i lo le faamasinoga a Samuelu tulaga mauialo?"

"Faauta i le pei o Saulo o le toatele o Isaraelu i aso nei. O le a ola se tasi i nisi o faaliga a le Alii e tusa ma le soifua maloloina sei vagana e tatau ona fai ma inu sina ipu kofe; o le a le faaogaina e le tamaitai le tapaa po o le ava malosia ma o ia mea e le fiafia lava i ai peitai e tatau lava ona inu sina ipu ti.

"O le a galue o ia i se tofiga i le Ekalesia, aua o se mea lea e fiafia i ai ma o se naunauga e pele ia te ia, . . . peitai e faigofie tele ia te ia ona faia tala taufaauifi e tusa ma lona le tofoga o sefuluai lea ua ia iloa e faigata tele. E le mafai ona ia faia lea mea . . . ua le mautinoa e ia e mafai e ia ona faasoasoana lana tupe e pei ona ia manao i ai, a o ai ona ia iloa lona le faia o lea mea?"

"O le isi e auai i ni sauniga a ua pei o Saulo i lona faia o faamatalaga e alofaga i ai i lona le faia o le mea e tatau ona fai. Aisea e le matamata ai o ia i se taaloga, i se tifaga, faia lana galuega e tatau ai i lona fanua, pe faia mea e masani ai?"

"O le isi foi e auai i le faia o ona tiute i le vaaiga i fafo i le Ekalesia peitai e tetee i soo se fautuaga e tusa ma faafitauli i le aiga po o feeseeseaiga po o tatalo faaleaiga pe a faigata ona faapotopoto mai le aiga.

"Sa faapena Saulo. Sa mafai e ia ona fai mea e mafai ona fai po o mea e aoga mo ia peitai e faia e ia mea e alofaga i ai ona o mea e le talafeagai ma ona lava manaoga" (in Conference Report, Oct. 1954, 51).

## 2. O le faatoilaloina o o tatou Koliata.

Ia momotu mai se fasi manoa e 9<sup>1/2</sup> futu (3 mita) le umi, o le maualuga fuafuaina lea o Koliata. Ia ave atu i le vasega ma le manoa, se mea faapipii, ni pepa, ma se peni maka. Ia faapipii le manoa agai i luga ma lalo i le puipui o le fale e faaoga ai se isi fasi mea faapipii i le pito i luga ma le isi i lalo (afai e le lava le maualuga o le puipui o le fale, ia faaauau pea le mea o totoe o le manoa i le fola o le fale). Fai i le vasega e ta'u mai ni mea e matautia ia i latou (o ia tali atonu e aofia ai le mitamita, matamata i tusi leaga, lotoleaga, ma fualaau oona). Ia tusi mea taitasi e matautia i se fasipepa ma faapipii fasi pepa taitasi i le puipui ma le manoa, ma ufitia ai le manoa atoa mai i le pito i luga seia tau i le pito i lalo.

Ia faamatala atu tatou te manaomia ni auupega e faatoilalo ai Koliata. Ia fesili atu i tagata o le vasega e ta'u mai ni auupega e mafai ona faatoilalo ai Koliata (atonu e aofia mai i tali le faalagolago i le Alii, tatalo, suesue i tusitusiga paia, aoao i le upu moni, amio mama, ma le filifili o uo lelei). A o ta'u mai e le vasega auupega taitasi, ia aveese le pepa o lo o tusia ai lea auupega. Ia amata mai i le pito i luga o le manoa, ma ia aveesea le pepa ma le mea faapipii o lo o faapipii ai le manoa i le puipui o le fale. Ia faapau ifo pea le manoa i le pepa o lo o sosoo ai. A uma ona aveesea pepa uma ma le mea faapipii, o le a pa'u ifo le manoa i le fola o le fale ma o le a faatoilaloina Koliata.

## Faamoemoega

Ia uunaia tagata o le vasega ina ia faamaoni i a latou uo, e pei o Ionatana ma Tavita, ma ia aloese mai le faaleagaina e le lotoleaga ma le inoino, e pei ona sa i ai Saulo.

## Sauniuniga

1. Ia suesue ma le agaga tatalo ia mau nei:

- a. 1 Samuelu 18:1–16. Sa osia e Ionatana ma Tavita se feagaiga o le faauoga (18:1–4). Ua faamamaluina Tavita e Isaraelu ona o lona manumalo i le taua (18:5–7). Ua lotoleaga Saulo ia Tavita ma ua taumafai e faaumatia o ia i se tao (18:8–16; tagai i le Faaliliuga a Iosefa Samita o le 1 Samuelu 18:10 o lo o faaalua ai o le agaga leaga na oo mai ia Saulo e *le* mai le Atua ia).
- e. 1 Samuelu 18:17–30; 19:1–18. Ua tau Tavita ma Filisitua ina ia maua e Tavita le aia tatau e faaipoipo ai ma le afafine o Saulo, e aunoa ma lona iloa o loo faamoemoe Saulo o le a oti Tavita i le taua (18:17–25). Ua manumalo Tavita i Filisitua ma ua faaipoipo ma le afafine o Saulo o Mekala (18:26–28). Ua ta’u atu e Ionatana ia Tavita ina ia lafi ma o le a taumafai o ia e suia le mafau o Saulo ina ia le fasiotia o ia (19:1–7). Ua le manuia se isi taumafaiga a Saulo e fasioti ia Tavita i se tao (19:9–10). Ua faasaoina e Mekala Tavita mai se isi taumafaiga a Saulo ina ia faaumatia ia (19:11–18).
- i. 1 Samuelu 20. Ua faafouina e Ionatana ma Tavita le la feagaiga o le faauoga ma le filemu (ia manatua o lenei feagaiga sa le gata i le va o Ionatana ma Tavita ae sa faapea foi i le va o o la aiga). Ina ua toe taumafai Saulo e fasiotia Tavita, ua lapataina e Ionatana Tavita e sola ese.
- o. 1 Samuelu 23–24. Ua faaauau ona tau Tavita ma Filisitua ma ua sola ese Saulo. Ua maua e Tavita Saulo ma faasaoina lona ola.

2. Mau faaopoopo: 1 Samuelu 14:1–16; 2 Samuelu 1.

## Faalautelega Fautuaina o le Lesona

Gaoioiga e  
Faatosina Mai Ai

Atonu e te manao e faaoga se tasi o gaoioiga nei (po o sa oe lava gaoioiga) e amata ai le lesona.

Ia tuuina atu i tagata o le vasega fesili nei:

- O a nisi o uiga lelei e te sailia i se uo? (Atonu e te manao e tusia tali a tagata o le vasega i luga o le laupapa. Atonu e aofia i tali le faamaoni, amio sao, lē manatu faapito, agalelei, ma le alofa.)

Ia faamatala o loo aoao atu i se vaega o lenei lesona le taua o le avea ma uo faamaoni.

Mau Talanoaina  
ma le Faaogaina

A o e aoaoina atu nei mau, ia talanoaina pe faapefea ona faaoga i le olaga i aso taitasi. Uunai tamaiti o le vasega e faamatala ni aafiaga e faatatau i mataupu ua taua i le mau.

**1. Ua osia se feagaiga o le faigauo e Ionatana ma Tavita. Ua oo ina lotoleaga Saulo ia Tavita ma ua taumafai e fasiotia o ia.**

Ia aoao atu ma talanoaina le 1 Samuelu 18:1–16.

Sa vave ona avea Tavita ma se toa ina ua mavae lona fasiotia o Koliata. Sa faamamaluina o ia e le tupu o Saulo ma le malo uma. Ae ui i lea, e leai se tasi sa faamaoni ia Tavita e pei o Ionatana, le atalii o Saulo.

- E faapefea lagona o Tavita ma Ionatana, o le tasi i le isi? (1 Samuelu 18:1, 3.) O le a se mea sa mata e faigofie ai ia Ionatana ona lagona le lotoleaga ia Tavita?
  - a. Ona o se atalii o Saulo, o lea, o Ionatana le isi tagata e tataua ona avea ma tupu e sosoo ai. Ae ui i lea, sa faauuina e Samuelu Tavita e avea ma tupu e sosoo ai (1 Samuelu 16:6–13).
  - e. A o matua faamamaluina Tavita e tagata ona o lona manumalo i le taua, sa tau le amanaia Ionatana ona o lona lava manumalo i le taua (1 Samuelu 14:1–6).
- O le a le pogai ua e manatu ai sa le lotoleaga Ionatana ia Tavita pe lamalama foi ia te ia? (1 Samuelu 18:1, 3.) Pe sa faapefea ona faaalua e Ionatana lona lagolagoina o Tavita? (Tagai 1 Samuelu 18:4. Sa tuuina atu e ia lona ofu tau tupu ma aupega ia Tavita.)
- O le a se lagona na i ai i le Tupu o Saulo e uiga ia Tavita ina ua mavae le fasiotia o Koliata? (Tagai 1 Samuelu 18:2, 5. Sa ave e Saulo Tavita i lona aiga ma tuu o ia e taitai lana autau.) Sa faapefea ona faaalua e Tavita lona faamaoni i le Tupu o Saulo? (Tagai 1 Samuelu 18:5.) O le a se mea na mafua ai ona ita Saulo ia Tavita? (Tagai 1 Samuelu 18:6–9.) Aisea e faigata ai i isi taimi ona maua le fiafia e uiga i le manumalo o isi? Pe faapefea ona aafia lo tatou lava manuia faaleagaga ona o le lotoleaga ma le faamaualuga?

Sa saunoa mai Ezra Taft Benson:

“Sa avea Saulo ma fili ia Tavita ona o le faamaualuga. Sa fua o ia ona o le pepese o fafine o Isaraelu “ua fasia e Saulo ana toaape, a o Tavita o ona sefulu o afe” (1 Samuelu 18:7; tagai foi i le 18:6, 8).

“E sili atu le matata’u o e faamaualuluga i faamasinoga a tagata, nai lo faamasinoga a le Atua . . . ‘O le a le manatu o tagata ia te a’u?’ nai lo ‘o le a le finagalo o le Atua mo a’u?’ . . .

“E iloa le mata’u i faamasinoga a tagata i le tauva ia talia e tagata. Ua sili lo latou manao i viiga mai tagata, nai lo viiga mai le Atua’ (Ioane 12:42–43). O le pogai o mea tatou te faia, e maua ai le agasala o le faamaualuga. Sa fetalai mai Iesu sa ia ‘faia pea lava o mea’ ua fiafia i ai le Atua (Ioane 8:29). Ua le sili ea ona lelei ia i tatou ona maua o le finagalo malie o le Atua e avea ma pogai tatou te faia ai se mea, nai lo le taumafai e sii a’e i tatou lava i luga a’e o o tatou uso, ma fia tele atu nai lo isi?

“E i ai nisi tagata faamaualuluga e le popole pe gafatia e o latou totogi mea latou te manaomia nai lo le mananao ia sili atu o latou totogi nai lo isi tagata. O le tau o lo o latou saili, o le fia ese o lo latou maua atu nai lo isi . . .

“A piimau le faamaualuga i o tatou loto, e aveesea lo tatou tutoatasi mai le lalolagi ma lafoai atu lo tatou saolotoga i le pologa o faamasinoga a tagata. E sili atu le leo tetele o le fe’ei mai o tagata o le lalolagi nai lo musumusuga a le Agaga Paia. E taua i tagata faamaualuluga taofi o tagata nai lo faaaliga mai

le Atua, ma latou le pipii i le aiu'amea" (Lipoti o le Konafesi, Aperila, 1989, 4–5; po o le *Liahona*, Iulai, 1989, 5–6).

- O le a le mea na fai e Tavita ina ua faamanuiaina o ia e Ieova i le manumalo i le taua? (Tagai 1 Samuelu 18:5, 14–16.) O le a se mea e mafai ona tatou aooina mai lana faaitaiga? O le a so outou manatu i le uiga o le "faautauta [i la tatou] amio" pe a faamanuiaina la tatou taumafaiga?

## **2. Ua faatolu ona le manuia taumafaiga a Saulo e faaumatia le ola o Tavita.**

Ia aoao atu ma talanoaina le 1 Samuelu 18:17–30; 19:1–18.

- Sa ofo atu Saulo e faaipoipo Tavita ma se tasi o ona afafine pe afai e tau Tavita ma Filisitia. O le a le mafuaaga moni na faia ai e Saulo lea mea? (Tagai 1 Samuelu 18:20–25. Sa faamoemoe o ia ina ia fasiotia Tavita e Filisitia.)
- Pe sa faapefea ona avea Ionatana ma se uo faamaoni ina ua taumafai Saulo e fasioti Tavita? (Tagai 1 Samuelu 19:1–7.) O le a le uiga o le avea ma se uo faamaoni? O a ni auala o lo o faamaoni ai au uo ia te oe? O faapefea ona e faamaoni i au uo?
- E ui lava i taumafaiga a Ionatana ina ia suia lagona o Saulo e uiga ia Tavita, ae sa faaauau pea e Saulo ona saili e faaumatia le ola o Tavita (1 Samuelu 19:9–10). Pe sa faapefea ona faaalua e Mekala, le ava a Tavita, e faamaoni o ia i lana tane? (Tagai 1 Samuelu 19:11–18.)

## **3. Ua faafouina e Tavita ma Ionatana le la feagaiga o le faauoga, ma ua faasaoina e Ionatana le ola o Tavita.**

Ia aoao atu ma talanoaina le 1 Samuelu 20.

- O le a le mea na fai e Tavita i le inoino ma le taumafai o Saulo e fasioti ia te ia? (Tagai 1 Samuelu 20:1.) Pe sa faapefea ona faaauau pea e Ionatana lona faaalua o le agaga faauo a o sailia e Saulo le ola o Tavita? (Tagai 1 Samuelu 20:2–4, 13–17, 23; ia tagai foi 1 Samuelu 20:24–42, e pei ona talanoaina i lalo.)
- Sa faapefea ona avea le faatuatua i le Atua ma mea na mautu ai atili le faauoga a Ionatana ma Tavita? (Tagai 1 Samuelu 20:23.) Pe faapefea ona avea lo tatou alolofa i le Atua ma mea e faatupu ai lo tatou alofa i isi?
- Afai tatou te faamuamua le faamaoni i le Atua i o tatou olaga, o le a le mea tatou te fai pe afai e faia e a tatou uo mea e sese? (O le a tatou taumafai ma le alofa e fesoasoani atu ia tatou uo ina ia suia la tatou amio.) O le a le mea o le a tatou fai pe a fai e fai mai a tatou uo ia i tatou e faia mea sese? (O le a tatou le faia mea le tonu e fai mai ai a tatou uo e fai, tusa lava pe aafia ai a tatou fegalegaleaiga faaleuo, ma o le a tatou taumafai e faatosina mai a tatou uo ina ia faia filifiliga tonu.)
- E faapefea ona faailoa atu e Ionatana ia Tavita pe ua saogalemu le toe foi atu i le maota o Saulo? (Tagai 1 Samuelu 20:5–7, 18–22.) O le a le lagona na faaalua e le Tupu o Saulo ina ua le sau Tavita faapea ma le taumafai o Ionatana e pui-puia lana uo? (Tagai 1 Samuelu 20:24–33.) Pe sa faapefea ona lapatai e Ionatana Tavita ina ia sola ese ma Saulo? (Tagai 1 Samuelu 20:35–42.)

## **4. Ua tumu Saulo i le ita ia Tavita. Ua faasaoina e Tavita le ola o Saulo.**

Ia aoao atu ma talanoaina le 1 Samuelu 23–24.

- Ua faamanuiaina e le aunoa Tavita, i lona manumalo pea i taua (1 Samuelu 23:1–5). Aisea sa tatau ai ia Tavita ona tuua le nuu o Kaila ina ua uma ona ia faasaoina ona tagata mai ia Filisitia? (Tagai 1 Samuelu 23:7–13.)
- Ina ua iloa e Saulo o lo o i ai Tavita i Kaila, sa saunia e ia ana vaegaau e faaumatia le aai atoa (1 Samuelu 23:10). O le a se mea na suia ai Saulo mai le avea ma se tupu amiotonu ma avea ma se tasi o le na naunau e faaumatia se aai atoa ina ia fasiotia ai se tagata e toatasi? Pe aisea ua avea ai le lotoleaga ma le inoino ma se amio e le mafai ona pulea? Pe mafai faapefea ona tatou aveesea le lotoleaga po o le inoino mai ia i tatou lava?
- A o lafi Tavita mai ia Saulo, sa asiasi atu Ionatana ia Tavita ma “faamalosi atu ia te ia i la le Atua” (1 Samuelu 23:16). O le a sou manatu i le uiga o lea mea? Pe mafai faapefea ona tatou faamalosia a tatou uo i le Atua?
- I le faagasologa o se isi taumafaiga e saili ma fasiotia Tavita, sa afe Saulo e malolo i se ana (1 Samuelu 24:1–3). O le a le mea na fai atu ai tagata o Tavita ina ua latou maua Saulo? (Tagai 1 Samuelu 24:4.) O le a le mea na fai e Tavita? (Tagai 1 Samuelu 24:4–5. Ia manatua, o le faamatalaga e uiga i le fuaiupu e fa, o lo o faamatala ai e faapea na tipi ese e Tavita le pito ofu o le ofu o Saulo—o le pito o le ofu talaloa e fai ma faailoga o le pule.)
- Aisea na musu ai Tavita e fai se mea ia Saulo? (Tagai 1 Samuelu 24:6–12.) O le a se mea ua aoao mai ia i tatou i le faaitaiga a Tavita e uiga i le tau ma sui faapea ma le tali lelei atu ia i latou o e e fai mai mea leaga ia i tatou? (Tagai 1 Samuelu 24:12–15; ia vaai foi i le Mamona 8:20.) O le a le tala a Saulo ina ua faasaoina e Tavita lona ola? (Tagai 1 Samuelu 24:16–19.)

## Faaiuga

Faailoa atu o le tala ia Ionatana ma Tavita e faamanatu mai ai ia i tatou o le faauoga moni ma le alofa e aumaia i tatou ina ia latalata atu ia tatou uo ma le Atua. O le tala ia Saulo e faamanatu mai ai ia i tatou o le lotoleaga e taitaieseina i tatou mai ia tatou uo ma le Atua. Ia uunaia tagata o le vasega ina ia faamaoni a latou uo ina ia mafai ona latou faapea atu, “O Ieova e va a’i oe ma a’u e faava-vau” (1 Samuelu 20:23).

## Manatu Faaopopo e Aoao Atu Ai

### Iloiloga a le tagata lava ia o faauoga

Ia faaoga le gaoioiga o lo o i lalo pe afai e te manao e faamamafa atu le taua o le avea ma se uo faamaoni.

Ia tufa atu i tagata taitoatasi o le vasega se pepa ma se peni po o se penitala. Ia faamatala atu o le a e tuuina atu ia i latou ni nai fesili e fesoasoani ia i latou e filifili ai po o avea i latou ma ni uo faamaoni. Ia tusi e le tagata o le vasega a latou tali i lalo, ma ia ta’utino atu ia i latou o le a le faaalai i se tasi a latou tali. Ona tuuina atu lea o fesili nei:

1. O le a se mea agalelei mulimuli nei sa e faia mo se tasi?
2. O le a se mea e te fai pe a e faalogo atu i se tasi o faamatala ni mea leaga e uiga i se isi tagata?
3. O le a se mea na e faia e fesoasoani ai i au uo ina ia avea ma tagata e sili atu ona lelei?



---

**Faamoemoega**      Ia uunaia tagata o le vasega ina ia mama i mafaufauga ma mea e fai ma ia salamo i a latou agasala.

---

- Sauniuniga**
1. Suesue ma le agaga tatalo mau nei:
    - a. 2 Samuelu 11. Ua mulilua Tavita ma Patisepa, le ava a Uria (11:1–5). Ua le manuia taumafaiga a Tavita e nana lana agasala (11:6–13). Ua ia fuafuaina ina ia oti Uria i le taua (11:14–17). Ua faaipoipo Tavita ia Patisepa, ma ua maua se la tama (11:26–27).
    - e. 2 Samuelu 12:1–23. Ua aoao atu le perofeta o Natano e uiga i le matuia o le agasala a Tavita e ala i le ta’u atu ia Tavita o se faataoto (12:1–6). Ua ta’u atu ia Tavita o le a faasalaina o ia ona o ana agasala (12:7–14; manatua, i le Faaliliuga a Iosefa Samita o le fuaiupu 13, o lo o faapea atu ai Natano, “Ua *le* aveeseina e Ieova lau agasala ina ia e le oti ai”). Ua oti le atalii muamua o Tavita ma Patesepa a o itiiti lava o ia (12:15–23).
    - i. Salamo 51. Ua salamo Tavita ma ua saili mo se faamagaloga.
  2. Tusi faitau faaopopo: 2 Samuelu 2–10.
  3. Afai e te faaogaina le gaoioiga e faatosina mai ai, ia aumaia se atigifilo ma se seleulu.
- 

**Faalautelega  
Fautuaina o  
le Lesona**

Gaoioiga e  
Faatosina Mai Ai

Atonu e te manao e faaoga le gaoioiga o lo o i lalo (po o sa oe lava gaoioiga) e amata ai le lesona.

Ia ofo mai se tagata o le vasega e tu i luma ma faaloloa mai ona lima agai i luma. Ia nonoa tapulima o le tagata lea i se filo tuatasi. Ia faamatala atu o lenei filo tuatasi o le faatusa lea o se mafaufauga lē mama. Ona momotu lea e le tagata o le vasega le filo e ala i le falo o ona lima faafuasei i ona itu.

- O le a le mea e tatau ona tatou fai pe a ulufale mai se mafaufauga le mama i o tatou mafaufau? (E tatau ona tatou aveesea i le taimi lava lea.)

Ia toe fai atu i le tagata o le vasega e faaloloa agai i luma ona lima. Ia nonoa ona tapulima i se filo e taai faatolu pe faafa ma ia lava ina ia sili atu ona faigata ona momotu. Ona fai atu lea i le tagata o le vasega e taumafai e momotu filo. Ia toe fai lenei gaoioiga e ala i le faaogaina o ni taamilosaga o le filo e lava lelei ina ia matua le mafai ona toe momotu.

- O le a le mea e tupu pe a tatou faataga mafaufauga le mama e nonofo i o tatou mafaufau?

Ia faasaoloto lima o le tagata o le vasega e ala i le oti o le filo i le seleulu. Ia faamatala atu o se vaega o lenei lesone e faatatau lea i taunuuga o le mafau fau umi i mafau fauga le mama. O lo o talanoaina foi i le lesone auale e faasaoloto ai e i tatou i tatou lava mai mafau fauga le mama.

Mau Talanoaina  
ma le Faaogaina

---

A o e aoaoina atu nei mau, ia talanoaina pe faapefea ona faaogaina i le olaga i aso taitasi. Uunai tamaiti o le vasega e faamatala ni aafiaga e faatatau i mataupu ua taua i le mau. Talu ai ona atonu e faigata le tuuina atu o fesili uma pe faamatala atu mea uma o lo o i le lesone, ia filifili faatasi ma le agaga tatalo ni mea o le a sili ona faamalieina ai manaoga o tagata o le vasega. Atonu e tataua ona e toe fetuunai nisi o nei fesili ina ia fetau ma tulaga o le vasega.

O lo o tuuina mai i le 1 Samuelu 25 e oo i le 2 Samuelu 10 ni faamatalaga taua e uiga i le talafaasolopito mo lenei lesone. Talu ai ona e le aofia nei mataupu i lenei tusi lesone, atonu e te manao e ootoo ia mataupu e faapea:

E le i pine lava ona mavae le taimi na faasooina ai e Tavita le ola o Saulo, ae toe taumafai tasi Saulo e faaumatia le ola o Tavita. Sa toe maua e Tavita le avanoa e fasiotia ai le tupu, peitai sa musu o ia e fai lea mea. Sa faaauau pea taua i le va o tagata o Iuta ma malo na siomia ai, ma sa fasiotia Saulo ma Ionatana i se tasi o ia taua. Sa suitulaga loa Tavita ia Saulo i le ave ma tupu ma sa ave ma se tasi o tupu faautauta i le talafaasolopito o Isaraelu. Sa tuu faatasia e ia ituaiga i se malo e tasi, maua le laueleele sa folafola mai i ona tagata, ma faatuina se malo e faavae i le tulafono a le Atua. Ae ui i lea, o le luasefulu tausaga mulimuli o lona olaga sa faaleagaina e ala i le faaiuga agasala o lo o talanoaina i lenei lesone.

### **1. Ua mulilua Tavita ma Patisepa ma ua fuafuaina le oti o Uria, le tane a Patisepa.**

Ia aoaoina atu ma talanoaina le 2 Samuelu 11.

- Sa savalivali Tavita i luga o lona fale ma sa ia vaia Patisepa, ma sa faaosoosoina e mulilua ma ia (2 Samuelu 11:2). O le a le mea sa tataua ona faia e Tavita ina ua vaai atu ia Patisepa? O le a le mea na fai e Tavita na taitai atu ai o ia e agasala ma Patisepa? (Tagai 2 Samuelu 11:2–4.) O le a se mea e ono taitaiina ai tagata ina ia faaosoosoina e faia agasala o le feusuai? O le a se mea e mafai ona tatou faia e aloese ai mai le faaosoosoina i le faia o agasala feusuai?

Atonu e te manao e tusia tali a tagata i luga o le laupapa e ala i le faaogaina o se faatulagaga e pei o lea o lo o i lalo. Atonu e aofia i tali mea nei:

<i>O mea e aloese ai.</i>	<i>O le ala e aloese ai mai ia mea.</i>
Mafaufauga le mama	Ia faatumulia lou mafaufau i mafaufauga faagaetia
Ata o televise, tifaga, ma mekasini, tusi, ma musika e leaga pe taufaaosooso i soo se itu.	Filifili ata po o faasalalauga e musuia ai oe e faia mea lelei.
Tafaoga faamasani po o evaga lē mama.	Mulimuli i tulaga faatonuina o tafaoga faamasani po o evaga sa aoao mai e perofeta o aso e gata ai ma o lo o ootooina i le tusi laititi o le <i>Mo Le Malosi o le Autalavou</i> .
O le faapouliuli ma isi a ua uma ona faaiipo.	Ia alofa i lou toalua ma lou loto atoa. Ia faaauau pea ona faauo (atinae le lua mafutaga) ma lou toalua.
O nofoaga po o gaoioiga e le mafai ai e oe ona maua le mafutaga e le aunoa ma le Agaga Paia.	Ia mautinoa o nofoaga e te alu atu i ai ma gaoioiga e te auai o le a mafai ai ona e maua le mafutaga e le aunoa ma le Agaga Paia.

Atonu e te manao e faaoga le manatu faaopoopo muamua e aoao atu ai, ina ia talanoaina ai auala e aveesea ai mafaufauga lē mama.

- O le a le mea sa taumafai Tavita e fai ina ua iloa e ia ua to Patisepa? (Tagai 2 Samuelu 11:6–13. Sa taumafai o ia ina ia toe foi atu Uria, le tane a Patisepa i lana ava. Ona foliga mai lea o le tamaitiiti e le i fanau mai o le atalii lea o Uria.) Aisea na le manuia ai le fuafuaga a Tavita? (Tagai 2 Samuelu 11:11. Sa le manao Uria e toe foi atu i lona aiga i lona taimi ona sa faamaoni o ia i ana ‘au o le taua ma sa manatu e tataua ona faatasi pea o ia ma i latou.)
- O le a se isi agasala sili ona mamafa sa faia e Tavita ona o lona taumafai e nana lona amio le mama? (Tagai 2 Samuelu 11:14–17.) O ai e te manatu sa manatu Tavita e mafai ona ia natia mai ai lana agasala? Pe ua faapefea ona taumafai tagata e ufiufi agasala i aso nei? O le a le mea e tupu pe afai tatou te taumafai e ufiufi a tatou agasala?

Sa saunoa mai Elder Richard G. Scott e faapea:

“Aua nei e mafaufau fialia faapea e le o iloa au solitulafono e isi. Ua pei lena o se oseterisi (manu Aferika o le ostrich) ua tanu lona ulu i le oneone. Ua na o le pogisa ua vaai atu i ai ma ua fialia lava ia i lona lafitaga. Ae o le mea moni, o lo o tu matilatila mai lava. Ua faapea foi ona silafia mai e le Tama oi le Lagi ma Lona Alo Pele a tatou mea uma e fai. Ua la silafia mea uma e uiga ia i tatou. . . .

“Afai ua e faia se solitulafono matuia, o le a e le maua se toafilemu po o se mafana tumau i mea ua e faia. O le taumafai e ufiufi pe nana le solitulafono, atonu e foliga mai e foia ai le faalavelave ae leai. Ua manao le tiapolo e faalau-aitele au amioga e sili ona e maasiasi ai, i le taimi e sili atu ona faamanualiaina ai oe. E lalagaina e le talapepelo se upega e sili atu ona mau, ma aveia ma mai-lei o le a faaoga e Satani e faamalaia ai oe” (Lipoti o le Konafesi, Aperila, 1995, 103; po o le *Liahona*, Iulai, 1995, 86).

Atonu e te manao e faaoga le manatu faaopoopo lona lua e aoao atu ai e faamalamalama ai le matautia o le taumafai e ufiufi a tatou agasala.

## 2. Ua ta’u atu ia Tavita o le a faasalaina o ia ona o ana agasala.

Ia aoao atu ma talanoaina le 2 Samuelu 12:1–23.

- O le a le faataoto sa ta’u atu e le perofeta o Natano e faamalamalama ai le ala e le fiafia ai Ieova ia Tavita? (Tagai 2 Samuelu 12:1–4.) O le a le mafaufau sa i ai ia Tavita e uiga i mea na fai e le tagata mauoa e tetee atu ai i le tagata mativa o lo o i le faataoto? (Tagai 2 Samuelu 12:5–6). Pe ua faapefea ona pei mea na fai e Tavita o mea na fai e le tagata mauoa? (Tagai 2 Samuelu 12:7–9.) Pe sa faapefea ona tali atu Tavita i le aoaiga a Ieova? (Tagai 2 Samuelu 12:13.)
- Aisea ua e manatu ai sa le mafai ona iloa e Tavita o ia o le tagata mauoa o lo o ta’ua i le faataoto? Aisea ua le mafai ai e i tatou i nisi taimi ona iloa a tatou lava agasala?
- O a taunuuga o agasala a Tavita? (Tagai 2 Samuelu 12:10–14. O le faataunuuga o nei valoaga e mafai ona maua i le fuaiupu e 15–23 faapea ma mataupu mulimuli mai o le 2 Samuelu ma le 1 Tupu; ia tagai foi i le MFF 132:39. Ia manatua o le mulilua o se agasala matuia, peitai na le maua e Tavita lona faaeaina ona o le faamasinoga a le Alii na pau ia te ia le fasiotiga o Uria.)

Sa saunoa mai Peresitene Marion G. Romney e faapea: “O Tavita la i le tasi itu, e ui lava ina sa matua alofagia e le Alii . . . (a o le mea moni, sa taua o ia o le tagata na tatau ma lona finagalo) ae sa faamatuu atu o ia i le faaosoosoga. O lona solia o le tulafono o le legavia na oo atu ai lava i le fasioti tagata, ma o lona taunuuga la, sa faapea ona aveesea mai ai ia te ia ona aiga ma lona faaeaina” (Lipoti o le Konafesi, Aperila, 1979, 60; po o le *Liahona*, Oketopa 1979, 75).

- O a ni taunuuga vavave e oo i le tagata ona o le ola le mama i aso nei? O a nisi o taunuuga uumi mo le tagata e le salamo?

## 3. Ua salamo Tavita ma ua saili mo se faamagaloga.

Ia aoao atu ma talanoaina le Salamo 51.

I se salamo na ia tusia mo le Alii, sa faaalai ai e Tavita se naunauga ina ia fesoasoani atu i isi ia salamo, ma ua ia faapea atu, “ou te aoao atu ai ou ala i e ua solitulafono; ona faaliliuina atu ai lea ia te oe o e ua agasala” (Salamo 51:13). E ui lava ina sa faafitia e Tavita lona faaeaina ona sa fuafuaina e ia le oti o Uria, e mafai ona tatou aoao mai lona lava lagona salamo a o saili o ia mo le faamagaloga mo le agasala o le mulilua. O ana upu i le Salamo e 51 o lo o aoao mai ai le tele o vaega o le salamo faamaoni. A o e suesue i le salamo faatasi ma tagata o le vasega, ia talanoaina le auala e mafai ona tatou faatino ai le faataitaiga o le salamo a Tavita i o tatou olaga.

- I le Salamo e 51, sa muai ona faailoa e Tavita le Atua ma lona agalelei (Salamo 51:1). Sa faaalai foi e Tavita le tumu o ia i le agasala (Salamo 51:1–3). Pe aisea ua taua ai lo tatou iloa o le agalelei o le Atua ma lo tatou lava tumu i le agasala pe a tatou salamo ia tatou agasala?

- O le a se mea e mafai ona tatou tuu ina ia maua ai e i tatou se faamagaloga o a tatou agasala? (Tagai Salamo 51:16–17.) O le a sou manatu i le uiga o le maua “o le loto momomo ma le nutimomoia”?
- Pe ua faapefea ona “i ai [i o tatou] luma” a tatou agasala a o le i faamagaloina i tatou? (Salamo 51:3). O le a se suiga e oo mai pe a maua e i tatou le faamagaloga? (Tagai Salamo 51:10; Alema 36:17–19.) O le a se tagai a le Atua e uiga ia tatou agasala ua mavae pe a uma ona ia faamagaloina i tatou? (Tagai Salamo 51:9; Isaia 43:25; MFF 58:42.)
- Sa faamatala e Tavita le faamagaloga e faapea o le fufulueseina (Salamo 51:1–2, 7, 9–10), o le faafoisia mai(Salamo 51:12), ma o se laveai (Salamo 51:14). Pe aisea ua avea ai nei mea ma ni faamatalaga talafeagai o faamanuiaga o le faamagaloga a le Atua?

Faaiuga

Ia faamatala atu e tusa lava po o le a le alualu i luma po o le malolosi o i tatou, e faaososoina lava i tatou. Ia uunaia tagata o le vasega ina ia faia se suiga e tataua ona fai i o latou olaga o le a fesoasoani ia i latou ia ola mama i mafaufauga ma mea e fai. Ia faaalua lou alofa mo Iesu Keriso ma lou agaga faafetai mo lana Togiola. Ia molimau atu talu ai ona o le Togiola, ua mafai ai ona tatou maua le faamagaloga o a tatou agasala.

## Manatu Faaopoopo e Aoao Atu Ai

O mataupu o lo o taua i lalo e faaopoopo i le ootoga o le lesona fautuaina. Atonu e te manao e faaoga se tasi o nei manatu pe sili atu foi e avea o se vaega o le lesona.

### 1. Ia aveesea mafaufauga le mama mai o tatou mafaufau

Ia faamatala atu ia oe lava upu le faamatalaga lena a Boyd K. Packer i le ala e aveesea ai mafaufauga lē mama e tei ua oo mai i o tatou mafaufau:

“O le mafaufau e pei o se tulaga e fai ai faafiafiaga. E tatala pea lava le pupuni sei vagana ua tatou momoe. E i ai pea lava ni taga e fai mai i luga o lena tulaga. Atonu o se mea malie, o se tulaga e mafatia ai, faatosina loto pe le malie, lelei pe leaga; ae peitai e i ai pea lava se mea e faia i le tulaga o le mafaufau.

“Pe ua e iloa ea, e aunoa ma so tatou faamoemoeina, e toetoe o le ogatotonu o soo se mea e fai, e mafai ai lava ona tolotole ane sina mafaufauga leaga itiiti mai autafa ma faatosina atu o tatou mafaufau? O nei mafaufauga leaga o le a taumafai e aveesea ai lou mafaufau mai i isi mea uma. Afai o le a e faatagaina ia mea e faaauau pea, o le a o ese isi mafaufauga lelei uma mai le tulaga. O le a tuua oe, ona ua e malie i ai, i le faatosinaga a mafaufauga leaga.

“Afai o le a e gauai i ia lagona, o le a faatinoina i lou mafaufau soo se mea e te lavatia. Atonu e faatinoina e ia mea se lagona o le ita, lotoleaga, po o le inoino. Atonu o se mea leaga, le mama, ma faatiapolo. Pe a fai o le a i ai ia mea i le tulaga, afai e te faatagaina, o le a faia e ia mea se faatosinaga poto e te gauai i ai. O le a faatupuina e ia mea lou fiafia i ai, ma o le a faatalitonu ai foi oe e faapea o ia mea e le leaga - aua ua na o ni mafaufauga.

“O le a se mea e te faia i se taimi e pei o lea, pe a fai e faatumulia le tulaga o lou mafaufau e le tiapolo o mafaufauga le mama, e tusa lava po o ia mea e lanu faafuefu ma e foliga mai e toetoe lava mama lelei po o mea foi e eleelea ua e matua iloa o ia mea e leaga? Afai e te pulea ou mafaufauga, e mafai ona e manumalo i amioga, e tusa lava po o ni amioga leaga tau oe lava. Afai e mafai ona e aoao e pulea ia mea, o le a e maua se olaga fiafia.

“O le mea lea ou te fia aoao atu ia te outou. Ia filifili mai musika paia a le ekalesia se viiga e te fiafia i ai, o se viiga e faatumulia i upu e faagaetia loto ma o se musika faaaloalo, o se musika e te lagona ai e pei o se musumusuga. Ia mafaufau ma le faaeteete i ai. Ia taulotoina. E tusa lava pe e te le i aoga i mea tau musika, e mafai ona e mafaufau i se viiga.


“Ia faaoga lenei viiga e agai i ai ou mafaufauga. Ia avea ma au ala leo faaleoleo. So o se taimi lava e te maua ai nei mafaufauga le tataua ua oo mai i le tulaga o lou mafaufau, ia tata lelei musika i lou mafaufau e pei o lo o e faalogologo i se pese. A o amataina le musika ma a’o oo mai i lou mafaufau upu, o le a o ese ma le maasiasi nei manatu le mama. O le a suia ai le lagona i lou mafaufau. Talu ai ona o lea musika e faagaetia loto ma mama, o le a o ese nei mafaufauga le mama. Aua a o ola mama, ma lē auai i mea leaga, e le gafatia foi e le tiapolo le malamalama.

“E i ai se taimi o le a e iloa ai o lo o e pesepese i lea musika i totonu o lou loto. A o e tulimata’i atu i ou mafaufauga, o le a e iloa ai se faatosinaga mai le lalolagi o lo o siomia ai oe ma o lo o uunaia i se mafaufauga le mama ina ia e oo atu i le tulaga o lou mafaufau, ma o le a amata loa lava i lea taimi le musika.

“O le taimi lava e te iloa ai ona faamama le tulaga o lou mafaufau mai mafaufauga le mama, ia aoao i mea aoga. Ia suia le tulaga o mea e siomia ai oe ina ia siomia oe e mea o le a uunaiina ai oe e mafaufau i ni mea lelei ma le faagaetia loto. Ia faia i taimi uma mea e tonu” (in Conference Report, Oct. 1976, 99–100).

## 2. O le matautia o le taumafai e ufiufi a tatou agasala.

I le taumafai e natia lana agasala o le mulilua, sa faia e Tavita se isi agasala e sili atu ona mamafa. Ina ia talanoaina le tulaga matautia o le taumafai e natia a tatou agasala, ia faatusa le agasala i se faaputuga eleele. Ia faamalamalama lenei manatu i luga o le laupapa e pei ona faaalua i le ata muamua o i lalo.



- O le a le mea e tupu pe a fai tatou te taumafai e ufiufi se faaputuga eleele ititi? (O le a faasolo ina lapoa le mauga ma iloa gofie. Ia faamalamalama atu lenei mataupu e pei ona faaalua i le ata lona lua o lo o i luga.)

- O le a le auala ua pei ai le ufiufi o a tatou agasala o le ufiufi o se faaputuga eleele? (O le a avea a tatou agasala ma agasala e sili atu ona tetele ma sili atu ona mamafa pe afai tatou te taumafai e ufiufi a tatou agasala.)
- Afai tatou te le mananao e iloa e tagata se faaputuga eleele, o le a le mea e tatau ona tatou fai? (E tatau ona tatou aveese le faaputuga ae le o le ufiufi.) Pe mafai faapefea ona tatou aveese le agasala mai o tatou olaga?

### 3. “Ona matua inoino tele lava lea o Amanono ia te ia” (2 Samuelu 13:15).

O lo o i ai i le 2 Samuelu 13 le tala e uiga i le atalii o Tavita o Amanono faapea ma le afafine o Tavita o Tamara. Sa tosina Amanono ia Tamara ma ua faapea ona faamalosi ai Tamara e faia le agasala o le faitaaga ma ia.

- O lo o faapea mai le 2 Samuelu 13:1 sa alofa Amanono ia Tamara. Pe sa faapefea ona suia lagona o Amanono mo Tamara ina ua agasala o ia ma Tamara? (Tagai 2 Samuelu 13:15.) Aisea e masani ai ona i ai le inoino, ae le o le alofa, i le va o ni tagata o e solia mataupu faavae o le ola mama?

Sa saunoa mai Peresitene Gordon B. Hinckley e faapea: “Sa ou faalogo o faapea mai Elder John A. Widtsoe . . . ‘o le tulaga ua ou mautinoa o se alii talavou ma se tamaitai talavou o e ua solia mataupu faavae o le ola mama e le pine ae iu ina inoino le tasi i le isi.’ Ua ou iloa foi lenei mea e tasi. Atonu e i ai ni upu o le alofa e amata ai, ae o le a i ai upu o le ita ma le inoino mulimuli ane” (“Faamaoni i le Faatuatuaga,” *Liahona*, Setema, 1996, 6).

### 4. O le faamoemoe mo e ua salamo

Afai o le a e faamamafa atu e faapea e le mafai ona tuai ona salamo, atonu e te manao e faamatala atu le fuaitau lenei mai ia Elder Boyd K. Packer e faapea:

“O le manatu faalotovaivai e faapea o se sese (po o ni sese) ua atili tuai ai lava, e le sau mai le Alii. Na ia fetalai mai afai tatou te salamo, e le gata o le a ia faamagalalo a tatou solitulafono, ae o le a ia faagalalo foi ma ‘le toe manatua lava a tatou agasala . . . O le salamo e pei o se fasimoli, e mafai ona faamamaina agasala. O le pisia i se palapala e le taumate e manaomia ai se fasimoli malosi o le amio pulea e faamamaina le pisia, ma o le a matafi ese ai” (Lipoti o le Konafesi Aperila, 1989, 72 po o le *Liahona*, Iulai, 1989, 71–73).

# “O Mea Uma Lava e Manava ia Vivii atu ia Ieova”

Lesona  
**25**

*Salamo*

---

**Faamoemoega** Ina ia fesoasoani atu i tagata o le vasega ia faaalua le agaga faafetai mo le Faaola faapea ma le tele o faamanuiaga ua tuuina mai ia i tatou e ia ma lo tatou Tama Faalelagi.

---

- Sauniuniga**
1. Ia suesue ma le agaga tatalo i mau e talanoaina i le lesona, ma le tele o le tusi a Salamo e te mafaia.
  2. Ia suesuse i le lesona ma filifili ma le agaga tatalo mau, autu, ma fesili o lo o sili ona talafeagai ma tulaga manaomia o tagata o le vasega. E le aofia i lenei lesona le tusi atoa o le Salamo. A o lo o faamatala ai nisi o autu taua o lo o faaalua i le tusi atoa.
  3. Afai e te faaaogaina le gaoioiga e faatosina mai ai muamua, ia aumaia se ata o le Faaola ma ni ata se fa po o se lima o lo o faaalua ai mea e te faafetai i ai, e pei o tusitusiga paia, o se ata o se ua pele ia te oe, po o se mea e faaalua ai se tasi o au taleni, po o se meaai. Afai e te faaaogaina le gaoioiga e faatosina mai ai lona lua, ia fai atu i se tagata e toatasi pe toalua o le vasega e faamatala mai se salamo e fiafia i ai ma ia ta'u mai le pogai e taua ai ia i laua.
  4. Ia aumaia se ata e tasi po o le sili atu foi o malumalu.
- 

## **Faalautelega Fautuaina o le Lesona**

Gaoioiga e  
Faatosina Mai Ai

Atonu e te manao e faaaoga se tasi o gaoioiga o lo o i lalo (po o sa oe lava gaoioiga) e amata ai le lesona. Filifili le gaoioiga e sili atu ona talafeagai mo le vasega.

1. Ia faaali atu se ata o le Faaola ma ia faaalua lou agaga faafetai mo lona soifuaga ma le misiona. Ia faatutu solo ata o isi mea e te faafetai ai. Ia faaalua lou agaga faafetai mo mea taitasi. Ona tuuina atu lea o fesili nei:

- O a ni meaalofa ma ni avanoa mai le Alii e aupito sili ona e faafetai ai? Mata e faapefea ona ese lou olaga pe a aunoa ma ia mea?

Ia faamatala atu o le tele o Salamo o lo o faaalua ai le agaga faafetai mo faamanuiaga ua tuuina mai e le Alii. O se vaega o lenei lesona e faatatau lea i faamanuiaga ma mea e mafai ona tatou fai e faaalua ai lo tatou agaga faafetai mo ia mea.

2. Fai atu i se tagata o le vasega e faitau leotele le Salamo 23. Ona tuuina atu lea o fesili nei:

- O a lagona o lo o faaalua i lenei salamo? O a lagona e oo ane ia te oe a o e faitauina pe faalogologo i lenei salamo?

Ia fai atu i se tagata e toatasi po o le toalua o le vasega ua tofia e tuuina mai se Salamo e sili ona fiafia i ai ma ia faamatala mai le pogai e taua ai ia i laua.



A o e aoao atu mau o lo o i lalo, ia talanoaina le auala e faatino ai i lou olaga i aso taitasi. Ia uunaiina tagata o le vasega e faamatala mai ni mea na oo ia i latou e tusa ma mataupu faavae o mau.

Ia faamatala atu o le tusi a Salamo o se tuufaatasiga lea o ni solo sa faaoga mua-mua e avea o ni viiga po o ni talosaga i le Atua. O le tele o ia salamo sa tusia e Tavita. O lenei tusi ua pei lava o ni viiga ia Isaraelu anamua. O ana upu o lo o aofia ai nisi o tusi musuia sili ona lelei o le lalolagi, e faaalua ai le faatuatua i le Alii ma se agaga naunautai e ola amiotonu.

### 1. O valoaga e uiga i le soifuaga ma le misiona a Iesu Keriso

O le tele o ia salamo o lo o vavalo mai ai e uiga i le misiona a Keriso o le Mesia. Sa fetalai mai le Faaola Toetu, “e tatau ona taunuu o mea uma ua tusia ia te au i le tulafono a Mose, ma le au perofeta ma salamo” (Luka 24:44). Ia talanoaina le faataunuuga o nisi o valoaga o lo o i lalo e uiga ia Keriso o lo o tusia i le tusi a Salamo:

<i>Valoaga</i>	<i>Taunuuga</i>
Salamo 107:23–30	Mataio 8:23–27. Ua vaoia e Iesu le matagi ma galu.
Salamo 69:8	Ioane 1:11; 7:5. Sa le talia Iesu i lona lava nuu.
Salamo 41:9; 55:12–14	Ioane 13:18, 21. Sa faalataina Iesu e se uo.
Salamo 69:20	Mareko 14:32–41. Sa mafatia Iesu na o ia i Ketesemane.
Salamo 22:7–8	Mataio 27:39–43. Sa tauemuina Iesu.
Salamo 22:16	Mareko 15:25. Sa faasatauroina Iesu
Salamo 22:18	Mataio 27:35. Ua faia e fitafita se vili i laei o Iesu.
Salamo 22:1	Mataio 27:46. Sa fesili atu Iesu i le Tama po o le a le mea ua ia tuulafoai mai ai ia te ia.
Salamo 69:21	Ioane 19:28–30. Sa tuuina atu ia Iesu le vineta ina ua fiainu.
Salamo 34:20	Ioane 19:33–36. Sa leai se ivi o Iesu na gauia.
Salamo 31:5	Luka 23:46. Ua tuuina atu e Iesu lona agaga i le Tama ona maliu ai lea.
Salamo 16:10	Galuega 2:31–32; 13:34–35. Sa le i pala le tino o Iesu, ae sa toe tu a’e i le Toetu.

- O Iesu Keriso o le tagata lea e toatasi o le na valoia lona fanau mai, soifuaga, maliu, ma le toetu. Aisea tou te manatu ai na tuuina mai ia valoaga auiliili e uiga i le soifuaga o le Faaola? (O nei valoaga ua faamanino mai ai o Iesu o le Mesia na folafola mai, o le Faaola o le lalolagi.) Pe ua faapefea ona avea nei valoaga ma se faamanuiaga ia i latou o e na maua? (Sa fesoasoani valoaga i tagata e aoao ai e uiga i le Faaola ma maua molimau e uiga ia te ia a o le i taitai lava ona soifua mai [tagai Mosaea 3:13]. Sa fesoasoani foi valoaga i nisi tagata e iloa ai o ia ina ua afio mai.)

### 2. “Ua agalelei mai leova ia te oe” (Salamo 116:7).

Ua le gata ina vavalo e uiga i le soifuaga ma le misiona a le Faaola, a ua faaalua i le tele o salamo le agaga faafetai mo faamanuiaga e pei o le foafoaina o le lagi ma le lalolagi; o le agalelei, loto faamagalo, ma le alofa o le Faaola; o tusitusiga paia; faapea ma le malumalu.

*O le Foafaina o le Lagi ma le Lalolagi*

Ia talanoaina salamo o lo o i lalo o lo o faaalua ai le agaga faafetai i le Alii mo le foafaina o le lagi ma le lalolagi:

Salamo 19:1

Salamo 104:5–7, 14, 24

Salamo 136:3–9

- Pe ua faapefea ona molimau mai le foafaina o le Lagi ma le Lalolagi e uiga i le mana ma le alofa o le Atua? (Tagai Alema 30:44; Mose 6:63.) Pe mafai faapefea ona tatou faaalua le agaga faafetai mo le meaalofo o le Foafoga?

*O le Alofa Mutimutivale, Loto Faamagalo, ma le Agalelei o le Faaola*

Ia talanoaina nisi o salamo o lo o i lalo o lo o faaalua ai le agaga faafetai i le Faaola mo lona alofa mutimutivale, loto faamagalo, ma le agalelei:

Salamo 23 (Atonu e te le manao e talanoaina leni salamo pe afai sa e faaaogaina i le gaioiga e faatosina mai ai).

Salamo 51 (Atonu e te le manao e talanoaina leni salamo pe afai sa e talanoaina i le lesona 24).

Salamo 59:16

Salamo 78:38

Salamo 86:5, 13

Salamo 100:4–5

Salamo 103:2–4, 8–11, 17–18

- O le a se mea e mafai ona tatou aoao e uiga i le Alii mai nei salamo? Ia valaauina tagata o le vasega e faamatala mai pe faapefea ona latou iloa le alofa mutimutivale, loto faamagalo, ma le agalelei o le Alii.
- O le a se mea ua e lagona ai le ootia e uiga i le talosaga a Tavita mo le faamagaloina e pei ona i ai i le Salamo 51? O le a se mea ua aoao mai ia i tatou i leni salamo e uiga i le salamo ma le loto faamagalo? (tagai o upu muamua i le fuaiupu e 2, 7 ma le 12. O nei upu ua faamatalaina mai ai vaega taua o le salamo. Ia tagai foi i le fuaiupu e 17, o lo o faamatala ai le tulaga o le loto e tataua ona tatou maua ina ia maua le salamo moni.)

*O Mau*

Ia talanoaina salamo nei o lo o faaalua ai le agaga faafetai i le Alii mo tusitusiga paia:

Salamo 19:7–11

Salamo 119

- O a upu sa faaaoga e Tavita i le Salamo 19:7–10 e faamatala ai tusitusiga paia? (O upu e tutusa uiga ma tusitusiga paia e aofia ai le *tulafono*, *molimau*, *poloai*, ma *faamasinoga*. O soanauna o lo o faamatala ai tusitusiga paia e aofia ai le *atoatoa*, *mautinoa*, *sa'o*, *mama*, *faamaoni*, ma le *amiotonu*. O lo o faamatalaina foi tusitusiga paia e faapea e sili atu ona manaomia nai lo le auro ma sili atu ona suamalie nai lo le meli.)
- O a ni faamanuiaga e mafai ona aumaia e tusitusiga paia i o tatou olaga, e pei ona faamaumauina i le Salamo 19:7–11? Atonu e te manao e tusia nei faamanuiaga i luga o le laupapa:

- a. Latou te faaliliuina o tatou agaga (fuaiupu 7).
  - e. E faapotoina ai le ua faigofie (fuaiupu 7).
  - i. E faafiafia ai le loto (fuaiupu 8).
  - o. E malamalama ai mata (fuaiupu 8).
  - u. Na te tuuina mai ia i tatou le lapataiga (fuaiupu 11).
- Pe ua faapefea ona faamanuiaina lou olaga e tusitusiga paia i nei auala po o nisi foi auala?
  - Sa alaga le faisalamo ia Ieova, “Ua tele lava lo’u naunau i lau tulafono; ou te mafaufau i ai i le aso atoa” (Salamo 119:97; ia vaai foi i le fuaiupu e 15–16, 33–35, 40, 47–50, 72, 92, 104, 174). Pe mafai faapefea ona tatou faatupuina lea fiafia mo tusitusiga paia?
  - Pe ua faapefea ona avea tusitusiga paia e pei o se “sulu i o [tatou] vae, ma le malamalama i o [tatou] ala”? (Salamo 119:105).

### *O le Malumalu*

Ia talanoaina nisi o salamo o lo o i lalo e uiga i le malumalu. Atonu e te manao e faaali i lea mea ma lea mea se ata e tasi po o le sili atu o malumalu a o faitau e tagata o le vasega salamo nei:

Salamo 5:7

Salamo 15:1–3

Salamo 24

Salamo 27:4

Salamo 65:4

Salamo 84:1–2, 4, 10–12

Salamo 122

Salamo 134

- O le a se mea e mafai ona tatou aoaoina e uiga i le malumalu mai nei salamo? O le a se mea e mafai ona tatou aoaoina e uiga i le saunia o i tatou lava mo le o atu i le malumalu?

Atonu e te manao e valaauina nisi o tamaiti o le Peraimeri e o mai i le vasega ma usu le pese “Ou te Fia Vaai i le Malumalu” (*Tusipese a Tamaiti*, itulau 95).

### **3. “Se a se mea ou te tau ai Ieova ona o lona agalelei ia te a’u?” (Salamo 116:12).**

- I le Salamo 116:12, sa fesili atu Tavita, “Se a se mea ou te tau ai Ieova ona o lona agalelei mai uma lava ia te a’u?” Pe sa faapefea ona tali e Tavita lenei fesili? Atonu e te manao e tusia faamatalaga taitasi a Tavita e pei ona faaalua i lalo:
  - a. “Ou te avae le ipu o le olataga” (116:13).
  - e. “Ou te valaau atu i le suafa o Ieova” (116:13).
  - i. “Ieova e, o lau auauna lava au” (116:16).
  - o. “Ou te fai le taulaga o le viiga ia te oe” (116:17).
  - u. “Ou te avatu ia Ieova i luma o lona nuu uma lava o mea na ou tauto ai, i lotoa o le fale o Ieova” (116:18–19).
- Pe mafai faapefea ona tatou faatino tali a Tavita i le faaalua o le agaga faafetai i le Alii?

#### 4. “Faalagolago ia Ieova” (Salamo 4:5)

- “O le “faalagolago ia Ieova” o se tasi lea o apoapoaiga sili ona taatele i le tusi a Salamo (Salamo 4:5; 5:11; 9:10; 18:2; 56:11; 62:8; 118:8–9). Pe faapefea ona tatou faalagolago ia Ieova? Pe ua faapefea ona faamanuiaina oe a o e faalagolago ia te ia?”

Faiiuga

O lo o faaalua e le salamo ni molimau malolosi e uiga i le misiona paia a Iesu Keriso. O lo o faamanatu mai ai foi ia te i tatou e uiga i faamanuiaga tetele ua tuuina mai ia i tatou e ia ma lo tatou Tama Faalelagi. Ma o loo fautua mai ai foi auala e mafai ona tatou faaalua ai le agaga faafetai mo na faamanuiaga.

Atonu e te manao e valaauina ni tagata o le vasega e faitau le Salamo mulimuli (Salamo 150) ina ia faia ai se aotelega o le savali a le tusi o Salamo. Ia faaopoopo atu lau lava molimau i le vivii ma le faafetai.

#### Manatu Faaopoopo e Aoao Atu Ai

O mataupu o lo o taua i lalo e faaopoopo i le oototoga o le lesona fautuaina. Atonu e te manao e faaoga se tasi o nei manatu pe sili atu foi e avea o se vaega o le lesona.

##### 1. O viiga o le au paia o aso e gata ai na musuia e salamo o le Feagaiga Tuai.

Ia faamatala atu o le tusi pese e mafai ona tatou ta’ua e tusa lava ia ma o tatou salamo o aso e gata ai. Atonu e te manao e usu faatasi e tagata o le vasega se pese o aso e gata ai na mafua mai ona o se salamo o le Feagaiga Tuai. O nisi o nei viiga o le “O Iesu Lo’u Sulu” (*Viiga*, nu. 49; Salamo 27:1; “Ua Sili Oe” (*Viiga*, nu. 46; Salamo 8:3–9; 9:1–2).

##### 2. O Faamanuiaga e maua i le lagiina o viiga

- O a nisi o autu faapitoa o a tatou viiga o aso e gata ai? (Atonu e aofia mai tali le Faaola, o o tatou tiute i le avea ma tagata o le ekalesia, o le tumau seia oo i le iuga, faatuatua, fale ma le aiga, alofa, galuega faafaifeautalai, tatalo, perisitua, perofeta, o le toefuataina o le talalelei, o le faamanatuga, o le auauna atu, o le onosaia o mea faigata, ma Siona.) Pe ua faapefea ona faamanuiaina i tatou i le lagiina o viiga? (Tagai MFF 25:12.)

Ia talanoaina nisi o ala o lo o i lalo e faamanuiaina ai i tatou ona o le usuina o viiga:

- E siitia a’e o tatou agaga i viiga.
- O viiga e musuia ai i tatou ina ia ola atili i le amiotonu.
- E faamanatu mai e viiga ia i tatou o tatou faamanuiaga.
- O viiga e maua ai e i tatou le avanoa e vivii ai i le Alii.
- O viiga e tuuina mai ai ia i tatou le auala e fai ai molimau.
- E fesoasoani viiga ia i tatou i le tuuina atu o i tatou lava i le Alii.
- E fesoasoani viiga ia i tatou e lagona ai le Agaga.
- E fesoasoani viiga ia i tatou e fesoata’i ai ma lo tatou Tama Faalelagi.
- E fesoasoani viiga ia i tatou e iloa ai ma aoao atu le talalelei.

Sa saunoa mai le au Peresitene Sili e faapea:

“O musika musuia o se vaega o a tatou sauniga lotu. E valaauina e viiga le Agaga o le Alii, faatupuina ai le lagona o le faaaloalo, fusia faatasi i tatou ma tagata o le ekalesia, ma saunia ai se auala mo i tatou e fai ai viiga i le Alii.

“O nisi o lauga tauta’ua o lo o tuuina atu i le usuina o viiga. O viiga e uunaiina ai i tatou ia salamo ma faia galuega lelei, fausia ai molimau ma le faatua-tua, faamafanafana ai i e ua loto faanoanoa, ma musuia i tatou ina ia tumau seia oo i le iuga” (*Viiga*, nu. 9).

- O nisi o salamo o lo o ta’ua e faapea “ia alalaga ia Ieova” (Salamo 98:4; 100:1; ia tagai foi i le 66:1; 95:1–2). E mafai faapefea ona tatou faaaogaina atili le usuina o viiga ia tatou sauniga lotu ma le aiga, ma ia mautinoa ua maua ai le olioli ma ia i ai sona uiga?
- I le Talisuaga Mulimuli, sa usuina e Iesu ma ana Aposetolo se viiga (Mataio 26:30). Pe ua faapefea ona e manatu o le usuina o se viiga sa fesoasoani ia Iesu ma ana Aposetolo e saunia ai e faataunuaina le galuega sa i o latou luma?
- I le taimi lava a o le i maliu fasia le perofeta o Iosefa Samita i le falepuipui o Karatasi, sa ia fai atu ai ia Ioane Teila la te usuina le pese “Se Tagata Mativa Faanoanoa” (*Viiga*, nu. 16; ia tagai foi i le tusi a B. H. Roberts, *A Comprehensive History of the Church*, 2:282–84). O le a sou manatu na faapefea ona fesoasoani le lagiina o lenei viiga i le Perofeta?

### 3. O mea e tutusa ai solo i salamo

Atonu e faatamaoigaina lau sutesuega i salamo e ala i lou malamalama i faiga faatusi solo na faaaogaina e Tavita ma isi tusi solo Eperu. O se tasi o nei faiga poto o le tali tutusa lea o faaupuga. O se tasi o uiga taatele o le talitutusa o faaupuga o le ta’u soo lea o se manatu i ni upu eseese. O lea ta’u soo o faaupuga e faalauteleina ai pe faaopoopoina ai le uiga o se manatu. O se tasi o faaitaiga o lenei ituaiga o le ta’u soo o se faaupuga o lo o ta’ua i le Salamo 102:1–2, o lo o faaalua ai le manatu lava e tasi i ni upu eseese pe tusa ma le faalima (“faafofoga mai ia i la’u tatalo,” “ia oo atu la’u alaga ia te oe,” “aua le alo ou fofoga ia te a’u,” “ia liliu mai ou fofoga ia te a’u,” “ia taalise ona e tali mai ia te a’u i le aso ou te valaau atu ai ia te oe”). Ia faamalamalama atu le ala e faamamafaina ai atili le savali i le ta’ua soo.

# O le Tupu o Solomona: O le Tagata Poto, ma le Tagata Valea

Lesona  
**26**

1 Tupu 3; 5–11

---

**Faamoemoega** Ia uunaia tagata o le vasega ina ia faaaoga o latou faamanuiaga ma le poto ma ia ulufale atu i le malumalu ma le agavaa.

---

**Sauniuniga**

1. Ia suesue ma le agaga tatalo i mau nei:
  - a. 1 Tupu 3:5–28. Ua suia e Solomona lona tama, o Tavita, ua avea ma tupu, ma ua mulimuli i le Alii. Ua faaali mai le Alii ia Solomona, o le sa ole atu ina ia faamanuiaina o ia i le loto mataala (3:5–9). Ua faamanuiaina e le Alii Solomona i le poto, oa, ma le mamalu (3:10–15). Ua avatu e ni fafine se toalua se tamaitiiti ia Solomona, o le na filifili ma le poto po o ai le fafine o le tina o le tamaitiiti (3:16–28).
  - e. 1 Tupu 5–6; 7:1–12. Ua taitaiina e le tupu o Solomona le fausia o se malumalu tele (5:6). Sa fausia e ia se maota o le tupu mo ia lava (7:1–12).
  - i. 1 Tupu 8:22–66; 9:1–9. Ua faapaiaina e Solomona le malumalu ma ua ole atu i le Alii ina ia faamanuia Isaraelu i le oa faaleagaga ma le faaletino (8:22–53). Ua tapuai tagata mo le 14 aso (8:54–66). Ua toe faaali mai le Alii ia Solomona, ma ua folafola mai o le a faamanuia ia Isaraelu pe afai latou te auauna ia te ia ae o le a fetuu i latou pe afai latou te liliu atu i isi atua (9:1–9).
  - o. 1 Tupu 10–11. Ua faatupuina le lauiloa o Solomona ona o lana oa ma le poto (10:1–13, 24–25). Ua matua tamaoiga o ia (10:14–23, 26). Ua faaipoi atu o ia i le tele o fafine e le o ni fafine Isaraelu o e na tauanau ia te ia e ifo i atua ese (11:1–10). Ua faatuina e Ieova ni fili e faasagatau ia Solomona (11:11–25). Ua valoia e se perofeta e faapea o le a vaeluaina le malo o Isaraelu ona o le amioleaga o Solomona (11:26–40).
2. Tusi faitau faaopoopo: 1 Tupu 2:1–12; 4:29–34; 7:13–51; 1 Nofoaigatupu 29; MFF 46.
3. Afai o maua le ata o Malumalu Sa Faaoga Anamua, atonu e te manao e faa-aoga lea ata i le faagasologa o le lesona (62300; Taga o Ata o le Talalelei 118).

---

**Faalautelega  
Fautuaina o  
le Lesona**

Gaoioiga e  
Faatosina Mai Ai

Atonu e te manao e faaoga le gaoioiga o lo o i lalo (po o sa oe lava gaoioiga) e amata ai le lesona.

Ia faitau atu po o le alu ane o se tagata o le vasega e faitau le faamatalaga lenei a Dallin H. Oaks

“E masani ona tatou manatu ia Satani faapea na te osofaia i tatou i mea tatou te vaivai ai . . . Peitai o vaivaiga e le na o le pau lena o le mea tatou te afaina ai. E mafai foi e Satani ona osofaia i tatou i mea ua tatou manatu tatou te malolosi ai, i vaega tonu lava tatou te mitamita ai i o tatou malosiaga. O le a faalatalata mai o ia e ala i a tatou taleni aupito sili ma meaalofa faaleagaga ua tatou umia. Afai

tatou te le faaeteete, e mafai e Satani ona faatupuina lo tatou toilalo faaleagaga e ala i le faatamaiaina o o tatou malosiaga atoa ma le faaaogaina o o tatou vaivai-ga” (“E Mafai Ona Avea o Tatou Malosiaga Ma o Tatou Toilalo,” *Liahona*, Me 1995, 12–13).

- O a nisi o malosiaga e ono avea ma mea tatou te pa’uu ai?

Ia faamatala atu o lenei lesona e faatatau lea i le Tupu o Solomona, o se tagata na ia maua meaalofo taua mai le Atua ae na oo ina faaaoga e ia na meaalofo ma le amioletonu. Ia fautua atu ina ia saili e tagata o le vasega ni mea e faaalua ai le pa’u malie o Solomona. Ia faamamafa atu e tatau ona tatou saili mo mea e vaivai ai e le ona o le faamasino atu ia te ia ae ia tatou aoao mai i ana mea sese.

## Mau Talanoaina ma le Faaogaina

---

A o e aoao atu mau o lo o i lalo mai tusitusiga paia, ia talanoaina le auala e faatino ai ia mau i le olaga i aso taitasi. Ia uunaiina tagata o le vasega e faamatala mai ni tulaga na oo ia i latou e faatatau i mataupu faavae o mau.

I le taimi lava a o le i oti Tavita, sa faauuina Solomona e avea ma tupu e Satoka le faitaulaga ma Natano le perofeta. O Solomona, o le sa avea ma atalii o Tavita ma Patisepa, sa ia maua le fautuaga lenei mai i lona tama: “Ia e faamalosia . . . ia e faatama tane; ia e tausia foi sauniga a Ieova lou Atua, ina ia e savali i ona ala, ia tausii i ana sauniga, ma ana poloaiga, ma ana faamasinoga, ma ana tulafono . . . ina ia manuia oe i mea uma e te faia” (1 Tupu 2:2–3).

### 1. Ua faamanuia e Ieova Solomona i le poto, oa, ma le mamalu.

Ia aoao atu ma talanoaina le 1 Tupu 3:5–28.

- O le taimi lava na avea ai Solomona ma tupu, sa faaali mai ai Ieova ia te ia i se miti ma ua faapea mai, “Ina fai mai ia, pe se a se mea ou te avatua ia te oe” (1 Tupu 3:5). O le a le mea na ole atu ai Solomona? (Tagai 1 Tupu 3:9). O le a le uiga o le maua o se “loto matala”? (Tagai 1 Tupu 3:28; 4:29.) Aisea na lagona ai e Solomona le manaomia faapitoa o lona faamanuiaga? (Tagai 1 Tupu 3:7–8.) Pe faapefea ona avea le maua “o le poto mai le Atua” ma mea e fesoasoani ia i tatou i o tatou tiutetauave i le aiga? i le galuega? i le aoga, i le ekalesia? Pe mafai faapefea ona tatou maua lenei poto?
- Aisea na fiafia ai Ieova i le talosaga a Solomona i le fia maua o se loto matala? (Tagai 1 Tupu 3:11–12. Sa ole atu Solomona mo se meaalofo e ono fesoasoani atu ai o ia i isi nai lo se meaalofo e faamoemoe ia te ia lava.) O a nisi o meaalofo faaleagaga atonu tatou te sailia? (Tagai MFF 46:13–26.) O a tulaga e tuuina mai ai e Ieova meaalofo a le Agaga? (Tagai 1 Tupu 3:14; MFF 46:8–12.) Pe mafai faapefea ona tatou faaoga lenei meaalofo e auauna atu ai i isi?
- O a nisi o faamanuiaga na tuuina atu e Ieova ia Solomona? (Tagai 1 Tupu 3:13–14.) O le a se auala e mafai ona faaoga ai nei faamanuiaga e auauna ai i isi?
- O le a le uluai tulaga sa manaomia ai le faamasinoga a le tupu o Solomona? (Tagai 1 Tupu 3:16–22.) Pe sa faapefea e Solomona ona foia le faafitauli? (Tagai 1 Tupu 3:23–28.) Pe sa faapefea ona iloa mai le faaiuga a Solomona ua faamanuiaina o ia e Ieova i le poto?

## 2. Ua taitaiina e le tupu o Solomona le fausia o se malumalu tele ma ua faatonuina e ia le fausia o se maota o le tupu mo ia lava.

Ia aoao atu ma talanoaina le 1 Tupu 5:6; 7:1–12.

- E pei lava ona sa poloaiina e Ieova, o le mea lea sa taitaiina ai e Solomona le fausia o se malumalu. (Atonu e te manao e toe faamanatu faapuupuua le 1 Tupu 5:1–6, 17–18; 6:15–36 e faamamafa ai le uiga lasilasi o le malumalu.) O le a sou manatu i le pogai sa faaaoga ai e Solomona ni mea aupito lelei e fausia ai le malumalu?
- Pe sa faapefea ona faaalua e le fau fale le faaaloalo mo le malumalu i le taimi na fausia ai? (Tagai 1 Tupu 6:7.)
- Pe sa faapefea ona faaaoga e Solomona lona poto, oa, ma le mamalu e mautinoia ai ua fausia tatau le malumalu? (Tagai 1 Tupu 5:1–12. Talu ai ona o nei malosiaga o le mea lea na mafai ai e ia ona maua mea e fausia ai ma faaaoga le fesoasoani a le au faigaluega popoto i le fausia o le malumalu.)
- O le a se folafolaga sa tuuina atu e Ieova ia Solomona e tusa ma le malumalu? (Tagai 1 Tupu 6:11–13.) O le a se folafolaga faapea ua tuuina mai e Ieova ia i tatou i aso nei? (Tagai MFF 97:15–17.)
- Sa i ai foi ia Solomona se fale na fausia mo ia lava. Pe sa faapefea ona faatusatusa le tele o lona fale i le tele o le maota o le Alii? (Tagai 1 Tupu 6:2–3; 7:2, 6–7.) Pe faapefea ona faaalua i le faaaogaina o nei oa le faasolosolo atu i le faatoilaloina o Solomona?

## 3. Ua faapaia e Solomona le malumalu.

Ia aoao atu ma talanoaina le 1 Tupu 8:22–66; 9:1–9.

- Ina ua mavae le fitu tausaga o fausia, sa faapaiaina le malumalu. O a nisi o mea sa tatalo ai Solomona i le tatalo o le faapaia? (Tagai 1 Tupu 8:22–53.)  
Atonu e te manao e tusia tali a tagata o le vasega i luga o le laupapa. Atonu e aofia i tali mea nei:
  - a. Tali i tatalo (1 Tupu 8:28–30, 49–52)
  - e. Faamagaloga (1 Tupu 8:33–39)
  - i. Timu (1 Tupu 8:35–36)
  - o. Fesoasoani i le taimi o oge ma faamai (1 Tupu 8:37)
  - u. Fesoasoani i taua (1 Tupu 8:44–45)
- I lana tatalo o le faapaia sa tatalo atu ai Solomona ia Ieova ia fesoasoani mai i lona nuu i le tele o faafitauli faigata. Pe mafai faapefea e le auai soo atu i le malumalu ona fesoasoani ia i tatou pe afai tatou te mafatia i faafitauli?

Sa saunoa mai Peresitene Ezra Taft Benson: “I le filemu o totonu o nei malumalu matagofie, e maua ai e i tatou i nisi taimi ni tali i faafitauli tuga o le olaga. O nisi taimi i lalo o le aafiaga a le Agaga, e oo mai ai ia i tatou iina se malamalama moni. O malumalu, o ni nofoaga ia o faaaliga patino. Pe a mafatia lo’u loto i se faafitauli po o se mea faigata, ou te alu i le Maota o le Alii ma se tatalo i lo’u loto mo ni tali. O nei tali, ou te mauaina i ni auala manino ma e lē mafaaseseina” (“O le Mea Ou te Faamoemoe o le a e Aoao Atu i Lau Fanau e Uiga i le Malumalu,” *Liahona*, Aperila, 1986, 4).



- Sa tatalo Solomona ina ia fesoasoani malumalu i le taitaiina mai o e le talitonu i le Alii (1 Tupu 8:41–43). Pe faapefea ona faia e se malumalu lenei mea? (Ia valaauina tagata o le vasega e tuuina mai ni faataitaiga o le auala na fiafia ai nisi o i latou po o isi i le ekalesia ona o lo latou fia malamalama i malumalu.)
- Ina ua uma ona faia e Solomona le tatalo o le faapaiaga, sa lapata'i atu o ia i lona nuu, "ia atoatoa o outou loto ia Ieova lo tatou Atua" (1 Tupu 8:61). O le a sou manatu i le uiga o le maua o se loto "ia Ieova"? Pe mafai faapefea e le auai i malumalu ona fesoasoani ia i tatou i le faaatoatoaina o o tatou loto?
- O le a se mea e mafai ona tatou fai ina ia faatumauina ai le faatosinaga a le malumalu ia malosi i o tatou olaga? (Atonu e aofia mai i tali mea nei: Ia ulu-fale soo i taimi e mafai ai, ia faatumauina le umia o se pepa faataga o le malumalu e aoga i le taimi nei, ma ia faapipii ata o le malumalu i o tatou fale.)
- O le a le mea na fai e tagata ina ua uma ona faapaia le malumalu? (Tagai 1 Tupu 8:62–66.) O le a le lagona o tagata a o foi mai i latou i o latou aiga ina ua uma le faapaiaga o le malumalu ma le 14 aso na tapuai ai? (Tagai 1 Tupu 8:66.) O le a se lagona e te maua pe a e foi atu i le fale mai le malumalu?
- O le a le savali a le Alii ina ua asiasi mai o ia ia Solomona ina ua mavae le faapaiaga o le malumalu? (Tagai 1 Tupu 9:3–9. Ia tagai foi 1 Tupu 6:11–13. Ia tagai na faia foi e Ieova se faamatalaga faapea i le taimi o fausia le malumalu.) O le a le pogai ua e manatu ai sa manaomia e Solomona le toe faamanatu atu e uiga i ana feagaiga? Pe ua faapefea ona faamanatu mai e Ieova ia i tatou a tatou feagaiga?

#### **4. Ua tumu Solomona i le tamaoaiga ma ua faaipoipo atu o ia i fafine e le o ni Isaraelu o e na tauanauina o ia ina ia ifo i tupua.**

Ia aoao atu ma talanoaina le 1 Tupu 10–11.

- Sa faapefea ona faatupulaia oa ma le mamalu o Solomona ina ua fausia le malumalu? (Tagai 1 Tupu 10:1–15, 24–25.) Sa faapefea ona faaoga sese e Solomona nei faamanuiaga? (Tagai 1 Tupu 10:16–23, 26–29. Ia faamalalama atu sa faaoga e ia lea oa e fausia ai lona lava malo ae le o le malo o le Atua.) O le a se auala e tatau ona tatou faaoga ai le poto, oa, ma le mamalu? (Tagai Iakopo 2:18–19.)
- Pe sa faapefea ona faaalua i le filifiliga o ava a Solomona ua ia liliuese mai le Atua? (Tagai 1 Tupu 11:1–2. Sa faaipoipo o ia i fafo atu o le feagaiga.) O le a le mea sa tauanau ai Solomona e ana ava e le o ni Isaraelu e fai? (Tagai 1 Tupu 11:3–8. Ia tagai o le Faaliliuga a Iosefa Samita, o lo o faapea mai ai le fuaiupu e 4 ua faapei le loto o Solomona o le loto o lona tama, o Tavita, ma ua faapea mai le fuaiupu e 6 sa leaga le mea na fai e Solomona i le silafaga a Ieova, e pei foi o lona tama, o Tavita.)
- O le a le mea na faia e le Alii ina ua solia e Solomona ana feagaiga ma liliuese mai lona ala? (Taga 1 Tupu 11:9–14, 23–25, 33–36.)
- O le a le auala ua e manatu ai o faamanuiaga o le poto, oa, ma le mamalu sa fesoasoani i le pa'u o Solomona? Pe faapefea ona e iloa o nei malosiaga ua fesoasoani lea i le pa'u o tagata o aso nei? Pe ua mafai faapefea ona tatou mautinoa o o tatou malosiaga ua le avea o se pa'u mo i tatou? (Tagai 1 Tupu 8:61; MFF 88:67.)

Sa saunoa mai Elder Dallin H. Oaks:

“Ae faapefea la ona tatou puipuia o tatou malosiaga mai le avea ma o tatou toilalo? O le tulaga mauualuga lelei e tatau ona tatou faatupulaia o le lotomauualalo. O le lotomauualalo o se puipuiga lelei tele. O le lotomauualalo o se vailaau lea e puipuia ai mai le faamaualuga. O le lotomauualalo o le mea lea e fesoasoani e faatumauina ai aoaoga uma, aemaise o mea faaleagaga. E ala mai i le perofeta o Moronae, na aumai ai e le Alii lenei malamalamaga tele e uiga i le lotomauualalo: ‘Ou te tuuina atu i tagata le vaivai, ina ia latou faamaualalo ai, ma ua lava lo’u alofa tunoa i tagata uma o e faamaualaloina i latou lava i o’u luma, ma faatuatua ia te au, ona ou faia lea o mea vaivai ma mea malolosi ia te i latou” (Eteru 12:27).

“E mafai foi ona tatou fai atu afai e faamaualalo e alii ma tamaitai i latou lava i luma o le Atua, o le a fesoasoani foi o ia ia te i latou e puipuia o latou malosiaga mai le avea ma vaivaiga ma mafai ai e le fili ona faaoga e faatamaia i latou.

“. . . afai tatou te lotomauualalo ma aoao gofie, gauai i poloaiga a le Atua, fautuaga a ona taitai, ma musumusuga a lona Agaga, e mafai ona taitaiina i tatou i le ala e mafai ai ona faaoga a tatou meaalofa faaleagaga, o mea ua tatou ausia ma faataunuuna, ma isi o tatou malosiaga uma mo le amiotonu. Ma e mafai foi ona taitaiina i tatou i le ala e ‘aloese mai ai i taumafaiga a Satani e faaoga o tatou malosiaga e faatupu ai lo tatou toilalo.

“O nei mea uma, e tatau lava ona tatou manatua ma faalagolago i taitaiga a le Alii ma ana folafolaga: ‘Ia e lotomauualalo; ona taitaiina ai lea o oe e le Alii lou Atua, ma tali atu i au talosaga’ (MFF 112:10).” (“E Mafai ona Avea o Tatou Malosiaga ma O Tatou Toilalo,” *O le Liahona*, Me, 1995, 22–23).

Faaiuga

Ia faaalua lou faafetai mo faamanuiaga faaleagaga ma le faaletino ua tuuina atu e Ieova ia te oe faapea ma le malumalu. Ia uunaiina tagata o le vasega ina ia faamaualalo i latou lava i luma o le Alii ina ia mafai ona latou faaoga o latou faamanuiaga ma le poto ma ia ulufale atu i le malumalu ma le agavaa.

## Manatu Faaopoopo e Aoao Atu Ai

O mataupu o lo o taua i lalo e faaopoopo lea i le oototoga o le lesona fautuaina. Atonu e te manao e faaoga se tasi o nei manatu pe sili atu foi e avea o se vaega o le lesona.

### 1. “Ina nei faamaualugaina lona loto i ona uso” (Teuteronomie 17:20)

- Ia faitau leotele e se tagata o le vasega le Teuteronomie 17:14–20. Pe faapefea ona avea le faatinoga o lenei mau ma mea e suia ai le olaga o Solomona ma olaga o tagata i lona malo?

### 2. Tatalo o le Faapaiaga mo Malumalu

Afai e i ai se tagata o le vasega na auai i le faapaiaga o se malumalu, ia fai atu i se tasi po o le toalua o i laua e faamatala mai e uiga i le tulaga na oo i ai i laua. Atonu e te manao e fai atu i se tagata o le vasega e saunia e faamatala mai ni malamalamaaga se lua po o le tolu mai le tatalo o le faapaiaga o se malumalu o aso e gata ai. (O lo o i ai i le Mataupu Faavae ma Feagaiga le tatalo na tuuina atu i le faapaiaga o le Malumalu o Katelani. E masani ona lomua tatalo o faapaiaga o malumalu fou faatoa faapaia i le *Liahona*.)

- E faapefea ona faatosinaina o tatou olaga faaletagata i tatalo o faapaiaga?

Sa saunoa mai Peresitene Iosefa Filitia Samita, “Pe a tatou faapaiaina se fale i le Alii, o le mea moni o lo o tatou faia o le faapaiaina lea o i tatou lava i le galuega a le Alii, faatasi ma se feagaiga o le a tatou faaoga lea fale i le auala ua faamoe-moe ai o ia e faaoga i ai” (*Church News*, 22 January 1972, 3).

# Faatosinaga a Taitai Amioleaga ma Taitai Amiotonu

Lesona  
**27**

*1 Tupu 12–14; 2 Nofoaiga a Tupu 17:20*

---

**Faamoemoega** Ia uunaia tagata o le vasega ina ia atinae uiga lelei tau le taitaiga ina ia mafai ona latou faatosinaina isi e ola amiotonu.

---

## **Sauniuniga**

1. Suesue ma le agaga tatalo mau nei:
  - a. 1 Tupu 12:1–20. Ua suitulaga Reopoamo i lona tama, o Solomona, e avea ma tupu i ituaiga e sefulumalelua o Isaraelu. Ua teena le fautuaga a tagata popoto ina ia fesoasoani mai i ona tagata, a ua taumafai e tuuina atu isi avega sili atu ona mamafa ia i latou (12:1–15). Ua vaeluaina le malo ona ua tete ituaiga e sefulu (12:16–19); ua faaigoaina pea ituaiga e sefulu i le igoa o malo o Isaraelu, a o le ituaiga o Iuta ma Peniamina ua tumau pea i lalo o le puleaga a Reopoamo ma ua ta'ua o le malo o Iuta). Ua filifilia e le malo o Isaraelu Ierepoamo, o se taitai sa i ai muamua i le malo o Solomona, e avea ma tupu (12:20).
  - e. 1 Tupu 12:25–33; 13:33–34; 14:14–16, 21–24. Ua taitaiina e Ierepoamo lona nuu e ifo i tupua ma suia e ia ositaulaga i ni tagata e le o ni Sa Levi (12:25–33; 13:33–34; mo se faamatalaga e uiga i laau tauluuluola ma mea mauualuluga, vaai manatu faaopoopo lona lua e aoao atu ai). Ua valoia e se perofeta le faatafunaina o le aiga o Ierepoamo ma le faataapeapeina o Isaraelu (14:14–16). Ua taitaiina e Reopoamo le malo o Iuta i le ifo i tupua (14:21–24).
  - i. 2 Nofoaiga a Tupu 17:1–10; 20:1–30. Ua nofotupu ma le amiotonu Iosefatu, le atalii o Reopoamo, i le malo o Iuta, ma ua faaumatia e ia laau tauluuluola ma mea mauualuluga ma ua auina atu e ia Sa Levi i le malo uma o Iuta ina ia aoao atu ai le tusi o le tulafono a Ieova (17:1–10). A o mai fili o Iuta ma tau faasaga mai ia i latou, sa anapogi ma tatalo Iosefatu ma lona nuu. Sa tuu mai e le Alii ia i latou o lea taua e le tau ai i latou, a o ia. Sa toe tau lava e na osofai'a i latou ma ua faaumatia ai e le tasi le isi (20:1–30).
2. Tusi faitau faaopoopo: 1 Tupu 11:26–40; 2 Tupu 17:20–23.
3. Afai e te faaaogaina le gaoioiga e faatosina mai ai, ia aumaia se fasi ieie tuai e mafai ona saesae ninii po o se pepa lautele e oti faafoliga i se fasiieie.

---

## **Faalautelega Fautuaina o le Lesona**

**Gaoioiga e  
Faatosina Mai Ai**

Atonu e te manao e faaoga le gaoioiga o lo o i lalo (po o sa oe lava gaoioiga) e amata ai le lesona.

Ia ave ane se fasi ieie tuai po o se pepa ua uma ona oti faafoliga i se fasiie ma sasae lea ieie po o le pepa i ni fasi ieie se sefulu ma le lua. Ia faamatala atu ina ua oo i le faaiuga o le olaga o Solomona, sa vavalu le perofeta o Akia e faapea o le a avea se vaega tele o le malo o Isaraelu e Ierepoamo, o se tasi o taitai e sefulumalelua o le

malo o Solomona sa vaaia lafoga ma le leipa. Ina ia faamalamalamaina lenei mea, sa tago Akia i lona ofu fou, ma saeia i ni fasiofu se sefululua, ma ua tuuina atu fasi ofu e sefulu ia Ierepoamo (1 Tupu 11:29–32; o lo o faamalamalama e le faamatalaga i lalo o le mataupu e 32a e faapea e tusa ai ma le faamatalaga a Sepetatio, o le faaliliuga Eleni o le Feagaiga Tuai, o le a tuua ituaiga e lua, ae le o le tasi, i le malo e pulea e i latou na tupuga mai ia Tavita).

Sa aoao mai le Faaola e faapea “o malo uma ua fevaevaea’i e faaumatia ia” (Mataio 12:25). Ia faamatala atu o le mea lea na tupu i le malo o Isaraelu ina ua mavae le oti o Solomona. O lenei lesone e faatatau lea i le faatosinaga a taitai leaga ma amioletonu i le malo na vaeluaina o Isaraelu.

Mau Talanoaina  
ma le Faaaogaina

A o e aoao atu mau o lo o i lalo, ia talanoaina le ala e faatinoina ai ia mau i le olaga i aso taitasi. Ia uunaiina tagata o le vasega e faamatala mai ni mea na oo ia i latou e faatatau i mataupu faavae o mau.

### **1. Ua vaeluaina le malo o Isaraelu, ona o le taitaiga matautia a Reopoamo.**

Ia aoao atu ma talanoaina le 1 Tupu 12:1–20.

Atonu e te manao e tusia le faamatalaga lenei i luga o le laupapa.

*O se taitai lelei:*

#### *1. E auauna atu.*

- Ina ua oti Solomona, sa avea lona atalii o Reopoamo ma tupu o Isaraelu. O a suiga sa mananao Isaraelu e faia e Reopoamo mai le auala sa pulea ai e lona tama? (Tagai 1 Tupu 12:3–4.) O le a se fautuaga sa tuuina atu e alii matutua ia Reopoamo e uiga i le taitaiga faamanuiaina? (Tagai 1 Tupu 12:6–7; 2 Nofoaiga a Tupu 10:7.) Aisea e foliga mai ai o le a faatosinaina lelei i tatou e se taitai o le e agalelei ma auauna ia i tatou? Pe mafai faapefea ona tatou faatino leni fautuaga i le aiga? i le ekalesia? i le aoga? i le galuega? (Tagai MFF 121:41–46.) O a ni faataitaga ua e vaaia i matua po o isi taitai o lo o faatinoina lelei leni fautuaga?
- Ina ua teena le fautuaga a tagata matutua, sa liliu atu Reopoamo i alii talavou sa ia masani ai i le taimi o talavou. O le a le fautuaga sa latou tuuina mai? (Tagai 1 Tupu 12:8–11.) O a taunuuga o le faaiuga a Reopoamo ina ia mulimuli i la latou fautuaga? (Tagai 1 Tupu 12:12–17. Ia faamatala atu le fuaitau “ona o ai lea o Isaraelu i o latou faleie” e faatatau lea i ituaiga e sefulu o e na o ese mai le malo o Reopoamo.) Pe mafai faapefea ona ese taunuuga e oo i ai pe ana faapea e mulimuli Reopoamo i le fautuaga a tagata matutua? (Tagai 1 Tupu 12:7.)
- Sa avea Ierepoamo ma se tasi o taitai e sefulu ma le lua o Solomona o le sa vaaia lafoga ma leipa. Ina ua latalata i le faaiuga o le nofoaiga a Solomona, sa vavalalo le perofeta o Akia e faapea o le a avea Ierepoamo ma tupu i le tele o ituaiga o Isaraelu (1 Tupu 11:29–31; tagai i le gaoioiga e faatosina mai ai). Pe sa faapefea ona faataunuu leni valoaga? (Tagai 1 Tupu 12:20. Sa nonofo pea ituaiga o Iuta ma Peniamina e faatasi ma Reopoamo i le Malo i Saute, po o le malo o Iuta. Sa mulimuli atu le isi sefulu ituaiga ia Ierepoamo i le Malo i Matu, po o le malo o Isaraelu.)

## 2. Ua taitaiina e Ierepoamo ma Reopoamo o la malo e ifo i tupua.

Ia aoao atu ma talanoaina le 1 Tupu 12:25–33; 13:33–34; 14:14–16, 21–24.

Atonu e te manao e faaopoopo atu i le faamatalaga na e tusia i luga o le laupapa:

*O se taitai lelei:*

1. *E auauna atu.*
2. *Faalagolago ma usiusitai i le Alii.*

- Sa folafola mai le Alii ia Ierepoamo e ala mai i le perofeta o Akia, o le a ia tuuina mai se “aiga tumau” (o se malo mautu) pe a fai e savali o ia i ala o le Alii (1 Tupu 11:38). Sa faapefea ona le maua e Ierepoamo faamanuiaga o lena folafolaga? (Tagai 1 Tupu 12:25–33.) Pe aisea na fausia ai e Ierepoamo tamai povi auro ma mea maualuluga ma faauuina faitaulaga pepelo? (Tagai 1 Tupu 12:26–33; 13:33–34.)

Ia faamatala atu e faapea sa fefe Ierepoamo ona afai e o atu ona tagata i Ierusalem e tapua’i ai, atonu e toe foi atu i latou ia Reopoamo. Ina ia taumafai e pulea lona nuu ma faatumauina lo latou faamaoni, o le mea lea na fausia ai e ia ni tamai povi auro i Peteli ma Tanu, o ni aai ia se lua i le Malo i Matu, ma sa ia valaauina ona tagata e tapua’i i ia aai. I le faia o lea mea, sa ia faatagaina lona fefe i le toilalo e suitulaga i lona faalagolago i le folafolaga a le Alii. Ia faamalamalama atu o se taitai poto e faalagolago i le Alii ma e le faavae e ia ni faaiuga i le fefe po o ni ana lava faamasinoga.

- Ina ua ma’i lona atalii, sa saili atu Ierepoamo mo le fesoasoani a le perofeta o Akia. O le a le mea na vavalo ai Akia e tusa ma le aiga ma le malo o Ierepoamo? (Tagai 1 Tupu 14:14–16. O le faataunuuga o lena valoaga o lo o maua i le 2 Tupu 17:20–23.)
- Sa le usitai Reopoamo e pei foi o Ierepoamo, i le Atua e ala lea i lona taitaia o tagata e ifo i tupua (1 Tupu 14:21–24). Sa avea le taitaiga amioleaga a nei tupu e lua ma mea na maua ai ni taunuuga uumi. Sa faataapeapeina malo uma e lua pe aveaina atu faatagata o taua i le tele o tausaga mulimuli ane (Israelu e Asuria ma Iuta e Papelonia) ona sa pipii pea i laua i a laua tu tuai. Pe o mafai faapefea e se taitai amioleaga e toatasi ona faia se faatosinaga mautu i le toatele o tagata?

Atonu e te manao e faamalamalama atu e faapea e le tatau ona tatou mulimuli i se taitaiga a ni taitai amioleaga e pei o tagata o Isaraelu ma Iuta. Ua tuuina mai e le Atua ia i tatou le filifiliga saoloto, ma e mafai ona tatou faa-aoga lena malosi e filifili ai le lelei, e tusa lava pe filifili e taitai le leaga (Helamana 14:30–31).

## 3. Ua taitaiina e Iosefatu le malo o Iuta ina ia mulimuli atu i le Alii ma ana perofeta.

Ia aoao atu ma talanoaina le 2 Nofoaiga a Tupu 17:1–10; 20:1–30.

Atonu e te manao e toe faaopoopo atu i le lisi o lo o i luga o le laupapa:

*O se taitai lelei:*

1. *E auauna atu.*
2. *E faalagolago ma usiusitai i le Alii.*

3. E faatuatua i le Atua.

4. E aoao atu mai tusitusiga paia.

5. Mulimuli i perofeta.

- I le tolu augatupulaga talu ona mavae Reopoamo, sa avea le atalii o lona atalii o Iosefatu ma tupu i le malo o Iuta. Pe sa faapefea ona faaalua e Iosefatu lona lava amiotonu? (Tagai 2 Nofoaiga a Tupu 17:3–4, 6.) E faapefea e lo tatou tapuai o i tatou lava ma usitai i le Atua ona aafia ai lo tatou tomai e taitaiina isi?
- O Iosefatu “ua aveeseina foi e ia o mea maualuluga ma tupua o Asaira i Iuta” (2 Nofoaiga a Tupu 17:6). O le a se mea sa aoao e tagata mai lenei mea? (Tagai 2 Nofoaiga a Tupu 20:12–13, ma ia iloa e faapea sa “tutu Iuta uma i luma o Ieova, ma o latou tamaiti, o a latou ava, ma a latou fanau.”) O le a se mea atonu tatou te aveesea mai i o tatou aiga ma o tatou lava olaga ina ia mafai ai e i tatou ona tapuai i le Atua i se tulaga sili atu ona faamaoni?
- Sa auina atu e Iosefatu sa Levi i le malo uma e aoao atu i tagata mai “tusi o le tulafono a Ieova” (2 Nofoaiga a Tupu 17:9). O le a se auala ua e manatu ai o le aoaoina i tusitusiga paia sa aoga i tagata o Iuta? Pe faapefea ona fesoasoani ia te oe a oe lava suesuega ma suesuega a le aiga i tusitusiga paia? Pe faapefea ona suia o tatou aiga ma le ekalesia atoa i le suesue i tusitusiga paia?

Sa aoao mai e Peresitene Ezra Taft Benson e faapea: Ua masani ona tatou faaalua ina ni taumafaiga tetele e faaopoopo le tulaga o a tatou gaoioiga i o tatou siteki. Tatou te galulue punoua’i e siitia ae le pasene o i latou e auai i le sauniga faamanatuga. Tatou te galulue ina ia maua se pasene e sili atu ona maualuga o o tatou alii talavou e fai misiona. Tatou te taumafai e faaleleia numera o i latou e faaipoipo i le malumalu. O nei taumafaiga uma o ni taumafaiga e ao ona ave i ai le faamalo ma e taua i le tuputupu ae o le malo o le Atua. Peitai afai e punouai tagata taitoatasi ma aiga i le suesue e le aunoa i tusitusiga paia, o le a maua lava nei vaega uma. O le a faatupulaia molimau. O le a faamalosi tautinoga. O le a malolosi aiga. O le a oo mai pea faaaliga tau le tagata lava ia (*The Teachings of Ezra Taft Benson* [1988], 44).

- O lo o faamatala mai i le 2 Nofoaiga a Tupu 20 se vaitaimi o le matua popole o tagata o Iuta, ona e tolu malo sa omai e tau ma i latou. Sa leai se foliga faamanuiaina o se tasi o nei taua mo le Tupu o Iosefatu ma ona tagata, o ē sa matua toaitiiti. O le a le mea na faia e Iosefatu ina ia maua mai ai se fesoasoani? (Tagai 2 Nofoaiga Tupu 20:3–13.) O le a le tali a le Alii i le talosaga? (Tagai 2 Nofoaiga Tupu 20:14–17. Manatua na oo mai lenei tala e ala mai i le perofeta o Iaaseelu.) O le a le fautuaga na tuuina atu e Iosefatu i ona tagata? (Tagai 2 Nofoaiga a Tupu 20:20.) I le avea ai ma Au Paia o Aso e Gata Ai, e faapefea ona toaitiiti i tatou i ona po nei e pei o tagata o sa Iuta i aso anamua? E faapefea ona fetai le fautuaga a Iosefatu mo i tatou?
- Na manatua e Iosefatu le faamautinoaga na tuuina mai e le perofeta o Iaaseelu e faapea o le taua a le Atua, o lea na ia tofia ai tagata e pepese ina ia faamanu atu i le Alii nai lo le tau. Ina ua amata ona latou pepese, sa puipuia i latou e le Atua e ala i le toe tau lava o e na o mai e osofa’i i latou ma latou faatamaiaina ai lava i latou (2 Nofoaiga a Tupu 20:21–24). E puipuia faapefea i tatou pe a tatou manatuaina ma usitai i upu a perofeta soifua?

- E ese mai lo Ierepoamo ma Reopoamo, o ē na taitaiina o la nuu e ifo i tupua, sa faatosinaina e Iosefatu le nuu o Iuta e faamaualalo ia i latou lava i luma o le Alii (2 Nofoaiga a Tupu 20:3–4). O a faaitaiga ua outou vaaia i faatosinaga a taitai amiotonu? O le a se mea e mafai ona tatou faia e fesoasoani ai ia i latou o loo tatou auauna atu i ai ina ia ola amiotonu?

Faaiuga

Ia molimau atu e uiga i le mana o lo o i ai i taitai e taitaiina ai tagata i le amioleaga po o le amiotonu. Ia toe faamanatu atu i tagata o le vasega lo tatou tiute-tauave o lo tatou taitai i o tatou valaauga i le ekalesia, i o tatou alalafaga, i le galuega, ma le aiga. Ia uunaiina tagata o le vasega ina ia avea ma ni taitai e ala i le auauna atu, faalagolago ma usiusitai i le Alii, ia faatuatua ia te ia, ia aoao atu mai tusitusiga paia, ma ia mulimuli i perofeta.

## Manatu Faaopoopo e Aoao Atu Ai

O mataupu o lo o taua i lalo e faaopoopo i le ootoga o le lesona fautuaina. Atonu e te manao e faaoga se tasi o nei manatu pe sili atu foi e avea o se vaega o le lesona.

### 1. Faatoilaloina o faatosinaga leaga a uo

- Sa vaeluaina le malo o Isaraelu ona sa filifili Reopoamo e mulimuli i le fautuaga le faautauta a e sa latou faifai mea faatasi (1 Tupu 12:9–16). E mafai faapefea ona tatou teena faaosoosoga e mulimuli i fautuaga valea mai a tatou uo?

Sa saunoa mai Elder Malcolm S. Jeppsen e faapea:

“E toatele outou . . . o le a faafetaia’i e se tasi po o nisi foi o a outou ‘uo’ i se taimi, o le a faaosoosoina e fai se mea e te iloa e le tatau . . .

O le a faapea atu i latou ua ta’u o au uo, ‘E leai se tasi na te iloa.’ ‘E le gata i lena, o le a ea se eseesega e maua ai?’”

“. . . tou te le tau teena a outou uo o loo sese i le ala; tou te le tau lafoai foi i latou mai le avea ai ma a tou uo. E mafai ona avea outou ma a latou uo e popole alofa, ma sauniuni e fesoasoani atu ia i latou pe afai ua saunia i latou tou te fesoasoani i ai. E mafai ona outou talanoa i ai ma uunai i latou ma tuuina atu i ai a outou molimau. Ia taitai i latou e ala i a outou faaitaiga.

“Ae aua lava nei taitaiina outou e au uo i le faia o se mea e le fiafia ai lo outou Tama o i le Lagi, o ē atonu o le a faapea atu, talu ai o outou o a latou uo, e tatau ona outou filifili pe o o latou ala po o le ala o le Alii.

“Afai e tupu mai lena mea, ia e filifili le ala o le Alii ma saili ni au uo fou” (Lipoti o le Konafesi Iulai, 1990, 59; po o le *Liahona*, Iulai 1990.)

### 2. O le Uiga o mea maualuluga ma tupua

O faamatalaga o lo o i lalo o le a fesoasoani ia te oe i le faamatalaina o le ifo i tupua e pei ona sa uunaia e Ierepoamo ma Reopoamo.

Nofoaga maualuluga (1 Tupu 12:31); o fata faitaulaga ia sa faia i tumutumu o mauga. Pe a ifo tagata i tupua, latou te faaoga sese nei fata faitaulaga ma faaoga e ifo ai i tupua.

Tupua (1 Tupu 14:15): O nofoaga e ifo ai i tupua ma o nisi taimi e faia ai e tagata ni amioga le mama.



### 3. “Tou te auauna ai i Atua na faia i lima o tagata” (Teuteronomie 4:28).

- Ina ua fausia e Ierepoamo ni tamai povi auro ma ifo i ai tagata i mea maualuga ma tupua, sa le usitai o ia ma ona tagata i lapataiga a Mose na tuuina mai muamua i le 500 tausaga ua mavae (Teuteronomie 4:25–28). O le a se mala sa latou fuafua e aumaia i o latou lava luga? O le a se mea na folafola mai pe afai latou te liliu atu i le Alii ae le o atua ese? (Tagai Teuteronomie 4:29–31).

### 4. Lesona faatatau i le taitaiga

Ia aumaia i le vasega ni seti se lua o fasi laupapa e tutusa lelei (po o nisi mea). Ia valaaulia ni tagata se toalua o le vasega e faia taga o le faamalamalama o lo o i lalo. Ia tuuina atu i tagata taitoatasi ia tofua ma le seti. Ia tofia le tasi tagata o le vasega e avea ma taitai ae avea le isi ma tagata e mulimuli i ai. Ia fefulitua a’i tagata ia e toalua o le vasega ina ia le mafai ona iloa atu poloka laupapa a le isi. Ia fausia e le taitai i se taimi vave lava se mea e faaaoga ai poloka laupapa ma ia tuuina atu faatonuga i le tagata e mulimuli ai i le ala e fausia ai se mea faapena. E le tatau i le tagata e mulimuli i le faatonuga ona tuuina atu ni fesili a o mulimuli o ia i faatonuga. E le tatau ona vaai le tasi i le tasi i ana poloka seia oo ina atoa le mea o lo o fai.

Pe a maea ona fausia lea mea e le tagata o lo o mulimuli i le faatonuga, ia talanoaina le taua i taitai o le tuuina atu o ni faatonuga manino ma ia faalogo le e mulimuli i ai. Afai e tutusa le mea sa fausia e le na mulimuli i faatonuga ma le mea sa fausia e le taitai, ia faamalo atu i ia tagata e toalua ma ia fai atu i isi tagata o le vasega e faamatala mai pe aisea na manuia ai a la taumafaiga. Afai e iu ane le faataitaiga e eseese mea na la faia, ona fai atu lea o fesili nei:

- Pe na mafai ona faamanino atili e le taitai faatonuga? Pe na mafai ea e le sa mulimuli i faatonuga ona faalogo i se tulaga e sili atu ona faateete? Pe mata e fesoasoani faapefea le faataga o le tagata na mulimuli i le faatonuga e maitau a o faia e le taitai le fausaga?
- Pe mafai faapefea ona tatou faatino le mea ua tatou aoaoina mai leni faamalamalama i o tatou valaauga i le ekalesia ma le aiga?

# “E Mulimuli i le Afi o le Leo Filemu ma le Itiiti”

Lesona  
28

1 Tupu 17–19

---

## Faamoemoega

Ia uunaiina tagata o le vasega ina ia faamuamua le Atua i o latou olaga ma ia maua se taitaiga ma se faamafanafanaga i upu a perofeta soifua faapea ma musumusuga a le Agaga Paia.

---

## Sauniuniga

1. Ia suesue ma le agaga tatalo i mau nei:
    - a. 1 Tupu 17. Ua faamauina e Elia le lagi ina ia aua nei toe timu, ua sola mai ia Aapo ma Isapela, ma ua tausia o ia e ala i se vavega i le vao (17:1–6). Ua auina atu e Ieova Elia i se fafine ua oti lana tane o le na ia tuuina atu ia te ia ni meaai ma le vai (17:7–16). Ua faatula'iina e Elia le tama tama a le fafine ua oti lana tane nai le oti (17:17–24).
    - e. 1 Tupu 18. Ina ua mavae le sili atu i le lua tausaga o oge, ua feiloai Elia ma Aapo ma ua tuuina atu e ia se lu'i i faitaulaga a Paala ina ia valaau atu ia pau ifo se afi mai le lagi e faamuina ai la latou taulaga (18:1–2, 17–24). Ua toilalo faitaulaga a Paala ia latou taumafaiga, a ua tatalo Elia ma ua auina ifo e Ieova se afi mai le lagi e faamuina ai le taulaga ua ia saunia (18:25–40). Ua tatalo Elia ina ia faamutaina le oge, ma ua auina mai e Ieova le timu (18:41–46).
    - i. 1 Tupu 19. Ua taumafai Isapela e fasioti Elia (19:1–2). Ua sola Elia i le vao ma ua fagaina e se agelu (19:3–8). Ua alu atu Elia i Horepa, o le mea ua faamafanafanaina ai o ia e le Agaga Paia ma ua faatonuina ina ia faaauau pea ona faia o le galuega a le Atua (19:9–19).
  2. Ia fai atu i se tagata o le vasega ina ia saunia e tuuina mai se lipoti puupuu e uiga i le fetaitaiga a Elia ma faitaulaga a Paala (1 Tupu 18:17–40).
- 

## Faalautelega Fautuaina o le Lesona

Gaoioiga e  
Faatosina Mai Ai

Atonu e te manao e faaoga le gaoioiga o lo o i lalo (po o sa oe lava gaoioiga) e amata ai le lesona.

Ia faamatala atu le tala lea sa ta'ua e Elder Thomas S. Monson:

“Na fanau [Iose Kasia] i se tulaga mativa ae na faafaileleina i le faatuatua, ma na saunia ai o ia mo se misiona. Sa ou i ai i le aso na maua ai lona tusi e fautuaina ai lona alu i se misiona. Na i ai i lea tusi se faaupuga faapenei: “O le a galue auauna atu le uso o Kasia i se osigataulaga tele a lona aiga, aua e na o ia o loo faalagolago i ai le tele o le tausiga o lona aiga. E na o le tasi lava lana meatotino—o lana faaputuga faailoga tusi e faapelepele lava i ai—a o lea o loo naunau e faatauina atu, pe afai e tatau ai, e fesoasoani e faatupeina ai lana misiona.

“Na matua faalologo le faafofoga a Peresitene Kimball a o faituina atu lenei faamatalaga ia te ia, ona ia tali mai lea faapea: ‘Fai i ai e faatau atu lana faaputuga faailoga tusi. O lena osigataulaga o le a avea ma faamanuiaga ia te ia.’”

Ia fai atu i tagata o le vasega e mafaufau po o le a se mea latou te fai pe afai e talosagaina i latou e tuuina atu mea uma ua ia te i latou ina ia auuina atu ai i le Alii. Ona faaaau ai lea o le tala:

“Ona emoemo lea o ona fofoga, ma faapea mai ma le laufofoga fiafia, ‘O masina taitasi i ofisa tutotonu o le Ekalesia, tatou te mauaina ai le faitau afe o tusi mai vaega uma o le lalolagi. Vaai, ia teuina uma nei faailoga tusi ma tuuina atu ia Iose pe a maea lana misiona. O le a na ia mauaina, e aunoa ma se totogi, le faa-putuga faailoga tusi e aupito sili ona matagofie nai lo se isi lava alii talavou i Mekisiko.’” (Lipoti o le Konafesi, Oke. 1978; po o le *Liahona*, Fepuari 1979).

Ia faamatala atu afai tatou te faamuamua mea a le Atua i o tatou olaga, o tau i tatou te maua e sili mamao atu nai lo soo se mea tatou te maua e faitaulaga ai a o tatou ola. O lenei lesona o lo o faamatala ai e uiga i ni tagata se toalua—o Elia ma le fafine Sarefata ua oti lana tane—o e na maua faamanuiaga silisili ona ua la naunau e mulimuli i le Atua e ui lava ina sa faigata ona faia lea mea.

Mau Talanoaina  
ma le Faaogaina

A o e aoaoina atu nei mau, ia talanoaina pe faapefea ona faaoga i le olaga i aso taitasi. Uunai tamaiti o le vasega e faamatala ni aafiaga e faatatau i mataupu ua taua i le mau.

Ina ua mavae ona taitaiina e Ierepoamo le malo o Isaraelu i le ifo i tupua, sa faaumatia o ia ma e na tupuga mai ia te ia. Sa sosoo ai ma se isi vaega o tupu e ifo i tupua. Mai i na taitai uma, sa sili ai lava le tupu o Aapo o le “ua sili lava mea na faia e Aapo e faaonono ai ia Ieova le Atua o Isaraelu i tupu uma o Isaraelu na muamua ia te ia” (1 Tupu 16:33). Sa faaipoipo o ia ia Iesepela, ma mulimuli i faiga a lea fafine o le tapuai ia Paala, ma sa uunaiina e ia ona tagata e mulimuli atu ia te ia e tapuai atu i atua ese. Sa tuuina atu e le perofeta o Elia ni upu lapatai ia Aapo ma lona malo.

### **1. Ua faamauina e Elia le lagi, ua tausia i se vavega, ma ua faatuina e ia le tama tama a se fafine ua oti lana tane mai le oti.**

Ia aoao atu ma talanoaina le 1 Tupu 17.

- Ona o le amioleaga o Aapo ma ia tagata, o le mea lea na faapea atu ai Elia, “e leai se sau po o se timu i nisi tausaga *seiloga ou te fai atu*” (1 Tupu 17:1). Aisea na mafai ai e Elia ona fai lea faamatalaga? (Atonu e te manao e faatusatusa Elia ia Nifae, le atalii o Helamana, o le na tuuina atu i ai lea lava mana e tasi. O pogai sa i ai i le Alii na faatagaina ai mea uma ina ia faia e tusa ai ma upu a Nifae o lo o maua i le Helamana 10:4–5).
- Ina ua uma ona fai atu Elia e le toe i ai se timu e pau i le malo, sa poloaiina o ia e Ieova ina ia sola ese. Pe sa faapefea ona tali atu Elia i le poloaiga a Ieova? (Tagai 1 Tupu 17:2–5.) O le a se mea e mafai ona tatou aoao mai le tali atu a Elia?

Sa saunoa mai Elder Gordon B. Hinckley e faapea:

“Sa ou maua se faamalosiaga mai le faamatalaga faigofie lea e uiga i le Perofeta o Elia, lea na lapataia le Tupu o Aapo e uiga i le la mala ma le oge o le a oo mai i le laueleele. Ae sa aamu i ai Aapo. Ma sa fetalai atu le Alii ia Elia ia malaga atu o ia ma lafi i le alia o Kiriata, ina ia mafai ai e ia ona maua le vai e inu ai i lea mea, ma o le a fafagaina ai o ia i lea mea e oreva. Ma ua faapea ona faamauina

i le Tusi Paia lenei faamatalaga faigofie ma le taua: 'Ona alu ai lea o ia ma na faia e tusa ma le afioga a Ieova.' (1 Tupu 17:5.)

“Sa le i finau. Sa lei faia se ‘alofaga. Sa le taumafai e faafiti. Ae sa tulai Elia ma faia e tusa ma le afioga a Ieova. Ma sa faasaoina o ia mai mala matautia na oo ia te i latou o e na aamu ma finauvale ma tetee” (Lipoti Konafesi, *O le Liahona*, Novema, 1972, 11–12).

- Na faapefea ona faasaoina le ola o Elia i le vao ina ua amata le lamala? (Tagai 1 Tupu 17:4–6.) O a ni tulaga na oo ia te oe na tausia ai e Ieova oe i le faaletino po o le faaleagaga?
- O ai sa saunia e Ieova e fesoasoani atu ia Elia ina ua matutu le alia? (Tagai 1 Tupu 17:7–13.) O le a se mea e mafai ona aoao mai ia i tatou e uiga i le ala e fesoasoani ai Ieova ia i latou e manaomia le fesoasoani? (Ia faamatala atu e masani ona fesoasoani Ieova i e manaomia le fesoasoani e ala i auauunaga a isi tagata.) Ua e vaaia faapefea le Alii o fesoasoani ia i latou o loo manaomia le fesoasoani e ala i auauunaga a isi tagata? O a mea e mafai ona tatou faia e fesoasoani ai i isi o loo manaomia le fesoasoani?

Sa saunoa mai Elder Jeffrey R. Holland: “Ma ou te iloa e mafai e i tatou taitoatasi ona faia o se mea i ai, ae peitai e foliga mai o lena gaoioiga e laitiiti. E mafai ona tatou totogiina se sefuluai atoa ma tuuina atu a tatou taulaga anapogi ma foai ma le lofofuatiaifo . . . Ma e mafai ona tatou vaavaai atu mo nisi auala e totogi atu ai. E mafai ona tatou ofoina atu o tatou taimi pe afai ua leai ni a tatou tupe mo tagata matitiva, ma e mafai ona tatou tuuina atu le alofa pe afai e le lava se taimi. E mafai ona tatou tufatufa atu mea ua tatou mauaina ma faatuatua i le Atua o le a le uma le fagu suauu” (Lipoti o le Konafesi, *Aperila*, 1996, 41; po o le *Liahona*, Iulai, 1996, 36).

- Sa faapefea ona tali atu le fafine ua oti lana tane i le talosaga a Elia i le fia maua o se vai e inu ai? (Tagai 1 Tupu 17:10–11. Sa alu atu loa lava e aunoa ma le faatuai.) O le a le mea na fai mai ai le fafine ua oti lana tane ina ua talosaga atu Elia mo se meaai? (Tagai 1 Tupu 17:11–12.) O le a le mea na folafola atu e Elia ia te ia? (Tagai 1 Tupu 17:13–14.) O le a se mea sa faia e le fafine ua oti lana tane i lea taimi? (Tagai 1 Tupu 17:15.) O le a se mea ua tatou aoao mai i le tali a le fafine ua oti lana tane?

Sa saunoa mai Elder Holland o le tali a le fafine ua oti lana tane ina ua talosaga atu Elia ia te ia mo se meaai, o se “faailoga o le faatuatua —ua maeu lona tele, e tusa ma nei tulaga, e pei o isi ou te iloaina i tusitusiga paia. . . . Atonu e le i mautinoa pe o le a le tau o lona faatuatua . . . , muamua na ia tuuina atu lana potoi areto na totoe ia Elia, o le mea moni na talitonu ana fai e le lava se areto e totoe, o le mea sili semanu e oti i laua ma lana tama ona o se galuega alofa mama atoatoa” (Lipoti o le Konafesi, *Aperila*, 1996, 39; po o le *Liahona*, Iulai, 1996, 34).

- Aisea e te manatu ai sa poloaiina e le Atua le fafine ua oti lana tane ina ia fafaga ia Elia i se taimi na itiiti ai mea na ia maua? O le a se faamanuiaga na maua e le fafine ua oti lana tane ona o lona usiusitai? (Tagai 1 Tupu 17:16.) O a nisi o mea ua talosagaina i tatou e le Atua e tuuina atu atonu e faigata? O a ni auala ua faamanuiaina ai i tatou pe afai tatou te faamuamua le Atua, ma faia mea e finagalo ai tusa lava pe faigata?

Sa aoao mai Peresitene Ezra Taft Benson:

“Pe a tatou faamuamua le Atua, o le a sologa lelei isi mea uma pe aveesea foi mai i o tatou olaga. O le a pulea e lo tatou alofa i le Alii mea tatou te faamemelo i ai, o mea tatou te faaalu i ai o tatou taimi, o mea tatou te filifili e fai. . . .

“ Ia faamanuia mai le Atua ina ia tatou faamuamua [o ia] ona, selesele ai lea o le filemu i lenei olaga ma le ola e faavavau faatasi ai ma le olioli atoatoa i le olaga a sau” (Lipoti o le Konafesi Aperila, 1988, 3, 6 po o le *Liahona*, Iulai, 1988, 6–7).

- O le a le mea na fai e Elia ina ua ma’i le tama a le fafine ua oti lana tane ma ua oti? (Tagai 1 Tupu 17:17–22.) O le mana o ai na mafai ai e Elia ona toe faa-ola le tama a le fafine ua oti lana tane? Pe ua faapefea ona faamanuiaina lou olaga ona o le mana o le perisitua?

## 2. Ua tuuina atu e Elia se lu’i i faitaulaga a Paala ma ua tatala le lagi mo se timu.

Ia aoao atu ma talanoaina le 1 Tupu 18:

- I le tausaga lona tolu o le oge, sa poloaiina e le Alii Elia, “Ina alu ia oe, ma faa-ali oe ia Aapo, ou te faatotoina foi le ua i le eleele” (1 Tupu 18:1). O le a se mea na faia e Aapo ina ua vaai atu ia Elia? (Tagai 1 Tupu 18:17. Ia faamalalama-lama atu e faapea sa tuuaina e Aapo Elia ona o le oge.) O le a le mafuaaga moni o le oge? (Tagai 1 Tupu 18:18.)
- E pei ona talosagaina e Elia, sa faapotopoto e Aapo tagata uma o Isaraelu ma faitaulaga e 850 i le mauga o Karamelu (1 Tupu 18:19–20). Ina ua faapotopoto mai tagata e faalogologo i le lauga a Elia, sa fai atu Elia ia te i latou, “Pe tou te faaletonu i manatu e lua seia afea?” (1 Tupu 18:21). O le a sou manatu i le uiga o le faaletonu i manatu e lua? Pe ua faapefea ona tatou faaletonu i manatu e lua i nisi taimi? (Tagai Mataio 6:24. Ia faamalalama atu o le upu *mamone* e faatatau lea i le lalolagi.)

Sa saunoa mai Elder Neal A. Maxwell: “O upu faagaetia loto a perofeta eseese . . . ua uunaiina ai i tatou e filifili, ia faia se tonu, ae le o le faaletonu. . . . O le savali a Elia e faatatau tonu lava ia i tatou i aso nei, aua e tatau i tagata uma ona filifili i le va o atua o lenei lalolagi ma le Atua e faavavau” (*That My Family Should Partake* [1974], 22).

Ia tuuina mai e le tagata o le vasega na tofia se lipoti puupuu e uiga i le faafesa-gaiga a Elia ma faitaulaga a Paala (1 Tupu 18:17–40).

- O le a le faamoemoega sa i ai ia Elia i le tuuina atu o se lu’i i faitaulaga a Paala? (Tagai 1 Tupu 18:36–37.) O a ni uiga na faaalua e tagata ina ua faaalua e le Alii lona mana? (Tagai 1 Tupu 18:38–39.) Pe sa faapefea ona faamanuiaina i latou ona o lo latou iloa o Ieova ma lona mana? (Tagai 1 Tupu 18:45.) Pe mafai faapefea ona tatou faaalua atoatoa le Alii ma lona mana? (Tagai 1 Tesalonia 5:16–18; Alema 34:38; Moronae 7:33–39.)

## 3. Ua faamafanafanaina Elia e le Agaga Paia ma ua faatonuina e faaauau le galuega a le Atua.

Ia aoao atu ma talanoaina le 1 Tupu 19.

Sa saili Iesepela e fasioti ia Elia ina ua ita i le manumalo o Elia i faitaulaga a Paala. Ua sola Elia i le vao ma ua alaga atu ia Ieova, ua faapea atu, “Ieova e, soia; ia e aveese lo’u ola” (1 Tupu 19:4). Ua faamanuia Ieova ia Elia e ala i le auina mai o se agelu ma vai ma ni meaai. Atonu e te manao e faamalamalama atu e oo lava i perofeta e mafai ona oo ia i latou le lotovaivai ma e manaomia le faamafanafana ma le taitaiga ua na o le Atua lava e maua mai ai.

- Aisea na oo ai ia Elia le lotovaivai? (Tagai 1 Tupu 19:10, 14. E tusa lava po o a tali a tagata e tali atu ai i le ofoofogia o le faaalua e le Atua o lona mana, ae sa lagona e Elia ua na o ia lava le Isaraelu ua totoe o loo tapuai i le Atua moni.) O le a se mea na ia fai e maua ai le filemu? (Tagai 1 Tupu 19:4, 8. Sa tatalo o ia ma anapogi.) O le a se mea e mafai ona tatou aoao mai ai e uiga i le mea na oo ia Elia e fesoasoani ai ia i tatou pe a tatou lagona le faavaivai ma le faanoanoa?
- Pe sa faapefea ona faamafanafana e le Atua Elia i luga o le Mauga o Horepa? (Tagai 1 Tupu 19:9–13.) O le a se mea tatou te aoao mai lenei mea e uiga i le auala e fesootai ai le Atua ma i tatou? O le a se mea ua outou manatu ai e fesootai le Atua ma i tatou i le tele o taimi e ala i le “leo itiiti” o le Agaga Paia ae le o le faaalua o le mana i se tulaga leotele ma le ofoofogia? Pe mafai faapefea ona tatou iloa musumusuga a le Agaga Paia?

Ina ua fesili se tagata faasalalau ia Peresitene Hinckley pe faapefea ona fesootai o ia ma le Atua, sa tali atu le perofeta, “ou te manatu o le auala sili e mafai ona ou faamatalaina ai lea mea o le faatusa lea i le mea na oo ia Elia e pei ona faamatalaina i le tusi o le Tupu Muamua. Sa fai atu Elia i le Alii, ma sa agi mai se matagi, o se matagi tele lava, ma sa le i ai le Alii i le matagi. Sa i ai se mafuie, ma sa le i ai le Alii i le mafuie. Sa i ai foi se afi, ae sa le i ai le Alii i le afi. Ma ina ua mavae le afi sa oo mai se leo itiiti, ua ou faamatalaina o musumusuga a le Agaga” (Lipoti o le Konafesi, Oketopa, 1996, 71; po o le *Liahona*, Ianuari, 1997).

Sa aoao mai Peresitene Ezra Taft Benson e faapea: “Pe e te faatali ea mo sina taimi e faalogologo atu ai i musumusuga a le Agaga? E masani ona oo mai tali i fesili i se leo itiiti ma e faamalamalamaina i o tatou lagona loloto. Ou te tau atu ia te outou o le a mafai ona outou iloa le finagalo o le Atua e uiga ia te outou lava, pe a faaaogaina le taimi e tatalo atu ai ma faalogologo atu ai” (Lipoti o le Konafesi Oketopa, 1977, 46; po o le *Liahona*, Mati, 1978, 51).

- Ua le gata ina avea ma fesoasoani, a ua avea foi le Agaga Paia ma se faiaoga (Ioane 14:26; 2 Nifae 32:5). O le a le mea sa faatonuina e le Alii—e ala i le Agaga Paia—Elia e fai? (Tagai 1 Tupu 19:15–16.) Pe mafai faapefea ona avea le auauna atu i le Alii ma mea e fesoasoani ai ia i tatou pe a oo ia i tatou le faavaivai?
- O le tasi o auala sa faamafanafana ai e Ieova Elia o le ta’u atu lea ia te ia o lo o i ai le tele o Isaraelu e le i ifo ia Paala (1 Tupu 19:18). Pe mafai faapefea ona avea le faaumea ma isi tagata faatuatua o le Au Paia o Aso e Gata Ai ma mea e faamafanafana ai i tatou? O a faatosinaga o lo o siomia ai oe o lo o fesoasoani ia te oe ina ia iloa ai e le o tuua na o oe? O le a se mea e mafai ona e faia e fesoasoani atu ai i isi pe a maua e i latou le lagona o le tuua na o i latou?

### Manatu Faaopoopo e Aoao Atu Ai

O mataupu o lo o taua i lalo e faaopoopo i le ootoga o le lesona fautuaina. Atonu e te manao e faaoga se tasi o nei manatu pe sili atu foi e avea o se vaega o le lesona.

#### O le Agaga o Elia

E masani ona talanoa le Au Paia o Aso e Gata Ai e uiga i le Agaga o Elia. O leni fuaitau e faatatau lea i le galuega tatou te faia “e faaliliuina ai loto o tama i fanau ma fanau i tama” (MFF 110:15). O leni galuega e aofia ai le sailiga o talafaasolopito o le aiga faapea ma galuega i le malumalu mo e o ola ma e o oti. Ua tatou ta’ua lea mea o le Agaga o Elia ona sa toefuatai mai e Elia ki o le mana faamau o le Perisitua ia Iosefa Samita (MFF 110:13–16). O leni mana, e mafai ona faia ai sauniga o faamauga e fusia ai faatasi aiga mo le faavavau.

Sa saunoa mai Iosefa Samita e faapea:

“O le mana o le agaga ma le valaauga o Elia, ia maua e outou o le mana e umia ai ki o faaaliga, sauniga, ma afioga a le Atua, mana ma faaeega paia o le atoaga o le Perisitua Mekisateko ma le malo o le Atua i le lalolagi; ma ia maua, ma faia sauniga uma e faatatau i le malo o le Atua, e oo lava i le faaliliuina o loto o tama i fanau, ma fanau i tama, e oo lava ia i latou o e ua i le lagi. . . .

“Ou te manao ina ia outou malamalama i leni mea, aua e taua, ma afai ua outou maua, o le agaga lea o Elia, o lo tatou togiolaina o o tatou tagata oti, ma faasosoo atu i tatou lava i lo tatou Tama oi le Lagi, ma faamau o tatou tagata oti ina ia omai i le uluai toetutu; ma o iinei tatou te mananao ai i le mana o Elia e faamau ai i latou o e o lo o nonofo i le lalolagi ia i latou o e ua i le lagi. O le mana leni o Elia ma ki o le malo o Ieova” (*Teachings of the Prophet Joseph Smith*, sel. Joseph Fielding Smith [1976], 337–38).

# “Ua Ia Ava’e Foi . . . le Ofu Tele o Elia”

Lesona  
**29**

2 Tupu 2:5–6

---

## Faamoemoega

Ina ia fesoasoani i tagata o le vasega ia malamalama pe faapefea ona tuu faasolo mai le pule (ofutele) mai le tasi perofeta i le isi, ina ia uunaiina ai i latou e muli-muli i upu a perofeta, ma ia tautino atu ai ia i latou o le mana o le Atua e sili atu lea ona tele nai lo soo se tasi lava mana.

---

## Sauniuniga

1. Ia suesue ma le agaga tatalo i mau nei:
  - a. 2 Tupu 1:1–18. Ua saunia e Elia ia Elisaia e avea ma perofeta fou (2:1–10). Ua ave a’e Elia i le lagi. Ua tago Elisaia i le ofu tele o Elia ma ua avea ma perofeta (2:11–15). Ua saili tagata e toalima gafulu mo Elia mo le tolu aso e ui lava ina sa fautua atu Elisaia ia i latou e le tatau ona latou faia lea mea (2:16–18).
  - e. 2 Tupu 5. Ua faamalolo e Elisaia Naamanu mai le lepela (5:1–14). Ua vivii atu Naamanu i le Atua ma ua ofoina atu ia Elisaia se tau, ma o lea tau na teena e Elisaia (5:15–19).
  - i. 2 Tupu 6:8–18. Ua taitaiina e Elisaia le tupu o Isaraelu i se taua ma Suria (6:8–10). Ua poloaiina e le tupu o Suria ona tagata ina ia pu’e faatagata o tauaina Elisaia, ma ua siomia e le vaegaau le aai o Totana (6:11–14). Ona o lona le fefe, ua tatalo ai Elisaia, ma ua faaalua mai e le Alii se mauga ua tumu i Solofanua ma kariota afi, ona ia faatauasoina ai lea o le vaegaau a Suria (6:15–18).
2. Afai e te faaaogaina le gaoioiga e faatosina mai ai, ia aumai se fasi ie e faaoga e fai ma ofu tele.

---

## Faalautelega Fautuaina o le Lesona

### Gaoioiga e Faatosina Mai Ai

Atonu e te manao e faaoga gaoioiga o lo o i lalo (po o sa oe lava gaoioiga) e amata ai le lesona.

Faatautau se fasi ie i ou tauau (po o tauau o se tagata o le vasega). Ia faamatala atu sa faaoga e le perofeta o Elia se ofu tele. Ua tatou le iloa tonu po o a foliga na foliga ai lea ofu tele, ae foliga manino mai o se ofu e fai i le ie. O le tuuina atu o le ofu mai ia Elia ia Elisaia o se faailoga lea o le tuuina atu o le pule faape-rofeta ia Elia.

I ona po nei e masani ona tatou taua se “ofu tele” o le pule e maua e le perofeta pe a faauuina o ia ma faamanuia. E ui lava ina le faaoga e se perofeta i aso nei se ofutele po o se fasi ie, a ua tuuina e le Atua ki o le perisitua ia te ia. O nei ki e tuuina atu ai ia te ia le mana e galue ai i le suafa o le Atua i le avea ma taitai o le ekalesia i le lalolagi. Pe a maliu se perofeta, e tuuina atu lena pule i le perofeta fou.



A o e aoaoina atu nei mau, ia talanoaina pe faapefea ona faaaoga i le olaga i aso taitasi. Uunai tamaiti o le vasega e faamatala ni aafiaga e faatatau i mataupu ua taua i le mau.

### 1. Ua suitulaga Elisaia ia Elia i le avea ma perofeta.

Ia aoao atu ma talanoaina le 2 Tupu 2:1–18.

- O le a se faia i le va o Elia ma Elisaia? (Tagai 2 Tupu 2:2–10.) Pe aisea tou te manatu ai sa naunau tele Elisaia e o faatasi ma Elia? O le a le mea na fai e Elisaia ina ua ave a'e Elia i le lagi? (Tagai 2 Tupu 2:11–13. Afai sa e le faaaogaina le gaoioiga e faatosina mai ai, ia toe ta'ua ina ia faamatala ai po o le a le ofu tele o Elia ma po o le a foi lona uiga.)
- O ai o lo o ua i ai le ofu tele o le perofeta i aso nei? (O le Peresitene o lo o i ai nei o le Ekalesia.) Pe ua faapefea ona tuuina atu lenei ofu tele pe a maliu le perofeta?

Sa faamatala mai e Peresitene Iosefa Filitia Samita e faapea:

“E leai se mea lilo o lo o i ai e uiga i le filifilia o lē e suitulaga i le Peresitene o le Ekalesia. Sa ta'u mai e le Alii lenei mea i aso lava la ua leva, ma o le taimi lava lea e avea ai le Aposetolo Sinia ma taitai pule faamalumalu o le Ekalesia, ma e taliaina o ia i lea tulaga e le Au Fono a le Toasefululua ma e avea i latou ma tagata pule faamalumalu o le Ekalesia pe afai o le a leai se Au Peresitene Sili o le Ekalesia. E le filifilia le Peresitene, ae tatau ona le gata ina taliaina o ia e le au uso o le Au Fono ae faapea foi ma tagata o le ekalesia” (*Doctrines of Salvation*, comp. Bruce R. McConkie 3vols. [1954–56], 3:156).

Sa faamatala mai e Peresitene Gordon B. Hinckley le auala e mulimuli ai i lenei faiga ina ua faauuina ma faamanuiaina o ia e avea ma perofeta ma Peresitene o le Ekalesia ina ua mavae le maliu o Peresitene Howard W. Hunter:

“Ina ua maliu Peresitene Hunter, na soloia le Au Peresitene Sili. O le uso o Monson ma a'u, o e sa avea ma ona fesoasoani, sa toe foi atu i o maua tulaga i le Korama a le Toasefululua, lea na avea ma pule faamalumalu o le Ekalesia.

“[I ni nai aso mulimuli ane] na faapotopoto uma ai Aposetolo na faauuina o lo o soifua i le agaga o le anapogi ma le tatalo i le potu i luga o le malumalu. O iina na matou usuina ai se viiga paia ma tatalo faatasi ai. Sa matou aai ai i le faamanatuga o le talisuaga a le Alii, na faafouina ai i lena faatusa paia, le tautinoga, o a matou feagaiga na matou faia ma la o lē ua avea ma o tatou Togiola paia. Ona toe faatulagaina ai lea o le Au Peresitene Sili, e mulimuli lava i le ala ua uma ona faavaeina mai i tupulaga ua mavae [o loo faamalamalamaina lenei mea i le saunoaga a Peresitene Iosefa Filitia Samita o loo i luga atu]. Sa leai ni faiga faatosina po o nisi na tauva i le tofi, leai se finauga, leai foi se tasi na manao mo le tofi. Sa filemu, ma paia, ma faigofie lea faatulagaga. Ma sa faia lava e tusa ai ma le ala na faavaeina e le Alii lava ia” (Lipoti o le Konafesi, Aperila, 1995. 92; po *O le Liahona*, Iulai, 1995, 76).

Atonu e te manao e faamalamalama atu e pei lava ona faia anamua, sa tuuina atu e le Faaola ki o le Perisitua i Aposetolo taitasi o Aso e Gata Ai. Ae ui i lea, ua na o le Peresitene lava o le Ekalesia, o le ua avea ma Aposetolo sinia soifua, e mafai ona ia faaaogaina nei ki (pe faatagaina isi e faaaoga) e fai ma sui o le Ekalesia atoa (Tagai MFF 132:7).

- O le a se uiga sa faaalua e tagata ina ua latou vaai atu ua faia e Elisaia le vavega sa fai e Elia o le vaeluaina lea o le vai o Ioritana? (Tagai 2 Tupu 2:14–15.) Aisea ua taua ai lo tatou talia loa lava ma le lagolagoina o se Peresitene fou faatoa faauu o le Ekalesia? (Tagai MFF 43:2–3, 7.)
- O le taimi lava na ave a'e ai Elia i le lagi, sa mananao tagata e auina atu le 50 tagata malolosi ia te ia. O le a le mea sa tau atu e Elisaia i tagata? (Tagai 2 Tupu 2:16.) O le a le tali a tagata e tusa ma le tali a Elia? (Tagai 2 Tupu 2:17. Sa talosaga i latou ia Elisaia seia oo lava ina faatagaina e ia tagata e o.)
- O le a le mea na fai atu ai Elisaia i tagata ina ua toe fo'i mai le 50 tagata e aunoa ma le maua o Elia? (Tagai 2 Tupu 2:18.) O le a se mea e mafai ona tatou aoaoina mai le mea na oo i ai le 50 tagata? (E tataua ona tatou mulimuli i le fautuaga a le Perofeta i le taimi muamua lava tatou te faalogoina ai.) Pe aisea tatou te faatali ai i nisi taimi se i toe saunoa mai perofeta i la latou fautuaga ona tatou faatoa mulimuli ai lea? O le a se fautuaga ua tuuina mai e taitai o le Ekalesia ia i tatou i tausaga faatoa mavae atu nei? Pe ua faapefea ona faamanuina oe ona o lou mulimuli i lenei fautuaga?

## 2. Ua faamalolo e Elisaia Naamanu mai le lepela.

Ia aoao atu ma talanoaina le 2 Tupu 5.

- O ai Naamanu ma o le a le mea sa mafatia ai? (Tagai 2 Tupu 5:1.) Aisea na alu atu ai o ia ia Elisaia? (Tagai 2 Tupu 5:2–9.) O le a le mea na ta'u atu e le aveafeau a Elisaia ia Naamanu e fai ina ia faamaloloina ai? (Tagai 2 Tupu 5:10.) Aisea na musu ai Naamanu i le taimi muamua e mulimuli i faatonuga a Elisaia? (Tagai 2 Tupu 5:11–12.)
- Pe sa faapefea ona faatalitonu e auauna a Naamanu o ia ina ia faia le mea na ta'u atu e Elisaia ia te ia e fai? (Tagai 2 Tupu 5:13.) O le a le mea na tupu ina ua tofua faafitu Naamanu i le vaitafe o le Ioritana? (Tagai 2 Tupu 5:14.)
- O le a se mea e mafai ona aoao mai e le tala ia Naamanu ia i tatou e uiga i le mulimuli i fautuaga a le Perofeta—e tusa lava pe tatou te le fialia i ai pe malamalama ai po o le faatatau foi i mea laiti ma le faigofie? O a nisi o mea laiti ma le faigofie ua faatonuina i tatou e fai e perofeta po o isi taitai o le Ekalesia? Aisea ua faigata ai ona faataunuu i nisi taimi nei mea? Pe mafai faapefea ona tatou faaopoopoina lo tatou naunau e mulimuli i fautuaga a taitai o le Ekalesia?

Sa fesili mai Elder Rex D. Pinegar, “Pe tatou te le pei ea o Naamanu i nisi o taimi, e faia na o mea e taua ae le amanaia nai mea faatauavaa e faaono suia ai o tatou olaga ma faamaloloina ai o tatou tulaga pagatia?” (Lipoti o le Konafesi, Oketopa 1994, 106; po *O le Liahona*, Ianuari, 1995, 95).

Ina ua uma ona faamatala atu le tala ia Naamanu, sa saunoa mai Elder Gordon B. Hinckley: “O le ala o le talalelei o se ala faigofie. Atonu o nisi o tulaga manaomia e foliga mai ia te oe o ni mataupu mo vasega laiti ma o ni mea faatauavaa. Aua nei e manatu faatauavaa i ai. Ia ia te outou le lotomauualalo ma savavali ma le usiusitai. Ou te folafola atu o tauai o lo o mulimuli mai ai o le a outou oo ai i se tulaga ofoofogia ma le faamalieina” (Lipoti o le Konafesi, Oketopa, 1976, 143; po o *O le Liahona*, Fepuari, 1977, 89).

- O le a le mea na iloa e Naamanu i le faamaloloina o ia? (Tagai 2 Tupu 5:15.) Pe ua faapefea ona faamalosia lau molimau i le ususitai i nai mea faatauvaavaa?
- O le a le mea sa taumafai Naamanu e tuuina atu ia Elisaia ina ua faamaloloina? (Tagai 2 Tupu 5:15.) O le a le pogai ua e manatu ai na musu Elisaia e talia le ofo a Naamanu? Aisea e taua ai le auauna atu e aunoa ma le manatu mamafa i tau faalelalolagi?

### 3. Ua taitai e Elisaia Isaraelu i se taua ma Suria.

Ia aoao atu ma talanoaina le 2 Tupu 6:8–18.

- Pe sa faapefea ona fesoasoani atu Elisaia i le tupu o Isaraelu i le taua faasaga ia Suria? (Tagai 2 Tupu 6:8–10.) O le a le mea na fai e le tupu o Suria ina ua iloa e ia le mea na fai e Elisaia? (Tagai 2 Tupu 6:11–14.)
- O le a se uiga faaalua i le auauna a Elisaia ina ua vaai atu o ia i solofanua ma kariota a Suria ua siomia ai le aai? (Tagai 2 Tupu 6:15.) O le a le tali na tuuina atu e Elisaia? (Tagai 2 Tupu 6:16.) O le a le uiga o le saunoaga a Elisaia ina ua ia ta’u atu i ana auauna e faapea, “E toatele ua ia i tatou i e ua ia te i latou?” (2 Tupu 6:16). Pe faapefea ona e iloa le sa’o pea o le faamatalaga a Elisaia i aso nei?

- O a ni tulaga o ona po nei atonu e taitaiina ai nisi o i tatou e talitonu ua leai so tatou aoga i le tetele atu i mea leaga o le lalolagi? Pe mafai faapefea ona fesoasoani mai ia i tatou a o tatou tau faasaga atu i nei mea leaga le faamatalaga faatoafilemu loto e faapea “e toatele ua ia te i tatou i e ua ia te i latou”?

Sa saunoa mai Elder Dallin H. Oaks: “A o ou faitau i lenei tala matagofie a o aveva ma se tamaitiiti, sa ou taumafai i taimi uma ina ia pei o le auauna talavou a Elisaia. Sa ou mafaufau, afai e siomia a’u i se taimi e mea leaga a o ou i ai i le galuega a le Alii, ou te faamoemoe o le a faamatala e le Alii o’u mata ma tuuina mai ia te a’u le faatuatua e malamalama ai e faapea afai tatou te i ai i le galuega a le Alii, o i latou o e ua ia i tatou e sili atu ona malolosi nai lo i latou o e faasagatau mai” (Lipoti o le Konafesi, Oketopa, 1992, 54; po o *O le Liahona*, Ianuari, 1993).

- Pe mafai faapefea ona fesoasoani mai ia i tatou a o tatou avatu le talalelei i tagata uma le faamatalaga o le faatoafilemu loto e faapea “e toatele ua ia te i tatou i e ua ia te i latou” (Tagai MFF 84:87–88.)

Sa saunoa mai Peresitene Gordon B. Hinckley: “E le i taunuu ona tatou avatu o le talalelei i atunuu, ma ituaiga, ma gagana, ma tagata uma. A e ua tatou faia ni laa tetele. Ua tatou o atu i soo se mea ua faatagaina ai tatou. O le Atua lava ua tautai, ma o le a tatalaina lava faitotoa e Lona mana e tusa ma Lona finalo paia. Ou te tautino atu lena mea. Ua ou mautinoa lena mea” (Lipoti o le Konafesi, Oketopa, 1995, 93; po o *O le Liahona*, Ianuari, 1996, 84).

- O le a le tatalo a Elisaia e uiga i lana auauna? (Tagai 2 Tupu 6:17.) Muamua lava, aisea na le iloa atu ai e le auauna le mauga ua tumu i solofanua ma kariota afi sa auina mai e le Atua? O le a se mea e mafai ona tatou fai e pupula ai atili o tatou mata i le mana o le Atua ua faaalua i o tatou lava olaga ma le lalolagi?

Faaiuga

Ia molimau atu o le Peresitene o le Ekalesia o se perofeta a le Atua. Ia uunaiina tagata o le vasega ina ia lagolagoina taitai fou o le ekalesia ma ia mulimuli i le fautuaga a perofeta. Ia molimau atu o le mana o le Atua e sili atu ona tele nai lo se isi lava mana.

## Manatu Faaopoopo e Aoao Atu Ai

O faamatalaga o lo o i lalo e faaopoopo atu lea i le oototoga fautuaina o le lesona. Atonu e te manao e faaoga se manatu e tasi po o le sili atu foi e avea ma vaega o le lesona.

### 1. O vavega a Elisaia

Sa faia e Elisaia le tele o vavega ofoofogia, ma sa faaalua le alofa i tagata na tuuina atu isi faamaoniga e faapea o ia o le sui faamaonia o Elia. Sa vaeluaina e ia le vaitafe o Ioritana, faamagalo le vai i Ieriko, faateleina le suauu a se fafine ua oti lana tane, faatuina se tama talavou nai le oti, faamalolo i tagata o e na onana i le meaai, fafaga i e ua fia aai, faamalolo i le lepela o Naamanu, faaopeopea le matau (to'i), ma taitaiina tupu i le taua. Atonu e te manao e toe faamanatu nisi o nei vavega mai le 2 Tupu 2–6.

- Pe e te manatu ea o lo o i ai ni vavega o lo o tutupu i o tatou nei aso e pei lava o vavega na tutupu i aso o Elisaia? O a tulaga matautia o le saili na o vavega ofoofogia? O a ni vavega e foliga mai e laiti o lo o tutupu i o tatou olaga?

### 2. Ua ta'u atu e se teine Isaraelu talavou Elisaia ia Naamanu.

- Pe sa faapefea ona iloa e Naamanu Elisaia ma ona mana e faamalolo ai? (Tagai 2 Tupu 5:2–4. Sa ta'u atu e se teine talavou Isaraelu, o le na aveina faapagota e Suria, i le toalua o Naamanu o loo i ai se perofeta i Isaraelu e mafai ona faamaloloina Naamanu.) Pe faapefea ona avea leni teine talavou o Isaraelu ma se faataitaiga ia i tatou? (E tusa lava po o le a le matutua ua tatou i ai, tulaga o lo o i ai, po o se valaauga o le ekalesia, e tele se mea e mafai ona tatou fai i le faasinoina o tagata i perofeta—faapea ma le Alii.)

**Faamoemoega**

Ina ia uunaia tagata taitoatasi o le vasega ina ia maua faamanuiaga folafolaina, ia e maua i le faia o galuega o le malumalu ma susesue i tusitusiga paia.

**Sauniuniga**

1. Ia susesue ma le agaga tatalo mau nei:
  - a. 2 Nofoaiga a Tupu 29–30. Ua tatala e Esekia, le tupu o Iuta, faitotoa o le malumalu ma faatonuina faitaulaga ma Sa Levi ina ia faamama ma faapaia lea maota e tapuai ai (29:1–19). Ina ua faamamaina le malumalu, sa tapua'i Esekia ma ona tagata ma vivii i le Alii (29:20–36). Ua valaauina e Esekia Isaraelu uma e o mai i le maota o Ieova i Ierusalem (30:1–9). Ua toē ma tauemu nisi i le valaaulia, peitai ua tapuai Isaraelu faatuatua ia Ieova i Ierusalem (30:10–27).
  - e. 2 Nofoaiga a Tupu 32:1–23. Ua osofa'i e Sanerivi, le tupu o Asuria, Iuta ma ua faifai ia Ieova (32:1–19). Ua tatalo Isaia ma Esekia mo se fesoasoani, ma ua faaumatia e se agelu a le Alii se vaega tele o le vaegaau a Asuria (32:20–23).
  - i. 2 Nofoaiga a Tupu 34. Ina ua mavae le nofoaiga amioleaga a le atalii o Esekia faapea ma le atalii o lona atalii, sa tulai mai Iosia le atalii o le atalii o le atalii o Esekia e avea ma tupu o Iuta. Ua faaleagaina e Iosia tupua i le malo ma ua faafouina le malumalu (34:1–13). Ua maua le tusi o le tulafono i totonu o le malumalu ma ua faitau atu ia Iosia, o le na tagi ina ua iloa e ia le mamao ese o le nuu mai le tulafono (34:14–21). Ua ta'u atu e Ulata le perofeta fafine le faafanoga o le a oo mai o Iuta peitai ua vavalo o ia o le a le vaai Iosia i lea faafanoga (34:22–28). Ua osi feagaiga Iosia ma lona nuu o le a auauna atu ia Ieova (34:29–33).
2. Tusi faitau faaopopo: 2 Nofoaiga a Tupu 31; 33; 2 Tupu 18–19; 22–23; Isaia 37:10–20, 33–38.
3. Afai e mafai ona maua ata nei atonu e te manao e faaaoga ia ata i le faagasologa o le lesona: O Malumalu sa Faaoga Anamua (62300) ma se ata o se Malumalu i Aso e Gata Ai.

**Faalautelega  
Fautuaina o  
le Lesona**

Gaoioiga e  
Faatosina Mai Ai

Atonu e te manao e faaaoga le gaoioiga lenei (po o sa oe lava gaoioiga) e amata ai le lesona.

Ia faamatala atu ina ia fesoasoani i le puipuia o Ierusalem mai osofaiga a Asuria, o le mea lea na pupuni ai e le tupu o Esekia vaipuna o Kona se ia oo i le taelega o Selo, i totonu o puipui o le aai (2 Nofoaiga a Tupu 32:2–4, 30). Sa faia lenei mea e ala i le eli o se alavai mo le vai e tusa ma le 1,770 futu le umi i le papa ele. Ona poloai lea o Esekia ina ia ufitia punavai i fafo o le aai ina ia le mafai ai e

Asuria ona maua se vai. Pe a aunoa ma lenei vai i fafo o puipui o le aai, o le a le mafai ona faasaoina Ierusalem ma le osofaiga a Asuria.

Ia faamalamalama atu e pei lava ona moomia le vai mai le vaipuna o kiona mo le faasaoina faaletino o tagata o Esekia i le faagasologa o a latou taua ma Asuria, ua faapea foi ona manaomia le vai o le ola mo o tatou agaga ina ia ola ai i le faagasologa o taua faasaga ia Satani.

- O le a le vai o le ola? (Tagai Ioane 4:10–14.)

Sa faamatala mai e Elder Bruce R. McConkie e faapea o le vai o le ola o le “upu o le ola e faavavau, o le savali o le faaolataga, o mea moni e uiga i le Atua ma lona malo; o mataupu faavae o le talalelei” (*Doctrinal New Testament Commentary*, 3 vols. [1966–73], 1:151).

- Pe mafai faapefea ona tatou tatalaina se alavai e tau atu ia Ieova ina ia mafai ai ona tafe mai le vai o le ola i o tatou olaga?

Ia faamatala atu o se tasi o auala e maua ai le vai o le ola o le alu atu lea i le malumalu, le maota o le Alii, o iina e tuuina mai ai ia i tatou le mana ma le malamalama, e aoaoina ai e Ieova, ma lagona le filemu ma le olioli.

Ia faamalamalama atu o le tapuai i le malumalu sa avea ma se puipuiga taua mo Isaraelu i le taimi o Esekia, ma e mafai foi ona avea ma se puipuiga taua mo i tatou i aso nei.

Mau Talanoaina  
ma le Faaogaina

---

A o e aoaoina atu nei mau, ia talanoaina pe faapefea ona faaoga i le olaga i aso taitasi. Uunai tamaiti o le vasega e faamatala ni aafiaga e faatatau i mataupu ua taua i le mau.

### 1. Ua poloai atu Esekia ina ia faamama le maota o le Alii.

Ia aoaoina atu ma talanoaina le 2 Nofoaiga a Tupu 29–30.

- O le tama o Esekia, o Aasa lea, o se tupu amioleaga sa ia faaleagaina le matagofie o le malumalu o Ieova ma “tapuni i faitotoa” (2 Nofoaiga a Tupu 28:24). Ina ua avea le tupu o Esekia ma tupu o Iuta (le Malo i Saute) i le 715 TLM, o se tasi o mea muamua lava na ia faia o le tatala lea o faitotoa o le malumalu ma poloaiina faitaulaga ma Sa Levi e faamama ma faapaia le malumalu (2 Nofoaiga a Tupu 29:6–7.) O a ni auala atonu tatou te nofosala ai i le “liliuese [o o tatou] mata ai le afioga a Ieova”? O le a le mea na tupu i tagata o Iuta ona o lo latou le amanaia o le malumalu? (Tagai 2 Nofoaiga a Tupu 29:8–9.)
- O le a le mea sa faamoemoe Esekia e maua e ala i le faamamaina o le malumalu ma saunia mo le toe tapuai ai? (Tagai 2 Nofoaiga a Tupu 29:10.) Aisea e taua ai le puipuia o le malumalu mai mea le mama? (Tagai MFF 97:15–17.) O le a lo tatou tiutetauave ina ia mautinoa ai ua leai se mea le mama e ulufale atu i le malumalu? (Tagai MFF 109:20–21. E tatau ona tatou mautinoa o lo o mama i tatou pe a tatou ulufale atu i le malumalu.)
- O le a le mea na fai e Esekia ma le nuu o Ierusalem ina ua faamama le malumalu? (Tagai 2 Nofoaiga a Tupu 29:20–21, 29–31, 36.) O ai sa valaaulia e Esekia e omai i le maota o Ieova mo le faamanatuina o le Paseka? (Tagai 2 Nofoaiga a Tupu 30:1, 6.) Pe sa faapefea ona talia lenei valaauga? (Tagai 2 Nofoaiga a Tupu 30:10–11.)

- O le a se faamanuiaga sa teena e tagata o Isaraelu ina ua mumusu e o mai i le malumalu? (Tagai 2 Nofoaiga a Tupu 30:6–9. Ia faamatala atu e faapea e oo mai i le taimi o le nofoaiga a Esekia, ua avea faatagataotauaina e Asuria se vaega tele o le malo o Isaraelu [o le Malo i Matu]. Sa folafola atu e Esekia i e na totoe o Isaraelu afai latou te “toe foi mai ia Ieova,” o le a toe faasaolotoina e ua taofia faatagataotauaina. Ae ui lava i lea, sa teena e le toatele o tagata o Isaraelu le valaauga a Esekia. Ona o le amioleaga o tagata, o le mea lea na aveina atu ai faatagataotau le vaega na totoe o le malo o Isaraelu i ni nai tausaga mulimuli ane [2 Tupu 18:10–12]. O e na faatagataotauaina o Isaraelu sa avea ma ituaiga e sefulu na leiloa.)

**2. Ua osofaia e Asuria le malo o Iuta. Ua tatalo atu Isaia ma Esekia mo se fesoasoani, ma ua faaumatia e se agelu a Ieova se vaega tele o le vaegaau a Asuria.**

Ia aoao atu ma talanoaina le 2 Nofoaiga a Tupu 32:1–23.

- Ina ua mavae le ave faatagataotauaina o le malo o Isaraelu, sa amata ona osofaia e Asuria le malo o Iuta (2 Nofoaiga a Tupu 32:1). O le a le mea na faia e Esekia ina ua vaai atu ua fuafua le vaegaau a Sanerivi e osofaia Ierusalem? (Tagai 2 Nofoaiga a Tupu 32:2–5.) Ina ua mavae ona faia e Esekia ni sauni-uniga mo le taua, o le a le mea na ia tau atu i ona tagata e uiga i le osofaiga o le a oo mai? (Tagai 2 Nofoaiga a Tupu 32:6–8.) O le a se mea e mafai ona tatou aoao mai ia Esekia e uiga i le faiā lelei o le faalagolago i lo tatou lava malosi ma le faalagolago ia Ieova.
- Sa auina atu e Sanerivi ana auauna e tautala atu i tagata Ierusalem. O le a se mea sa fai atu ai auauna? (Tagai 2 Nofoaiga a Tupu 32:9–17.) Aisea na fai mai ai i latou i ia mea? (Tagai 2 Nofoaiga a Tupu 32:18.) O a ni auala ua taumafai ai Satani e faatalitonu i tatou e faapea e le mafaia e le Atua po o le a le fesoasoani mai foi le Atua ia i tatou?
- Pe sa faapefea ona tali atu Esekia ma le perofeta o Isaia i upu a auauna a Sanerivi? (Tagai 2 Nofoaiga a Tupu 32:20; Isaia 37:14–20.) Pe sa faapefea ona tali atu Ieova e tusa ma talosaga a Esekia ma Isaia? (Tagai 2 Nofoaiga a Tupu 32:21; Isaia 37:33–38.)
- Sa maua e Esekia ma lona nuu le puipuiga a Ieova ona o lo latou amiotonu, lea sa faaalua i la latou tapuaiga i le malumalu. Pe mafai faapefea ona avea le ulufale atu i le malumalu ma se puipuiga mo i tatou? (Tagai MFF 109:24–28.) O le a se mea e mafai ona tatou fai ina ia avea ai le agavaa ma le auai i le malumalu ma se mea e faamuamua i o tatou olaga?

Sa faalototele mai Peresitene Howard W. Hunter e faapea:

“Ia avea i tatou ma tagata e ulufale atu i le malumalu. Ia ulufale atu i le malumalu e le aunoa pe afai e mafai e tusa ma tulaga e oo ia te i tatou lava. Ia tautau pea se ata o se malumalu i lou fale ina ia mafai ona iloa atu ai e lau fanau. Ia aoao atu ia i latou e uiga i le faamoemoe o le maota o le Alii. Ia fuafua i latou i tausaga amata lava o o latou olaga ina ia o atu iina ma ia tumau i le agavaa mo lena faamanuiaga.

“Afai e avea le mamao o se malumalu ma mea e le mafai ai ona ulu atu e le aunoa, ia faaputupu le tala faasolopito o lou aiga ma saunia igoa mo sauniga paia e na o le malumalu e faia ai. O lenei sailiga i le aiga e taua tele mo le



galuega a malumalu, ma e moni lava o le a oo mai faamanuiaga ia i latou o e e faia lena galuega” (Lipoti o le Konafesi, Oketopa, 1994, 8; po o le *Liahona*, Ianuari, 1995).

### 3. Ua osi feagaiga Iosia ma ona tagata e auauna atu ia Ieova.

Ia aoao atu ma talanoaina le 2 Nofoaiga a Tupu 34.

Sa suia Esekia i le avea ai ma tupu e lona atalii o Manase faapea ma le atalii o lona atalii o Amone (Nofoaiga a Tupu 33). Sa pulea e Manase Iuta i le amioleaga, ma ua tuu e ia tupua i totonu o le malumalu ma taitai tagata i le agasala. Ae ui i lea, sa oo lava ina faamaualaloina e Manase o ia lava ma salamo a o le i malii. Sa pulea e le atalii o Manase o Amone le malo i le amioleaga, ma ua tapuai i tupua sa faia e lona tama. Sa le salamo Amone, ma sa fasia o ia e ana lava auau-na. Sa avea le atalii o Amone e igoa ia Iosia ma tupu o Iuta i le taimi o valu tausaga o lona matua. Sa avea o ia ma se tupu amiotonu o le sa teena ala leaga a lona tama faapea ma le tama o lona tama.

- O le a le ituaiga o tagata sa i ai le Tupu o Iosia? (Tagai 2 Nofoaiga a Tupu 34:1–2; 2 Tupu 23:25. Ia tagai o le Tavita o lo o taua i le 2 Nofoaiga a Tupu 34:2 o le Tupu lea o Tavita, o le sa tupuga mai ai Iosia, ae le o lona tama moni.)
- O a mea lelei sa faia e Iosia i le amataga o lana nofoaiga e avea ma tupu? (Tagai 2 Nofoaiga a Tupu 34:3–8. Sa saili o ia mo le Atua moni, sa faaleagaina e ia tupua i le malo, ma auina atu tagata e faafou le malumalu. Ia faamalalama-lama atu e faapea sa na o le 15 po o le 16 tausaga le matua o Iosia i le taimi na amata ai ona faia nei suiga taua.)
- O le a se mea taua na maua e Hilikia le faitaulaga i le taimi na toe faafou ai le malumalu? (Tagai 2 Nofoaiga a Tupu 34:14. Sa maua e ia se tusi o le tulafono a Ieova, po o tusitusiga paia. Ia tagai e oo mai i lea taimi i le talafaasolopito o Iuta ua leiloa le tulafono tusitusia ma sa le iloaina e tagata lea tusi.) O le a se uiga na faaalua e Iosia ina ua faitauina atu ia te ia le tusi o tulafono? (Tagai 2 Nofoaiga a Tupu 34:19. Ia tagai o le tu sa i ai anamua i Isaraelu o le saeia lea o le ofu o se tasi ina ia faaalua ai le faavauvau po o le faanoanoa tele.) Aisea na faanoanoa ai Iosia ina ua faalogo i mea na i ai i le tusi o le tulafono? (Tagai 2 Nofoaiga a Tupu 34:21.)
- O le a se mea sa fai mai ai le perofeta fafine o Ulata o le a tupu ia Iuta ona sa le tausaga e tagata le upu a Ieova ma faia mea na fai mai ai tusitusiga paia? (Tagai 2 Nofoaiga a Tupu 34:22–25.) O le a le mea o le a tupu ia i tatou pe afai tatou te le faitauina tusitusiga paia ma faatino a latou aoaoga?

Sa faamatala mai e Peresitene Ezra Taft Benson tulaga matautia o le le faitau i se tasi o a tatou tusi o tusitusiga paia, o le Tusi a Mamona lea:

“I le 1829, sa lapataiina e le Alii le Au Paia e faapea e le tataua ona latou ta’u faatauvaaina mea paia (tagai MFF 6:12). E moni lava o le Tusi a Mamona o se mea paia, ma e toatele i latou ua latou ta’u faatauvaaina, o lona uiga, o le manatu mama i ai, po o le manatu faapea o se mea e lē taua tele.

“I le 1832, ina ua foi mai nisi o faifeautalai anamua mai mea sa galulue ai, sa aoaoina e le Alii i latou ona o le manatu mama i le Tusi a Mamona. Ona o lea uiga, sa ia fetalai mai, ua faapogisaina ai o latou mafaufau. Sa le gata ina avea le manatu mama i lenei Tusi Paia ma mea na aumaia ai le pogisa ia i latou



lava, ae sa faapea foi ona aumaia i se tausalagi i le ekalesia atoa, e oo lava i tamaiti o Siona. Ona fetalai mai ai lea o le Alii, 'o le a latou tumau ai i lalo o lenei ta'usalaga seia latou salamo ma manatua le feagaiga fou o le Tusi a Mamona lea' (MFF 84:54–57).

“Afai sa aoaoina le au paia anamua ona o le manatu mama i le Tusi a Mamona, pe o lona uiga ea ua itiiti se ta'usalaga e maua ai i tatou pe afai e ia i tatou foi lea uiga?” (Lipoti o le Konafesi Oketopa, 1986 3–4, po o le *Liahona*, Ianuari 1987).

- O le a le mea sa fai mai ai Ulata o le a tupu ia Iosia? (Tagai 2 Nofoaiga a Tupu 34:26, 28. O le faataunuuga o lenei folafolaga o lo o faamatalaina lea i le 2 Nofoaiga a Tupu 35:20–24.) Aisea na faia ai e le Alii lenei folafolaga ia Iosia? (Tagai 2 Nofoaiga a Tupu 34:27.)
- Ina ua iloa e Iosia o le a ta'usalaina ona tagata ona ua latou le faia e pei ona faatonuina e Tusitusiga Paia, sa valaauina e ia i latou uma i le malumalu ma faitau atu tusitusiga paia ia i latou (2 Nofoaiga a Tupu 34:29–30). Aisea ua outou manatu ai na faia e ia lenei mea? (E le mafai ona mulimuli tagata i tulafono a le Atua pe afai latou te le iloa ia tulafono.) Pe mafai faapefea e matua ona mulimuli i le faaitaiga a Iosia ma aoao atu i a latou fanau tulafono o le talalelei? (Tagai MFF 68:25, 28.)
- Pe mafai faapefea ona tatou faaali atu le taua ua tatou tuuina atu i tusitusiga paia? Ia faamalalama atu ua sili atu ona tele tusitusiga paia ua mafai ona tatou maua nai lo Isaraelu, ma ua sili atu ona faigofie ia i tatou ona maua tusitusiga paia. O le a se tiutetauave ua ia i tatou ona o nei faamanuiaga?  
Sa saunoa mai Peresitene Spencer W. Kimball: “E le o ta'u faatauvaaina e le Alii i tatou pe afai e tuuina mai e ia ia i tatou nei mea, aua o le ua tuuina atu i ai le tele o mea, o ia foi lea o le a manaomia mai ai le tele o mea.” (Luka 12:48.)  
O le maua o nei mea o lona uiga ua ia i tatou se tiutetauave mo ia mea.  
E tataua ona tatou sutesue i tusitusiga paia e tusa ma le poloaiga a le Alii (tagai 3 Nifae 23:1–5); ma e tataua ona tatou tuuina atu o tatou ola ia pulea e ia mea” (“O Tusitusiga Paia—O Se Oa Maua Gata!” *O Le Liahona*, Tesema 1985).
- A o i ai Iosia ma ona tagata i le malumalu, sa latou osia se feagaiga ma le Alii. O le a le mea na latou osi feagaiga ai e fai? (Tagai 2 Nofoaiga a Tupu 34:31–33.)  
Ia faamatala atu o totonu o le malumalu tatou te osia ni feagaiga paia ma le Alii, ma o le faataunuina o ia feagaiga e aumaia ai ia i tatou faamanuiaga faalelalo-lagi faapea ma le faaeaina e faavavau. Pe mafai faapefea ona tatou saunia e osia feagaiga paia i le malumalu? O le taimi lava tatou te osia ai nei feagaiga, aisea ua taua ai lo tatou toe foi atu i le malumalu i taimi uma e mafai ai?

## Faaiuga

Ia faamatala atu o tagata i le malo o Iuta na oo lava ina avea i latou ma ni tagata amioleaga ma o le mea lea na faatagaina ai i latou e Ieova ina ia ave faatagata-otauaina (2 Nofoaiga a Tupu 36:14–21). Ae ui i lea, i le faagasologa o la latou nofoaiga, sa taumafai Esekia ma Iosia e faamalosi tagata i le faatepa taula'i o i latou i le malumalu faapea ma tusitusiga paia. Ia molimau atu e faapea a o tepa taula'i o tatou mafaufau i le ususitai i poloaiga a le Alii ma le agavaa e ulufale atu i le malumalu, o le a faamanuiaina i tatou i le malosi faaleagaga faapea ma le olioli. Ia uunaia tagata o le vasega ina ia latou maua faamanuiaga o le malumalu e ala i le ola agavaa ma ia auai atu i ni taimi e mafai ai.

## Manatu Faaopoopo e Aoao Atu Ai

O mataupu o lo o taua i lalo e faaopoopo i le ootoga o le lesona fautuaina. Atonu e te manao e faaoga se tasi o nei mataupu pe sili atu foi e avea o se vaega o le lesona.

### 1. “O se pepa faaaitalafu ma le Alii”

I se vaiaso a o lumanai le aoaoina atu o lenei lesona, ia fai atu i se tasi o le vasega ia malamalama i se vaega o lo o i lalo mai se tautalaga na saunia e Peresitene Gordon B. Hinckley, ma ia saunia e faamatala mai lea mea i le vasega:

“O lo o i ai nei i ou luma ni pepa faaaitalafu se lua. O le toatele o outou ua masani lelei ma pepa faapena.

“O le pepa muamua o se pepa faaaitalafu a le faletupe. O lea pepa ua faatagaina ai a’u e aumaia ni oloa faaaitalafu, ona totogi faatasi ai lea o a’u mea na aumai ai i se taimi mulimuli ane. O se pepa taua tele ma e tatau ona tausia lelei. Afai e gaioia ma faaogaina sese e se tasi, o le a ou mafatia ai ma ou maua ai foi le maasiasi. I le mauaina o lenei pepa mai le faletupe, ua ou ulufale atu ai i se feagaiga ma fusia ai a’u i ni tiutetauave ma ni tuutuuga. O lo’u mauaina o lenei pepa, ua ou talia ai tulaga uma e aofia ai i le aiaiga o lenei pepa.

“O lenei pepa e tuuina mai mo le tausaga e tasi ma e tatau ona toe faafouina i tausaga taitasi pe afai ou te fialia pea i avanoa taua e maua i le faaogaina o lenei pepa. O lenei pepa e le o sa’u mea totino. O le mea totino a le faletupe. Afai ou te le ususitai i aiaiga o lenei pepa, e mafai e le faletupe ona taofia le aitalafu ma toe ave ese lenei pepa faaaitalafu mai ia te a’u.

“O le isi pepa o lo o ia te a’u, o le mea lea ua tatou taua o le pepa faataga o le malumalu. Ua avea lea pepa ma sui o se pepa faaaitalafu i le Alii e mafai ai ona ou maua le tele o ana meaalofa silisili. O le pepa o le faletupe e faapitoa i mea o le lalolagi, a o le pepa faataga o le malumalu e faapitoa i mea tau le Atua.

“Ina ia maua se pepa faataga o le malumalu, e tatau i le na te umia ona faaalua lona agavaa, ma o lena agavaa e fuafua i le agavaa o le tagata lava ia. Pe a tuuina atu lena pepa faataga, e le faavavau lena faatagaga, ae tatau ona toe faafouina i tausaga taitasi. O lenei foi pepa, e mafai ona toe aveesea, pe afai e faia e se tasi na te umia lea pepa, se mea e le agavaa ai o ia mo lona faaogaina.

“O le agavaa mo se pepa faataga o le malumalu e le faavae i ni tupe. E matua leai lava sona faia ma lena tulaga. A e faavae i le amio lelei a le tagata lava ia, i le lelei o lona olaga. E le faatatauina i ni mea tau tupe, ae faatatau lava i mea o le faavavau.

“O le pepa a le faletupe e tatala ai faitotoa mo aitalafu tau tupe. A o le pepa faataga o le malumalu e tatala ai le faitotoa o le Maota o le Alii. O lenei pepa e faapitoa lava i le ulufale atu i nofoaga paia e faia ai galuega paia.

“. . . O lenei pepa faataga o lo o ia te a’u ma o lo o maua e le toatele o outou, o se mea taua ma le ofoofogia. E maua ai e se tasi se avanoa taua ma le ofoofogia—o le maua lea o le avanoa taua e ulufale atu ai i lena Maota o lo o tusia i ona pui-pui, ‘E Paia i le Alii—O le Maota o le Alii.” Ia e ola agavaa mo le auauna atu i lena maota. Ia tausia lea maota ia paia. Ia e faia lau vaega ina ia pui-puia le maota o le Alii mai soo se mea le mama po o se faatosinaga leaga po o se tagata leaga. Ia olioli i lona matagofie. Ia e maua le fialia i mea o lo o tautalagia iina, o le matagofie ma faamanuiaga o sauniga o lo o faia iina.

“Ia i latou e le i ulu atu i le malumalu, ou te fautua atu ina ia outou faaaoga le avanoa taua o le papatisoina lea e sui mo e ua oti. Ona avea ai lea o lena sauniga paia ma se taula i o outou olaga, ina ia pulea outou lava i taimi uma lava ma tulaga uma ina ia mafai ona outou maua, i le taimi e tatau ai, se pepa faaaitalafu faapitoa ma le faasaina ma le Alii, o se pepa faataga lava lea e ulufale atu ai i lona maota paia, ina ia e olioli iina i ona faamanuiaga ma avanoa taua” (Lipoti o le Konafesi, Aperila, 1990, 65, 69; po o le *Liahona*, Iulai, 1990).

## 2. Faamoemoega o Malumalu

Ia aumaia ni ata o ni malumalu o aso e gata ai (ma ia tele ituaiga eseese o fausaga, pe afai e mafai). Ia faamalamalama atu e ui lava ina atonu e foliga mai e eseese i le vaaiga i fafo nei malumalu, a o sauniga ma feagaiga o lo o faia ai i totonu o nei malumalu e tutusa lava.

Ia faamatala atu e ui lava ina eseese faiga i totonu o le malumalu anamua mai mea tatou te faia i totonu o malumalu i aso e gata ai (mo se faataitaiga, tatou te le faia ni taulaga o manu pe tutuina ni moliga’o ma mea manogi i malumalu o aso e gata ai), a o faamoemoega o malumalu anamua ma malumalu o aso e gata ai e tutusa lelei lava: Ia saunia ai i tatou e o atu i le afioaga o le Alii ma ia avea faapei o ia.

Atonu e te manao e faaali atu “Malumalu Anamua,” o se vaega lea e iva minute le umi mai Faamalamalama o le Vitio o le Feagaiga Tuai (53224), o lo o faamatalaina ai le fale fetafa’i o Mose ma nisi o mea na fai ai iina.

## 3. O le suesue i tusitusiga paia

- Aisea ua faigata ai ia te i tatou i nisi taimi le suesue i tusitusiga paia?

Ia tusia tali a tagata o le vasega faasolosolo agai i lalo i luga o le laupapa. Ona talanoaina lea o ni auala e mafai ona tatou faatoilalo ai nei mea faigata. Mo se faataitaiga, afai tatou te le malamalama i mea tatou te faitauina, e mafai ona tatou tatalo mo se malamalama ma suesue i mea na fai mai ai perofeta ma aposetolo e uiga i tusitusiga paia o lo o tatou faitauina; afai ua fia momoe tele i tatou mo le faitauina o tusitusiga paia i le po, e mafai ona tatou maua se isi taimi o le aso e faitau ai. Ia tusia nei tulaga e foia ai faafitauli faasolosolo i lalo i luga o le laupapa.

Ia tuuina atu se lu’i i tagata o le vasega ina ia faamaoni atili i la latou suesuega i tusitusiga paia.

# “Amuia le Tagata Na Te Maua le Poto”

Lesona  
**31**

*Faataoto ma le Failauga*

---

**Faamoemoega** Ia uunaia tagata o le vasega ia avea atili faapei o Keriso e ala i le faatinoina o le fautuaga poto o lo o i ai i le Faataoto ma le Failauga.

---

- Sauniuniga**
1. Ia suesue ma le agaga tatalo i mau o lo o talanoaina i le ootoga o le lesona faapea ma le tele o tusi o le Faataoto ma le Failauga i le mea e mafai ai.
  2. Afai e te faaaogaina le gaoioiga muamua e faatosina mai ai, ia tusi fuaiupu o lo o i lalo i se pepa po o luga o le laupapa a o le i amataina le vasega:
    - a. E muamua le \_\_\_\_\_ i le malaia.
    - e. Aoa ia i le \_\_\_\_\_ e tusa ma lona ala.
    - i. O le mea ma lona \_\_\_\_\_ i mea uma, ma ona lava \_\_\_\_\_ i mea uma lava i lalo o le lagi.
    - o. Ia e \_\_\_\_\_ ia Ieova ma lou loto atoa.
    - u. O le \_\_\_\_\_ e liliueseina ai le ita.
    - f. Aua e pei ona o ia \_\_\_\_\_ i lona loto, ua faapea lava o ia.

Afai e te faaaoga le gaoioiga e faatosina mai ai lona lua, ia fai atu i se tagata e toatasi po o le toalua o le vasega ina ia saunia e tau mai se mau e sili ona fiafia i ai mai le Faataoto po o le Failauga ma ia ta’u mai le pogai ua taua ai ia i laua.
  3. Afai e maua le vitio o *Ata Vitio o le Feagaiga Tuai* (53224), atonu e te manao e faaali atu le vaega e lima minute le umi ua ta’ua “Faatuatua i le Alii,” e avea ma vaega o le lesona.
- 

**Faalautelega  
Fautuaina o  
le Lesona**

- Gaoioiga e  
Faatosina Mai Ai**
- Atonu e te manao e faaaoga se gaoioiga o lo o i lalo (po o sa oe lava gaoioiga) e amata ai le lesona. Ia filifili le gaoioiga o le a sili ona talafeagai mo le vasega.
1. Ia faasino i le vasega fuaiupu ua e tusia i luga o se pepa lautele po o luga o le laupapa (tagai “Sauniuniga” o lo o i luga). Ia faamatala atu o nei faamatalaga o ni faamatalaga lauiloa mai i tusi o le Faataoto ma le Failauga, ma ia fai atu i tagata o le vasega e faatumu avanoa. Afai ua tata ai, ia tuuina atu mau o lo o i lalo ina ia mafai ai e tagata o le vasega ona su’e mau ina ia sailia upu latou te le o iloa.
    - a. Faataoto 16:18 (Faamaualuga)
    - e. Faataoto 22:6 (tama)
    - i. Failauga 3:1 (Tausaga, po)
    - o. Faataoto 3:5 (Faatuatua)
    - u. Faataoto 15:1 (tali filemu)
    - f. Faataoto 23:7 (manatu)

2. Ia fai atu i se tagata e toatasi po o le toalua o le vasega ina ia ta'u mai se mau e sili ona fiafia i ai mai i le Faataoto po o le Failauga ma ia ta'u mai le pogai ua taua ai ia i laua ia mau.

## Mau Talanoaina ma le Faaaogaina

A o e aoaoina atu nei mau, ia talanoaina pe faapefea ona faaoga i le olaga i aso taitasi. Uunai tamaiti o le vasega e faamatala ni aafiaga e faatatau i mataupu ua taua i le mau. Talu ai ona e faigata ona tuuina atu fesili uma pe faamatala foi mea uma o lo o i le lesona, ia filifili faatasi ma le agaga tatalo mea o le a sili ona faamalieina ai tulaga manaomia o tagata o le vasega. Atonu e tataua ona e suia nisi o fesili ina ia talafeagai ma tulaga o tagata o le vasega.

O le Faataoto o ni fuaitau pupuu ia e masani lava ona tuuina mai ai se fautuaga e uiga i le ola amiotonu. O lo o faamauina i le Feagaiga Tuai e faapea o Solomona “o ana faataoto e tolu afe ia” (1 Tupu 4:32). O nisi o nei fuaitau poto o lo o maua i le Tusi a Faataoto. E ui lava o Solomona ma isi tagata sa tusia lenei tusi e le o ni perofeta, a o le tele o mea na latou tusitusia sa musuia e le Alii. O a latou tusitusiga e masani lava ona faaalua i se talitonuga e faapea o le poto moni e mai le Atua ia.

O lo o iai foi i le tusi o Failauga ni fuaitau poto, ma ua talitonu nisi tagata o Solomona na tusia ia tusi. O le savali a le Failauga e faatoa maua le uiga moni o le olaga e ala i le Atua.

Ua vaevaeina lenei lesona i ni vaega se fitu e faatatau i autu taua i le Faataoto ma le Failauga. I la oe lava suesuega, atonu e te maua nisi autu e te manao e talanoaina i le vasega.

### 1. O le faautauta

Ia aoao atu ma talanoaina faamatalaga o lo o i lalo mai le Faataoto ma le Failauga.

- O lo o faamamafaina i le tusi a Faataoto ma Failauga le taua o le faautauta. O a ni eseese o lo o i ai i le aoaoina ma le faautauta? (Tagai Faataoto 1:7; 9:9–10; 2 Nifae 9:28–29. Ia faamalamalama atu e faapea o le gagana o le Tusi Paia, o le uiga o le mata'u ia Ieova o le faaaloalo lea ma usiusitai ia te ia. Ia faamatala atu o le faautauta e sili atu lona uiga nai lo le poto; o lea mea o se faatinoga lelei lea o le atamai. I tagata Isaraelu, o le uiga o le faautauta o le usiusitai lea i tulafono a le Atua.)
- O le a se mea e mafai ona tatou aoaoina mai le Faataoto 2:2–6 e uiga i le auala e maua ai le malamalama i le Atua? O le a le pogai ua outou manatu ai e manaomia le agaga filiga ina ia maua lenei malamalama?
- Pe faapefea ona faatusatusa le taua o le faautauta ma le taua o oa o le lalolagi? (Tagai Faataoto 3:13–18; Failauga 7:12. Ia tagai o le upu *ia* i le Faataoto 3:15–18 e faatatau lea i le faautauta.) Pe mafai faapefea e le faautauta ona aumaia le fiafia ma le filemu?

O lo o faapea mai le Faataoto 3:18 o le faautauta “o le laau o le ola” ia i latou o e maua. O le a se mea e mafai ona aoao mai e lenei faatusa ia i tatou e uiga i le taua o le poto? (Tagai 1 Nifae 11:8–11, 21–25, ma ia tagai o le laau o le ola o se faatusa lea o le alofa o le Atua.)

- O a uiga lelei o tagata faautauta o lo o tusia i le Faataoto 9:9–10 ma le 15:31–33? Pe aisea ua tataua ai ona i ai ia uiga lelei ina ia maua le poto?

## 2. Faatuatua i le Alii

Ia aoao atu ma talanoaina le Faataoto 3:5–7.

- O le a se fautuaga o lo o tuuina mai i le Faataoto 3:5–7? Pe faapefea ona faatonuina e le Alii o tatou ala? O le a se mea na oo ia te oe ua aoaoina ai oe ina ia faatuatua i le Alii?
- O le a le uiga o le manatua o le Atua? (Tagai Faataoto 3:6; Alema 34:38; MFF 59:21.) Pe faapefea ona faamanuiaina i tatou a o tatou manatua o ia?

## 3. O upu tatou te tautala ai

Ia aoao atu ma talanoaina mau o lo o i lalo mai le Faataoto.

- O lo o tusia i le Faataoto 6:19 ni mea se fitu e inoino i ai le Alii. O le tolu o nei mea o le pepelo, o le molimau pepelo, ma le faatupu maseiga e faatatau lea i upu tatou te tautala ai. Aisea ua manatu mamafa tele ai le Alii i upu tatou te tautala ai? (Tagai Faataoto 16:27–28; 18:8; 25:18; Mataio 12:36–37.) Pe mafai faapefea ona tatou faatoilaloina faafitauli o le pepelo, faitatala, po o le tautala leaga e uiga i isi tagata?
- O lo o faapea mai le Faataoto 16:24 “o upu matagofie, o le meli ua sisina ifo ia, e suamalie i le loto.” Pe faapefea ona moni lenei mea? O a ni taunuuga o le tautala ma le alofa? (Tagai Faataoto 12:25; 15:1; 16:24.) Pe faapefea ona fesoasoani ia te oe upu alofa a isi tagata?
- O a faamanuiaga e maua mai le tautala filemu pe a tupu mai se maseiga? (Tagai Faataoto 15:1.)

Sa saunoa mai Elder Gordon B. Hinckley: “E seasea ona tupu ni maseiga pe a tatou tautala filemu. Ua na o le taimi lava e siitia ae ai o tatou leo e felelei ai aloiafi ma avea ai nai mauga iti ma mauga tetele o fevaevaeaiga” (Lipoti o le Konafesi Aperila, 1971, 82; po o le *Liahona*, Oketopa 1971).

Ina ia faamalosi atili le taua o le tautala i upu alofa, atonu e te manao e usu e tagata o le vasega le pese “Fai Upu Alofa i le Tasi” (*Viiga*, nu. 147).

## 4. Faamaualuga

Ia aoao atu ma talanoaina le Faataoto 8:13; 13:10; 16:18–19.

- O lo o taua mai i le Faataoto 8:13 e inoino Ieova i le faamaualuga. Pe aisea ua avea ai le faamaualuga ma se agasala mamafa?

Sa saunoa mai Peresitene Ezra Taft Benson e faapea:

“O le uiga autu o le faamaualuga o le ita lea—o le ita i le Atua ma le ita i o tatou uso a tagata. O le uiga o le ita, o le inoino lea i se mea, po o se tulaga o le tete. O le mana lava lea o lo o manao Satani e pulea ai i tatou.

“O le faamaualuga e i ai lona uiga faatauva. O lo tatou tuuina lea o o tatou loto ia tete atu i le finagalo o le Atua. Pe a faasagasaga lo tatou faamaualuga i le Atua, o le a i ai lea i le agaga o le “faia o lo’u loto ae le o lou finagalo.” E pei lava ona faapea mai Paulo, ua latou ‘saili e i latou uma a latou lava mea, e le o mea a Keriso Iesu’ (Filipi 2:21).

“O le tetee atu o o tatou loto i le finagalo o le Atua e faatagaina ai o tatou manaoga, tuinanauga, ma naunauga ia lē pulea (tagai Alema 38:12; 3 Nifae 12:30).

“O e faamaualuluga e le mafai ona latou talia le pule a le Atua i le tuuina atu o faatonuga i o latou olaga (tagai Helamana 12:6). Latou te faaaogaina o latou manatu ma talitonuga e uiga i le upu moni e tetee atu ai i le malamalama sili o le Atua, ma ua faatautee mea latou te mafai ona fai ma le mana o le perisitua a le Atua, faapea ma mea ua latou faataunuuina e tetee atu ai i galuega mamana a le Alii.

“E eseese uiga o lo tatou ita i le Atua, e pei o le faalii, ua maaa, lē salamo, faafefeteina, itaita gofie, ma saili i se faailoga. O e faamaualuluga e mananao ina ia au atu le Atua ma i latou. E le fiafia i latou i le suia o o latou manatu ina ia o gatasi ma le finagalo o le Atua . . .

“O le faamaualuluga o se agasala e faafanoina ai i lona uiga moni o lona upu. O le faamaualuga e faatapulaaina ai pe taofia ai le aualu i luma (tagai Alema 12:10–11). O le ua faamaualuga e le faigofie ona aoaoina (tagai 1 Nifae 15:3, 7–11). Latou te le tuuina se lu’i i o latou mafaufau ina ia talia le upu moni, aua o le faia o lea mea o lona uiga ua sese i latou” (Lipoti o le Konafesi, Aperila, 1989, 3–5; po o le *Liahona*, Iulai, 1989).

- Ua aoao mai le Faataoto 13:10 ma le 16:18 e faapea o le faamaualuga e taitaiina atu ai i le fouvale ma le faafanoga. Pe mafai faapefea ona faia e le faamaualuga lenei mea? Pe faapefea ona aafia o tatou aiga i le faamaualuga?

Sa saunoa mai Peresitene Ezra Taft Benson e faapea:

“O le isi faailoga o le faamaualuga o le fevaevaea’i. O finauga, fetauaiga, pulega lē tonu, feeseeseaiga i le va o matua ma fanau, tatala faaipoipoga, sauaga i le toalua, vevesi, ma faalavelave, ma o nei mea uma e aofia faatasi i le vaega o le faamaualuga.

“O le fevaevaea’i i totonu o aiga e tulieseai ai le Agaga o le Alii. E avea foi lea tulaga ma mea e tulieseai ai le toatele o tagata o o tatou aiga . . .

“O le faamaualuga e aafia ai lo tatou va—o lo tatou va ma le Atua ma ana auauna, le va o le tane ma le ava, matua ma le tamaitiiti” (Lipoti o le Konafesi, Aperila, 1989, 5; po o le *Liahona*, Oketopa, 1989).

- Pe mafai faapefea ona tatou faatoilaloina le faamaualuga? (tagai Faataoto 16:19.) O le a se mea e mafai ona tatou fai e maua ai atili le lotomauualalo i lo tatou va ma tagata o o tatou aiga faapea ma le Atua?

## 5. Fefaauoaiga

Ia aoao atu ma talanoaina mau o lo o i lalo mai le Faataoto ma le Failauga.

- Aisea ua lapataiina ai i tatou e uiga i uo amioletonu? (Tagai Faataoto 13:20; 22:24–25.)
- O a nisi uiga o uo lelei? (Tagai Faataoto 17:17; 27:9.) Pe faapefea ona fesoa-soani uo lelei ia te oe i taimi faigata?
- O le a se mea e mafai ona tatou fai e maua ai ni uo moni? (Tagai Faataoto 18:24. Ia faamalalama atu e faapea o le maua o ni uo lelei e manaomia fo’i e i tatou le avea ma uo lelei.)

- O le a se uiga e faaalua e uo moni pe a tatou faia ni filifiliga le sa'o? (Tagai Failauga 4:9–10.)

Sa saunoa mai Elder Marvin J. Ashton e faapea:

“Sa faapea mai se tasi, ‘O se uo o se tagata lea ua naunau e talia a’u i le tulaga ua ou i ai.’ O le talia, o se tasi lea o faamatalaga o le uiga o le upu, ou te fia fautua vave atu o lo o avea i tatou ma se tulaga mauualalo ifo nai lo le mea tonu e i ai se uo moni pe afai tatou te tuua se tagata i le auala lava e tasi na tatou maua ai . . .

“E leai se tau e sili atu e mafai ona oo mai i soo se tasi o i tatou a o tatou auauna atu nai lo se faaupuga e faia ma le loto faamaoni ‘faafetai mo le avea ma a’u uo.’ Pe afai e maua e i latou o e manaomia se fesoasoani lena mea. Pe afai e faamalosia e ua vaivai ma sili atu ona malolosi ona o tatou olaga, o le mea moni le faauoga. Afai e mafai ona faamasinoina se tagata e ana uo, e mafai foi ona ia faamasinoina i latou i mea ua latou lelei ai . . .

“Ioe, o se uo o se tagata lea ua ia talia a’u i le tulaga ua ou i ai ma o le ua nau-nau ma mafai ona tuua au i se tulaga sili atu ona lelei nai lo le tulaga na ia maua ai a’u” (Lipoti o le Konafesi, Oketopa 1972, 32–35; po o le *Liahona*, Ianuari, 1973).

- Pe mafai faapefea ona tatou faamalosia faauoga i tagata o le aiga?
- Sa masani lava ona ta’ua e Iesu Keriso ona soo o ana uo (MFF 88:62; 93:45). Pe faapefea ona ia faaalua o ia o la tatou uo? (Tagai Ioane 15:13.) Pe faapefea ona tatou faaalua o i tatou o ana uo? (Tagai Ioane 15:14.) Pe faapefea ona e lagona lana faauoga?

## 6. O le tausia o fanau

Ia aoao atu ma talanoaina mau o lo o i lalo mai le Faataoto.

- Ua faapea mai le Faataoto 22:6. Ia “aoao le tama e tusa ma ona ala.” O le a le mea e tatau ona fai e matua ina ia mulimuli i lenei fautuaga? (Tagai MFF 68:25–28.) Pe mafai faapefea ona sili atu ona lelei lo tatou aoaoina o fanau i mataupu o le talalelei ma fesoasoani atu ina ia tupu a latou molimau?

Sa saunoa mai Elder Richard G. Scott: “E tatau ona outou malilie e lafoai i faafiafiaga o le tagata lava ia ma mea ua naunau i ai ina ia maua ni gaoioiga e faatatau i le aiga, ma ia aua le tuuina atu i le ekalesia, aoga, po o faalapotopotoga le tiutetauave autu o le “uunaiina po o le fesoasoani atu i se tamaitiiti ina ia atinae i vaega uma o le olaga. E manaomia le taimi, taumafaiga malosi, ma le tuu o isi mea ua tatou loto i ai ina ia ‘aoao le tama e tusa ma ona ala.’ Peitai o fea e mafai ona tatou maua ai ni tau e sili atu ona taua mo se galuega ua faia lelei?” (Lipoti o le Konafesi Aperila, 1993, 43; po o le *Liahona*, Iulai, 1993).

- Aisea ua manaomia ai e tamaiti ni tulafono, tuaoi, ma se aoaiga e faia ma le alofa? (Tagai Faataoto 19:18; 29:17.) E faapefea ona tali atu tamaiti i fautuaga amiotonu a o latou matua? (Tagai Faataoto 6:20–23.) Pe faapefea ona tuuina atu e matua ni faasaoga? (Tagai MFF 121:41–44.)



## 7. O le fiafia ma uiga malie lelei

Ia aoao atu ma talanoaina le Faataoto 15:13 ma le 17:22.

- Aisea ua taua ai le faatupuina o le fiafia ma uiga malie lelei? (Tagai Faataoto 15:13; 17:22.)

Sa saunoa mai Peresitene Hugh B. Brown: “Ou te manao ina ia faaalua e outou le mata fiafia aua e tatau ona tatou faatumauina sina uiga malie i soo se taimi e maua ai. Ou te mafaufau i tagata uma i le lalolagi ma e tatau ona aveia i tatou ma tagata e sili ona fiafia. Ua ia i tatou se savali sili ona taua ma sili ona fiafia i le lalolagi. Ou te manatu pe a tatou o atu i le isi itu, o le a faafeiloai mai i tatou e se tasi i le mata fiafia (sei vagana ua tatou o atu i le nofoaga sese o lona uiga la o le a ataata aamu mai se isi), o le mea lea ia tatou fiafia ai. Peitai ia moni lo tatou fiafia—ia sau mai i totonu o le loto” (*The Abundant Life* [1966], 83).

- O le a se mea e mafai ona tatou fai i le uunaiina atili o mea malie lelei i totonu o o tatou aiga? (Atonu e te manao e fai atu i tagata o le vasega e faamatala mai ni taimi na fesoasoani ai le maua o se mea malie i o latou aiga i le foia o faafitauli ma tuputupu a’e ai le alofa o le tasi i le isi.)

---

Faaiuga

Ia faaali atu ou lagona e uiga i autu na e talanoaina. Ia uunaia tagata o le vasega ina ia manatua ma mulimuli i le fautuaga i le Faataoto ma le Failauga. Atonu foi e te manao e uunaiina i latou ina ia taulotoina se mau e sili ona fiafia i ai mai se tasi o ia tusi.

---

## Manatu Faaopopo e Aoao Atu Ai

O mataupu o lo o i lalo e faaopopo i le oototoga o le lesona fautuaina. Atonu e te manao e faaoga se tasi o nei manatu pe sili atu foi e aveia o se vaega o le lesona.

### 1. Gaoioiga i le Faataoto

Ia tusia ni mau mai le tusi o Faataoto i ni fasi pepa eseese ma tuu i totonu o se faatanoa. Ia auuai mai tagata o le vasega e filifilia se fasi pepa mai le faatanoa, ma faitau le mau o lo o tusia i le fasi pepa, ma ia faamatala pe ua faapefea ona faatatau lea mau i o tatou olaga.

### 2. Faaogaina o Mau

Ia tusia se ata o le tino o se tagata i luga o le laupapa. Ia sailia e tagata o le vasega mau o lo o i lalo ma ia tusia mau i tafatafa ane o vaega o le tino o lo o faatatau i ai. Ia faitau faatasi fuaiupu ma ia talanoaina le ala e faatino ai i o tatou olaga.

- a. Faataoto 2:2 (taliga ma le loto)
- e. Faataoto 3:5 (loto)
- i. Faataoto 3:7 (mata)
- o. Faataoto 3:27 (lima)
- u. Faataoto 4:26–27 (vae)
- f. Faataoto 8:7 (gutu)
- g. Faataoto 10:4 (lima)
- l. Faataoto 12:15 (mata)

### 3. “O le ava amio lelei” (Faataoto 31:10)

Ia toe faamanatu e tagata o le vasega le Faataoto 31:10–31 ma ia tusia uiga lelei o se ava amio lelei. Ia faamalamalama atu o uiga lelei ia e tatau ona taumafai i tatou uma, o alii ma tamaitai, e atinae. Atonu e te manao e tusi tali a tagata o le vasega i luga o le laupapa. Atonu e aofia i tali mea nei:

<i>Fuaiupu</i>	<i>Uiga lelei</i>
11	E mafai ona faatuatuaina
13	E galue ma le filiga
20	E alofa
25	E malosi ma mamalu
26	Tautala ma le potu ma le agalelei
28	O se ava ma se tina faamaoni
30	E usitai ia Ieova

Ia tofi ni tagata o le vasega e talanoa e uiga i ni tagata ua latou iloa o lo o i ai nei uiga lelei.

---

**Faamoemoega** Ia fesoasoani i tagata o le vasega ina ia faatupuina le malosi e feagai ai ma puapuga e ala i le faatuatua ia leova, ia atinae a latou molimau e uiga ia te ia, ma ia tausisia pea le amio sa’o.

---

**Sauniuniga**

1. Ia suesue ma le agaga tatalo i mau o lo o i lalo (atonu foi e te manao e suesue i ulutala o mataupu o lenei tusi a Iopu ina ia maua ai se vaaiga lautele i le tala.
  - a. Iopu 1–2. Ua oo ia Iopu, o se tagata amiotonu ma le faatuatua ni mafatiaga mamafa. Ua tumau o ia i le faatuatua ia leova e tusa lava pe aveesea mai ia te ia ana meatotino, fanau, ma le ola maloloina.
  - e. Iopu 13:13–16; 19:23–27. Ua maua e Iopu le malosi i le faalagolago ia leova faapea ma lana molimau e uiga i le Faaola.
  - i. Iopu 27:2–6. Ua maua e Iopu le malosi i lona lava amiotonu faapea ma le amio sa’o.
  - o. Iopu 42:10–17. Ina ua mavae ona onosaia ma le faatuatua Iopu i ona mafatiaga, ua faamanuia o ia e leova.
2. O isi tusi e faitau i ai: O isi mataupu o le Iopu; Mataupu Faavae ma Feagaiga 121:1–10.

---

## Faalautelega Fautuaina o le Lesona

**Gaoioiga e Faatosina Mai Ai** Atonu e te manao e faaaoga le gaoioiga o lo o i lalo (po o sa oe lava gaoioiga) e amata ai le lesona.

Ia tuuina atu le tala faatusa o lo o i lalo i tagata o le vasega (pe fai atu i se tagata o le vasega e saunia e faamatala mai):

Sa faamatala e Elder Joseph B. Wirthlin i se tasi taimi se tala e uiga i faifaatoaga i le toafa vevela i le itu i matu i sisifo o Mekisiko o e “na totoina ni ituaiga eseese o sana ma pi e ola lelei tele ma e mafai ona ola tusa lava pe tau leai se suavai. O nei ituaiga o sana e mafai ona ola talaulau i se tau faigata e masani ona mamae ai ma pepe isi laau. O se tasi o nei laau o le pi paepae o le tepari. E tatupu fatu ma o le a tupu a’e le laau e tusa lava pe itiiti le timu e maua. E oo atu ona aa i le loloto e ono futu i le eleele papa ma le oneone ina ia maua ai le susu o lo o ia moomia. E mafai ona oso fugalaa ma fua i le toafa e 115-tikeri (Faranehaite) ma e na o le tasi le timuga e pa’u i le tausaga. O ona lau e tumau i le lanulauava matagofie lava, ma e tau le faasusuina, e tusa lava po o le vevela o le vaeluaga o Iulai.”

- O le a se mea e mafai ona tatou aoaoina mai lenei tala faatusa e mafai ona fesoasoani ia i tatou i le onosaia o puapuga?

Sa fautua mai Elder Wirthlin: “Atonu e mafai ona faataitai tagata o le ekalesia i le faataitaiaga a nei laau malo ma le sasa’o. E tatau ia i tatou ona auina atu o tatou a’a i le loloto o le eleele o le talalelei. E tatau ona tatou tuputupu a’e, ola mafala, fuga mai fugalaa, ma fua mai i ni fua lelei e tusa lava po o le a le tiapolo, faaososoga,

po o se faitioga atonu tatou te feagai. E tatau ona tatou faamasani i le ola i le vevela o puapuaga” (Lipoti o le Konafesi Aperila, 1989, 7; po o le *Liahona*, Iulai, 1989).

Ia faamatala atu o lenei lesone e faatatau lea ia Iopu, o se tagata sa fesoasoani lona faatuatua ma le amiotonu ia te ia i le onosaia o puapuaga faigata.

## Mau Talanoaina ma le Faaagaina

A o e aoaoina atu nei mau, ia talanoaina pe faapefea ona faaoga i le olaga i aso taitasi. Uunai tamaiti o le vasega e faamatala ni aafiaga e faatatau i mataupu ua taua i le mau.

### 1. Ua matua tofotofoina Iopu.

Ia aoaoina atu ma talanoaina le Iopu 1–2.

- O le a le ituaiga o tagata sa i ai Iopu? Atonu e te manao e tusia i luga o le laupapa uiga nei. O le tele o mau e faatatau i ai e le o i ai i mau faitauina, o le mea lea atonu e te manao e fai atu i tagata taitoatasi o le vasega e saili ia mau ma ta’u mai po o le a le uiga ua faamatalaina.
  - a. O ia o se tagata lelei o le sa mata’u i le Atua ma tetee atu le tiapolo (Iopu 1:1).
  - e. O ia o se tagata mauoa peitai sa le pupu tele lona loto i le oa (Iopu 1:3; 21).
  - i. Sa ia te ia le amio sa’o (Iopu 2:3).
  - o. Sa faamalosia e ia o e vaivai (Iopu 4:3–4).
  - u. Sa savali o ia i ala o Ieova ma sa faasilisilia e ia upu a Ieova (Iopu 23:10–12).
  - f. Sa alofa o ia i fafine ua oti a latou tane, e matitiva, e pipili, ma e tauaso (Iopu 29:12–16).
  - g. Sa manatu mamafa o ia i ona fili ma faamagalo i latou (Iopu 31:29–30).
- O a faaososoga sa oo ia Iopu? Atonu e te manao e tusia nisi o nei faaososoga i luga o le laupapa. O le tele o mau e faatatau i ai e le o i ai i le tofiga o tusi e faitau i ai, o le mea lea atonu e te manao e fai atu i tagata taitoatasi o le vasega e su’e ia mau ma ta’u mai po o le a le faaososoga o lo o faamatala ai.
  - a. Aveesea o auauna, meatotino, ma mea e maua (Iopu 1:13–17).
  - e. Aveesea o le fanau (Iopu 1:18–19).
  - i. Ma’i ma le tiga faaletino (Iopu 2:7; 7:5; 16:16).
  - o. Sa faatumulia lana moe i miti (Iopu 7:4, 13–14).
  - u. Tuuaiga leaga ma le le maua o se lagolago mai o ana uo ma le aiga (Iopu 2:9; 4:1; 7–8; 11:1–6; 19:13–22).
  - f. Faaletonu po o le a le pogai na oo ai o ia i nei puapuaga (Iopu 10:15).
  - g. O tauemuga a i latou o e sa fiafia i lona pa’u (Iopu 16:10–11; 30:1, 8–10).
  - l. O le lagona e faapea ua faagaloina o ia e le Atua po o le faapea ua le faafofoga mai (Iopu 19:6–8; 23:3–4; ia tagai o le upu *ia* o lo o i le Iopu 23:3–4 e faatatau lea i le Atua).
- Pe faapefea ona faatusatusa mafatiaga o Iopu ma mafatiaga o tagata i o tatou nei aso? (E tutusa lava mafatiaga o le le maua o se meatotino, aveesea o fanau, le maua o le ola maloloina, ma le le alolofa mai ma fesoasoani mai o uo ma aiga).
- O le a le mea na fai mai Satani o le pogai o le amiotonu o Iopu? (Tagai Iopu 1:9–10.) O le a le mea sa valoia e Satani o le a faia e Iopu pe a aveesea lana oa ma isi faamanuiaga? (Tagai Iopu 1:11; 2:4–5.) O le a se mea na fai e Iopu ina ua oo mai nei mea? (Tagai Iopu 1:20–22; 2:10.) O le a se mea e mafai ona tatou aoaoina mai nei mea?

- E ui lava i ona puapuaga, “ua le agasala Iopu i na mea uma, ua na le ta’uvaleina foi le Atua” (Iopu 1:22). Pe faapefea ona ta’uvaleina e nisi tagata le Atua pe a oo mai le faanoanoa, le manuia, po o se mala? (Atonu e tuuaina e i latou le Atua pe fesiligia lona poto po o le tausiga, ma manatu e le malamalama o ia pe alofa ia i latou. Atonu e fesiligia e nisi tagata pe o soifua o ia.)

## 2. Ua maua e Iopu le malosi ia Ieova.

Ia aoao atu ma talanoaina le Iopu 13:13–16; 19:23–27.

- O le faalagolago o Iopu ia Ieova sa avea o se mafuaaga tele o le malosi faaleagaga mo ia (Iopu 13:13–16). O le a le uiga o le faalagolago ia Ieova? Pe mafai faapefea ona tatou atinae le faatuatua ia Ieova? Pe mafai faapefea ona tatou atinae le faatuatua ia Ieova lea o le a lagolagoina ai i tatou i puapuaga? (Tagai Roma 8:28; 2 Nifae 2:2, 11, 24; MFF 58:2–4; 122:5–9.) Ia molimau atu e faapea ona o le alofa o Ieova ia i tatou, o le mea lea ua ia ta’utino mai ai ia i tatou afai tatou te faatuatua, o le a faia mea uma mo lo tatou lelei ma fesoasoani mai ia i tatou ina ia tuputupua’e.
- I le mataupu e 19, sa faamatala e Iopu puapuaga na oo mai ia te ia, ona molimau mai ai lea e uiga i le Faaola. Pe sa faapefea ona avea le molimau a Iopu e uiga i le Faaola ma mea na fesoasoani ai ia te ia e onosaia ona puapuaga? (Tagai Iopu 19:25–27.) Pe mafai faapefea e se molimau e uiga i le Faaola ona tuuina mai ai ia i tatou le malosi i le taimi o puapuaga?

Atonu e te manao e usu e tagata o le vasega le pese “Ua Ou Iloa Lo’u Faaola” (*Viiga*, nu. 73), po o le ta e oe o se lipine o leni pese.

## 3. Ua maua e Iopu le malosi ona o lona amiotonu ma le amio sa’o.

Ia aoao atu ma talanoaina le Iopu 27:2–6.

- Sa avea le amio sa’o o Iopu ma se isi pogai o le malosi faaleagaga i ona puapuaga (Iopu 27:2–6). O le a le mea e ta’u o le amio sa’o? Pe sa faapefea ona avea lona lava amio sa’o ma mea sa faamalositia ai Iopu i le taimi o ona tofotofoga? Pe mafai faapefea e le amio sa’o o le tagata ona fesoasoani ia te ia i taimi o puapuaga? (A o faatumauina lo tatou amio sa’o, e mafai ona tatou maua le malosi mai le iloa o le ala o o tatou olaga o lo o fiafia i ai le Alii.)

Sa faamatala mai e Elder Joseph B. Wirthlin le amio sa’o e faapea “o le faia lea i taimi uma o le mea sao ma lelei, e tusa lava po o a ni taunuuga o lo o i ai. O le uiga o lea mea o le amiotonu mai le taele o o tatou loto, e le gata i mea tatou te fai peitai, o le mea e sili atu ona taua, o o tatou manatu ma o tatou loto. O lea amio sa’o o le tagata la va ia e faatatau lea i le faalagolagoina ma le amio sa’o ma e le mafai ona tatou sese i se mea ua faatonuina i tatou e fai po o se feagaiga” (Lipoti o le Konafesi, Aperila, 1990, 38; po o le *Liahona* Iulai, 1990).

## 4. Ina ua mavae le onosai ma le faatuatua o Iopu i ona puapuaga, ua faamanuia o ia e le Alii.

Ia aoao atu ma talanoaina le Iopu 42:10–17.

- Ina ua mavae ona onosaia ma le faatuatua e Iopu ona puapuaga, pe sa faapefea ona faamanuiaina o ia e Ieova? (Tagai Iopu 42:10–15; Iakopo 5:11.) Pe faapefea ona faamanuia e le Alii i tatou a o tatou onosai ma le faatuatua i puapuaga?

(Tagai Iopu 23:10; 3 Nifae 15:9.) Ia uunaia tagata o le vasega e faamatala atu ni o latou lava aafiaga. Atonu e te manao e faamanino atu e ui lava ina faamanuina e le Alii ia Iopu i le ta'i "lua mea i mea uma na muai ia te ia," o faamanuiaga faaleagaga e tuuina mai e le Alii ia i tatou a o tatou onosai ma le faatuatua, e sili atu ona taua nai lo faamanuiaga faaletino.)

Sa saunoa mai Elder Orson F. Whitney e faapea: "E leai se tiga tatou te mafatia ai, e leai foi se puapuaga e oo mai ia i tatou e le aoga. E aoaoina ai i tatou, i le atinae o uiga lelei e pei o le onosai, faatuatua, le faamalosi ma le lotomau-lalo. O mea uma tatou te mafatia ai ma mea tatou te onosai ai, aemaise lava pe a tatou tumau ai ma le onosai, e atinae ai la tatou amio, faamamaina ai o tatou loto, faateleina ai o tatou agaga, ma avea ai i tatou ma ni tagata sili atu ona alolofa, ma ua sili atu ona agavaa e taua o le fanau a le Atua . . . ma o le faanoanoa ma le mafatia, mamafa ma le tiga, tatou te maua ai aoaoga ua tatou o mai iinei ina ia maua, ma o le a avea atili ai i tatou e pei o lo tatou Tama ma le Tina i le lagi" (quoted in Spencer W. Kimball, *Faith Precedes the Miracle*, 98).

Sa saunoa mai le Perofeta o Iosefa Samita: "Ua pei a'u o se ma'a lapoa ma le talatala ua taavale i lalo mai o se mauga maualuga; ma na pau lava faamoemoega ou te maua o le olo ese lea o se tulimanu ina ua fetoi ma se isi mea . . . ma ua aveesea ai lea tulimanu ma lea tulimanu. Ona avea ai lea o a'u ma se u fanafana ua faapupulaina i le utu a le Silisiliese" (*Teachings of the Prophet Joseph Smith*, sel. Joseph Fielding Smith [1976], 304).

## Faaiuga

Ia faia se aotelega o lau talanoaga e uiga i le tusi a Iopu, ma ia faamamafaina le manatu e faapea e mafai ona tatou maua le malosi e onosai ai i o tatou puapuaga e ala i le faalagolago i le Alii, atinae a tatou molimau e uiga ia te ia, ma faatumauina lo tatou amio sa'o ina ia mafai ai ona tatou iloa o o tatou olaga ua avea ma se mea e fiafia i ai o ia. Atonu e te manao e ta'u atu i tagata o le vasega se taimi na e maua ai se malosi i le taimi o puapuaga. Ia fautua atu ina ia mafaufau loloto tagata o le vasega e uiga i le auala e mafai ona latou faatino ai mataupu ua talanoaina i lenei lesona ina ia fesoasoani ai ia i latou e onosai i puapuaga.

## Manatu Faaopoopo e Aoao Atu Ai

O mataupu o lo o taua i lalo e faaopoopo i le oototoga o le lesona fautuaina. Atonu e te manao e faaoga se tasi o nei manatu pe sili atu foi e avea o se vaega o le lesona.

### 1. Uo a Iopu

- Pe sa faapefea ona faamatala e Elifasa ma Pilitati, o nisi o uo e toalua a Iopu, lona mafatiaga? (Tagai Iopu 4:7–8; 8:6. Sa manatu i laua o mafatiaga o Iopu o se faasalaga lea mai le Atua mo agasala sa faia e Iopu.) O a ni tulaga matautia o le talitonu o mafatiaga uma e maua mai ona o le faasalaga a le Atua mo a tatou agasala?
- O le a se mea e mafai e sese o uo a Iopu ona aoao ai i tatou e uiga i le fesoasoani i tagata o loo mafatia i puapuaga?

### 2. O fesili e fai i le taimi o puapuaga

Sa saunoa mai Elder Richard G. Scott: "Pe a feagai oe ma puapuaga, e mafai ona taitaiina oe e fesili ifo i le tele o fesili. O nisi o ia fesili ua avea ma se faamoemoega

aoga; a o isi e leai. O le fesili ifo, pe aisea ua tatau ai ona tupu lenei mea ia te au? Pe aisea ua tatau ai ona ou mafatia i lenei mea i le taimi nei? O le a le mea ua ou faia ua mafua ai lenei mea? E leai se faamoemoega aoga. E leai se mea lelei e maua i le fesili i ni fesili e faaalua ai le tetee i le finagalo o le Atua. Ia fesili, o le a le mea e tatau ona ou faia? O le a se mea e tatau ona ou aoaoina mai lenei mea? O le a le mea e tatau ona ou suia? O ai e tatau ona ou fesoasoani atu i ai? Pe mafai faapefea ona ou manatua le tele o o'u faamanuiaga i taimi o puapuaga? (Lipoti o le Konafesi Oketopa 1995, 18; po o le *Liahona*, Ianuari, 1996).

### **3. O le tausisia o malamalamaaga i taimi o puapuaga**

Sa saunoa mai Peresitene Spencer W. Kimball e faapea:

“Afai tatou te vaai i le olaga faaletino e faapea o le olaga atoatoa lea, o lona uiga o le a avea le tiga, faanoanoa, lē manuia o taumafaiga, ma le puupuu o le ola ma se puapuaga. Peitai afai tatou te vaai i le olaga e faapea o se mea e faavavau ma e oo atu lava i le mua'i olaga ua mavae atu ma faaauau ai i le lumanai e faavavau pe a mavae le oti, o lona uiga o mea uma e tutupu e mafai ona i ai i lona malamalamaaga tatau.

“. . . Pe ua le oo mai ea faaososoga ona ia tofotofoina ai lo tatou malosai, le mai ina ia tatou iloa ai onosai ma le oti ina ia mafai ona tatou maua le tino ola pea ma faamamaluina?

“Afai e faamaloloina ma'i uma tatou te tatalo atu ai, afai foi e puipuia tagata amiotonu uma ma faaumatia amioleaga, semanu e le aoga le polokalama atoa a le Tama ma o le a faamutaina le mataupu faavae autu o le talalelei, o le filifiliga saoloto lea” (*Faith Precedes the Miracle* [1975], 97).

### **4. E le umi le tamaoaiga o tagata amioleaga**

- O nisi taimi e foliga mai ai e ola tamaoaiga tagata amioleaga a o e amiotonu e mafatia lea. O le a se mea ua e aoao mai le tusi a Iopu e uiga i le ola tamaoaiga o e amioleaga? (Tagai Iopu 21:24).

# Talai atu o le Talalelei i le Lalolagi

Lesona  
**33**

*Iona 1–4; Mika 2:4–7*

---

**Faamoemoega** Ia uunaia tagata o le vasega ina ia faataunuaina lo latou tiute tauave i le avea ma Isaraelu o aso e gata ai ina ia alolofa i tagata uma o le lalolagi ma tufatufa atu faamanuiaga o le talalelei ia i latou ia.

---

**Sauniuniga** Ia suesue ma le agaga tatalo i mau nei:

- a. Iona 1–2. Ua valaauina Iona e Ieova e talai atu le salamo i tagata o Nineva. Ua taumafai Iona e sola ese mai ia Ieova i luga o se vaa, ua folo e se ia tele, ua tatalo ma ua faasaoina mai le manava o le ia.
- e. Iona 3–4. Ua vavalu Iona e uiga i le pau o Nineva ma ua ita ina ua salamo tagata o Nineva ma ua faasaoina e Ieova le aai (o lo o faamatala e le Faaliliuga a Iosefa Samita o le Iona 3:9–10 e faapea o tagata na salamo ae le o le Atua). Ua faaoga e Ieova se kikaiona ma se anufe e aoao atu ai ia Iona le tatau ona alofa o ia i tagata uma.
- i. Mika 2:12–13; 4:1–7, 11–13; 5:2–4, 7–8; 6:6–8; 7:18–20. Ua vavalu Mika e uiga i le misiona a Isaraelu i aso e gata ai.

---

## Faalautelega Fautuaina o le Lesona

Gaoioiga e  
Faatosina Mai Ai Atonu e te manao e faaoga le gaoioiga o lo o i lalo (po o sa oe lava gaoioiga) e amata ai le lesona.

- Pe toafia alii talavou o le ekalesia ua finagalo le Alii ina ia faia ni misiona? (O alii talavou o e ua agavaa ma mafai ona o atu.) Aisea ua taua ai le tali atu o nei alii talavou taitoatasi i lenei valaau? O ai nisi tagata ua agavaa mo le faia o ni misiona? (O tuafafine nofofua o e o lo o agavaa e 21 tausaga le matutua po o le sili atu faapea ma ulugalii ua matutua pe afai e talafeagai ma o latou tulaga.

I le 1979, sa tautalagia ai e Peresitene Spencer W. Kimball le manaomia o nisi faifeautalai e sili atu e mafai ona latou talai atu le talalelei i tagata i vaega uma o le lalolagi. Sa ia saunoa mai: “Ua ou talitonu e mafaia ona fai e le Alii soo se mea lava ua ia finagalo e fai. Peitai e leai se pogai lelei ou te iloa ua tatala ai e Ieova faitotoa, tatou te lei saunia e ulufale atu ai” (“I Tuluiga Uma o le Lalolagi” *Liahona*, Aperila, 1980).

O lenei lesona o le a talanoaina ai le ala e mafai ai ona fesoasoani ia i tatou olaga ma tusitusiga o Iona ma Mika, ina ia tatou malamalama ai i la tatou matafaioi ia alolofa i tagata uma ma fetufaai faamanuiaga o le talalelei ma i latou.

---

Mau Talanoaina  
ma le Faaogaina

A o e aoao atu fuaitau nei mai tusitusiga paia, ia talanoaina le ala e faaoga ai i le olaga i aso taitasi. Ia uunai tagata o le vasega e faamatala mai o latou aafiaga e fetau ma mataupu o loo taua i mau.



## 1. Ua valaaaina Iona e talai atu i Nineva, ae peitai ua sola o ia.

Ia aoao atu ma talanoaina le Iona 1–2.

- Aisea na finagalo ai Ieova e alu Iona i Nineva? (Tagai Iona 1:2.) O le a le pogai atonu na musu ai Iona e talia se misiona i Nineva? (Tagai Nauma 3:1–5, o lo o faamatala ai le amioleaga tele ma le solitulafono o Nineva. O tagata o Nineva, le laumua o Asuria, o ni fili ia o Isaraelu.)
- Aisea na alu atu ai Iona i Tasesa? (Tagai Iona 1:3.) O a ni auala ua tatou taumafai ai i nisi taimi e sosola ese mai ia Ieova po o valaauga ua tauina mai ia i tatou e ona sui? O a taunuuga o ia taumafaiga?
- Pe sa faapefea ona faaalua e Ieova le agalelei ma le fesoasoani ia Iona ina ia salamo? (Tagai Iona 1:4–2:10.) O le a le mea na iloa e Iona a o i ai o ia i totonu o le ia tele? (Tagai Iona 2:1–9.) Pe faapefea ona fesoasoani mai Ieova ia i tatou ina ia salamo ma toe foi atu i ona ala?
- I le faagasologa o lana galuega i le lalolagi, sa fetalai le Faaola e uiga i le “faailoga o le Perofeta o Iona” (Mataio 12:39). O le a le uiga o lea faailoga? (Tagai Mataio 12:39–41. E tolu ao tolu po o i ai Iona i le manava o le ia ona toe aumaia lea i fafo a o ola pea. E tolu aso ma po e tanumia ai le Faaola i le eleele ona toetu mai ai lea.)
- Ua poloai mai pea e le aunoa Ieova e ala mai i ana perofeta, e tatau i alii talavou agavaa malolosi ona faia se misiona. Ua ia faalototele mai foi i ulugalii matutua e avea ma faifeautalai faamisiona pe afai latou te mafai. (Ia tagai i le manatu faaopoopo e aoao atu ai.) O a nisi o pogai ua tatau ai i nisi o alii talavou malolosi ma ulugalii matutua ona filifili e aua le faia ni a latou misiona? (O le le i ai o se ta’utinoga ma le faatuatua, o le le agavaa, o le le naunau e tuua tulaga toafilemu o le aiga, fefe i se mea o loo faamoemoe latou te faia.) O le a se mea e mafai ona tatou aoaoina mai le tala ia Iona e mafai ona fesoasoani ia i tatou ia agavaa atili i le usiusitai ia Ieova ma le talai atu o le Talalelei?

## 2. Ua tali atu tagata o Nineva i le savali a Iona ma ua salamo.

Ia aoao atu ma talanoaina le Iona 3–4.

- Ina ua salamo Iona, sa toe valaaaina o ia e Ieova e talai atu le salamo i tagata o Nineva. Pe sa faapefea ona tali mai tagata o Nineva i le savali a Iona? (Tagai Iona 3:5–9. I ona po anamua, sa oofu tagata i le ie talatala, ma ua nonofo i le lefulefu ina ia faaali ai ua lotomauualalo i latou ma salamo.) O le a se tali sa faaali mai e le Atua i le suiga i tagata? (Tagai Iona 3:10.)
- Sa valoia e Iona le pau o Nineva (Iona 3:4). Sa faapefea ona tali atu Iona ina ua faamagalo e Ieova tagata o Nineva? (Tagai Iona 4:1–3. Sa ita o ia ona sa alofa Ieova i tagata.)
- O le a le mea sa aoao atu e Ieova ia Iona ona o le tupu a’e o le kikaiona na faapaolo ai ma maua ai e ia le toafilemu ona mamae ai lea? (Tagai Iona 4:4–11. E alofa le Atua i lana fanau uma lava. E pei lava ona sa faaalua e ia le agalelei ia Ieova, o le mea lea na ia finagalo ai ia faaalua le agalelei i tagata ua salamo o Nineva.) O le a se mea e mafai ona aoao mai ia te i tatou i le tulaga na oo ia Iona e uiga i le alolofa atu i isi tagata?

### 3. Ua vavalu atu Mika e uiga i le misiona a Isaraelu o aso e gata ai.

Ia aoao atu ma talanoaina mau mai le Mika.

Sa valaau atu le perofeta o Mika i tagata o Isaraelu ina ia salamo i la latou amioleaga ma toe foi atu i le Alii. Sa vavalu o ia e uiga i le faatafunaina o Iakopo (Isaraelu) faapea ma Iuta. Sa vavalu foi o ia e faapea o le a faataunuuina e Isaraelu o aso e gata ai (O le Ekalesia a Iesu Keriso o le Au Paia o Aso e Gata Ai) faamoemoega o le Alii i se mana tele.

- O a ni folafolaga sa tuuina atu e Ieova i le Mika 2:12–13? (Sa folafola atu o ia o le a ia faapotopotoina e o totoe o Isaraelu, ina ia avea i latou ma se motu tele o tagata, ma o le a ia taitaina i latou.) Pe ua faapefea ona faataunuu i nei aso nei folafolaga?
- O nisi o valoaga tetele na faia e Mika e uiga i aso e gata ai o lo o faamaumau i le Mika 4:1–7. O le a se mea sa valoia e Mika e uiga i le malumalu i aso e gata ai? (Tagai fuaiupu 1–2.) O le a se mea sa valoia e ia e uiga i le Meleniuma? (Tagai fuaiupu 3–7.) Pe aisea ua taua ai ia i tatou ia valoaga?
- O le a se mea e mafai ona tatou iloa mai le Mika 4:11–13 e uiga i le taunuuga i aso e gata ai o Isaraelu? (I le lalolagi anamua sa masani ona faaoga povi e selesele ai le saito. E savavali ia povi i le saito, ma ua tuu eseseina ai le aputi mai le saito. Sa lelea ese le aputi ae nofo na o le saito. O malo e tetee ia Siona o le a faapotopotoina i latou e pei o fusi saito ma solia e Isaraelu.) Pe mafai faapefea ona faatusatusa leni tuueseese o aputi o saito mai le saito i le tiute-tauave o Isaraelu i aso e gata ai mo le faia o galuega faafaifeautalai i le lalolagi atoa? (Tagai MFF 29:7; 33:5–7.)
- O ai sa faatatau i ai le valoaga a Mika i le Mika 5:2–4? (Ia faatusatusa leni valoaga ma le tala o lona faataunuuina e pei ona i ai i le Mataio 2:4–6.)
- O le a se mea o lo o faatusa i ai tagata o Ieova e pei ona taua i le Mika 5:7? Pe mafai faapefea ona faatusatusa le sau po o le ua e pau i luga o le mutia ma le tulaga o tagata o le ekalesia i le feagai ai ma tagata o le lalolagi? O le a se mea e te manatu sa faauiga i ai le faamatalaga a Mika i lona faapea mai o le a le faatalitali le sau “mo le fanau a tagata”? (E pei lava ona le mafai e tagata faaletino ona taofia le sau po o le ua mai i le pau ifo, ua faapea foi ona leai se mea e taofia le galuega a le Alii mai le agai i luma i le lalolagi atoa.)
- O le a se mea ua faatusa i ai tagata o Ieova i le Mika 5:8? O le a se mea ua ta’u mai i leni faatusa e uiga i le malosi ma le mana o le galuega a le Alii? (E pei lava ona le mafai e se lafu mamoe ona taofia se liona talavou, ua faapea foi ona leai se mana i le lalolagi e mafai ona taofia le galuega a le Alii.)

I le 1842, sa faapea mai le perofeta o Iosefa Samita, “e leai se lima le paia e mafai ona ia taofia le galuega mai le agai i luma; atonu e oo mai sauaga, taupulepule faatasi tagata leaga, faapotopoto vaegaau, atonu e faia ni faamatalaga sese, peitai o le a agai pea i luma le upu moni a le Atua, i se tulaga mamalu, ma le le faalagolago seia oo atu i konetineta uma, asiati atu i nofoaga uma, ma oo atu i atunuu uma, ma faalogoina e taliga uma, seia oo ina faataunuuina faamoemoega o le Atua, ma o le a fetalai mai Ieova Silisiliese ua maea le galuega” (*History of the Church* 4: 540).

- Pe mafai faapefea ona fesoasoani mai ia i tatou le Mika 6:6–8 i taimi e lofituina ai i tatou i mea o loo faamoemoeina mai ia te i tatou?

- Ina ua uma ona vavalalo e uiga i le galuega a le Alii i aso e gata ai, o le a se faaiuga sa faia e Mika e uiga i le natura o le Atua? (Tagai Mika 7:18–20.) O a ni fuaitau i nei fuaiupu e mafai ona faatatau i mea na faia e le Alii i tagata o Nineva? O le fea o ia fuaitau e mafai ona faatatau i mea e faia e le Alii ia i tatou?

Faaiuga

Ia tuuina atu lau molimau e alofa le Alii i lana fanau uma ma ua i ai ia i tatou, o Isaraelu o aso e gata ai, le tiutetauave tele o le tufatufa atu o lona alofa ma upu moni o le talalelei i tagata uma. Ia fai atu i tagata o le vasega e faamatala mai mea na latou aoaoina mai ia Iona ma Mika.

## Manatu Faaopoopo e Aoa Atu Ai

O mataupu o lo o taua i lalo e faaopoopo i le ootoga o le lesona fautuaina. Atonu e te manao e faaoga se tasi o nei manatu pe sili atu foi e avea o se vaega o le lesona.

### 1. E tatau i alii talavou uma e agavaa ma malolosi ona saunia e faia se misiona.

Ia talanoaina le faamatalaga lenei a Peresitene Spencer W. Kimball:

“Afai ou te talosaga atu mo nisi faifeautalai, ou te le o talosaga atu mo ni tagata ua leai ni molimau po o faifeautalai e le agavaa. O lo o ou talosaga atu ina ia tatou vave amata ma aoaoina o tatou faifeautalai i se auala sili atu ona lelei i totonu o paranesi uma ma uarota uma i le lalolagi. O se isi lena o lu’i—ia mala-malama tagata talavou, o se faamanuiaga sili le alu i se misiona ma e tatau ona maloloina lelei i le tino, mafaufau, i la le agaga, ‘o le Alii e le mafai ona vaai atu i le agasala ma faatagaina ai sina mea itiiti lava’ . . .

“E masani lava ona tuuina mai le fesili e faapea: Pe tatau ea i alii talavou uma ona faia se misiona? Ma ua tuuina mai e le Alii le tali. O lea tali o le “Ioe.” E tatau ona faia e alii talavou uma se misiona” (“O le Taimi E Liliu Ai le Lalolagi,” *Liahona* Novema, 1974).

### 2. O le tulaga manaomia o ulugalii faafaifeautalai

Ia talanoaina le faamatalaga lenei mai ia Elder David B. Haight:

“I le avea ai ma sui o le Au Uso, ou te tuuina atu ai se valaau mo ulugalii ua litaea ina ia mafaufau loloto e uiga i le faia o se misiona. Matou te manaomia tele ni ulugalii e fesoasoani i le foia o matou tulaga manaomia . . . e itiiti ifo i le 50% o talosaga o ulugalii faifeautalai mai [o tatou] peresitene o misiona ua faatutumu . . .

“Ua faamoeome le au uso o le a tele ulugalii o le a faaavanoa e i latou i latou lava mo le auauna atu i le ekalesia. E matua tele le tulaga manaomia! E tusa ma le selau o afe tagata fou ua auai i le ekalesia i tausaga taitasi, ma e tatau ona latou faalogo i se leo alofa o le lagolago ma le faamafanafanaga mai tagata o le ekalesia ua i ai le tomai.

“O le fuaitau taua soo, ‘Ou te alu i mea e te tofia, le Alii e’ (*Viiga*, nu. 169), e tatau ona sili atu i lo na o se viiga tatou te usuina i Aso Sa. E tatau ona avea ma a tatou lava tatalo le faatuatua a o tatou auauna atu i soo se mea o lo o manaomia ai i tatou e le Alii” (“Couple Missionaries” ‘A Wonderful Resources,’ *Ensign* Feb. 1996, 7, 12).

# “Ta te Osifeagaiga ma Au i le Amiotonu”

## Lesona 34

Hosea 1–3; 11; 13–14

---

**Faamoemoega** Ina ia fesoasoani i le vasega ia malamalama o le Alii e alofa ma alofa mutimutivale ma o le a ia faamagaloina i tatou pe a tatou salamo ma toe foi atu ia te ia.

---

### Sauniuniga

1. Suesue ma le agaga tatalo mau nei:
  - a. Hosea 1–3. I le faaaogaina o le faatusa i se tane faatuatua ma se ava mulilua, sa faamatala e Hosea le sootaga i le va o le Alii ma Isaraelu.
  - e. Hosea 11; 13–14. Ona o lona alofa i ona tagata, sa faaauau pea e le Alii ona valaau atu ia Isaraelu e salamo ma toe foi atu ia te ia.
2. Mau faitau faaopoopo: O le Hosea atoa.
3. Afai o lo o e faaaogaina le gaoioiga e faatosina mai ai, ia tusia fuaitau nei o lo o i lalo i ni fasipepa a o le i faia le vasega. Afai e toalaiti lau vasega, saunia ia tofu le tamaitiiti ma le pepa.

“O fanau a Isaraelu e pei o le oneone o le sami” (Hosea 1:10)

“Ou te liligi atu lo’u ita faapei o le vai ia te i latou” (Hosea 5:10)

“O le Alii . . . e afio mai ia te i tatou e faapei o le ua” (Hosea 6:3)

“E sau o ia e pei o se aeto” (Hosea 8:1)

“O Isaraelu o le vine ia e mafala” (Hosea 10:1)

“E tupu ae foi le faamasinoga e pei o laau oona i utu o fanua” (Hosea 10:4)

“E avea i latou e pei o le puao i le taeao” (Hosea 13:3)

“Ou te oso atu ia te i latou e pei o se urosa ua avea ma ana tama” (Hosea 13:8)

“E pei o se perosi lauolaola a’u nei” (Hosea 14:8)

---

### Faalautelega Fautuaina o le Lesona

Gaoioiga e  
Faatosina Mai Ai

Atonu e te manao e faaaoga se tasi o gaoioiga nei (po o sa oe lava gaoioiga) e amata ai le lesona.

Ia tufatufa atu fasipepa sa e saunia mo tagata o le vasega (tagai i “Sauniuniga” i luga). Faamatala atu o nei fasi fuaitau taitasi o ni faatusatusaga mai le tusi a Hosea. Ia tuu atu i tagata o le vasega ua maua pepa e faitau leotele atu ma fautua mai i se uiga sa’o mo le faatusatusaga. Mo se faataitaiga, o le faapea mai o se tasi e “pei o se liona” e mafai ona faaalua ai le malosi ma le taufaafefe.

- Aisea e te manatu ai na faaoga e Hosea ma isi perofeta faatusatusaga? (E faatusatusaga ai ni manatu faigata ma ni manatu faigofie po o le sili atu foi ona masani ai e avea ma tulaga e sili ona malamalama ai tagata o lo o aoao. O faatusatusaga foi e mafai ona fesoasoani e maua ai le tele o faamatalaga auiliili i ni nai upu itiiti.)

Faamatala atu i le faaopoopoga la i nei faatusatusaga laiti, sa faaoga foi e Hosea ni faatusatusaga uumi, e taua o faataoto po o faatusa (faataoto o le upu o lo o faaoga i mau). O le tusi o Hosea o lo o i ai ni faatusatusaga e fesoasoani tatou te malamalama ai i le fegalegaleaiga i le va o Iesu Keriso ma ona tagata.

Mau Talanoaina  
ma le Faaogaina

A o e aoaoina atu nei mau, ia talanoaina pe faapefea ona faaoga i le olaga i aso taitasi. Uunai tamaiti o le vasega e faamatala ni aafiaga e faatatau i mataupu ua taua i le mau.

### **1. I le faaogaina o le faataoto i se tane faatuatua ma se ava mulilua, sa faamatala e Hosea le sootaga i le va o le Alii ma Israelu.**

Aoao atu ma talanoaina le Hosea 1–3. Afai e te le o faaogaina le gaioiga e faatosina mai ai, faamatala atu le uiga o le faataoto a o le i amataina le talanoaga.

O se tasi o faataoto faaoga soo i mau o lo o faamatala mai ai le Alii o le faatoa-faiava (po o le tane) ma ona tagata o le feagaiga o le faatoanofotane (po o le ava). O le Hosea 1–3 o lo o malosai ai le faaogaina o lenei faataoto, le faatusatusaina o le tapuai o Israelu i tupua ma le mulilua. O nei mataupu o lo o suitulaga ai le perofeta o Hosea i le Alii o se tane, ao Komeri o lo o sui ia Israelu o se ava.

- I le tusi a Hosea, o le sootaga i le va o le Alii ma Israelu (ma le Ekalesia i ona po nei) o lo o faatusatusa i le sootaga i le va o le tane ma le ava. O le a le mea o lo o aoaoina mai e lenei faatusatusaga e uiga i le vaega o a tatou tautinoga ma le alofa o lo o moomia e le Alii mai ia i tatou?
- O a ni aualea e mafai ai ona faatusatusa tagata Israelu i aso ua mavae ia Komeri, lea ua faamatalaina o le “ava talitane”? (Tagai Hosea 1:2–3; 2:5, 13. Na tuua e Komeri lona toalua ae faatasi atu i e sa mananao ia te ia; sa galo ia Israelu le Alii ma ua aveia ma tagata leaga.)
- O ai po o a foi mea o lo o “mananao” ai tagata Israelu—o mea o lo o mafua ai ona liliuese tagata mai le Alii? (O isi atua, meaai, ma mea a le lalolagi.) O a mea e mafai ona aveeseina mai i tatou mai lo tatou naunautai e mulimuli atu i le Faaola?
- O ai na tuuina atu i ai e ava mulilua le faafetai mo meaai ma lavalava? (Tagai Hosea 2:5.) O ai na faafetaia e tagata Israelu ona o le elele faamanuiaina o lo o latou nonofo ai? (Tagai Hosea 2:5, 12; i o latou atua sese po o tupua.) E faapefea e tagata i ona po nei ona tuuina atu le faafetai i atua sese mo faamanuiaga o lo o latou mauaina?
- Sa faapefea ona faamanatu atu e le tane i lana ava, o ia—ae le o ē o lo o faanau i ai—na tuuina atu ia te ia meaai, vai ma isi oloa? (Tagai Hosea 2:8–9.) O a ni aualea ua saunia ai e le Alii ni faamanuiaga mo oe i ni mea o lo o e manao-mia ma faamanuiaga faaleagaga? E faapefea ona faaalua la tatou faafetai i le Alii mo faamanuiaga ua ia tuuina mai ia i tatou?
- O a ni uiga na faaalua e le tane i lana ava lē faatuatua o lo o taua i le Hosea 2:6–13? O le a le mea na ese ai nei uiga faaalua i le fuaiupu 14–23? (Ia faamanino atu e ui lava ina le faatuatua ina le ava, ae sa alofa pea i ai lana tane ma manao e toe foi mai ia te ia. E faapena foi, e alofa le Alii i ona tagata ua se ese, ma o lo o finagalo o ia ina ia latou toe foi mai ia te ia.)

Sa faamatala mai e Elder Henry B. Eyring: “O se tala lenei o le alofa. O se tala lenei i se faaiipoipoga i le feagaiga ua fusia i le alofa . . . ma ua mausali. O le Alii, lea sa faamanuiaina a’u ina ia faia lenei feagaiga, e alofa ia te a’u, faapea foi ma oe, . . . o lona mausali ou te maofa ai pea, ma ua ou manao ma lo’u loto atoa ina ia ou faataitai i ai” (*Covenants and Sacrifice* [address delivered at the Church Educational System Symposium, 15 Aug. 1995], 2).

- O le a le mea na folafola atu e le tane i lana ava pe a ia toe foi mai ia te ia? (Tagai Hosea 2:19.) O le a le mea na folafola atu e le Alii i ona tagata pe afai latou te salamo ma toe foi atu ia te ia? (Tagai Hosea 2:20, 23.) Aisea e taua ai lenei folafolaga?
- I le Hosea 3:1–2, sa faatauina e le tane lana ava mai le sa faananau ia te ia (atonu o le a e manao e faamatala atu o tu ma aganuu i le Feagaiga Tuai, o fafine sa pei lava o ni fanua ma e mafai ona faatau mai pe faatau atu foi). O le a le mea na manao le tane e fai e lana ava ina ua uma ona ia faatauina mai o ia? (Tagai Hosea 3:3.) O le a le mea sa ia folafola atu ia te ia? O le a le mea na “faatauina” ai i tatou taitoatasi e Iesu Keriso? (Tagai 1 Peteru 1:18–19.) O le a le mea o lo o finagalo Iesu Keriso tatou te faia?

## **2. Ona o lona alofa i ona tagata, o lea sa faaauau ai pea ona valaau atu le Alii ia Israelu e salamo ma foi mai ia te ia.**

Ia aoao ma talanoaina le Hosea 11; 13–14.

I le tusi atoa a Hosea, o loo inosia ai e le Alii le fanauga a Israelu ona o a latou agasala maoae. Ina ua maea ona faamalamalama mai e le Alii e ala mai ia Hosea, le ave faatagataotauaina ma le faatafunaga e oo mai ona o le amioleaga o Israelu, ona ia toe valaaulia lea o lona nuu e salamo ma toe foi atu ia te ia.

- O le tasi faatusa o lo o faaoga soo i mau e faamatala ai le fegalegaleaiga i le va o le Alii ma ona tagata o le tulaga lea i le va o le matai ma le manu. O lo o faaoga lenei faatusa i le Hosea 11:4. O le a se mea ua tatou aoaoina mai lenei faatusatusaga i lagona o le Alii i ona tagata? (Tagai foi Hosea 11:7–9. ‘Ia manatua o le Faaliliuga a Iosefa Samita i le fuaiupu e 8 o lo o faapea mai sa liliu atu le loto o le Alii i Israelu ae le o ia lava.’)
- O le tele o taimi sa faamanatu ai e le Alii i tagata Israelu le auala na faasaoina ai o latou tuua mai le tafeaga i Aikupito (Hosea 11:1; 12:9, 13; 13:4–5). Mata o le a se mea e faatusa i ai lenei mea na tupu? (Tagai Hosea 13:14. Ao faasaolotoina e le Alii le fanauga a Israelu mai le nofopologa i Aikupito, e faapena foi ona ia faasaoina i latou—ma tagata uma o loo o mai ia te ia—mai le agasala ma le oti.)
- O le a le mea o lo o moomia e faia e tagata Israelu e toe foi atu ai i le Alii ma faamanuiaina? (Tagai Hosea 12:6; 14:2–3. E manaomia lo latou salamo mai agasala ma tetee atu i atua sese sa latou tapuai atu i ai.) O le a le mea na folafola atu e le Alii ia i latou pe a latou salamo? (Tagai Hosea 14:4–7.) O le a le mea sa folafola mai e le Alii o le a ia faia pe a tatou salamo i a tatou agasala?
- E faapefea ona fesoasoani ia i tatou faataoto o lo o i le tusi a Hosea ia tatou malamalama i lagona o le Faola ia i tatou?

---

Ia molimau atu ao faatalitali faamanuiaga a le Alii mo i latou o lo o tausia tula-fono, e tumau pea lona alofa i tagata uma. E tusa lava pe tatou te o ese mai ia te ia e ala i agasala, e alofa pea le Alii ia i tatou ma e finagalo o ia tatou te salamo ma toe foi atu ia te ia. Ia uunaia tagata o le vasega e faatuatua i le Alii.

---

## **Manatu Faaopoopo e Aoao Atu Ai**

O mataupu o lo o taua i lalo e faaopoopo i le ootoga o le lesona fautuaina. Atonu e te manao e faaoga se tasi o nei manatu pe sili atu foi e avea o se vaega o le lesona.

### **1. “O le alofa ou te loto i ai, ae le o le taulaga” (Hosea 6:6)**

I le Hosea 6:6 sa faapea atu ai le Alii i Isaraelu, “O le alofa ou te loto i ai ae le o le taulaga; ia iloa foi le Atua e sili lea i lo’u manatu i taulaga mu.” I le taimi o lana talaiga muamua, sa faalua ona faatatau e Keriso lenei fuaiupu i tali na tuuina mai e tagata faitio mai Faresaio (Mataio 9:13; 12:7). A maea ona iloilo fuaitau o lo o i mau nei e lua (Mataio 9:10–13; 12:1–8), ona talanoaina lea o uiga o nei fuaiupu.

### **2. “Isaraelu e, ua malaia oe ia te oe” (Hosea 13:9)**

I le taimi o le talaiga a Hosea, sa osofaia ai le Malo i Matu (Isaraelu) e Asuria, lea na latou faatafunaina le malo ma ave faatagataotauaina tagata. O le mea moni lava, o Asuria na faatamaia Isaraelu. Ae sa faapea mai le Alii, Isaraelu e, ua malaia oe ia te oe” (Hosea 13:9).

- O le a le itu sa faatafunaina ai e Isaraelu ia lava? O le a le faamoemoe e tasi o Isaraelu mo le faaolataga ina ua uma ona faatamaia lo latou malo? (Tagai Hosea 13:9–10; 14:1.) E mafai faapefea i le mulimuli ia Iesu Keriso ona pui-puia i tatou mai le faatafunaga faaletino ma le faaleagaga?

### **3. Salamo**

Afai o maua, atonu o le a e manao e faaali le “Salamo: E le i Tuai Lava,” o se ata e ono minute mai le *Afiāfi Faaleaiga Faaopoopoga o Vitio 2* (5X736).

# E Faaali le Finagalo o le Atua i Ana Perofeta

Lesona  
**35**

*Amosa 3:7–9; Ioelu 2–3*

---

**Faamoemoega** Ina ia aoao tagata o le vasega, o aso e gata ai, e faaalua e le Alii ana mealilo i ana perofeta ma liligi ifo ai lona Agaga i tagata uma.

---

- Sauniuniga**
1. Suesue ma le agaga tatalo mau nei:
    - a. Amosa 3:6–7. Sa aoao atu e Amosa e faaalua e le Alii ana mealilo po o lona finagalo i ana auauna o perofeta.
    - e. Amosa 7:10–17; 8:11–13; 9:8–15. Ua valaauina Amosa e le Atua e avea ma perofeta (7:10–15). Sa ia valoia le ave faatagataotauaina ma le faataapeapeina o Isaraelu (7:16–17; 9:8–10). Sa ia valoia o le a oo mai se oge o le faalologo i afioga a le Alii (8:11–13). Sa ia valoia foi o aso e gata ai o le a toe faatuina ai Isaraelu ma avea ma tagata sili atu (9:11–15).
    - i. Ioelu 2; 3:16–17. Sa valoia e Ioelu taua ma mala i aso e gata ai (2:1–11). Sa ia valaau atu i tagata ina ia salamo (2:12–14; ia manatua o le Faaliliuga a Iosefa Samita i le fuaiupu 13 ma le 14 o lo o faamatala mai ai o tagata e tatau ona salamo ae le o le Alii). Sa valoia foi e Ioelu o le a faamanuia e le Atua ona tagata i aso e gata ai ma tuuina atu lona Agaga i o latou luga (2:15–32; 3:16–17).
  2. Mau faitau faaopoopo: Talafaasolopito o Iosefa Samita 1:41; Mataupu Faavae ma Feagaiga 1:14–28, 37–38.
  3. Afai e te faaaogaina le gaoioiga e faatosina mai ai lona lua, atonu e te manao e i ai se isi e taina le viiga. Atonu foi e te manao e valaaulia se tagata o le vasega e faamatala faapuupu'u atu se fautuaga talu ai nei a le perofeta.
  4. Afai e mafai, ia ave ane se ata o le perofeta soifua.
- 

## Faalautelega Fautuaina o le Lesona

Gaoioiga e Faatosina Mai Ai Atonu e te manao e faaaoga se tasi o gaoioiga nei (po o sa oe lava gaoioiga) e amata ai le lesona. Filifili gaoioiga e sili atu ona talafeagai mo le vasega.

1. Ia fetufaai atu le tala leni ma tagata o le vasega:

“A o avea a’u ma ava ma se tina talavou, sa faaluina e lo’u toalua le lua tausaga i le fuavaa o le ea Amerika. Sa matou nonofo i fale o le militeli i Long, Niu Ioka. A o tausia la maua fanau laiti, e masani ona ou talatalanoa i o matou tuaoi e faimalaga mai i atunuu eseese o le lalolagi. I se tasi aso sa ma talanoa ai ma se tasi o tuaoi e uiga i lo matou talitonuga, sa ese ni ona uiga sa faaalua e uiga i le Ekalesia a Iesu Keriso o le Au Paia o Aso e Gata Ai.



“Sa ou talanoa manino i ai e uiga i le Toefuataiina, ma sa ou faamatala foi i ai o lo o i ai se perofeta soifua a le Ekalesia toefuataina a Iesu Keriso i ona po nei. O le mea lea na amata ai ona faaosofia lona naunau e talanoa, ma sa ia manao e iloa mea sa fai mai ai le perofeta. A o ou talanoa atu i ai e uiga i le Mataupu Faavae ma Feagaiga ma faaaliga i ona po nei, sa ia faapea mai, “Ae o le a le mea na ia fai mai talu ai nei?” Sa ou tauina atu ia te ia konafesi aoao a le Ekalesia faatasi ai ma lomiga tai masina o lo o i ai se savali mai le perofeta. Ma sa ia matuai fiafia lava. Sa ou lagona le maasiasi ona ua ou tauina atu ou te le i faitauina le savali talu ai nei. Sa ia faaiuina la ma talanoaga i lona faapea mai, ‘ O le uiga o lau tala e i ai la outou perofeta soifua ae e te le iloa le mea na ia fai mai ai?’” (Janette Hales Beckham, “Lagolagoina o Perofeta Soifua,” *O le Liahona*, Iulai 1996, 100).

- Afai e fesiligia oe e se tasi pe o le a le mea sa saunoa mai ai le perofeta soifua talu ai nei, pe mafai ea ona e tali atu i lena fesili?

Faamatala atu o lenei lesona o lo o faamanino mai ai le taua o le faalogologo ma le mulimuli i le perofeta soifua.

2. Ia fai atu i tagata o le vasega e usu le pese “Ia Viia Oe le Atua” (*Viiga*, nu. 10). Faamatala atu e taua tele mo i tatou le aoao i fautuaga mai lo tatou perofeta soifua. Ia tofi se tagata o le vaega e fetufaai mai ni fautuaga na tuuina mai talu ai nei. Po o le tofi o se tagata filifilia o le vasega e iloilo manino ni fautuaga talu ai nei mai le perofeta.

## Mau Talanoaina ma le Faaaogaina

A o e aoaoina atu nei mau, ia talanoaina pe faapefea ona faaaoga i le olaga i aso taitasi. Unai tamaiti o le vasega e faamatala ni aafiaga e faatatau i mataupu ua taua i le mau.

O Amosa o se leoleo mamoe mai Tikoia, o se taulaga laitiiti i le itu i saute o Ieruselema. Sa ia talai atu i tagata o le malo o Isaraelu mai le tusa o le 800 i le 750 T.L.M. O le toatele o nei tagata sa liliuese. E alolofa i e mauoa ae inoino i e matitiva, ma sa matuai faamaaaina lava i latou e oo lava i le oge po o faama'i e le i mafai ona faamaualaloina i latou. A o fesouaina Amosa i tagata ma a latou agasala, sa ia valoia nisi o faasalaga mamafa o le a oo ia i latou. E le gata i lea, ae sa ia faamamafaina foi o loo naunau le Atua e faamama soo se tasi o le a salamo, ma sa ia uunai malosi atu ai, “Ia outou saili le Alii tou te ola ai” (Amosa 5:6). Sa valoia foi e Amosa aso e gata ai.

O le perofeta o Ioelu sa talai atu i tagata o le malo o Iuta. Tatou te le o mautinoa le vaitaimi na soifua ai, ae o ana valoaga e taua ia i tatou ona o le tele o ia valoaga e faatatau i aso e gata ai. Sa faaaoga e Ioelu faatusa mamana o ituaiga o sē e faatusa i ai le faatafunaga o le a aumaia e vaegaau ma le faamasinoga a le Atua i aso e gata ai. Sa valoia foi e Ioelu faamanuiaga sili i aso e gata ai, ma iloa ai o le Alii o le a ia “liligi ifo [lona] agaga i luga i tagata uma” (Ioelu 2:28).

### 1. Ua aoao atu e Amosa, e faaali mai e le Alii ana mealilo i ana auauna o perofeta.

Aoao atu ma talanoaina le Amosa 3:6–7.

- E faapefea ona tatou faalogoina le upu a le Alii i o tatou vaitaimi? Aisea na aoao mai ai le perofeta o Amosa e uiga i le taua o perofeta? (Tagai Amosa 3:7.)  
‘I le Faaliliuga a Iosefa Samita, o le upu *iloa* o lo o faaaoga i le fuaiupu 6 ae le o

le *faia* ae o le upu *seiloga* o lo o faaoga i le fuaiupu 7 ae le o le *ae.* E faapefea ona faamanino mai e nei suiga le uiga o le fuaiupu? Ia faaali atu o le Faaliliuga a Iosefa Samita lava ia o se faataitaiga o le finagalo o le Alii ua faaali atu i perofeta mo lo tatou lelei.

- O le a se mea o lo o aoao mai i le Mataupu Faavae ma Feagaiga 1:37–38 e uiga i se faaaloalo e tataua ona ia i tatou mo savali a perofeta? (Faaali atu se ata o le perofeta soifua.) E pei ona ta’ua i le Mataupu Faavae ma Feagaiga 21:4–5, o a fautuaga ma poloaiga na tuuina atu e le Alii i le Au Paia i le aso na faatulagaina ai le Ekalesia? O a faamanuiaga na ia folafola atu pe afai o le a faia nei mea e le Au Paia? (Tagai MFF 21:6.) Pe ua e vaai ua faataunuaina leni folafolaga i lou lava olaga a o e usitaia fautuaga a perofeta?

## 2. Ua valoia e Amosa Isaraelu i aso ua mavae ma aso e gata ai.

Aoao atu ma talanoaina le Amosa 7:10–17; 8:11–13; 9:8–15.

- Aisea na faatonuina ai e Amasia, o se ositaulaga i le malo o Isaraelu, Amosa e tuua le laueleele? (Tagai Amosa 7:10–17. Sa valoia e Amosa o le a oo mai le amioleaga i tagata ma lo latou tupu. Sa le i fia faalogo Amasia ma ona tagata i le sao e uiga i a latou amioga leaga.) O a mea o loo aoao mai e fuaiupu e 14 e oo i le 17 e uiga i le perofeta o Amosa? (E ia t e ia le amiotonu ma le lototele. Na te le suia lava se mea e ta’uina atu e le Alii ia te ia ae sa ia faaauau pea ona valoia o le a oo mai le leaga i le nuu pe afai latou te le salamo.)
- I augatupulaga uma o taimi, aisea e teena ai e le tele o tagata savali a perofeta? O le a le mea na valoia mai e Amosa o le a oo i ai Isaraelu ona o lo latou teena o fautuaga a perofeta? (Tagai Amosa 8:11–13. O le oge faaleagaga po o le liliuese o mea na o le a oo i ai.) O a ni mea e oo mai ia i tatou faaletagata pe afai tatou te teena fautuaga a perofeta?

O le valoaga a Amosa e uiga i se oge faaleagaga sa faataunuina i le fanauga a Isaraelu ina ua mavae taimi o Malaki, le perofeta mulimuli o le Feagaiga Tuai. O leni vaitaimi na faagata i le 400 tausaga mulimuli ina ua valaauina Ioane le Papatiso e teuteu le ala mo Iesu Keriso. E faatatau foi le valoaga a Amosa i le taimi o le Liliuese Tele, le senituri o le pogisa faaleagaga lea sa sosoo ai ma le maliu o le Aposetolo a le Faaola ma faaiuina i le toefuataina o le talalelei e ala mai i le Perofeta o Iosefa Samita.

- O a ni auala e mafai ai ona faatusatusa le le faalogo i le upu a le Alii i se oge? O a ni faamaoniga i ona po nei o lo o e vaaia i tagata o lo o fegasoloai “mai lea vasa i lea vasa” i le sailia o afioga a le Alii? E faapefea ona faatusatusa le mauaina o faamanuiaga o le toefuataina o le talalelei i se aiga?
- O le a le savali o le faamoemoe o lo o faai ai le tusi a Amosa? (Tagai Amosa 9:8–15. O le a le faaumatia uma le fanauga a Isaraelu, o le a faataapeape i atunuu uma, ma i le aso mulimuli, o le a toe faatuina ai ma avea ma tagata sili. Ia manatua o le faaiuga o le fuaiupu e 9, o lo o faamanino mai ai e le Alii lona manatu mamafa i tagata taitasi o le fanauga a Isaraelu.)

## 3. Ua valoia e Ioelu o le a faamanuia e le Atua ona tagata i aso e gata ai ma liligi ifo lona Agaga ia i latou.

Aoao atu ma talanoaina le Ioelu 2; 3:16–17.

Sa faamatala mai e le perofeta o Ioelu ni mea o le a tutupu i aso e gata ai ma o le a muamua i le Afio Faalua Mai. Sa ia faamatalaina se savaliga tele o vaegaau o le a latou faatupuina le faatamaia tele ona o le amioleaga o tagata (Ioelu 2:1–11). Sa ia valaau atu ia Isaraelu e salamo ma foi atu i le Alii, folafola atu o le a faatasi le Atua ma i latou, ma faamatalaina le manumalo ma le faaolaina o Isaraelu (Ioelu 2:12–32).

- Ia tusi le *Ioelu 2:12–32* ma le *Ioelu 3:16–17* i luga o le laupapa. Ia fai atu i tagata o le vasega e iloilo nei fuaitau ma saili tali i fesili o lo o i lalo:  
O a valaaulia ua tuuina atu e le Alii ia i latou o loo soifua i aso e gata ai?

Tusi le upu *valaaulia* i luga o le laupapa. A o taua e tagata o le vasega fuaitau, ia tusia ni upu autu mai valaaulia taitasi o lo o i luga o le laupapa. Ia faamalosia tagata o le vasega ina ia faailoga nei fuaitau i a latou tusitusiga paia. O nisi nei o valaaulia e mafai ona aofia ai:

#### *Valaaulia*

- a. Ia outou toe foi mai ia te au ma o outou loto atoa” (Ioelu 2:12).
  - e. “Ia outou saei o outou loto” (Ioelu 2:13, o lona uiga ia gausia lou loto ina ia maualalo).
  - i. “Toe foi i le Alii lo outou Atua” (Ioelu 2:13).
  - o. “Ia outou faapaiaina le faapotopotoga” (Ioelu 2:16).
  - u. “Le fanua e, aua e te fefe; ia e fiafia ma olioli” (Ioelu 2:21).
- O le a se mea o lo o fautuaina ai i tatou e nei valaaulia e uiga i le taua o le toe foi i le Alii ma le loto atoa? O le a se mea tatou te faia e faapaia ai i tatou lava ina ia agavaa i faamanuiaga ua folafola mai e le Alii?
  - Ia fai atu i tagata o le vasega e talanoaina le Ioelu 2:12–32 ma le Ioelu 3:16–17, ma sailia tali mo fesili nei: O a faamanuiaga ua folafola mai e le Alii ia i latou e mulimuli ia te ia i aso e gata ai?

Ia tusia le upu *Faamanuiaga* i luga o le laupapa. A o tau mai e tagata o le vasega fuaitau, ia tusia ni upu autu mai faamanuiaga taitasi i luga o le laupapa. Atonu o le a mananao tagata o le vasega e maka nei fuaitau i a latou tusitusiga paia. O nisi nei o faamanuiaga e mafai ona aofia ai:

#### *Faamanuiaga*

- a. “E alofa ma alofa mutimutivale o ia, e telegese lona toasa, ua tele foi lona alofa, ma o le a ia aveesea le tiapolo mai ia te oe” (tagai Faaliliuga Iosefa Samita, Ioelu 2:13).
- e. O le Alii na te “alofa mutimutivale i ona tagata” (Ioelu 2:18).
- i. “O le Alii o le a ia faate’a mamao ia te outou o ‘au mai le itu i matu, (o lo o faamatala mai i le fuaiupu 1–11) i le nuu naumati ma le gaogao” (Ioelu 2:20).
- o. “Tou te aai lava ma maoona ai” (Ioelu 2:26).
- u. “Ou te i ai ia Isaraelu, . . . e le ma fou lo’u nuu e faavavau” (Ioelu 2:27).
- f. “Ou te liligi atu lo’u Agaga i luga i tagata uma” (Ioelu 2:28; tagai foi i le fuaiupu 29).
- g. O e matutua ma e laiti o le a maua valoaga, faia miti ma maua faaaliga (Ioelu 2:28).
- l. “O e valaau atu i le suafa o le Alii e faaolaina” (Ioelu 2:32).

- m. “E faataio foi le Alii mai Siona, e tulei ifo lona siufofoga ai Ierusalemā” (Ioelu 3:16).
- n. “O le Alii o le malu o ia o lona nuu” (Ioelu 3:16).
- p. “O le Alii o le . . . ma le olo o le fanauga a Isaraelu” (Ioelu 3:16).
- s. Tou te iloa foi o a’u o Ieova lo outou Atua, o le nofo i Siona” (Ioelu 3:17).
- O a mea o lo o aoao mai e nei faamanuiaga e uiga i tautinoga a le Alii i ona tagata o le feagaiga? e uiga i lona mana i tagata o lana Au Paia? e uiga i lona alofa? e uiga i o tatou matafaioi i aso e gata ai?
  - O le folafolaga a Ioelu sa faapea o le Alii o le a liligi mai lona Agaga i luga o tagata uma i aso e gata ai (Ioelu 2:28–29) o se mea matua eseese tele ma le oge sa faamatala mai e Amosa (Amosa 8:11–12). Na faamatala atu e le agelu o Moronae le valoaga a Ioelu ia Iosefa Samita ma sa ia tauina atu e le i taunuu ae ua lata ona taunuu (Talafaasolopito o Iosefa Samita 1:41). O a faaitaiga o nei mea ua e vaaia ua mafi i ai olaga o le autalavou ma tagata matutua i ona po nei?

### Faaiuga

Ia faamanino atu o se faamanuiaga sili le ola i aso e gata ai, ina ua faataunuuina le tele o valoaga ma ua i ai se taitai o se perofeta soifua. Ia faamalosiā tagata o le vasega e suesue ma le agaga tatalo upu a le perofeta soifua ma faaāoga ana fautuaga i o latou olaga.

### Manatu Faaopoopo e Aoao Atu Ai

O mataupu o lo o taua i lalo e faaopoopo i le ootoga o le lesona fautuaina. Atonu e te manao e faaāoga se tasi o nei manatu pe sili atu foi e avea o se vaega o le lesona.

#### 1. Avea ma e faatalatalanoa i Siona

- Sa lapataiina e Amosa tagata e uiga i le avea ma e “faatalanoa i Siona” (Amosa 6:1). O le a le uiga o le avea ma e faatalanoa i Siona? (Tagai 2 Nifae 28:19–24, 27, 29–30.) O a ni auala e mafai ai ona avea i tatou ma e faatalanoa i Siona i lenei vaitaimi? E faapefea ona puipuia i tatou mai lenei mea?

#### 2. “Ou te liligi ifo lo’u agaga i luga i tagata uma” (Ioelu 2:28)

- O mea uma na fausia i ona po nei mo femalagaaiga ma fesootaiga ua maua talu ona faatuina le talalelei. E faapefea ona fesoasoani nei atinae mo le faataunuuina o valoaga a Ioelu i le Ioelu 2:28–29? E fesoasoani faapefea nei atinae i le faalateleina o le galuega a le Alii i o tatou vaitaimi?

Atonu o le a e manao e faitau atu le faamatalaga lenei a Elder Joseph Fielding Smith e fesoasoani i tagata o le vasega ina ia malamalama i le fesoasoani sili ua maua mai nei mea mo le faatinoina o le galuega a le Alii:

“Ou te matuai talitonu ana faapea e leai le talalelei toefuataiina, ma leai foi se faatulagaga o le Ekalesia a Iesu Keriso o le Au Paia o Aso e Gata Ai, e leai ni leitio; e leai i vaalele, e leai foi ni suesuega matagofie i vailaau mo mai, faletalavai, eletise, ma le tele o isi mea ua faamanuiaina ai le lalolagi ona o nei suesuega. Ana faapea la e leai se toefuataiina ma se faatulagaga o le Ekalesia o le a le maua nei faamanuiaga, aua o nei mea e ō le Tisipenisione o le Atoatoaga

o Taimi lea e faaautu i le talalelei toefuataiina ma le faatulagaga o le Ekalesia, lea e oo atu ai le Agaga o le Alii i le lalolagi atoa. O musumusuga a le Alii ua oo atu i mafaufau o alii, e tusa lava pe latou te le iloa, a ua faatonuina i latou e le Alii. I lea itu, ua ia aumaia ai i latou i lana galuega ma lona faamoemoega ma lana amiotonu, i le taimi e finagalo i ai le Alii, o le a silisili i le laueleele.

“. . . Ou te le talitonu i se taimi faapea na te'ite'i ua oo mai nei mea ua maua i suesuega, pe faapea ua oo mai ona o le maualuga o le atamai ua maua e tagata i ona po nei nai lo i latou ua mavae. Ua oo mai ma o le a oo mai aua ua saunia le lalolagi mo le oo mai, aua ua finagalo i ai le Alii, ma ua liligi ifo lona Agaga i tagata uma” (in Conference Report, Oct. 1926, 117).

# O le Mamalu o Siona e Avea ma Matagofie Uma

Lesona  
**36**

Isaia 1–6

---

**Faamoemoega** Ina ia faamalosiā tagata o le vasega e aloese mai mea leaga o le lalolagi e ala i le tutu i nofoaga paia ma fesoasoani ia i latou ina ia latou maua le malosi mai le naunautai o Isaia e auauna atu.

---

**Sauniuniga** 1. Suesue ma le agaga tatalo mau nei mai le Isaia 1–6 o lo o talanoaina i le lesona lenei.  
2. Mau faitau faaopoopo: 2 Nifae 11.

---

## Faalautelega Fautuaina o le Lesona

**Gaoioiga e Faatosina Mai Ai** Atonu e te manao e faaoga se tasi o gaoioiga nei (po o sa oe lava gaoioiga) e amata ai le lesona.

Faamatala atu e masani ona faaoga e le Alii le manatu lava lea e tasi i le tele o taimi i tusitusiga paia. Ia tusia mau nei i le laupapa ma fai atu i tagata o le vasega e suesue po o a fautuaga na tuuina mai e le Alii e fesoasoani ia i tatou e onosaia ai faaososoga o aso e gata ai:

Mataupu Faavae ma Feagaiga 45:32

Mataupu Faavae ma Feagaiga 87:8

Mataupu Faavae ma Feagaiga 101:22

Ia tusi i luga o le laupapa *“Ia outou tumau ai i mea paia ma aua le liliu ese.”*

- O le a sou manatu, o le a le uiga o lenei fuaitau? (O tali e ono aafia ai le agavaa i taimi uma, naunau e i ai i nofoaga paia e le aunoa, filifili e aua le auai atu i nofoaga le paia, mautinoa o le a taitaiina oe e le Atua, ma le lagolagoina o le sao ma le paia.)

Faamatala atu i lenei lesona, o le a suesue ai e tagata o le vasega le mafuaaga o le faatonuina o i tatou e le Alii e tutu i nofoaga paia ma po o a foi nei nofoaga paia.

---

**Mau Talanoaina  
ma le Faaogaina**

A o e aoao atu mau ia o lo o taua i lalo, ia talanoaina pe faapefea ona faatatau i o tatou olaga i aso taitasi. Ia faamalosiā tagata o le vasega e fetufaai mai ni mea na tutupu e talitutusa ma aoaoga o lo o taua i mau.

“E matagofie upu a Isaia,” sa faaali mai e le Faaola a o ia poloiaina tagata Sa Nifae e saili i valoaga a Isaia (3 Nifae 23:1). O valoaga a Isaia o lo o taua soo i le Feagaiga Fou, Tusi a Mamona, ma le Mataupu Faavae ma Feagaiga nai lo upu a se isi lava perofeta. Sa ia valoia mai le tele o mea e uiga i le misiona a le Faaola i le lalolagi, e uiga i le faatafunaga ona o le leaga o Isaraelu, ma le misiona ma le taunuuga o tagata Isaraelu i aso e gata ai.

## 1. Ua faamatala e Isaia le tulaga e oo i ai le lalolagi i aso e gata ai.

- O le tele o lapataiga a Isaia ma valoaga e faatatau i lona taimi, le taimi o le tele o le amioleaga, ma lo tatou taimi. E faapefea ona avea tulaga o lo o faamatala mai i mau o lo o i lalo ma faamaoniga i le lalolagi i le taimi nei? (Atonu e te manao e tusia mau i luga o le laupapa ma tuu atu i tagata o le vasega e sailia.)
  - a. Isaia 1:3–5 (Fouvale i le Alii)
  - e. Isaia 1:11–15 (Sauniga Faalelotu e aunoa ma se uiga po o se faatuatua)
  - i. Isaia 2:7–8 (Tapuai i mea faalelalolagi ma le puipuiga faalevaegaau ae le o le Alii, ia manatua o solofanua ma kariota sa faaaoga e avea ma mea tau i aso ua tuanai)
  - o. Isaia 2:11–12 (Faamaualuga)
  - u. Isaia 3:5 (Sauaina o isi tagata ma le le faaaloalo i tagata matutua)
  - f. Isaia 3:9 (E le maasiasi i agasala)
  - g. Isaia 3:14–15 (O le manatu faatauvaai e matitiva ma le le manatu alofa ia i latou)
  - l. Isaia 3:16–24 (Faamamafaina o le lalelei faaletino i tupe faaalu o le amio-tonu ma le tagata lelei.)
  - m. Isaia 5:8 (O le tagata faaloloto ua naunau na te pulea ni mea se tele)
  - n. Isaia 5:11–12 (Ua saili atu i tuinanauga o le lalolagi a ua le saili le Alii ma lana galuega)
  - p. Isaia 5:20 (Ua faapea mai o mea leaga e lelei a o mea lelei e leaga)
  - s. Isaia 5:21 (Faatuatua ia te ia lava ae le o le Atua)
  - t. Isaia 5:24 (Inoino i tulafono ma le afioga a le Atua)
- O faapefea ona faataunuaina nei valoaga i nei ona po? (Tagai i manatu faa-poopoo e aoao atu ai mo le talanoaina o nisi o nei valoaga.)

## 2. Ua fautuaina e Isaia o e faatuatua e tutu i nofoaga paia.

- O a ni nofoaga o lo o ofoina mai ai le saogalemu mai tulaga o le lalolagi e pei ona taua e Isaia? O a nofoaga paia e tolu o lo o taua i le Isaia 4:5–6?
  - a. O fale uma e nonofo ai le mauga o Siona (aiga)
  - e. Faapotopotoga (siteki, uarota, ma paranesi; tagai foi i le MFF 115:5–6)
  - i. Tapeneko (malumalu)
- E faapefea ona avea le aiga ma se nofoaga paia e avea ma sulufaiga mai le leaga o le lalolagi? E faapefea ona avea siteki, uarota ma paranesi ma nofoaga paia o le sulufaiga? E faapefea ona avea le malumalu ma nofoaga paia ma sulufaiga? E faapefea ona fesoasoani nei nofoaga paia e tolu e saunia se puipu-iga mo oe mai mealeaga o le lalolagi?

Atonu o le a e manao e tusia le *Tutu i Nofoga Paia* i luga o le laupapa ona tusi lea i lalo ifo 1. *Aiga*; 2. *Siteki, Uarota ma Paranesi*; ma le 3. *Malumalu*. Ia lisiina i lalo faamatalaga a tagata o le vasega i lalo o ulutala taitasi.
- O a ni faamatalaga o loo faaaoga i le Isaia 4:5–6 e faamatala ai le auala e puipui ai i tatou e nei nofoaga paia e tolu?
  - a. “O se faapaologa i le aso mai le vevela o le la”
  - e. “O se nofoaga o le sulufaiga”
  - i. “O se fale [nofoga e lalafi ai po o se fale] mai le matagi ma le timu”

- O le tele o tusitusiga a Isaia o lo o i ai foi i le Tusi a Mamona. Tuu atu i tagata o le vasega e faitau le 2 Nifae 14:5 ina ia iloa ai upu o lo o faaopoopo i le Isaia 4:5. (O upu a Siona o lo o faaopoopo i ai.) O a ni mea ua faaopoopo e nei upu i lo tatou malamalama e uiga i lenei fuaiupu?
- O a valoaga e uiga i malumalu i aso ua mavae o lo o aofia i le Isaia 2:2–3? (O le toatele o tagata o le a o mai i le fale o le Atua, o le malumalu lea, ma naunau e tausi i tulafono a le Atua ma savavali i ona ala.) Aisea e te manatu ai na faamatalaina e Isaia le malumalu o le “mauga o le Alii”? (O perofeta i aso ua mavae e masani ona o atu i mauga e fetautalatalaa’i ai ma le Alii ma maua faatonuga mai ia te ia. Na te tuuina atu faaaliga ia i latou iina. E mafai ona tatou maua lea lava tulaga e tasi i le malumalu i le aso.)

### 3. Sa faamatalaina e Isaia le faapotopotoina o Isaraelu i aso e gata ai.

I le Isaia 5:26–29, o lo o faamatala ai e Isaia le faapotopotoina o Isaraelu i aso e gata ai. O le tagavai ua siitia ae o le Ekalesia a Iesu Keriso o le Au Paia o Aso e Gata Ai. O le “faaili” o le mapu lea po o le valaau, lea e valaaulia ai malo o le lalolagi e faapotopoto i le Ekalesia. O lenei faapotopotoga e televave ma malosi.

- E faapefea ona faataunuu le valoaga o le faapotopotoina o malo i le Ekalesia i ona po nei? (O faifeautalai faamisiona o lo o malaga atu i le lalolagi atoa e aoao atu le talalelei ma aumai tagata i le upu moni.) O le a se mea e fai e i tatou taitoatasi e fesoasoani ai i le faataunuuina o lenei valoaga?

### 4. Sa tali atu Isaia ma le naunautai i lona valaauga e avea ma perofeta.

Sa vaalauina e le Alii Isaia e avea ma perofeta e ala lea i se faaaliga na vaaia ai e Isaia le Alii i lona mamalu. O lenei faaaliga o lo o faamaumauina i le Isaia e 6.

- Sa faapefea ona faamatalaina e Isaia le mamalu o le Atua? (Tagai Isaia 6:1–4.) O le a le tali a Isaia ina ua ia vaai i le Alii? (Tagai Isaia 6:5. Sa lagona e Isaia le le agavaa i le silafaga a le Alii.) Sa faapefea ona faaali atu e le Alii i se faatusa o Isaia o lo o mama i ona luma? (Tagai Isaia 6:6–7.) Sa faapefea ona tali atu Isaia ina ua valaauina o ia e le Alii e avea ma perofeta? (Tagai Isaia 6:8.)
- I le taliaina o lona valaauga, sa faaaoga e Isaia upu lava ia sa faaaoga e le Faola ina ua Ia talia le avanoa e faataunuu ai le fuafuaga a le Tama Faalelagi mo le faaolataga o ana fanau (Aperaamo 3:27). O a ni tulaga atonu e mafai ona moomia tatou te tali atu ai i le Alii i upu lava ia e tasi? (O tali e ono aafia ai le taimi e valaauina ai i tatou e auauna atu i ni misiona, pe a valaauina i tatou e galulue i le Ekalesia, pe a valaauina i tatou e onosai i faaososoga faigata.)
- O le tele o mataupu o le tusi a Isaia o lo o faamaumau i le Tusi a Mamona, e pei o le mataupu lua e oo atu i le 6. O a ni mafuaaga na tuuina atu e le perofeta o Nifae i lona faaofiaina lea o tusitusiga a Isaia i ana faamaumauga? (Tagai 2 Nifae 11:8.)
- O le fea o nei savali mai mataupu a Isaia e ono maua ai e oe le fiafia? O le fea o nei savali o nei mataupu e te manatu e sili ona taua pe a faatusa ia te oe lava?

#### Faaiuga

O upu a Isaia o lo o aoao mai ai ia i tatou le tele o mea e uiga i aso e gata ai. E ala i le suesue i fautuaga a Isaia, e mafai ona tatou aoao i le auala e tutu ai i nofoaga paia ma tetee atu i le leaga o le lalolagi. E ala i le mulimuli i ana faataitaiga, e mafai ona sili atu lo tatou naunau e auauna i lo tatou Tama Faalelagi.



---

## Manatu Faaopoopo e Aoao Atu Ai

O mataupu o lo o taua i lalo e faaopoopo i le ootoga o le lesona fautuaina. Atonu e te manao e faaoga se tasi o nei manatu pe sili atu foi e avea o se vaega o le lesona.

### O isi iloiloga o valoaga a Isaia i le Isaia 1–6

*O le avea o a tatou amioga po o mea faalelotu e fai ma mea e taliaina e le Alii*

- E tusa ma le Isaia 1:11, 16–17, aisea na le taliaina ai e le Alii taulaga a tagata Isaraelu? (E ui lava ina taumafai tagata Isaraelu e avea ma tagata talitonu, a o o latou loto ua tau mamao lea mai le Atua. Tagai foi i le Mataio 5:23–24; Moronae 7:6–9.) Aisea e taumafai ai isi tagata e avea ma tagata talitonu e ui lava ina mamao o latou loto mai le Atua? Aisea e faatiga ai nei ituaiga o faaoleole i le Atua?

*O faamanuiaga o le faamagalo atu*

- Sa saunia e Isaia i ata matagofie se lua, e fesoasoani ia i tatou ina ia malamalama ai i le auala e mafai ai ona faamagalo atoatoa e le Alii i latou o e salamo. Sa ia faapea mai, “E ui lava ina pei o ofu mumu a outou agasala, e sisina ia e pei o le kiona, e ui lava ina mumu ia e pei o le ie ulaula, e avea e pei o fulufulu mamoe” (Isaia 1:18). E mafai faapefea ona fesoasoani nei ata ia i tatou pe a tatou agasala ma lagona ua mamao ma le Alii? (Tagai foi i le MFF 58:42.)

*Tetee atu i mea faalelalolagi*

- Sa saunoa mai Elder Joseph Fielding Smith o le valoaga i le Isaia 3:16–24 e faatatau lea i tagata o le Ekalesia i ona po nei, “faatatau i alii ma tamaitai” (*Answers to Gospel Questions*, tuufaatasi e Joseph Fielding Smith Jr., 5 vols. [1957–66], 5:174). E faapefea e tulaga o o tatou laei ona aafia ai lo tatou faaleagaga? O le a le uiga o le laei i laei talafeagai? O a ni tulaga e matautia ai le popole tele i o tatou laei ma o tatou foliga vaaia? (Tagai Alema 31:27–28.) E mafai faapefea ona tatou aoao atu fanau e aloese mai foliga faalelalolagi?

*Avea mea leaga ma mea lelei ae avea mea lelei ma mea leaga*

- Aisea na le aoga ai le naunau o Isaraelu e faailoga le lelei mai le leaga? (Tagai Isaia 5:20.) O a ni auala ua faaoga e tagata i aso nei e tau ai le leaga o le lelei ma le lelei o le leaga? O le a se mea tatou te faia e mautinoa ai o lo o tatou iloa le eseese i le lelei ma le leaga? (Tagai 2 Nifae 32:5; MFF 45:57.)

*“Popoto i o latou lava manatu”*

- O le a le uiga o le tala a Isaia ina ua ia fautuaina tagata e auau le “popoto i o latou lava manatu, ma fai ma tagata mafaufau i o latou lava taofi”? (Isaia 5:21). O le a le mafuaaga o lenei faafitauli? Aisea e matautia ai? E faapefea ona tatou puipuia mai ai?

*“Ua faaloaloa ai lona aao i luga ia te i latou”*

- O le a le savali o lo o faamanino mai i le Isaia 5:25; 9:12, 9:17, 9:21, ma le 10:4? Aisea e taua ai lenei savali? E faapefea ona e iloa le tonu o lenei savali?

# “Ua Faia e Ia Mea e Ofo ai”

Lesona  
**37**

*Isaia 22; 24–26; 28–30*

---

**Faamoemoega** Ina ia fesoasoani i le vasega e omai ia Keriso e ala lea i le iloa o nisi o mea matagofie sa ia faia.

---

**Sauniuniga**

1. Suesue ma le agaga tatalo mau nei:
  - a. Isaia 22:22. Ua tatala e le Faaola le faitotoa i le afioaga o le Tama Faalelagi.
  - e. Isaia 24:21–22. Ua faalia le alofa o le Faaola ia i latou i le falepuipui o agaga.
  - i. Isaia 25:1–4; 32:1–2. O le Faaola o le malosi ma le sulufaiga.
  - o. Isaia 25:6–9. O le a saunia e le Alii se taumafataga ma faaumatia le “ufiufi.”
  - u. Isaia 25:8. Ua tafiese e le Faaola o tatou loimata.
  - f. Isaia 26:19. O le a aumaia e le Faaola le Toetu.
  - g. Isaia 28:16. O le Faaola o lo tatou faavae mautu.
  - l. Isaia 29:4, 9–14, 18, 24. O le a toefuatai e le Faaola le talalelei i le lalolagi.
  - m. Isaia 30:19–21. E silafia e le Faaola o tatou tofotofoga ma taitaia o tatou ala.

---

## **Faalautelega Fautuaina o le Lesona**

**Gaoioiga e  
Faatosina Mai Ai** Atonu e te manao e faaoga se tasi o gaoioiga nei (po o sa oe lava gaoioiga) e amata ai le lesona.

Tau atu i tagata o le vasega e uiga i se tagata o lou aiga po o se uo sa ia faia se mea e ofo ai mo oe. Ia tofi tagata o le vasega e talanoa e uiga i ni tagata sa latou faia ni mea e ofo ai mo i latou. Fai atu ia i latou e faamatala mai o latou lagona i na tagata. Faamatala atu o le lesona leni o le a faamanino atu ai nisi o mea matagofie sa faia e le Faaola.

---

## **Mau Talanoaina ma le Faaogaina**

A o e aoaoina atu mau nei o lo o taua i lalo, ia talanoaina le auala e faatatau ai i o tatou olaga i aso taitasi. Ia faamalosi tagata o le vasega e fetufaai mai ni mea na tutupu e talafeagai ma aoaoga o lo o i mau.

Faamatala atu o le perofeta o Isaia sa ia faia le tele o ana aoaoga i se gagana faafaatusa. O leni gagana e le mafai ona aoa sa’o atu, o lona uiga e tataua ona tatou suesue ma mafaufau i upu a Isaia e iloa ai le tonu o mea sa latou aoaoina.

O nisi o gagana faafaatusa matagofie loloto e faatatau i le Faaola, o lē o loo faatutumumu i ai leni lesona. Atonu e te manao e tusi i luga o le laupapa “*E igoa foi o ia o le Silisili ese*” (Isaia 9:6). A o outou talanoaina valoaga nei e uiga i le Faaola, ia ootoo taitasi i luga o le laupapa.

### **1. Ua tatala e le Faaola le faitotoa i le afioaga o le Tama Faalelagi.**

Talanoaina le Isaia 22:22

- Ua faapea mai le Isaia 22:22 o lo o i le Mesia “le ki o le fale o Tavita.” O le faatusatusaga lea o le faapea mai o le Faaola o lo o i ai le mana e ulufale ma ulufafo ai le tagata i le afioaga o le Tama Faalelagi. (Tagai foi i le Faaaliga 3:7–8; 2 Nifae 9:41.) O le a le mea na faia e le Faaola e tatala mai ai lenei faitotoa ia i tatou? O le a le mea e tatau ona tatou faia mo le ulufale atu? (Tagai 2 Nifae 9:45.)

### **2. Ua faaalua le alofa o le Faaola ia i latou i le falepuipui o agaga.**

Talanoaina le Isaia 24:21–22.

- O le a le falepuipui o lo o taua i le Isaia 24:21–22? (Falepuipui o agaga, le nofoaga e o i ai agaga o nisi o tagata ua maliliu e faatalitali ai i le Toetutu.) Aisea ua i ai agaga o nisi o tagata ua maliliu i le falepuipui o agaga? (Tagai MFF 138:32. O nisi o i latou e le i mauaina le talalelei i le lalolagi, a o isi e le i totoa i le molimau ia Iesu.)
- O le a le mea na fai e le Alii i agaga i le falepuipui? (Tagai Isaia 42:5–7; MFF 138: 29–37. Sa ia faatulagaina agaga amiotonu ma aoao i latou i le talalelei.) E faapefea ona faamatala e lenei tulaga le alofa o le Faaola? (Tagai Isaia 49:9–10.)

### **3. O le Faaola o le malosia ma le sulufaiga.**

Talanoaina le Isaia 25:1–4; 32:1–2.

- Sa tusia e Isaia le faamalosi o i tatou e le Faaola i taimi o afa, o matagi, vaitafe i le nuu naumati, eleele e leai se vai, ma faigata o o tatou olaga. O le a le mea o lo o aoao mai e nei manatu e uiga i le fesoasoani a le Faaola ia i tatou i le feagai ai ma ia ituaiga luitau?
  - a. O ia o le malu i le afa (Isaia 25:4).
  - e. O ia o le paolo i le vevela (Isaia 25:4).
  - i. O ia o le lafitaga i le matagi (Isaia 32:2).
  - o. O ia o se mea e malu ai i le afa (Isaia 32:2).
  - u. O ia o vaitafe i le nuu naumati (Isaia 32:2).
  - f. O ia o le paolo o le papatele i le nuu ua le o i ai se vai (Isaia 32:2).

### **4. O le a saunia e le Faaola se taumafataga ma faaumatia le ufiufi.**

Talanoaina le Isaia 25:6–9.

- O se tasi o faaliliuga o le Isaia 25:6–7 o le mauga o se faatusa lea o le malu-malu (tagai foi Isaia 2:2; MFF 58:8–9). O le a le taumafataga o lo o taua i le Isaia 25:6? (O le taumafataga o aoaoga a Keriso.) E faapefea ona avea le auai atu i le malumalu ma taumafataga?
- O le ufiufi o se ie manifinifi. O se faailoga o le le talitonu ua ufitia ai tagata mai le talitonu moni ma o mai ia Keriso. (Mose 7:26). E faapefea ona faaumatia le “ufiufi” o lo o ufitia ai le lalolagi? (Tagai Isaia 25:7–9.)

## 5. E soloiesea e le Faaola o latou loimata.

Talanoaina le Isaia 25:8

- O le a se mea e te faia pe afai e tagi se tasi e te alofa i ai? E faapefea ona “soloiesea e le Faaola o tatou loimata”? (Fautuaina tagata o le vasega e mafau-fau i se matua o lo o soloiesea loimata mai mata o se tamaitiiti. E i ai lagona o le vavalalata e oo mai i lea tulaga. O ni uiga feofoofota'i ua fetufaai e nei tagata o lo o i ai le faatuatuaga ma le alofa i le isi.)
- O a mea o lo o taua i le Faaaliga 21:4 e mafua ai loimata? E faapefea ona soloiesea e le Faaola loimata e mafua mai i ia tulaga?

## 6. O le a aumaia e le Faaola le Toetu.

Talanoaina le Isaia 26:19.

- Sa valoia mai e Isaia afai e oo mai le Mesia, o le a ia maliu ma toe tu mai (Isaia 25:8). O ai isi o le a toetutu? (Tagai Isaia 26:19; 1 Korinito 15:20–22; Alema 11:43–44. O fanau uma a le Atua o lo o i ai i le lalolagi o le a toe tutu.) O le a se mea o lo o fautua mai ai le Isaia 26:19 e uiga i o latou lagona pe a tatou toetutu? (Tagai foi i le MFF 138:12–16, 50.)

Sa saunoa mai le Perofeta o Iosefa Samita: “Ma a valaau mai le siufofoga mo e ua maliliu e tulai mai, . . . o le a se mea e muamua lava olioli ai lo’u loto? O le ma feiloai lea ma lo’u tama, lo’u tina, lo’u uso, ma lo’u tuafafine; ma pe a i ai i latou i o’u tafatafa, ou te fusi maia i latou ma fusi atu a’u e i latou” (*Teachings of the Prophet Joseph Smith*, sel. Joseph Fielding Smith [1976], 295–96).

## 7. O le Faaola o lo tatou faavae mautu.

Talanoaina le Isaia 28:16

- O le a le mea o lo o tau mai e Isaia ia i tatou e uiga i le Faaola i le faatusaina lea o ia i se “maa faataitai”? (Tagai Mose 7:53). E faapefea ona avea Iesu Keriso ma o tatou “faavae moni”? (Tagai Helamana 5:12.) O le a se mea tatou te faia e fausia i luga o lenei faavae? O le a se mea ua folafola mai e le Alii pe a fausia i tatou i lenei faavae? (Tagai MFF 50:44.)

## 8. O le a toefuatai e le Faaola le talalelei i le lalolagi.

Talanoaina le Isaia 29:4, 9–14, 18, 24.

- O le a se mea na vaai i ai Isaia e uiga i le toefuataiina o le talalelei i aso e gata ai? (Tagai Isaia 29:4, 9–14. Sa ia iloa o le a oo mai i le taimi o le pogisa faale-agaga. Sa ia iloa foi le aumaia o le Tusi a Mamona.)

Ia faatusatusa fuaiupu nei o lo o i le Isaia 29 ma tali o lo o i le Tusi a Mamona, Penina Tau Tele, ma le Mataupu Faavae ma Feagaiga e iloa ai pe faapefea ona faataunuu nisi o valoaga a Isaia:

- |                      |   |
|----------------------|---|
| a. Isaia 29:4        | Moronae 10:27                           |
| e. Isaia 29:9–10, 13 | Talafaasolopito o Iosefa Samita 2:18–19 |
| i. Isaia 29:11–12    | Talafaasolopito o Iosefa Samita 2:63–65 |
| o. Isaia 29:14       | Mataupu Faavae ma Feagaiga 4:1; 6:1     |

- Sa tau mai e Isaia tagata o lo o faalatalata atu i le Alii na o o latou laugutu a o latou loto ua mamao lea ma Ia (Isaia 29:13). E mafai faapefea ona tatou mautinoa o lo o tatou latalata atu i le Alii i o tatou mafaufauga ma galuega faapea foi ma a tatou upu?
- Sa saunoa mai Isaia o le a fesoasoani le Tusi a Mamona i le ua logonoa ma tauaso faaleagaga ina ia lagona ma vaai (Isaia 29:18, 24). Sa faapefea ona faataunuu ia valoaga? E faapefea ona fesoasoani le Tusi a Mamona ia te oe ina ia sili atu lou iloa ma mea e te faalogoina faaleagaga?

### 9. E silafia e le Faaola o tatou vaivaiga ma taitaia o tatou ala.

Talanoaina le Isaia 30:19–21

- O le a le mea o lo o aoao mai i le Isaia 30:19–21 e uiga i faigata? O le a le mea o lo o aoao mai e nei fuaiupu o le a fai e le Faaola mo i tatou pe a oo mai faigata? (Tagai foi i le Alema 37:37.)

Faaiuga

Tuuina atu lau molimau i le Faaola, e faailoa atu ai lou agaga faafetai i le tele o mea matagofie ua ia saunia mo i tatou. Tofi nisi o le vasega e talanoaina le lisi o lo o i luga o le laupapa ma faailoa mai ni o tatou lagona pe a latou mafaufau i nei mea. Ia talanoaina ni mea e ao ona tatou faia e tau ai ia tulaga. (Tagai Isaia 35:3–4 mo ni fautuaga.) Atonu o le a e manao e usu e tagata o le vasega le “Ou Te Tu ma Ofo” (*Viiiga*, nu. 107).

### Manatu Faaopoopo e Aoao Atu Ai

O mataupu o lo o taua i lalo e faaopoopo i le oototoga o le lesona fautuaina. Atonu e te manao e faaoga se tasi o nei manatu pe sili atu foi e avea o se vaega o le lesona.

#### 1. O ni mea e suitulaga i manatu o Isaia

Ia faaali atu ni meafaitino po o ni ata e suitulaga i manatu o Isaia, e pei o se ki, se maa, po o se ata o le paolo i le tofa, a o e talanoaina nei manatu.

#### 2. Musika mai le fatuga a Hanel ua taua “O Le Mesia”

Ia taina le musika “Ua Fanau mai Mo i Tatou le Tama,” faamusikaina o le Isaia 9:6 saunia e George Frideric Handel’s *Messiah*.

#### 3. “O le Pai Mai o le Aao o le Matai”

Afai e avanoa le ata vitio o *Afiafi Faaleaiga Faaopoopoga o Vitio (Faavaomalo)* (56736), atonu o le a e manao e faaali atu le “Pai mai o le Aao o le Matai,” o se ata e 18 minute, e avea ma vaega o le lesona.

# “E Leai se Faaola ua Na o A’u Lava”

Lesona  
**38**

Isaia 40–49

---

**Faamoemoega** Ina ia fesoasoani ia malamalama tagata o le vasega o Iesu Keriso e le mafaatusalia i lona alofa i ona tagata, ma o lo o i ai sana galuega tele mo i latou.

---

- Sauniuniga**
1. Suesue ma le agaga tatalo fuaitau nei mai le Isaia 40–49 o le a talanoaina i lenei lesona.
  2. Afai e te faaaogaina le gaoioiga e faatosina mai ai, ia tusia upusii i luga o se pepa lautele po o luga o le laupapa:
    - a. “Se a lo outou taofi i le Keriso?” (Mataio 22:42).
    - e. “Pe faapefea la outou amio e tatau ai?” (3 Nifae 27:27).
    - i. “Pe se a le upu a tagata ia te au le Atalii o le tagata, po o ai? . . . Pe se a la outou upu ia te au po o ai?” (Mataio 16:13, 15).
    - o. “O ai se au ma le Alii?” (Esoto 32:26).
    - u. “Po ua outou maua ea lona foliga i o outou mata?” (Alema 5:14).
  3. Afai o maua le *Afiafi Faaleaiga Faaopoopoga o Vitio* (Faavaomalo) (56736), atonu o le a e manao e faaali atu le vaega e 5 minute “Se a Lo outou Taofi i le Keriso?” e avea o se vaega o le lesona.
- 

## Faalautelega Fautuaina o le Lesona

**Gaoioiga e Faatosina Mai Ai** Atonu e te manao e faaaoga se tasi o gaoioiga nei (po o sa oe lava gaoioiga) e amata ai le lesona.

Ia faatepa tagata o le vasega i upusii sa e tusia i luga o le pepa lautele po o le laupapa (tagai “Sauniuniga” i luga). Ona tuuina atu lea o fesili nei:

- O le a se mea e tutusa ai nei fesili? (O nei fesili uma e mai tusitusiga paia e fesoasoani e iloilo ai a tatou molimau i le Faaola ma a tatou tautinoga e avea ma ona soo.) Aisea e te manatu ua tele ai ia ituaiga fesili i tusitusiga paia?

Faamatala atu o se vaega o lenei lesona o lo o taula’i atu i le fesili faaleagaga e faamanino ai le silisili o le Faaola.

---

**Mau Talanoaina ma le Faaogaina**

Ao e aoaoina atu nei mau, ia talanoaina pe faapefea ona faaaoga i le olaga i aso taitasi. Uunai tamaiti o le vasega e faamatala ni aafiaga e faatatau i mataupu ua taua i le mau.

### 1. Ua aoao mai Isaia o le Faaola e le mafaatusalia.

- E ala mai ia Isaia, sa faalua ona fesili le Alii i se fesili e tasi i ni auala eseese. O le a le fesili o lo o fesiligia i fuaiupu taitasi o lo o taua i lalo?

- a. Isaia 40:18 (“Tou te faatusa le Atua ia te ai?”)
- e. Isaia 44:8 (“Pe i ai ea se Atua e ese ai nai lo a’u?”)
- i. Isaia 46:5 (“Po o ai ea tou te faatusa i ai a’u, pe faagatusa ma a’u, pe faatatau ia te au ina ia ma tutusa?”)
- O le a le mea e tutusa ai nei fesili? (O lo o latou aoaoina mai o le Faaola e sili i soo se tagata po o se mea e faatusa i ai.) E faapefea ona e taliina nei fesili? O faapefea ona taliina i le tusi a Isaia? (Tagai i fuaiupu o lo o lisiina i lalo, ia iloa o vaega taitasi o lo o talanoa atu ai le Alii i tagata ifo i tupua ua latou fausia faatusa o atua sese i apamemea ma auro.)
  - a. Isaia 43:11 (“E leai se Faaola ua na o a’u lava.”)
  - e. Isaia 44:6 (“E leai se Atua ua na o a’u lava.”)
  - i. Isaia 45:5 (“E leai se Atua ua na o a’u lava”; tagai foi i le fuaiupu 6, 14, 18, 21–22.)
  - o. Isaia 46:9 (“O a’u o le Atua, e leai lava se ma te tutusa.”)
- Aisea e te manatu ai ua taua soo nei fesili i le tusi a Isaia? E faapefea ona faatusatusa nei fesili ma tali i o tatou vaitaimi?

## 2. Sa faamatalaina e Isaia mea e le ma faatusalia ai le Faaola i isi.

- Sa aoao mai le Perofeta o Iosefa Samita tatou te manaomia “se manatu sa’o i uiga moni o le Atua, lona atoatoa, ma ona uiga faaalua” mo le mauaina o se faatuatuga mo Ia (*Lectures on Faith* [1985], 38). Sa tuuina mai e Isaia ni faamatalaga matagofie e uiga i le Faaola ma ona uiga. Tuu atu i nisi o le vasega e faitau fuaitau o lo o taua i lalo ma iloilo fesili: O a uiga o le Faaola o lo o taua i le fuaitau? E faapefea ona faatupulaia lo tatou faatuatua i le Faaola i le iloa o ona uiga? Atonu o le a e manao e lisiina ia uiga i luga o le laupapa.
  - a. Isaia 40:13–14 (E leai se tasi na te faatonuina o ia.)
  - e. Isaia 40:28–31 (E le mafai ona vaivai o ia; na te faamalosiaina i tatou.)
  - i. Isaia 40:12, 21–22, 26; 45:12, 18 (Sa ia fuafua ma fausia le lalolagi ma na te silafia ona itu uma.)
  - o. Isaia 41:17–18 (Na te lagonaina o tatou tiga ma tuuina mai faamanuiaga e tele mo i tatou.)
  - u. Isaia 42:1, 4 (E le mafai ona malolo o Ia seiloga e taunuu lona faamoemoe.)
  - f. Isaia 42:16 (E na te faamalamalama ma faasaosao ala mo ona tagata ua leiloloa.)
  - g. Isaia 43:1–4 (O le a ia fesoasoani i ona tagata i o latou mafatiaga.)
  - l. Isaia 43:25–26; 44:21–23 (Na te aveesea a tatou agasala ma le toe manatuaina.)
  - m. Isaia 44:2–4 (Na te liligiina mai lona Agaga i o tatou aiga e pei o le vai i le eleele matutu.)
  - n. Isaia 46:3–4 (Na te tauave ona tagata i lo tatou faatoa fananau mai seia oo ina matutua.)
  - p. Isaia 49:14–16 (E na te le faagaloina i tatou. O i tatou o “faatusa” i ona alofilima.)

Ia tofi tagata o le vasega e fetufaa mai ni mea na tutupu ua faamalosiaina ai a latou molimau i nei uiga o le Faaola.

### 3. O le lalolagi (Papelonía) ua tauva ma le Faaola mo i tatou.

- O ai o lo o faatatau i ai le Isaia 47? (Tagai i le fuaiupu 1. O Papelonía o se aai malosi o le lalolagi ua mavae sa faatamaia ona o le amioleaga. I tusitusiga paia, o lo o faaaoga soo ai Papelonía o se faatusa o le amioleaga o le lalolagi.)
- I le mataupu 47, sa fautua mai ai Isaia o le a faatamaia Papelonía ona o le amioleaga. O nei fautuaga e mafai ona faatatau i le faatamaia o le lalolagi ma le amioleaga. O a ni mea o lo o aoao mai e fuaitau o lo o taua i lalo e uiga i le tali o le saili atu i ala leaga o le lalolagi?
  - a. Isaia 47:1, 5 (O le a ave ifo le lalolagi i le efuefu ma nofo faalologo i le pouliuli.)
  - e. Isaia 47:7–9 (E ui i manatu o le lalolagi e le mafai ona toilalo, o le a faatamaia ma aveesea nisi o mea taua, e faatusa i le aveesea o tane ma tamaiti.)
  - i. Isaia 47:10–11 (Ona ua tautino mai e le lalolagi e sili atu nai lo le Atua, o le a oo mai ai le faatafunaga.)
- I le Isaia 47:8, 10, o le a le mea sa taua e Papelonía (le lalolagi) e tutusa ma le tautinoga a le Faaola e uiga ia te ia? (“E leai se isi ua na o a’u lava.”) O le a se mea e mafai ona ofo mai e le lalolagi e faatusatusa i le mea na ofo mai e le Faaola? Aisea e tuuina atu ai e le tele o tagata o latou ola mo le lalolagi ae le mo le Faaola? E faapefea ona tatou fesoasoani i isi e iloa le mea na ofoina mai e le Faaola?
- I le Isaia 48:17–18, ua folafola mai e le Faaola faamanuiaga silisili mo i latou e saili ia te ia ae le o le lalolagi. O a ni lagona e te maua mai nei folafolaga e uiga i lou mulimuli i le Faaola ma lou loto atoa?

### 4. Sa faamatalaina e Isaia le misiona a Isaraelu i aso e gata ai.

- O lo o taua i le Isaia 49 le tele o valoaga e uiga i le misiona a Isaraelu i aso e gata ai. O nei valoaga e fesoasoani tatou te malamalama ai i le taua o le galuega a le Alii mo i tatou taitoatasi. Tuu atu i ni tagata o le vasega e faitau mai fuaitau o lo o taua i lalo ma talanoaina fesili: O le a se mea o lo o aoao mai e nei fuaitau e uiga i la tatou matafaioi i aso nei e gata ai? (Ia iloa, o le tele o nei valoaga o lo o faatatau i le galuega a le Faaola ma le galuega a ana auauna, le aiga o Isaraelu [Isaia 49:3.]
  - a. Isaia 49:1–5. “Ua valaauina a’u e Ieova talu mai le manava.” (Sa valaauina i tatou mai le fanau mai e faataunuu le galuega a le Alii i aso e gata ai; tagai foi i le Ieremia 1:5.)
  - e. Isaia 49:2. “Ua na faia lo’u gutu e pei o le pelu maai.” (O lenei faatusa ua fautuaina le tautala i upumoni malolosi–upu a le Alii; tagai foi i le MFF 6:2.)
  - i. Isaia 49:2. “Ua ia natia a’u i le paolo o lona aao.” (E puipuaia i tatou e le Alii ma saunia i tatou mo a tatou matafaioi sili, tagai foi i le MFF 86:9.)
  - o. Isaia 49:2. “Ua na . . . faia a’u ma ufanafana ua faapupulaina.” (O u ua faapupulaina o le a faia le mea moni. Ua saunia i tatou e le Alii tatou te faia le mea moni i soo se mea e tofia ai i tatou.)
  - u. Isaia 49:6. “E fai mo’u faaolataga ia oo i tuluiga o le lalolagi.” (Ua poloai atu le Alii i ana auauna e tulai ma toe faafoisia mai e ua faasaoina i Isaraelu ma avea ma malamalama i nuu ese. O le ala lea tatou te aumaia ai le faaolataga i tuluiga uma o le lalolagi; tagai foi i le MFF 86:8–11.)



Ia molimau atu o tusitusiga a Isaia e fesoasoani ia i tatou e atinae ai lo tatou alofa i le Faaola ma malamalama i le galuega ua ia finagalo tatou te faataunuuina. Atonu o le a e manao e tofi nisi o le vasega po o se vaega toalaiti e usuina le “Ua Sili Oe” (*Viiga*, nu. 46) po o “Le Faavae Malosi” (*Viiga*, nu. 45).

## Manatu Faaopoopo e Aoao Atu Ai

O mataupu o lo o taua i lalo e faaopoopo i le ootoga o le lesona fautuaina. Atonu e te manao e faaoga se tasi o nei manatu pe sili atu foi e avea o se vaega o le lesona.

### 1. O faatusa sa faaoga e Isaia

- Sa faaoga soo e Isaia le le pupula e avea ma faailoga o le amioleaga ma le pogisa faaleagaga (Isaia 29:10, 18; 32:3; 42:6–7, 16–18; 43:8; 44:9). A o e mafaufau loloto i nei fuaiupu, ia manatua sa masani ona folafola mai e le Faaola o Ia o le Malamalama o le Lalolagi (Ioane 8:12). E mafai faapefea ona matuai tatala atu o tatou mata faaleagaga i le Malamalama o le Lalolagi?
- Sa masani ona faaoga e Isaia faatusa o vai (Isaia 12:3; 32:2; 41:17–18; 43:19–20; 44:3–4; 48:18, 21; 49:10). E faapefea ona fesoasoani aoaoga a le Faaola o ia o le puna o le vai ola e te malamalama ai i nei fuaitau? (Tagai Ioane 4:7–14.)

### 2. Faatalitali i le Alii

- O le a le uiga o le “faatalitali i le Alii”? (Isaia 40:31). O a ni auala sa toe faafoisia ai e le Alii le malosi o i latou sa faatalitali ia te ia? (Tagai Isaia 41:10.) Tofi ni tamaiti o le vasega e fetufaai atu ni mea na tutupu e uiga i le faafouina e le Alii o se olaga faaleagaga o se tasi po o le malosi faaletino foi.

### 3. “A ua le valaau mai ia te a’u.”

- Aisea e manatu ai nisi o i tatou ua le amanaia i tatou e le Alii? Afai e te lagona ua tuua i tatou e le Alii, o le a moni lava le mafuaaga? (Tagai Isaia 43:22–26; Mosaea 5:13.) O le a se mea tatou te faia e toe latalata ai ia te ia?

Sa saunoa mai Peresitene Spencer W. Kimball: “Ua ou iloaina, afai ou te faalea-manaiaina a’u fegalegaleaiga faalelagi, ma a oo ina foliga e leai se taliga faalelagi o faalogo mai ma leai se leo faalelagi o talanoa mai, o lona uiga ua ou matua mamao ese lava. Afai ou te faatofuina a’u lava i tusitusiga paia, ona lē toe mamao ai lea, ma ua toe foi mai le faaleagaga” (*The Teachings of Spencer W. Kimball*, ed. Edward L. Kimball [1982], 135).

# “E matua Matagofie i Luga o Mauga”

Lesona  
**39**

Isaia 50:53

---

**Faamoemoega** Ina ia faamallosia molimau a tagata taitoatasi o le vasega i le Togiola a Iesu Keriso.

---

**Sauniuniga**

1. Suesue ma le agaga tatalo le Isaia 50–53 o le a talanoaina i leni lesona. O le totonugalemu o le taulaga togiola a le Faaola.
2. Mau faitau faaopopo: Mosaea 14–15
3. Afai e te faaaogaina le gaoioiga e faatosina mai ai, ona tofi lea o se toalua po o se toatolu o le vasega e filifili mai se viiga latou te fiafia i ai e uiga i le alofa o le Faaola ma le taulaga, ona saunia lea e faamatala i le vasega le uiga o leni viiga ma le auala ua ootia ai i latou. Atonu o le a e manao e faamatala atu se tasi o viiga e te fiafia i ai e uiga i le Faaola.

---

## Faalautelega Fautuaina o le Lesona

Gaoioiga e  
Faatosina Mai Ai

Atonu e te manao e faaaoga se tasi o gaoioiga nei (po o sa oe lava gaoioiga) e amata ai le lesona.

Faamatala atu o le tele o viiga a le Ekalesia e fesoasoani tatou te malamalama ai i le alofa na faaalua e le Faaola e ala i lana taulaga togiola. Ia tofi tagata taitasi o le vasega e faamatala mai se viiga e fiafia lava i ai e uiga i le alofa o le Faaola ma lana taulaga. Talu ai ona o musika e fesoasoani e aumaia le Agaga o le Alii i le vasega, atonu o le a e manao e fai atu i tagata o le vasega latou te usuina se viiga sa talanoaina.

Faamatala atu o leni lesona o le a talanoaina ai nisi o valoaga a Isaia e uiga i le soifuaga ma le misiona a le Faaola.

---

Mau Talanoaina  
ma le Faaogaina

A o e aoaoina atu nei mau, ia talanoaina pe faapefea ona faaaoga i le olaga i aso taitasi. Uunai tamaiti o le vasega e faamatala ni aafiaga e faatatau i mataupu ua taua i le mau.

### 1. O lo o talanoa Isaia e uiga ia i latou na aumaia le tala lelei.

- I le Isaia 52:7, o lo o faamatala ai e Isaia i ni fatuga ia tagata na aumaia le tala lelei. Aisea e te manatu ai na talanoa Isaia i vae o i latou na aumaia le tala? (I lalolagi ua mavae atu, ao le i oo mai fesoootaiga faaeletise, o savali taua sa masani ona aumaia e tagata e faimalaga tamomoe i o latou vae. O lo o faaaoga e Isaia vae o i latou e faafaigofie ai i latou lava.) O le a se manatu o Isaia i nei avefeau?

- Sa faapefea ona faamatala e Isaia le savali ua tuuina mai? (O le savali o le tala lelei, le savali o le filemu ma le olataga.) O le perofeta o le Tusi a Mamona o Apinati sa ia faamatalaina o avefeau sa faamatalaina e Isaia e aofia ai perofeta faapea foi ma le Alii lava ia (Mosaea 15:13–18). O a savali sili o le filemu ma le olataga ua aumaia e nei avefeau? (Tagai 2 Nifae 2:6–8.)
- O ai le isi na aumaia le savali o le talalelei i le lalolagi? Atonu o le a e manao e fesili atu i tagata o le vasega e faamatala mai ni mea na tutupu i le tuuina atu o le savali o le talalelei. Atonu o le a e manao foi e fesiligia i latou i ni o latou manatu e uiga ia i avefeau na tuuina atu le savali ia i latou.

## 2. Sa valoia e Isaia le taulaga togiola a le Faaola.

Talanoaina valoaga nei e uiga i le taulaga togiola a le Faaola ma faamanuiaga ua saunia mo i tatou.

- Isaia 50:5–7. O le a se mea o lo o taua mai i lenei mau i uiga o le Faaola i le taulaga sili sa ia faia mo i tatou? O le a le mea o lo o aoao mai e le Mataio 26:39 ma le Filipi 2:8 i uiga o le Faaola a o ia feagai ma puapuaga?
- Isaia 51:6. O le a le faatusatusaga o lo o faia i lenei fuaiupu? O le a le umi o le aafiaga o le Togiola? (Tagai foi i le Mosaea 16:9; Alema 34:10, 14.)
- Isaia 51:22. O ai na aioi i ai le Faaola? Na faapefea e le Togiola ona avea o ia ma o tatou Puluvaaga? (Tagai i le MFF 45:3–5.) O le a le “ipu oona” lea sa inu e Iesu mo i tatou? (Tagai MFF 19:15–20.) O a mea e tataua ona tatou faia mo le mauaina o faamanuiaga atoatoa na ofoina mai e ala i le Togiola?
- Isaia 52:3. O le a le uiga o le “faatauina mai foi outou, ae le avatu ai ni ario”? (Tagai 2 Nifae 26:27–28; Isaia 55:1–3.)
- Isaia 53:2–4. O a ni mea o lo o tau mai e nei fuaiupu e uiga i le soifuaga o le Faaola? Aisea e malamalama ai o ia i o tatou tiga ma faanoanoaga? (Tagai Alema 7:11–13; Eperu 2:16–18; 4:15.) E faapefea ona e lagonaina o lo o ia malamalama i ou tiga ma faanoanoaga?
- Isaia 53:5. Aisea na naunau ai le Faaola e puapuagatia i tiga o manua, momomo, ma le sasa? (Tagai 1 Nifae 19:9.)
- Isaia 53:6–7. O a ni uiga vaai o le Faaola ao faasauaina, tigaina, ma tuuina o ia e tauamo a tatou amioleaga? E faapefea ona tatou “faia o tatou lava loto” i nisi taimi ae le o le finagalo o le Tama Faalelagi? E faapefea ona fesoasoani faataitaitiga a le Faaola tatou te gauai atu ai i le finagalo o le Tama Faalelagi?
- Isaia 53:10. O le a le uiga o le upu a Isaia “ua finagalo le Alii e tu’imomomo” le Faaola? O le a se mea ua tatou aoaoina mai lenei fuaitau e uiga i le alofa o le Faaola ia i tatou? (Tagai foi Ioane 3:16–17.)
- Isaia 53:8–11. Faamatala atu o le perofeta o le Tusi a Mamona o Apinati sa ia tuuina mai ni faamatalaga malolosi e uiga i nei fuaiupu a o ia talanoaina atu i le faitaulaga leaga o le Tupu o Noa (Mosaea 15:10–13). E tusa ai ma upu a Apinati, o ai o le a avea ma fanau a le Faaola? (Tagai foi i le Mosaea 5:7–8.)
- Isaia 53:12. Faamatala atu i le faaiuga o se taua, o le taitaiu o le vaegaau manumalo o le a ia vaevaeina oa na maua i tagata uma. O a ni fua o le manumalo o Keriso i le oti ma agasala ua ia naunau e fetufaai mai mo i tatou? (Tagai Roma 8:16–17; 2 Timoteo 4:7–8.)

### 3. Ua faamatala e Isaia nisi o a tatou matafaioi.

- E pei ona tusia i le Isaia 51 ma le 52, o a ni matafaioi o lo o ia i tatou i le avea ma tagata e talia le Togiola a le Faaola?
  - a. Isaia 51:1, 4, 7. Ia faalogo ma usitai i le Alii; aua le fefefe i le faalumaina mai e tagata.
  - e. Isaia 51:12–13. Ia manatua le Alii, o ia o le Fofoa. Aua le fefe ia Satani.
  - i. Isaia 52:1–2. Ala mai ma faamaulu le malosi o le perisitua (tagai MFF 113:7–8). Ia faamaulu ofu matagofie o le amiotonu (tagai Faaaliga 19:7–8). “Tatala noanoataga o le ua” (tagai MFF 113:9–10).
  - o. Isaia 52:11. Ia o ese mai le agasala o le lalolagi. Aua nei pa’i atu i se mea leaga; ia mama.
- E mafai faapefea ona sili atu lo tatou faataunuaina o nei matafaioi taitasi?

Faaiuga

Talanoaina le Mosaea 15:18, lea sa faamatalaina e le perofeta o Apinati le Faaola o se avefeau ua matagofie ona aao i luga o mauga. Faamatala atu o le tasi mafuaaga e matagofie ai ona aao ona o lo o latou tauaveina tulaga o fao, le faailoga o lona alofa togiola. Tuuina atu lau molimau i le ala ua faamalasia ai e aoaoga a Isaia lou alofa i le Faaola ma lou naunau e agavaa mo faamanuiaga o lana tau-laga togiola. Fesili atu i tagata o le vasega pe faapefea ona faamalasia a latou molimau.

### Manatu Faaopoopo e Aoao Atu Ai

O mataupu o lo o taua i lalo e faaopoopo i le ootoga o le lesona fautuaina. Atonu e te manao e faaoga se tasi o nei manatu pe sili atu foi e avea o se vaega o le lesona.

#### 1. Savavali i le Malamalama

Talanoaina le Isaia 50:10–11 ma faamatala mai le filifiliga na tuuina mai e Isaia ia i tatou i ia fuaiupu. Afai tatou te filifili e matau i le Alii, usitai i siufofoga o ana auauna, ma faatuatua ia te ia, o le a tatou maua lona malamalama e taitai-ina ai i tatou ma o le a tatou le savavali lava i le pouliuli (Ioane 8:12; 12:46). Afai tatou te filifili e savavali i lo tatou lava malamalama, lea ua faatusina i le malamalama o le aloiafi, ua fautua mai le Alii o le tatou “taotoo i le tiga.”

#### 2. Galuega Faafaifeautalai

Afai e maua le ata vitio o *Afiifi Faaleaiga Faaopoopoga o Vitio 2 (Faavaomalo)* (56736), atonu o le a e manao e faaali atu le “Galuega Faafaifeautalai: O La tatou Matafaioi Silisili,” o se ata e lima minute, e avea ma se vaega o le lesona.

**Faamoemoega** Ina ia uunai tagata o le vasega e faamalosi i siteki o Siona ma saunia mo le Afio Faalua Mai ma le Meleniuma.

**Sauniuniga**


1. Suesue ma le agaga tatalo mau nei mai le Isaia 54–56 ma le 63–65 a o talanoaina i le lesona.
2. Afai e te faaaogaina le gaoioiga e faatosina mai ai, ia aumai se faleie a le siteki.
3. Afai e maua le ata O Iesu Keriso le Toetu, atonu o le a e manao e faaaoga i le taimi o le lesona (62187; Taga o Ata o le Talalelei 239).

**Faalautelega  
Fautuaina o  
le Lesona**

Gaoioiga e  
Faatosina Mai Ai

Atonu e te manao e faaaoga se tasi o gaoioiga nei (po o sa oe lava gaoioiga) e amata ai le lesona.

Ia tusia i luga o le laupapa se ata o se faleie e pei ona faaalua i lalo. Ona faaali atu lea o se pine e faamau ai le faleie ma fai atu fesili nei:



- Aisea e manaomia ai e lenei faleie ni siteki? (pine e faamau ai) O le a le mea e tupu pe afai e leai ni siteki? (pine e faamaumau ai le faleie)
- O le a le mea o lo o suitulaga ai le faleie o lo o taua i le Isaia 54:2? (O le Ekalesia a Iesu Keriso.) O a mea o lo o suitulaga ai siteki o faleie?

Sa saunoa mai Peresitene Ezra Taft Benson:

“O le upu *siteki* o se igoa faatusa lea. Ia e tagai atu faalemafaufau i se faleie tele o lo o faatu i luga e ni maea ua nonoa agai i fao laau (siteki) e tele o lo o tutu’i mau i le elelee.

Ua faatusa e le au perofeta ia Siona o aso e gata ai, i se faleie tele ua na siomia le fogaeleele. O lena faleie o lo o lagolagoina e maea ua nonoa agai i fao laau (siteki). Ioe, o na siteki o faalapopotoga eseese ia faalefaafanua o lo o salalau solo i le lalolagi. O le taimi nei, o lo o potopoto ai Isaraelu i siteki eseese o Siona” (“Ia Faamalosia Ou Siteki,” *O le Liahona*, Aokuso, 1991, 2).

Tau atu i le vasega siteki muamua o le Ekalesia a Iesu Keriso o le Au Paia o Aso e Gata Ai sa faatuina i Katelani, Ohio, ma Clay County i Misuri i le 1834. A o tuputupua’e le Ekalesia, sa faateleina siteki e pei ona faatonuina e le Alii (MFF 101:20–21). I le taimi nei, ua tusa nei ma le faitau fia selau siteki i le lalolagi atoa.

Faamatala atu o lenei lesona o le a talanoaina ai auala e faamalosia ai siteki o Siona. O le a talanoaina ai foi aoaoga mamana a Isaia e uiga i le Afio Faalua Mai ma le Meleniuma.

**Mau Talanoaina  
ma le Faaogaina**

A o e aoaoina atu nei mau, ia talanoaina pe faapefea ona faaoga i le olaga i aso taitasi. Uunai tamaiti o le vasega e faamatala ni aafiaga e faatatau i mataupu ua taua i le mau.

**1. “Ia faauumi au maea, ma faamalolosi siteki” (Isaia 54:2).**

- O le a sou manatu i le uiga o le fuaitau “Ia faalautele le mea e tu ai lou faleie”? (Isaia 54:2). (Ua finagalo le Alii i tagata o le Ekalesia e fetufaai atu le talalelei i le tele o tagata ina ia aofia ai le lalolagi. Sa valoia e Isaia o aso e gata ai, o le a tupu vave ai le Ekalesia ma o le toatele o tagata i le lalolagi o le a liliu mai i le mea moni [Isaia 54:3]).
- O a nisi fautuaga o lo o taua i le Isaia 54:3 e uiga i le faleie, po o le Ekalesia? E faapefea ona tatou mulimuli i nei fautuaga? Atonu o le a e manao e tusi le talanoaga i luga o le laupapa, e pei ona tusia i lalo.

Fautuaga a Isaia	Mea e Mafai ona Tatou Faia
Ia falo ie puipui ma faauumi au maea.	Auauna atu faafaifeautalai faamisiona; tufatufa atu le talalelei i uo ma tuaoi.
Ia faamalolosi siteki o faleie.	Faamalosia a tatou lava siteki.

- O le a se mea tatou te faia e faamalosia ai siteki o lo o tatou i ai? (O tali e ono aafia ai tulaga nei: Ia atinae le malosi faaleagaga, ia faaaafia ai o tatou aiga ma uo, ia auauna atu i o tatou tuaoi e auai i le ekalesia ma tuaoi e le auai, ma talia valaauga mai taitai perisitua e auauna i le Ekalesia.)
- E faapefea ona faamanuia e siteki olaga o tagata? (Tagai MFF 115:5–6.) E faapefea ona avea siteki o Siona ma sulufaiga mo i tatou?

**2. “A o le alofa tele ou te faapotopotoina mai ai oe” (Isaia 54:7).**

- E ui ina faataapepeina Isaraelu i le tele o tausaga, ua folafola mai e le Alii o le a ia faapotopotoina o ia i le Ekalesia moni i aso e gata ai (Isaia 54:4–10). O le a se mea ua tatou aoao ai e uiga i le Alii i le Isaia 54:4–10? O le a le faamanuiaga patino ua folafola mai e le Alii i ana auauna amiotonu? (Tagai Isaia 54:13–14, 17.) Aisea e taua ai nei folafolaga?

- O ai ua valaaulia e saili le sulufaiga e ala i le faapotopoto faatasi ma le Au Paia? (O fanau uma a le Tama Faalelagi.) Ia talanoaina le fuaitau lenei mai le Isaia o lo o faamatala mai ai vaega o tagata lea o lo o finagalo le Alii e o mai ia te ia ma maua le saogalemu i le talalelei.
  - a. Isaia 55:1–3. (O i latou uma o e fiainu.) O le a le ituaiga fiainu o lo o taua i nei fuaiupu? O le a le mea e tupu pe a tatou taumafai e faamalie lo tatou fiainu faaleagaga e ala i le faaalu o tupe i mea a le lalolagi? E faapefea ona faamalieina lo tatou fiainu faaleagaga? (Tagai 2 Nifae 9:50–51; 3 Nifae 20:8.)
  - e. Isaia 55:6–7. (O le tagata leaga ua salamo.) O le a le folafolaga ua tuuina atu ia i latou ua salamo?
  - i. Isaia 56:3, 5–8. (O tagata ese latou te le iloa le Alii.) O le a le mea e tatau ona fai e tagata ese e talia ai le Alii?
- O a ni mea o lo o aoao mai e nei fuaitau e uiga i le alofa o le Alii? O le a le mea o lo o aoao ai i tatou i le ala tatou te vaavaai ai i fanau uma a le Tama Faalelagi?
- Sa tusia e Isaia o afioga a le Atua e fagagaina ai o tatou agaga e pei ona fafaga e le timu ma le kiona laau (Isaia 55:10–13). E faapefea ona fafaga e afioga a le Atua o tatou agaga? (Tagai Alema 32:28, 41.)

### 3. O le Meleniuma o le taimi o le filemu ma le olioli.

- I ana faamaumauga uma, o lo o molimauina ai e Isaia e ui lava ina i ai faigata, faaososoga, ma mafatiaga i le lalolagi, o le a suia e le lelei le leaga i le faaiuga, ma mo le amiotonu, o le a faatumulia le lumanai i le olioli. Sa tatalo Isaia mo le Afio Faalua Mai o le Faaola, lea o le a aumaia ai le faasalaga mo e amioleaga ma le olioli sili mo e amiotonu (Isaia 64). O le a le savali o le faamoemoe ma le olioli o lo o taua i le Isaia 64:1–4? E faapefea e lenei savali ona faateleina lou agaga naunau e tumau e oo i le iuga i le auauna atu i le Alii?
- O le mataupu faaiua a Isaia o lo o faaalua mai ai se ata matagofie o le Meleniuma, le afe tausaga o le filemu lea o le a faaalua mai i le Afio Faalua Mai o le Faaola. E pei ona tusia i le Isaia 65:17–25, o a tulaga tatou te maua ai le Meleniuma? (Atonu o le a e manao e lisi ia tulaga i luga o le laupapa; tagai foi i le Isaia 11:6–9.)
  - a. O le a faia e le Alii le lagi fou ma le lalolagi fou (Isaia 65:17).
  - e. O le a i ai le fiafia sili ma le olioli e le toe i ai se fetagisi i tagata o le Alii (Isaia 65:18–19).
  - i. E le toe oti laititi se isi; o le a ola i latou mo tausaga e 100 (Isaia 65:20).
  - o. O le a latou olioli i fua o a latou galuega (Isaia 65:21–23).
  - u. O le a tali vave mai o ia i a tatou talosaga (Isaia 65:24).
  - f. O le a le toe i ai se feitagai i le va o manu feai (Isaia 65:25).
- O le a le mea o lo o aoao mai e le Isaia 63:7–9 e uiga i le alofa le faatuaioa o le Alii? (Fai atu i tagata o le vasega e fautua mai ni upu po o ni fuaitau mai nei fuaiupu o lo o faali ai le alofa o le Faaola mo i tatou. Atonu o le a e manao e tusi ia upu i luga o le laupapa.) O a ni auala ua faaalua ai e le Faaola ia te oe le “tele o lona alofa ma lona alofa mutimutivale”?

tepa taula'i atu i le Afio Faalua Mai o le Faaola ma le olioli ma le filemu o le a oo mai i le taimi o le Meleniuma. O valoaga a Isaia ua fautuaina i tatou ina ia tatou manatua o se avanoa taua le auauna atu i le Alii ma na te faamanuiaina ona soo.

## Manatu Faaopoopo e Aoao Atu Ai

O mataupu o lo o taua i lalo e faaopoopo i le oototoga o le lesona fautuaina. Atonu e te manao e faaoga se tasi o nei manatu pe sili atu foi e avea o se vaega o le lesona.

### 1. O le tulafono moni o le anapogi (Isaia 58:3–12)

- O le a se mea ua tatou aoaoina mai le Isaia 58 e uiga i le anapogi? O a ni vaega o le anapogi moni? (Tagai Isaia 58:3–7.)

O se tasi o vaega o le anapogi moni o le tuuina atu lea o se taulaga anapogi. Sa saunoa mai Peresitene Spencer W. Kimball, “Ou te manatu afai tatou te limamalosi, e pei ona i ai le toatele o i tatou, e ao ona tatou matua matamau . . . ma foai atu, ia lē na o le aofaiga tatou te faasaoina i a tatou ‘aiga e lua o le anapogi, ae e mafai ona sili atu, ia matua sili atu—ia faasefuluina i le tulaga tatou te faia ai” (in Conference Report, Apr. 1974, 184).

- O a folafolaga o le ola i le tulafono o le anapogi o lo o folafola mai i le Isaia 58?
  - a. E faateleina lo tatou malosi e tetete ai faasoosoga (Isaia 58:6).
  - e. E mama ai a tatou avega (Isaia 58:6).
  - i. Ua faaleleia lo tatou maloloina faaleagaga ma le faaletino (Isaia 58:8).
  - o. Ua avea i tatou ma tagata lotomauualalo ma saunia e fetaii ma le Alii (Isaia 58:9).
  - u. Ua tatou fesoasoani i e matitiva ma e le tagolima (Isaia 58:10).
  - f. Tatou te maua pea lava pea taitaiga mai le Alii (Isaia 58:11).
  - g. E faamalieina o tatou agaga i se lamala, “e avea foi e pei o se fanua ua faasu-suina, e pei o le punavai foi e le mate ona suavai” (Isaia 58:11).

Tofi tagata o le vasega e fetufaai faaitaiga mai tusitusiga paia, talafaasolopito o le Ekalesia, po o ni mea na tutupu i le tagata lava ia e faaalua ai faamanuiaga o le ola i le tulafono o le anapogi.

- E mafai faapefea ona faateleina lo tatou filiga e ola i tulafono o le anapogi?

### 2. Faamatalaga o galuega a le Faaola

- Isaia 61:1–3 o se tautinoga o valaauga ma galuega a le Faaola. I lana galuega i le taimi muamua i Nasareta, sa ia faitauina ai fuaiupu nei ma fai atu i tagata, “O le aso nei ua taunuu ai lenei Tusi, o outou o faalogologo ai” (Luka 4:14–21). O a ni mea o aoao mai i nei fuaiupu e uiga i le ituaiga tagata ma le misiona a Iesu Keriso?

### 3. O le Afio Faalua Mai o Keriso (Isaia 63:1–6)

- O le Afio Faalua Mai o le Faaola o lo o faamatala mai i le Isaia 63:1–6. O le a le lanu o le ofutalaloa o le Faaola pe a afio mai i lona mamalu? (Tagai i le Isaia 63:2; Faaaliga 19:11–13; MFF 133:46–48.) O le a le mea o lo o faatusa i ai le lanu mumu? (O le toto na tafe mai i lona tino ao ia puapuaga mo a tatou agasala i Ketesemane ma luga o le satauro.)



**Faamoemoega**

Ina ia faamalosia tagata o le vasega e faatumauiina le faatuatua i le taimi o puapuga ma faigata.

**Sauniuinga**

1. Suesue ma le agaga tatalo fuaitau mai le Jeremia o lo o talanoaina i lenei lesona. O lenei lesona o lo o taula’i i le lototele ma tautinoga a Jeremia ao feagai o ia ma le tetee mai tagata uma na siomia ai.
2. Afai e te faaaogaina le gaoioiga e faatosina mai ai, aumai se u’amea i le vasega.

**Faalautelega  
Fautuaina o  
le Lesona**

**Gaoioiga e  
Faatosina Mai Ai**

Atonu e te manao e faaaoga se tasi o gaoioiga nei (po o sa oe lava gaoioiga) e amata ai le lesona.

Ia faaali atu le u’amea ona tofi lea o se tagata o le vasega na te taumafai e gagau. Ona fai atu lea o fesili nei:

- Afai o lo o suitulaga lenei u’amea i ni uiga vaaia o se tagata, o le a le mea o lo o ia tauina mai e uiga i lena tagata?
- Fai atu i tagata o le vasega e faitau le Jeremia 1:17–19. O a ni faaupuga o lo o faaaoga e le Alii i le fuaiupu 18 e faamatala ai Jeremia? O le a se mea o lo o fautuaina e nei faaupuga e uiga i le ituaiga tagata sa i ai Jeremia? O a ni lagona e oo ia te oe pe a faapea o upu nei o lo o faaaoga e faamatala ai le ituaiga tagata e i ai oe, ao e galue mo le faataunuaina o se valaauga mai le Alii?

Faamatala atu o tupu, perenise, faitaulaga, ma tagata uma o le nuu sa latou teena Jeremia ma lana misiona, ae sa ia faia pea ma le toa e pei ona poloaiina ai o ia e le Alii. Ia faatatau i le u’amea ma faamatala atu o Jeremia o le “pou u’amea” sa sili ona malosi i taimi o faigata ma e le i toilalo lava o ia.

**Mau Talanoaina  
ma le Faaogaina**

A o e aoaoina atu nei mau, ia talanoaina pe faapefea ona faaaoga i le olaga i aso taitasi. Uunai tamaiti o le vasega e faamatala ni aafiaga e faatatau i mataupu ua taua i le mau.

O Jeremia sa galue i le vaitaimi o pulega a ni tupu e toalima, mai ia Iosia e oo atu ia Setekaia (626 e oo atu i le 586 T.L.M.). I le taimi o Iosia, sa ia taumafai e faaliliu tagata mai le ifo i tupua ma le ola le mama. A o isi tupu ina ua maea Iosia, sa latou pulea i le amioletonu, ma ua matuai liliuese ai tagata. O le misi-ona a Jeremia o le tuuina atu lea o le leo o le lapataiga i nei tagata, ma o lana faamalaiga o lo latou amioleaga o se tasi lea o faamalaiga aupito malosi ma ogaoga o loo ta’ua i tusitusiga paia. O ia o le leo mulimuli o le lapataiga a o le i faatoilaloina Iuta e Papelonia.

Sa tumu le olaga o Ieremia i faanoanoaga, ao lona tali atu i tofotofoga e mafai ona aoao ma musuia ai i tatou. Sa fasia o ia ma faafalepuipui ona o ana valoaga faasagatau i le malo o Iuta. O lona olaga sa faamata'uina pea lava pea. Ae i le feagai ai ma faigata ma puapuaga, sa pei Ieremia o se "pou u'amea" (Ieremia 1:18). O le tusi a Ieremia o lo o i ai ni faamaumauga o le faatupulaia o le faatuatua a perofeta e tali atu i faigata ma puapuaga o le olaga.

### 1. Sa valaauina e le Atua Ieremia e avea ma se perofeta.

Ia talanoaina le tala ia Ieremia i le valaauina o ia e avea ma se perofeta e pei ona tusia i le Ieremia 1:4–10.

- O le a se mea ua aoao mai e le valaauina o Ieremia e uiga i le aoaoga faavae o le uluai faauuina? (Tagai Ieremia 1:5.) O le a sou manatu i se fesoasoani na iloa ai e Ieremia i le muai olaga sa muai tofia o ia e avea ma se perofeta?

Sa saunoa mai le Perofeta o Iosefa Samita, "O alii uma ua valaauina mo le talagiga i tuluiga uma o le lalolagi na faauuina mo lena faamoemoe i le Fonotaga Sili i le lagi a o le i o mai i le lalolagi" (*History of the Church*, 6:364).

- O le a le mea sa faia e le Alii ina ua manatu Ieremia ua le agavaa o ia mo le faataunuina o lona valaauga? (Tagai Ieremia 1:6–10.) E faapefea ona toe faamautinoa oe e le Alii pe a e lagona ua e le agavaa?

### 2. O le toatele o tagata sa latou teena Ieremia ma taumafai e taofia o ia mai le faataunuina o lana misiona.

Ia faaoga mau nei e talanoaina ai feteenaiga sa feagai ma Ieremia a o ia faataunuina le misiona na tuuina atu i ai e le Alii:

- a. Ieremia 20:1–6. O le le fiafia i valoaga a Ieremia, o lea na faatonuina ai e Pasura le pule sili o le malumalu, ina ia sasaina ma tuu i se pa. Sa valoia e Ieremia o Pasura, o lona aiga, ma ana uo o le a ave faatagataotauaina e Papelonia ma maliliu ai i Papelonia.
  - e. Ieremia 26:7–15. O le toatele o tagata o le nuu e aofia ai faitaulaga sa latou teena Ieremia ma lana savali (26:7–11). E ui i lea, sa tuuina atu pea e Ieremia ma le lototele le savali na faatonuina ai o ia e le Alii e tuuina atu (26:12–15). Sa teena foi Ieremia e ona tuaoi ma ona aiga (11:19–21; 12:6. Manatua o Ieremia e malaga mai le aai o Anatota).
  - i. Ieremia 36:1–6, 20–32. O upu faavaloga a Ieremia sa tusitusia ma faitau atu i tagata (36:1–6). Sa susunuina e le tupu nei upu, ma sa faatonuina Ieremia e le Alii e toe tusia ia upu (36:20–32).
  - o. Ieremia 37:12–15; 38:4–13, O Ieremia sa tuuai seseina ma le amioletonu ma tuuina atu ai i le falepuipui (37:12–15). Sa tuuina o ia i totonu o le lua (38:4–6). E ala i le faatonuga a le Tupu o Setekaia, o lea sa aveesea ai o ia mai le lua ma toe tuuina atu i le falepuipui (38:7–13).
- O le a se mea o lo o faaalua mai i le Ieremia 20:14–18 e uiga i ni lagona na oo ia Ieremia a o feagai o ia ma nei puapuaga faigata? O le a se mea ua tatou aoaoina mai ia Ieremia e fesoasoani ia i tatou i le taimi o puapuaga? (O tali e aafia ai le faaauau pea ona usitai o Ieremia i le Alii, e ui lava ina sauaina ma faalotovaivaiina o ia; tagai Ieremia 26:12–15.)
  - I le Ieremia 2:13, o a amioleaga e lua sa taua e le Alii ua faia e ona tagata? (Sa latou lafoaiina o ia, o le puna o le vai ola. A ua latou eliina mo i latou o vaieli e mavaevae e le mafai ona tuu ai le vai ola a le Alii, o lona uiga, ua

latou sailia le loto malie ma le saogalemu i mea o le lalolagi.) Aisea e faigata i tagata e i ai uiga faapenei ona latou talia upu a Ieremia? Aisea e le mafai ai ona latou tali atu i faigata e pei ona faia e Ieremia? E faapefea ona tatou faia ni “vaieli mavaevae” i nisi taimi e le maua ai le vai ola mai le Alii?

Sa saunoa mai Elder Marion D. Hanks:

“Ua tele lo tatou taimi ua alu i le sailia o oa a le lalolagi. O le tauivi ma mea o lo o tatou moomia ua faaalu ai le tele o lo tatou taimi ma le malosi. Ua tatou fiafia i faafiafiaga, po o le aafia foi i nisi o faalapotopotoga. Ioe, e moomia e tagata taaloga, moomia le maua o mea, moomia foi le faia o saofaga; ae afai e maua mai nei mea i le tau o le faauo ma Keriso, e matuai taugata lava.

“Aua e lua mea leaga ua faia e lo’u nuu; ua latou tuu a’u i le puna o le vai ola, a ua latou eli mo i latou o vaieli, o vaieli mavaevae e le tali ai ni vai.’ Ieremia 2:13.)

“O lo tatou faia o se mea e sui ai le Atua i o tatou olaga, o le mea moni e le maua ai ni vai. I se tau ua tatou teena le ‘vai o le ola,’ ua tatou misia le olioli e tataua ona tatou maua” (in Conference Report, Apr. 1972, 127; or *Ensign*, July 1972, 105).

O valoaga a Ieremia o le a faaumatia e Papelonia Ierusalem, ua faataunuaina e pei ona taua i le Ieremia 39–40. Sa i ai o ia i le falepuipui i le taimi o puapuaga, ina ua maea sa faasaolotoina o ia e Papelonia ma avea o ia ma tagata totoa o Iutaia i le laueleele o Iuta. O Ioanana le taitai o i latou na totoa, sa fai atu ia Ieremia e saili le finagalo o le Alii mo i latou ma folafola atu o le a usitai i ai (Ieremia 42:1–6). Sa ta’u atu e le Alii i tagata e ala atu ia Ieremia, e nonofo i le elelee o Iuta ma folafola atu o le a ia faamanuia ia te i latou pe a latou faia (Ieremia 42:9–22). Ae sa taitaiina pea e Ioanana tagata i Aikupito, lea sa matua faaauau ai lo latou amioleaga (Ieremia 43–44).

### 3. Ua faamalosia Ieremia i puapuaga ona o lona alofa i afioga a le Atua.

Ia talanoaina mau nei, o lo o faaali mai ai le auala na fesoasoani ai afioga a le Atua ia Ieremia e faamalosia i taimi o faigata.

- E pei ona tusia i le Ieremia 1:9, o a upu na tuuina e le Alii i le fofoga o Ieremia? E pei ona tusia i le Ieremia 15:16, o le a le mea na fai e Ieremia i afioga a le Alii? (Sa ia taumafaina, lea e faamatalaina i le gagana faatusa o lona uiga sa avea afioga a le Atua ma vaega o ia.) O a ni lagona o Ieremia e uiga i afioga a le Alii?
- E faapefea ona tatou aai i afioga a le Alii e pei ona faia e Ieremia? (E ala i le aoao i tusitusiga paia ma fautuaga a perofeta o aso e gata ai.) Sa faapea mai le perofeta o le Tusi a Mamona o Nifae “ia outou fiafia i le afioga a Keriso” (2 Nifae 32:3). E faapefea ona faamalosia i tatou i le fiafia i afioga a Keriso?
- I le Ieremia 20:9, sa faapefea ona faamatala e Ieremia le afioga a le Alii i totonu ia te ia? O le a le uiga o le avea o le afioga a le Alii ma afi e mumu i ou ponaivi? Aisea e te manatu ai sa le mafai ona taofia Ieremia mai le aoao i le afioga a le Alii?

Faaiuga

---

Ia faamatala atu ou lagona e uiga i faataitaiga a Ieremia ma le manao ina ia faatuatua i taimi o faigata. Ia faamalosia i tagata o le vasega e suesue ma mafaufau loloto i afioga a le Alii seia avea ma afi e mumu i o latou ponaivi, e faamalosia ai i latou ao latou feagai ai ma le galuega a le Alii. Afai e te faaaogaina le gaoioiga e faatosina mai ai, faaali atu le u’amea ma faamalosia tamaiti e avea faapei o Ieremia, o le pou u’amea mo le Alii.

## Manatu Faaopoopo e Aoao Atu Ai

O mataupu o lo o taua i lalo e faaopoopo i le ootoga o le lesona fautuaina. Atonu e te manao e faaoga se tasi o nei manatu pe sili atu foi e avea o se vaega o le lesona.

### 1. “O le omea . . . i le lima o le fai ipu omea” (Ieremia 18:6)

- Ia talanoaina le tala i le asiasiga a Ieremia i le fai ipu omea, o lo o taua i le Ieremia 18:1–4. O le a le mea na aoao atu e le Alii i ona tagata e ala i mea na tutupu ia Ieremia? (Tagai Ieremia 18:5–10. Sa faaali atu e le Alii afai latou te salamo, o le a ia suia i latou i se isi mea e sili atu, e pei ona suia le ipu omea. Sa ia faamanatu atu foi ia i latou, ua ia te ia le mana e faatamaia ai i latou pe afai latou te le salamo.)
- E faapefea ona faatatau leni faatusatusaga ia i tatou i le taimi nei? E faapefea ona avea i tatou ma omea sili i aao o le Alii? (E ala i le lotomauualalo, usiusitai, salamo, faatuatua i le Alii, ma saili lona finagalo. Ia tofi ni tagata o le vasega e fetufaai mai ni mea na tutupu e faaalai ai le auala ua saunia ai e le Alii ona tagata e faataunuu lona faamoemoega.) O le a le mea e tupu pe a tatou teena le suia e le Alii?

Sa saunia e Peresitene Heber C. Kimball leni malamalamaaga e uiga i le faatusatusaga o loo i le Ieremia 18:1–10:

“O i latou o lo o augofie i aao o le Atua ma usiusitai i ana tulafono, o i latou o ipu o le faamaoni, ma o le a talia i latou e le Atua” (*History of the Church*, 4:478).

“Ua tele naua ipu ua faaleagaina ina ua maea ona suia. Aisea? Ona e le o ogatasi ma le fua na tuuina atu e le fai ipu omea ia te i latou, ae ua latou faia lava le mea o lo o mananao latou i ai: o le mea lea ua le malamalama i latou i le ata na fuafua e le Atua, ma ua latou faaleagaina i latou i le mana o lo latou saolotoga. [O nei tagata] e tataua ona toe uia le tele o auala e toe faaleleia ai, ona . . . toe teuteu ma lagilagi; ae i le taimi e lagilagi ai, e tele ipu ua taei ai” (in Stanley B. Kimball, *Heber C. Kimball: Mormon Patriarch and Pioneer* [1981], 270).

### 2. Sa lauga Ieremia i le taimi lava e tasi e pei o le perofeta o le Tusi a Mamona o Liae.

Sa aoao atu e le perofeta o Ieremia ma fautuaina tagata o Iuta i le taimi na tuua ai e Liae Ierusalem. Sa valoia e Ieremia ma Liae le faatafunaina o Ierusalem.

- O fea sa i ai Ieremia ina ua tuua e Liae ma lona aiga Ierusalem? (Tagai Ieremia 37:15–16; 1 Nifae 7:14.)
- Sa tele le taimi na faaaluina e Ieremia e fautuaina ai Setekaia le tupu o Iuta, ae sa faafitia e Setekaia afioga a le Alii na ala mai ia Ieremia. O le a le mea na tupu i a Setekaia o se tali i lona le usiusitai? (Tagai Ieremia 39:4–7.)
- Mai le Tusi a Mamona sa tatou iloa ai o le tasi o atalii o Setekaia e le i fasiotia e Papelonia. O ai lona igoa? (Tagai Helamana 8:20–21.) O fea sa alu i ai o ia? (Tagai Ominae 1:15.)

---

**Faamoemoega** Ina ia faamalosia tagata o le vasega e auai i galuega a le Atua i aso e gata ai ma tusia lana tulafono i o latou loto.

---

**Sauniuniga**

1. Suesue ma le agaga tatalo le Jeremia 16; 23; 29; ma le 31.
2. Mau faitau faaopoopo: Jeremia 3–9; 13; 30; 32:37–42; 33; 35.

---

**Faalautelega  
Fautuaina o  
le Lesona**

Gaoioiga e  
Faatosina Mai Ai

Atonu e te manao e faaoga se tasi o gaoioiga nei (po o sa oe lava gaoioiga) e amata ai le lesona.

- Afai e te molimau pe auai foi i so o se tala po o se mea na tupu i le Feagaiga Tuai, o le fea o le a e filifilia? (Atonu o le a e manao e tusi i luga o le laupapa tali a tagata o le vasega.)
- Aisea ua e fia molimau pe auai ai foi i lenei mea na tupu?
- O le a se mea o lo o tupu i le Ekalesia i lenei vaitaimi e mafai ona faatusatusa i nisi o mea na tutupu ua e filifilia?

Faamatala atu e ui lava ina i ai ni savali o le faamoemoega a Jeremia mo tagata o ona taimi, sa ia vaai mamao i se taimi o le faamoemoega i le faapotopotoina o Isaraelu i aso e gata ai. O lenei lesona o le a talanoaina ai valoaga a Jeremia i le faapotopotoina tele i aso e gata ai o lo o tatou aofia ai i lenei vaitaimi.

---

Mau Talanoaina  
ma le Faaogaina

A o e aoaoina atu nei mau, ia talanoaina pe faapefea ona faaoga i le olaga i aso taitasi. Unai tamaiti o le vasega e faamatala ni aafiaga e faatatau i mataupu ua taua i le mau.

**1. Sa vaai Jeremia i le faapotopotoina o Isaraelu i aso e gata ai.**

Afai e le o ta’ua le tala o le malaga a Isaraelu mai Aikupito i le gaoioiga e faatosina mai ai, faamatala atu o se tasi lea o mea na tupu faavavega i le Feagaiga Tuai. O lo o ta’ua i le tusi a Jeremia ma isi tusi o le Feagaiga Tuai, faapea foi ma le Tusi a Mamona.

- O a ni lagona o Mose e uiga i le taua o le Malaga? (Tagai Teuteronomie 4:32–35.) O le a sou manatu i le avega ma vaega o le malaga a Isaraelu mai Aikupito?
- I le tele o augatupulaga mulimuli ane, sa iloa ai e Jeremia ni faaaliga o mea e tutupu i aso e gata ai sa fetalai mai ai le Alii o le a sili e pei o le aveina ae o le Fanauga a Isaraelu (Jeremia 16:14–16; 23:3–8). O le a le mea na tupu o lo o faamatala mai i le Jeremia 16:15 ma le 23:3? (O le faapotopotoina o Isaraelu ma le tuputupua’e o le Ekalesia.) O ai leoleo mamoe o lo o ta’ua i le Jeremia

23:4? (Taitai o le Perisitua ma isi taitai o le Ekalesia.) O ai Tupu o lo o ta'ua i le Ieremia 23:5–6? (Iesu Keriso.) Aisea e te manatu ai o nei mea na tutupu e pei o le Malaga (Aveina ae o le Fanauga a Isaraelu)?

- Sa saunoa mai Elder LeGrand Richards, o faifaiva ma tulimanu o lo o taua i le Ieremia 16:16 o faifeautalai faamisiona a le Ekalesia (in Conference Report, Apr. 1971, 143; or *Ensign*, June 1971, 98–99). O a ni mea e tutusa ai faifaiva ma tulimanu ma faifeautalai? (Tagai Mataio 4:18–19.) E faapefea ona avea i tatou ma faifeautalai e sili atu ona lelei?

## 2. O le a tusia e le Atua lana tulafono i loto o ona tagata.

- Sa faalagolago le fanauga a Isaraelu ia Mose mo le mauaina o faaaliga mo i latou i le taimi sa latou aumau ai i le vao. O le a le mea sili sa faaaliga e Mose i le Numera 11:29? (Sa ia manao i tagata e aoao i le tulafono a le Atua ma aoao e faalogo i le Agaga mo i latou lava.)
- E pei ona tusia i le Ieremia 31:31–34, o le a le mea na folafola atu e le Alii o le a faia i aso e gata ai? (Tagai foi i le Esekielu 11:17–20; 36:24–28; 2 Korinoto 3:2–3.) O le a le uiga o le tusia o le tulafono a le Atua i o tatou loto? O le a se mea e tatau ona tatou faia ina ia tusia ai le tulafono a le Atua i o tatou loto?
- E faapefea ona aafia a tatou amioga pe a tusia le tulafono a le Atua i o tatou loto? Atonu o le a e manao e talanoaina ni auala e fesoasoani ai e usitai i tulafono taitasi e pei o le:
  - a. Alofa i o tatou tuaoi.
  - e. Ava i o tatou matua.
  - i. Ia ola mama.
  - o. Tausia le Sapati ina ia paia.
  - u. Filifili ata tifaga tatau, polokalama o le televise, tusi ma mekasini.
  - f. Laei i laei talafeagai.
  - g. Filifili musika tatau.
- Sa fesiligia Iosefa Samita pe sa faapefea ona faamanuiaina lona taitaiina o tagata e toatele. Sa ia faapea mai, “Sa ou aoao atu i tagata mataupu faavae sao ma sa latou taitaiina ai i latou lava” (upusii saunia e John Taylor, in *Journal of Discourses*, 10:57–58). E faapefea ona faatatau leni fuaiupu i le tusia o le tulafono a le Atua i o tatou loto?
- Sa valoia e Ieremia i le 70 tausaga pe a maea ona ave faatagaotauaina tagata o Iuta i Papelonia, o le a toe foi atu i o latou fanua ma nonofo ma le Atua (Ieremia 29:10–14; o le atoatoaga o leni valoaga o lo o talanoaina i le lesona 47). E tusa ai ma le Ieremia 29:12–14, o le a se mea e mafai ona tatou faia ina ia tatou latalata atu ai i le Alii? O a ni mea o ta'u mai i nei upu o le *valaau*, *tatalo*, *saili* ma le *suesue* i uiga e tatau ona tatou faia tatou te latalata atu ai i le Atua? Tofi tagata o le vasega e fetufaai mai ni mea na tutupu ia i latou ao latou taumafai ia latalata atili atu i le Atua?

Faaiuga

---

Tuu atu lau molimau o lo o tatou ola i le taimi o lo o taula'i i ai Ieremia ma le tele o perofeta ma le fiafia. Uunai tagata o le vasega e auai i le faapotopotoina o Isaraelu ma ia tusia le tulafono a le Atua i o latou loto.

---

## Manatu Faaopoopo e Aoa Ai

O mataupu o lo o taua i lalo e faaopoopo i le ootoga o le lesona fautuaina. Atonu e te manao e faaoga se tasi o nei manatu pe sili atu foi e avea o se vaega o le lesona.

### 1. O le taimi lenei e salamo ai.

O le alofa o le Alii e masani ona maua e tagata ua salamo. Ae peitai, o i latou o lo o faatuai ona salamo, o le a matuai faateleina le faigata ona salamo.

Sa aoao mai Peresitene Joseph F. Smith: “O le tagata o lo o tele ana agasala sa ia faia ae le i salamo ma maua se faamagaloga, o le a faigata ona aloese mai le tiapolo ma o le a leai sona faamoemoega i le lalolagi; a o le tagata ua le mafai ona tea ese ma le tiapolo ona sa le salamo i sese sa ia faia ua sili ona le manuia. O le tulaga e tatau ona ola ai i aso taitasi, o le sailia o le alofa ma le faamagaloga, e aumaia ai ia i tatou le mana tatou te sola ese mai ai i le tiapolo” (*Gospel Doctrine*, 5th ed. [1939], 374).

- O a ni mea o lo o aoao mai e mau o lo o i lalo e uiga i le taua o le faalogo i afioga a le Alii ma salamo ma le faamaoni?

Ieremia 5:1–5, 21–25

Ieremia 6:10–17

Ieremia 7:23–28

Ieremia 8:6–12, 20

Ieremia 13:11, 23

Ieremia 17:23

### 2. Faalogo i upu a perofeta

- Sa tusitusia e le aunoa e Ieremia, e le'i faalogo tagata i ana upu (Ieremia 7:13; 25:3–4; 26:2–5; 32:33). O a upu a perofeta o aso e gata ai e tatau ona tatou toaaga e mulimuli i ai?

### 3. O le toe faia o agasala a augatupulaga ua mavae

- Sa fautuaina e Ieremia tagata Iutaia i ona aso, o agasala sa latou faia ua tutusa ia ma agasala sa faasalaina ai augatupulaga ua mavae (Ieremia 11:1–12). Aisea e te manatu ai sa le i aoaoina tupulaga i le taimi o Ieremia mai agasala a o latou augatama, e ui ina manino le faamaumauina o faasalaga mo ia agasala? E faapefea ona faamanuiaina i tatou mai lesona sa aoaoina e augatupulaga ua mavae o tagata o le feagaiga a le Atua?

### 4. O le taua o le faatuatua o le Atua

- I le Ieremia 17:5–8, o a ni faatusatusaga o lo o faia i le va o e o lo o faatuatua i le tagata ma tagata o lo o faatuatua i le Atua? Ua e vaaia faapefea le sa'o atoatoa o nei faatusatusaga? E mafai faapefea ona faaalua lo tatou faatuatua o le Atua?

### 5. Perofeta pepelo

- O Setekaia o se tupu sa ia manao e tau atu e tagata ia te ia mea o lo o ia fia faalogo i ai. E toatele perofeta pepelo sa folafola mai o le a le toilalo Ierusema (Ieremia 28:1–4; 37:19). O aso nei, ua toatele perofeta pepelo ua o mai ia te outou i “ofu faamamoe” (Mataio 7:15). O a ni faailoga ua tatou iloa ai o lo o i ai perofeta pepelo i o tatou taimi? O a ni savali a perofeta pepelo i ona po nei? E faapefea ona tatou tetee atu i taitaiga a perofeta pepelo?

# O Le Leoleo Mamoe o Isaraelu

Lesona  
**43**

*Esekielu 18; 34; 37*

---

**Faamoemoega** Ia uunaia tagata o le vasega e faataunuu o latou tiute o ni “leoleo mamoe o Isaraelu” (Esekielu 34:2).

---

- Sauniuniga**
1. Suesue ma le agaga tatalo mau nei:
    - a. Esekielu 34. Ua aoaiina e le Alii leoleo mamoe latou te le o fafagaina le lafu. O le a ia sailia mamoe ua se ma avea ma o latou Leoleo mamoe.
    - e. Esekielu 18:21–32. Sa aoao mai e Esekielu o le tagata agasala ua salamo o le a faasaoina ae o le tagata amiotonu ua liliu atu i le amioleaga o le a tulieseina i fafo.
    - i. Esekielu 37:1–14. Sa vaai Esekielu i se faaaliga o ivi mamago ua faaolaina.
    - o. Esekielu 37:15–28. Sa valoia e Esekielu o le laau a Iuta ma le laau a Iosefa o le a avea ma laau e tasi i le Alii.
  2. Mau faitau faaopoopo: Esekielu 2
- 

**Faalautelega  
Fautuaina o  
le Lesona**

**Gaoioiga e  
Faatosina Mai Ai** Atonu e te manao e faaaoga se tasi o gaoioiga (po o sa oe lava gaoioiga) e amata ai le lesona.

Faitau (pe tusi i luga o le laupapa) fesili nei:

- O le a le eseese e i le leoleo mamoe e alofa i ana mamoe ma le leoleo mamoe na te faataunuuina lona tiute ona o lo o totogi ai o ia?

Fai atu i tagata o le vasega e faalogologo mo tali i upusii nei mai ia Peresitene Ezra Taft Benson (atonu te te manao e tofi se tagata o le vasega e lau atu nei upusii):

“I le vaitaimi o Iesu, na lauiloa le leoleo mamoe Palesitina i lana puipuiga o ana mamoe. E le pei o leoleo mamoe i ona po nei, ae e masani lava ona muamua i luma le leoleo mamoe i lana lafu mamoe. Na te taitai i latou. E silafia e le leoleo mamoe mamoe taitasi o lana lafu, ma e tofua lava le mamoe ma lona igoa. E iloa foi e mamoe lona leo ma faatuatuaina o ia, ma e le mulimuli lava i se tagata ese. O lea, pe a valaauina, ona mulimuli lea o i latou ia te ia. (Tagai i le Ioane 10:14, 16.)

“Pe a pogisa, ona taitaia lea e leoleo mamoe a latou mamoe i le mea e tuu ai le lafu mamoe. E siomia i ni pa puipui maualuluga le mea o i ai le lafu, ma tuu ai ni mea matuituia i luga o ia pa puipui e puipuia ai manu feai ma tagata gaoi mai le feai mai luga.

“Ae ui i lea, o nisi taimi, a fia aai tele nei manu feai, ona feosofi mai lea i luga o pa ma faamatau i mamoe. O se tulaga faapea e tuu eseese ai le leoleo moni—o le ua alofa i ana mamoe—mai le auauna—o le ua na ona galue mo le tau.



“O le leoleo mamoe moni, na ia naunau e ofoina atu lona ola e sui ai ana mamoe. E alu atu o ia i le mea o ia i mamoe ma tau mo lo latou saogalemu. Peitai, pe a fai i se isi itu, o le auauna ua taua ia te ia lona lava saogalemu nai lo o mamoe, ma sola ese” (in Conference Report, Apr. 1983, po o le *Liahona*, Iulai, 1983, 75).

A maea ona faitau upusii ona tofi lea o se tagata o le vasega e ootoo mai le ese-ese i le va o le leoleo mamoe e alofa i ana mamoe ma le leoleo mamoe ua na ona ia faataunuu lona tiute ona o lo o totogi o ia (po o le auauna). Ia faaoga fesili nei ma tusia tali i luga o le laupapa:

- O fea e savali ai le leoleo mamoe moni mai ana mamoe? O fea e savali ai le leoleo mamoe ua na o se auauna? (O le leoleo mamoe moni e savali i luma o ana mamoe ma taitai i latou; o lo o faailoa mai e upusii o le leoleo mamoe ua na o se auauna o loo totogi, e savali i tua o mamoe ma taitaia i latou.)
- O le a le fegalegaleaiga a le leoleo mamoe moni ma mamoe taitasi? O le a le fegalegaleaiga a le leoleo mamoe ua na o se auauna ma mamoe taitasi?
- E faapefea ona tali atu le leoleo mamoe moni pe a oo se mamoe i puapuaga? Ae faapefea ona tali atu le leoleo mamoe ua na o se auauna?

Faamatala atu o se vaega o lenei lesonea o lo o faamatala atu ai o tatou tiute o ni leoleo mamoe faaleagaga.

## Mau Talanoaina ma le Faaogaina

A o e aoaoina atu nei mau, ia talanoaina pe faapefea ona faaoga i le olaga i aso taitasi. Uunai tamaiti o le vasega e faamatala ni aafiaga e faatatau i mataupu ua taua i le mau.

I le 597 T.L.M., sa ave faatagataotaua ai e le Tupu o Nepukanesa le toatele o tagata o le malo o Iuta. Sa faatasi ai i lenei vaega Esekielu, lea sa valaauina e le Alii e avea ma perofeta i le lima tausaga mulimuli ane. I le 587 T.L.M., sa faatamaia ai e Papeleonia Ierusalem ma ave faatagataotaua ai le isi toatele o tagata. Sa aoao atu Esekielu i ona tagata aunuua seia oo i le 570 T.L.M.

O tusitusiga a Esekielu sa aofia ai ni aoaiga ma ni folafolaga sili e le gata ina faatatau i le malo o Iuta i aso ua mavae ae mo Isaraelu uma, e aofia ai ma tagata o le Ekalesia i lenei vaitaimi. E ui ina faatamaia Isaraelu, ae sa vaai Esekielu i le aso o le a toe faapotopotoina ai ma toefuataiina. O lenei mea o lo o i lana faaaliga o ivi mamago ma lana valoaga i le laau a Iuta ma le laau a Iosefa.

### 1. O leoleo mamoe o Isaraelu

Aoao atu ma talanoaina le Esekielu 34. I lenei mataupu sa aoaiina ai e le Alii leoleo mamoe a Isaraelu lava ia sa le i fafagaina a latou lafu. Sa ia faamatalaina o ia lava o le Leoleo mamoe Lelei e na te faapotopoto i lana lafu i aso e gata ai ma taitaiina i latou i le Meleniuma.

- O ai “leoleo mamoe o Isaraelu” o lo o taua i le Esekielu 34? (O taitai faalelotu i le vaitaimi o Esekielu.) Aisea na le fiafia ai le Alii ia i latou? (Tagai i le Esekielu 34:2–4.) O le a le mea e tupu i mamoe pe a tuulafoai i latou e le leoleo mamoe? (Tagai i le Esekielu 34:5–6.)
- O a ni auala e mafai ai ona avea i tatou ma leoleo mamoe o Isaraelu? (Tatou te vaavaaia ma faamalosi soo se tasi e pei o se tagata o le aiga, tagata o le Ekalesia, tuaoi, faiaoga asiasi ma faiaoga o aiga, ma tagata o korama ma vasega.)

Sa saunoa mai Elder Bruce R. McConkie: “So o se tasi o lo o auauna i soo se valaauga i le Ekalesia e na te vaaia ai le faaleagaga po o le faaletino o soo se tasi o fanau a le Alii o se leoleo mamoe i na mamoe. E tuuina e le Alii ana leoleo mamoe e gafa ma le saogalemu [faaolataga] o ana mamoe” (*Mormon Doctrine*, 2nd ed. [1966], 710).

- Sa le fiafia le Alii i nisi o leoleo mamoe sa latou fafaga ia i latou lava ae le o le lafu mamoe (Esekielu 34:2–3, 8). E faapefea ona tatou faia lea sese i lenei vai-taimi?
- E tusa ai ma le Esekielu 34:11–16, o a mea a leoleo mamoe moni e fai i a latou mamoe? (Ia matau le veape o le *sue*, *saili*, *taitai*, *faapotopoto*, *fafaga*, *faatasisi*, ma le *faamalosi*.) E faapefea ona tatou tetee atu i isi mai le faataapeapeina? E faapefea ona tatou fesoasoani e faapotopoto i latou ua faataapeapeina? E faapefea ona tatou fafaga ma faamalosi lafu a le Alii? E faapefea ona faamanuia-ina oe e leoleo mamoe moni sa faia ia mea?

Sa saunoa mai Peresitene Ezra Taft Benson: “Matou te valaau atu ina ia faatele-ina outou lava i le faafouina o lo outou naunautai. Matou te mananao ia outou faia mea tou te le i faia. Matou te mananao ia outou leoleo, fafaga, tausii, ma manatu mo le lafu, ma afai e i ai ni mamoe o lo o se, e matou te tuuina atu se lui ia te outou e saili mai i latou” (in Conference Report, Apr. 1983, 64; po o le *Liahona*, Iulai, 1983, 78).

- E faapefea ona avea le Faaola ma leoleo mamoe ia i tatou? (Tagai i le Esekielu 34:11–16; Salamo 23; Isaia 40:11; Ioane 10:11–15.) Atonu e te manao e talanoaina le auala na faataunuaina ai e le Faaola mea o lo o faamatala mai mau taitasi. Tuuina atu lau molimau i le Faaola a o e faalogoina musumusuga a le Agaga.

## 2. Salamo ma le faamagaloga

Aoao atu ma talanoaina le Esekielu 18:21–32

- O le a se mea o aoao mai e lenei mau e uiga i le salamo ma le faamagaloga? (Tagai Esekielu 18:21–22, 27–28.) O le a le uiga o le “fai mo outou . . . se loto fou ma se agaga fou”? (Esekielu 18:31). Aisea e taua ai le malamalama i le alo-ese mai agasala ma le maua o se suiga o le loto? E faapefea ona tatou iloa ia suiga o le loto? (Tagai Alema 5:7–14.)
- O le a se mea o aoao mai e lenei mau e uiga i tagata ua liliuese mai le amiotonu ma le salamo? (Tagai Esekielu 18:24, 26.)
- O le a se mea o tau mai e lenei mau e uiga i lagona o le Alii ina ua ia faasalaina tagata leaga? (Tagai Esekielu 18:23, 32.)
- O le a se mea o aoao mai e lenei mau e uiga i le faamasinoga ma le alofa o le Alii? (Tagai Esekielu 18:25, 29–32.) Aisea e taua ai le iloa o le Alii e tonu ma alofa?

## 3. O le faaaliga a Esekielu i ivi mamago

Aoao atu ma talanoaina le Esekielu 37:1–14. Faamatala atu o le faaaliga a Esekielu i ivi mamago o lo o faatusa lea i le Toetutu ma le toefaatasia o le fanauga a Isaraelu i lo latou laueleele folafolaina.

- E faapefea ona faatusa le Toetutu i le faaaliga a Esekielu? (O ivi o le a toe tuu-faatasia, o le a maua aano ma le pau, ma tuuina atu i ai le ola; tagai Esekielu 37:1–10, tagai foi i le Alema 11:42–44; 40:23.)
- E faapefea ona faatusa le toefuataiina o le fanauga a Isaraelu i lo latou eleele folafolaina i le faaaliga a Esekielu? (Tagai i le Esekielu 37:11–14. O le Toetutu o lo o faaoga e faamanino mai ai leni toefaatasia.)
- O le faaaliga na oo ia Esekielu e mafai ona faitauina o se faatusatusaga o lo o faamatala ai le faafouina o le “faamoemoe” o Isaraelu (Esekielu 37:11). E ui lava ina pe le faamoemoe o Isaraelu faapei o “le vaega sili” o ivi mamago sa vaia e Esekielu, sa mafai ona toe aumaia e le Faaola i le ola. E faapefea ona faafouina lou faamoemoe e le Faaola? (Atonu e te manao e faitau le Moronae 7:41 ao e talanoaina leni fesili.)
- O ivi o lo o i le faaaliga na oo ia Esekielu sa amata ona ola ina ua fai atu Esekielu ia i latou e “faalogo mai ia i le afioga a le Alii” (Esekielu 37:4). E faapefea ona aumaia e le afioga a le Alii le ola ia i tatou?

#### 4. O le laau a Iuta ma le laau a Iosefa

Aoao atu ma talanoaina le Esekielu 37:15–28. Faamatala atu e i ai se uiga o le valoaga a Esekielu i le laau a Iuta ma le laau a Iosefa. O lo o faatatau i le toe tuu-faatasi i aso e gata ai o tusitusiga a Iuta ma Iosefa (Isaraelu). E faatatau foi i le toe faatasia o le malo o Iuta ma Iosefa (Isaraelu) i aso e gata ai.

- Sa faapefea ona faataunuaina le valoaga o lo o i le Esekielu 37:15–20? (Tagai 1 Nifae 5:14; 2 Nifae 3:12; MFF 27:15. Faamatala atu o le upu *laau* i nei fuai-upu o lo o faatatau i se laau tusitusi sa faaoga i le taimi o Esekielu. O le laau a Iuta o le Tusi Paia, a o le laau a Iosefa o le Tusi a Mamona.)

Sa saunoa mai Boyd K. Packer: “O le laau po o le talafaamaumau a Iuta, o le Feagaiga Tuai ma le Feagaiga Fou, faapea ma le laau po o le talafaamaumau a Efaraima, o le Tusi a Mamona, o le isi molimau ia Iesu Keriso, ua femolimaau’i nei, a o e suesue mai i le isi tusi, o le a tosina atu lou loto i le isi; a o e aoao mai le tasi tusi, o le a faamalamalamaina foi oe i le isi. Ua tasi ia tusi i o tatou lima. Ua faataunuaina nei le valoaga a Esekielu” (in Conference Report, Oct. 1982, 75; po o le *Liahona*, Ianuari, 1983, 104).

- O a ni faamanuiaga ua oo mai i le mauaina o le Tusi a Mamona e faaopoopo i le Tusi Paia? (Tagai 1 Nifae 13:39–40; 2 Nifae 3:12.) E faapefea ona fesoa-soani le Tusi a Mamona ia te oe ia e malamalama i le Tusi Paia? E faapefea ona faamalosi oe o le Tusi Paia o se molimau a le Alii o Iesu Keriso?
- O le a le mea na tau mai e Esekielu o le a tupu pe a uma ona tuu-faatasi laau nei e lua?
  - a. O le a faatasia le fanauga a Isaraelu ma avea ma malo e tasi faatasi ma le Faaola o le Tupu (Esekielu 37:21–22).
  - e. O le a faamamaina i latou (Esekielu 37:23).
  - i. O le a latou tausi i tulafono a le Alii (Esekielu 37:24).
  - o. O le a latou nonofo i le nuu folafolaina (Esekielu 37:25).
- O a isi faamanuiaga na folafola atu e le Alii i le Esekielu 37:26–28? (O le tasi faamanuiaga taua o le faatuina lea o le maota o le Alii po o le tapeneko, o lona uiga o le malumalu. O le isi lesona o le a talanoaina ai faamanuiaga o le malumalu.)

Faaiuga

O aoaoga a Esekielu ua fesoasoani tatou te malamalama ai i le tele o le alofa o le Faaola mo i tatou taitoatasi. O ia o lo tatou Leoleo Mamoe. Ua naunau o ia e faamagalalo. Ua ia saunia le ala tatou te toetutu ai. Ua ia taitaia le faapotopotoina o Isaraelu i aso e gata ai. Ma ua ia aumaia le Tusi a Mamona o se tasi o molimau ia te ia. Ia tofi ni tagata o le vasega e fetufaai mai ni a latou molimau i le moni o nei mea.

## Manatu Faaopoopo e Aoao Atu Ai

O mataupu o lo o taua i lalo e faaopoopo i le ootootoga o le lesona fautuaina. Atonu e te manao e faaoga se tasi o nei manatu pe sili atu foi e avea o se vaega o le lesona.

### 1. O le aoao e avea ma leoleo mamoe lelei.

A o e talanoaina tiute o le avea ma se leoleo mamoe, atonu e te manao e faamatala atu le tala lenei mai ia Peresitene James E. Faust:

“Ao o’u itiiti lava, sa maua ai e lou tama se tamai mamoe ua se i le toafa. O le lafu mamoe e i ai le tina o lenei tamai mamoe ua o ese, ma o lea na se ese mai ai loa le tamai mamoe lea mai lona tina ma sa leiloa foi e le leoleo mamoe ua leiloa. Talu ai o le a le mafai ona ola lea tamai mamoe i le toafa, o lea na aumai ai loa e lo’u tama i lo matou aiga. O le tuu ai o le tamai mamoe i le toafa, o lona uiga o le a tele se avanoa e mate ai, a le faatamaiaina e isi manu po o le fia ai foi aua e manaomia le suasusu ona e laitiiti tele. Na tuuina mai ia te au e lo’u tama le tamai mamoe ma avea ai a’u ma ona leoleo mamoe.

“Mo ni nai vaiaso, sa ou faamafanafanaina ai le susu povi i totonu o le fagususu ma fafaga ai le tamai mamoe. Sa vave ona avea i maua o se uo. Sa amata ona tupu. Ma te taaalo lava ma lau tamaimamoe i luga o le mutia. O nisi taimi ma te taoto ai faatasi i luga o le mutia ma ou aluga ai i luga o lona tino taufufufu ma vaavaai i le vanimonimo lanumoana ma ao mafiafia. Ou te le lokaina lau tamai mamoe i le ao. E le mafai ona sola ese. Sa vave ona iloa ona ‘ai le mutia. Na mafai ona ou valaauina la’u tamai mamoe mai soo se vaega o le matou fanua i lo’u faataitaiina lea o le tagi a le mamoe i le lelei ou te mafaia . . .

“O se tasi po na agi ai se afa matautia. Sa galo ia te au ona tuu lau tamai mamoe i totonu o le pa, o se mea sa tatau ona ou faia. Sa ou alu i lou moega. Sa fefe si au uo i le tetele o le afa ma sa ou lagonaina lona tagi mai. Sa ou iloa sa tatau ona ou fesoasoani i lau fagafao, ae sa ou manao foi au ia ou te saogalemu, mafanafana ma mago i luga o lou moega. Ou te le i nofo i luga e pei ona sa tatau ona ou faia. Ina ua malama le taeao, sa ou alu atu ai i fafo ma ou iloaina lau tamai mamoe ua pe. Na faalogoina foi ese taifau lana tagi mai ma alu atu loa ma faaumatia o ia. Sa ou matuai faanoanoa lava. Sa le avea ai au o se leoleo mamoe lelei po o se taitai e faatuatuaina e lou tama. Sa faapea mai lo’u tama, “Atalii, pe le mafai ea ona ou faatuatuaina oe e tausi na o se tamai mamoe e tasi? sa sili atu ona tiga faamatalaga a lo’u tama ia te a’u nai lo le toesea o si au uo taufufufu. Sa ou tautino ai lava i lea aso ao ou laitiiti, o le a ou taumafai e aua lava nei ou toe faatamala i lou tiute o se leoleo mamoe pe afai ae toe tuuina mai ia te au lena tofiga.

“E le i tele ni tausaga na mulimuli ane, ae valaauina au o se soa laitiiti i se tasi o faiaoga o aiga. E i ai taimi e malulu ai pe matagi ma sa ou manao ou te nofo i le fale ma faamafanafana, ae i lou mafaufau, o lo o mafai lava ona ou faalogoina le

tagi mai a la’u tamai mamoe, ma sa ou iloaina e tatau ona avea au ma leoleo mamoe lelei ma o faatasi ma la’u soa sinia. I na tausaga e tele, soo se taimi lava e oo mai ai le faapaie i ou tofiga, o le taimi foi lena e faamanatu mai ai ia te au le faanoanoa na oo ia te au i lena po i tausaga e tele ua mavae ina ua le avea a’u ma se leoleo mamoe lelei” (in Conference Report, Apr. 1995, 62–63; po o le *Liahona*, Iulai, 1995, 52–53).

## 2. Tagata vaai e tuuina atu le leo o le lapataiga

- Ina ua valaauina Esekielu e avea ma perofeta, sa faapea atu le Alii: “Ou te faia oe ma tagata vaai i le aiga o Isaraelu” (Esekielu 3:17). E faapefea ona tutusa tiute o Esekielu o se perofeta ma se tagata vaai? (Tagai Esekielu 3:17–21; 33:1–9. I aso o Esekielu, o se tagata vaai i luga o le olo e na te fautuaina tagata i ni osofaiga leaga mai ni vaegaau ua avea i latou ma o latou fili. Sa lapataia e Esekielu ona tagata e uiga i fili o lo o taumafai e faaleaga lo latou faaleagaga.)
- O ai tagata vaai i o tatou vaitaimi? Aisea e taua ai le i ai o nei tagata vaai? O le a lo tatou tiute e avea ai ma tagata vaai? (Tagai MFF 88:81. O se vaega o lenei tiute o le aoaoina atu lea o le talalelei ia i latou e le i mauaina.)

O le aoao atu o le taua o le faalogo i lapataiga a perofeta—ma lapataiga o o tatou tuaoi i le aoao atu lea o le talalelei ia i latou—sa faamatala mai e Elder Boyd K. Packer se lolo faatamaia na mafua ona o le soloia o le Teton Dam i Idaho i le 1976. I le ala na pa ai lenei vai sa i ai tagata e 7,800. Sa tafe mai le vai o vanu ma faatamaia ai ni aiga se 790 ma matuai faaleagaina ai isi aiga e 800, o falesa, aoga ma pisinisi. I le maitauina o le aofaiga o le vai ma lona saosasoa, ma le faitau aofai o tagata o lo o nofoia lea eleele, sa maitau e se tasi o tagata poto pe tusa ma le 5,300 tagata e tatau ona maliliu. Ae toa 6 tagata na malelemo.

Sa saunoa mai Elder Packer:

“E faapefea ona toaitiiti na faatamaia e lenei faalavelave matautia? . . . Aua sa lapataia i latou! E le i umi se taimi ae sa lapataia i latou; ma soo se tasi ua lapataia, e tatau ona ia lapatai i lona tuaoi . . .

“A e faapefea le toa 6 na malelemo? O le tasi o i latou na i lalo tonu lava o le vai ma ua le mafai ona alo ese. O le toalua o i latou e le i talitonu i le lapataiga se ia oo i le taimi mulimuli. Sa latou mauaina i laua i la laua taavale, ae la te le i faalogo i le lapataiga. O le toatolu o i latou na toe foi e aumai ni oloa, ma sa maliliu ai.

“Ae o se vavega o se aofaiga tele. I le avea ai o i tatou ma tagata o le Au Paia o Aso e Gata Ai, ua tatou aoao e faalogo i lapataiga . . .

“O lea, ua ou vaai i se faatusa sili o le mea o lo o tupu i le lalolagi, o se galu lolo o le agasala i le lalolagi. O lo o i o tatou autafa ma o lo o faasolo ina loloto tele. O o tatou olaga ua i faigata. O lo tatou lauelele ua i faigata. O lo tatou saolotoga ua i faigata, ae o lo o tatou faia lava a tatou galuega ma lo tatou le malamalama, e tatau ona tatou lapataia o tatou tuaoi . . .

“[Ua uma ona] lapataia i tatou e se perofeta. Pe [tatou] te faalogo ea i le lapataiga, pe [tatou] te faapei o le toaono i Idaho sa manatu o le lapataiga e le mo i latou?” (*That All May Be Edified* [1982], 220–21, 223).

# “E Ola ai foi Mea Uma e Oo Atu i Ai Le Vaitafe”

Lesona  
**44**

*Esekielu 43–44; 47*

---

**Faamoemoega** Ina ia uunaia tagata o le vasega e faaoga mana o faamalologa e maua ai le ola o loo maua i le malumalu.

---

- Sauniuniga**
1. Suesue ma le agaga tatalo mau nei:
    - a. Esekielu 43:1–12; 44:6–9, 23. Ua faaali mai e Esekielu se faaaliga o le malumalu i Ierusalem.
    - e. Esekielu 47:1, 6–12. Sa vaaia e Esekielu se vai o tafe mai le malumalu ma aumaia le ola i le toafa ma faaolaina ai le Sami Mate.
    - i. Esekielu 47:2–5. Sa fuaina e Esekielu le loloto o le vaitafe, ma iloa ai sa faateleina le loloto o le vai i taimi uma na te asaina ai.
  2. Ia tusia le faafanua o lo o i lenei lesona i luga o se pepa lautele po o luga foi o le laupapa a o le i amataina le vasega.
  3. Mau faaopopo: Esekielu 40–42; Ioelu 3:18; Sakaria 14:8; Faaaliga 22:1–3; 1 Nifae 8:10–11; 11:25; Mataupu Faavae ma Feagaiga 97:8–20.
- 

## **Faalautelega Fautuaina o le Lesona**

Gaoioiga e  
Faatosina Mai Ai

Atonu e te manao e faaoga se tasi o gaoioiga nei (po o sa oe lava gaoioiga) e amata ai le lesona. Filifili le gaoioiga e sili atu ona talafeagai mo le vasega.

Ia fai atu i tagata o le vasega fesili e tali tutusa ma fesili nei:

- Pe i ai ea se taimi na e matua fiafia ai lava a o e matamata i se taaloga po o se isi ituaiga o faafiafiaga?
- Pe sa i ai ea se taimi na e matua fiafia ai lava i sea mea ma e oso ai i luga ma ‘e’e pe faataio foi e faamalosi?
- E mafai ona e mafaufau i ni mea paia na tutupu na o faatasi ma le olioli ma le loto faafetai? O nisi o nei mea e aofia ai:
  - a. O le foafoaina o le lalolagi (Iopu 38:4–7).
  - e. O le maliu atu o Iesu i Ierusalem (Ioane 12:12–16).
  - i. O le Afio Faalua Mai o Keriso ma le Toetu (1 Tesalonia 4:16).
- E faapefea e le fiafia tatou te maua mai taalogo po o faafiafiaga ona faatusatusa i le olioli mai ni mea paia na tutupu? (O le fiafia e maua i taaloga po o isi faafiafiaga e le tumau, ae o le olioli e o faatasi ma mea paia e tutupu, e faavavau.)
- O le a se mea taua na tupu i le Ekalesia e tulai ai tagata o lo o auai ma faaalia le fiafia ma le olioli i lo latou alalaga leotele ma talotalo o latou lima? (I le faapaiaina o se malumalu, e auai le faapotopotoga i le faaalia o le olioli tele, i le Alaga Osana.)

“O le Alaga o le Osana e faia ma le agaga atoa, ua tuuina atu i le malosi atoa-toa. E tutulai le faapotopotoga ma alaga atu ‘Osana, Osana, Osana, Osana i le Atua ma le Tamai Mamoe. Amene, Amene, ma Amene,’ e faia faatolu. O lenei tulaga e masani ona faia faatasi ma talotalo solosolo papae ma sii i luga lima. O le Tamai Mamoe e faatatau i le faamaulalo o le Atua ma le togiola a Iesu Keriso” (in Daniel H. Ludlow, ed., *Encyclopedia of Mormonism*, 5 vols. [1992], 2:659).

Faamatala atu o lenei lesona o le a fesoasoani i tagata o le vasega ia malamalama i auala e aumaia ai e le malumalu le olioli.

Mau Talanoaina  
ma le Faaogaina

Ao e aoaoina atu nei mau, ia talanoaina pe faapefea ona faaoga i le olaga i aso taitasi. Uunai tamaiti o le vasega e faamatala ni aafiaga e faatatau i mataupu ua taua i le mau.

### 1. Ua faaalua e Esekielu le faaaliga o le malumalu i Ierusalem

Aoao atu ma talanoaina le Esekielu 43:1–12; 44:6–9, 23.

- Tuu atu i tagata o le vasega e faitau le Esekielu 43:1–12 ma le 44:6–9, 23. O a ni mea e mafai ona tatou aoaoina e uiga i le malumalu mai nei fuaiupu?


Atonu e te manao e lisi i luga o le laupapa tali a tagata o le vasega ma talanoaina o latou uiga. O tali e mafai ona aafia ai tulaga nei:

- a. O le mamalu o le Alii ua faatumulia ai le malumalu (Esekielu 43:2, 4–5).
- e. O le malumalu o le “nofoaga o le nofoalii o le [Alii]” i luga o le fogaeleele (Esekielu 43:7).
- i. E savali le Alii i le malumalu, ua ia faaigoa “o le mea e tutu ai o’u alofivae” (Esekielu 43:7).
- o. O le malumalu o le nofoaga o le Alii e “nofo faatasi ai” ma ona tagata (Esekielu 43:7).
- u. Ua tatou aoao e uiga i tulafono a le Alii i le malumalu (Esekielu 43:11).
- f. Ua i ai ni sauniga ua finagalo le Alii tatou te faia i le malumalu (Esekielu 43:11).
- g. O eleele uma o lo o siomia ai le malumalu “ua sili ona mamalu” (Esekielu 43:12).
- l. Na o i latou e agavaa e tataua ona ulu atu i le malumalu (Esekielu 44:6–9).
- m. O le malumalu e aoao ai le eseese o mea paia mai mea le paia, ma mea mama mai mea e le mama (Esekielu 44:23).

### 2. Sa vaaia e Esekielu se vai o tafe mai le malumalu ma aumaia le ola i le toafa ma faaolaina ai le Sami Mate.

Aoao ma talanoaina le Esekielu 47:1, 6–12

- O le mea na vaaia e Esekielu o sau mai faitotoa o le itu i sasae o le malumalu i Ierusalem? (Tagai Esekielu 47:1.) O fea na agai i ai le vai? (Tagai Esekielu 47:8. Faaalia i le faafanua o eleele lafulafua o Iuta ma le Sami Mate o lo o i le itu i sasae o Ierusalem.)



- O le Vao o Iuta o se toafa naumati, a o le Sami Mate ua matuai oona ma e le ola ai ni meaola. E tusa ai ma le faaaliga na oo ia Esekielu, o le a le suiga o le a i ai i le Vao o Iuta ma le Sami Mate ona o le vai e tafe mai le malumalu? (Tagai Esekielu 47:6–12.)
- I se faaaliga e tali tutusa ma le faaaliga na oo ia Esekielu i le malumalu, sa faaaliga ia Ioane le Soo Pele le nofoalii o le Atua (Faaaliga 22:1–3. Ia manatua lena mea i le Esekielu 43:7, sa taua e le Alii le malumalu o le “mea e i ai lou nofoalii”). O le a le mea na tafe mai le nofoalii o le Atua i le faaaliga ia Ioane? (Tagai Faaaliga 22:1.) O le a le “vai o le ola”? (O mataupu o le talalelei; tagai i le gaoioiga e faatosina mai ai i le lesona 30.) E faapefea ona faapei i tatou o le Vao o Iuta ma Sami Mate pe a tatou le faaogaina le vai o le ola?
- E faapefea e le vai o le ola o lo o avanoa i le malumalu ona faamalolo ma tuuina atu le ola i faaipoipoga? aiga? o tatou tuua? ma le Ekalesia? O le a le isi mea o lo o tafe mai le malumalu e maua mai ai le ola faaleagaga ma faamalologa? (O tali e aafia ai le faamaoni, poto, faaaliga, ma feagaiga.)
- Esekielu 47:12 o lo o faamatalaina laau e tutupu i le auvai o le vaitafe i le faaaliga na oo ia Esekielu. O le a le mea e tutusa ai laau ma vai o le vaitafe? (O loo i ai mana o faamalologa e maua ai le ola.)
- O a mea o lo o ola i le auvai o le vaitafe i le faaaliga ia Ioane? (Tagai Faaaliga 22:2.) O fea isi mea i tusitusiga paia o lo o faaaliga ai i perofeta le laau o le ola? (Tagai 1 Nifae 8:10–11; 11:25.) I le miti na tuuina atu ia Liae ma Nifae, o le a le mea na sui tulaga ai le laau o le ola? (Tagai 1 Nifae 11:25.)
- E faapefea ona faia e le alofa o le Atua faamalologa ma tuuina atu le ola? O a manua faaleagaga ma faaletino e faamalolo e le alofa o le Atua?

### 3. Sa fuaina e Esekielu le loloto o le vaitafe

Aoao ma talanoaina le Esekielu 47:2–5.

- O le a le loloto o le vai i le taimi muamua na sopoia ai e Esekielu? (Tagai Esekielu 47:2–3.) O le a lona loloto i le taimi lona lua, lona tolu, ma le taimi lona fa na ia sopoia ai? (Tagai Esekielu 47:4–5.) O le a le moni o lo o fautuaina mai e nei fuaiupu e uiga i le malumalu? (O le mana o le malumalu e faateleina i o tatou olaga pe a tatou malaga soo atu i ai.)



- O mea moni matagofie o lo o aoaoina i le malumalu, o le tele o lo o faaaliga i faailoga. Afai o le taimi muamua e le i “lava ai” lo tatou malamalama i sauniga o le malumalu, o le a se mea e tatau ona tatou faia? (Tagai Esekielu 47:2–5. E tatau ona tatou savalia le “vaitafe” i taimi uma—po o nisi upu, auai i le malumalu i taimi uma pe a talafeagai ai.)

Faaiuga

Tau atu i tagata o le vasega sa faaigoaina e le Alii le malumalu o le “nofoaga e fai ma mea e faafetai ai” (MFF 97:13). Faaali atu lau faafetai i faamanuiaga ua oo mai ona o le malumalu, ma valaaulia tagata o le vasega e fetufaai mai o latou lagona faafetai mo le malumalu. Molimau atu e pei lava ona faamaloloina e le vai mai le malumalu le Vao o Iuta ma le Sami Mate i le faaaliga ia Esekielu, o le a faamalolo ma faamama i tatou e le talalelei a Iesu Keriso pe a tatou mauaina.

## Manatu Faaopoopo e Aoao Atu Ai

O mataupu o lo o taua i lalo e faaopoopo i le ootoga o le lesona fautuaina. Atonu e te manao e faaoga se tasi o nei manatu pe sili atu foi e avea o se vaega o le lesona.

### 1. “Ou te fiafia i mea e tu ai lou maota” (Salamo 26:8)

O le tele o le salamo o lo o taua ai faamanuiaga ua tatou maua mai le malumalu ma faailoa mai lagona matagofie o le alofa ma le faafetai mo le malumalu. Atonu e te manao e fesili i tagata o le vasega e faaali mai ni o latou lagona faafetai mo le malumalu ao e iloiloia salamo nei:

Salamo 24:3–4  
Salamo 26:6–8  
Salamo 27:1, 4–6  
Salamo 65:4  
Salamo 84  
Salamo 122  
Salamo 134

### 2. “O Faailoga Sili o lo Tatou Auai i lana Ekalesia”

Sa saunoa mai Peresitene Howard W. Hunter: “Ou te valaau atu ai i le Au Paia o Aso e Gata Ai ia tepa taulai i le malumalu o le Alii o se faatusa tele lea o lo outou auai i lana Ekalesia. O le moomooga sili lava o lo’u loto, ia agavaa tagata uma o le Ekalesia e ulu atu i le malumalu. O le a fiafia le Alii pe a agavaa tagata matutua uma o le Ekalesia ma tauaveina se pepa faataga o le malumalu. O mea e ao ina tatou faia tatou te agavaa ai mo se pepa faataga o le malumalu, o mea moni lava ia e mautinoa ai le fiafia o le tagata lava ia ma le aiga” (in Conference Report, Oct. 1994, 8; po o le *Liahona*, Ianuari, 1995. 9).

- E mafai faapefea ona tatou avea le malumalu ma “faailoga sili o lo tatou auai” i le Ekalesia?” E faapefea e lo tatou vaai atu i le malumalu i lea itu ona aafia ai o tatou uiga vaai i fafo atu ma o tatou naunauga i le galuega a le Alii?

# “Afai Ou te Oti ai, Oti ai Pea”

Lesona  
**45**

*Tanielu 1; 3; 6; Eseta 3–5; 7–8*

---

**Faamoemoega** Ina ia fesoasoani i tagata o le vasega e maua le lototele e ola ai e tusa ma tulaga o le talalelei.

---

**Sauniuniga**

1. Suesue ma le agaga tatalo mau nei:
  - a. Tanielu 1. Ua mumusu Tanielu ma ana uo e tauleagaina i latou i le aia o taumafa a le Tupu o Nepukanesa (1:1–16). Sa faamanuia e le Alii Tanielu ma ana uo i le soifua maloloina ma le atamai (1:17–21).
  - e. Tanielu 3. O Sataraka, Mesako ma Apeteniko ua le tapuai i tupua sa faatuina e le Tupu o Nepukanesa (3:1–12). Ua lafoina e le Tupu o Nepukanesa i latou i le ogaumu aasa, ma ua faasaoina i latou e le Alii mai le oti (3:13–30).
  - i. Tanielu 6. Ua tauanau e le nuu o le Tupu o Tariu le tupu ina ia sainia se malelelga a uma aso e 30 ua tatau ona faatoga uma atu tagata ia te ia ae le o se isi lava po o le Atua (6:1–9). E tusa lava pe o le a le vavao a le tupu, sa tatalo lava Tanielu i le Atua (6:10–13). I se faasalaga mo le le usitai i le vavao, sa lafoina Tanielu i le lua o leona (6:14–17). Sa auina atu e le Alii se agelu e puipuia Tanielu (6:18–23).
  - o. Eseta 3–5; 7–8. Sa tete Moretekai e ifo atu ia Hamanu (3:1–4). Sa tauanau e Hamanu le Tupu o Asueru e saunia se vavao mo le fasiotia o tagata Iutaia uma o lo o i le malo (3:5–14). Sa iloa e Eseta le fuafuaga a Hamanu mo le fasiotia o ona tagata ma alu atu o ia i le tupu mo se fesoasoani (4:1–17). Sa talia e le tupu Eseta ma lana valaaulia mo i laua ma Hamanu mo se taumafataga (5:1–8). I le taumafataga sa faailoa atu ai e Eseta le manatu o Hamanu e fasiotia Iutaia (7:1–6). Ua sisi e le tupu Hamanu (7:7–10). Sa faamamaluina e le tupu Moretekai ma talia le manao e Eseta e tatala le vavao a Hamanu (8:1–17).
2. Mau faitau faaopopo: Tanielu 5; Eseta 1–2; 6; 9–10.
3. Afai e te faaaogaina le gaoioiga e faatosina mai ai, ia tofia ni tagata o le vasega se toalua e saunia e faamatala atu se taimi na faaalua ai lo latou lototele e usitai i le Alii po o nisi foi latou te iloa.
4. Afai o maua ata nei, atonu e te manao e faaali atu nisi i le taimi o le lesona: Ua Faafitia e Tanielu le Meaai a le Tupu ma le Uaina (62094; Taga o Ata o le Talalelei 114); O Alii e Toatolu i le Ogaumu Aasa (62093; Tagata o Ata o le Talalelei 116); ma Tanielu i le Lua o Leona (62096; Taga o Ata o le Talalelei 117).

---

**Faalautelega  
Fautuaina o  
le Lesona**

Gaoioiga e  
Faatosina Mai Ai

Atonu e te manao e faaoga se tasi o gaoioiga nei (po o sa oe lava gaoioiga) e amata ai le lesona.

Ia tofia ni tagata o le vasega se toalua e saunia e faamatala atu se taimi na faaalua ai lo latou lototele e usitai i le Alii po o nisi foi latou te iloa.

A maea ona fetufaai atu ni mea na tutupu i tagata o le vasega, faamatala atu o lenei lesonea o lo o faatatau i tagata e toaono o le Feagaiga Tuai sa faaalua lo latou lototele e usiusitai i le Alii.

Mau Talanoaina  
ma le Faaagaina

---

A o e aoaoina atu nei mau, ia talanoaina pe faapefea ona faaoga i le olaga i aso taitasi. Uunai tamaiti o le vasega e faamatala ni aafiaga e faatatau i mataupu ua taua i le mau.

### **1. Sa teena e Tanielu ma ana uo taumafa a le tupu o Nepukanesa; ua faamanuiaina i latou i le soifua maloloina ma le poto.**

Aoao ma talanoaina le Tanielu 1.

A o laitiiti Tanielu, sa ave faatagataotauaina o ia mai Ierusalemia i Papelonia. O ia ma nisi o talavou atamamai o Eperu faatasi ma ana uo o Sataraka, Mesako ma Apeteniko sa aoao i le malae o le Tupu o Nepukanesa.

- O le a se fautuaga a Tanielu ma ana uo ina ua tuuina atu i ai mea taumafa a le tupu ma le uaina? (Tagai Tanielu 1:8–14). O a faamanuiaga na latou maua i le usitai i tulafono a le Alii o le soifua maloloina? (Tagai Tanielu 1:15, 17, 20.) E faapefea ona tutusa faamanuiaga na latou maua ma faamanuiaga a le Alii ua folafola mai ia i tatou pe a tatou tausia le Upu o le Poto? (Tagai MFF 89:18–20.)

Na aoao mai e Elder Boyd K. Packer: “Ua ou iloa nei . . . o le faamoemoega faavae o le Upu o le Poto e afua mai i faaaliga. Mai le taimi o outou laiti, matou te aoao atu outou e aua le inuina se ti, kofe, meainu malolosi, tapaa, fualaa faasaina, ma soo se mea lava e afaina ai lo outou soifua maloloina . . . Afai e faigata i se tasi o ‘loo aafia ai’ ona lagona se talanoa atu i se tulaga faigofie, e mafai faapefea ona latou tali atu i uunaiga faaleagaga ia e pa’i atu i o latou faalagona aupito ma’ale’ale? E pei lava ona taua le Upu o le Poto e faapena foi le taua o se tulafono o le soifua maloloina, atonu e sili atu le taua ia te outou i le faaleagaga nai lo le itu faaletino” (*Liahona*, Mati 1980.)

- O le a se mea e mafai o aoao mai e lenei tala ia i tatou e uiga i le ala e tali atu ai pe afai ua latou lagonaina le tauanau e fai se mea e le tataua ona fai? (Tagai Tanielu 1:5; 8.) O a ni tulaga i lenei vaitaimi o lo o moomia ai lo tatou lototele e tautai i tulafono a le Alii? E faapefea ona tatou atinaeina le lototele o lo o manaomia i le usiusitai i ia tulaga?

### **2. Sa faasaoina e le Alii Sataraka, Mesako ma Apeteniko mai le fasiotia i le ogaumu aasa.**

Aoao atu ma talanoaina le Tanielu 3.

- Sa poloaiina e le Tupu o Nepukanesa soo se tasi lava e le tapuai i tupua na faia o le a tuuina i le ogaumu aasa (Tanielu 3:1–6). Sa faapea ona tali atu Sataraka, Mesako ma Apeteniko i lea tulaga? (Tagai Tanielu 3:12.) O le a le mea na faia e Nepukanesa ina ua ia iloa latou te le o tapuai i tupua na ia faia? (Tagai Tanielu 3:13–15, 19–20.)
- O le a le tala a Sataraka, Mesako ma Apeteniko ina ua faamatau i latou e le tupu o le a lafoina i le ogaumu aasa? (Tagai Tanielu 3:16–18.)

Na saunoa mai Neal A. Maxwell: “O le i ai o le faamoemoe silisili tatou te le sao ai i taimi uma mai faalavelave lata mai, ae o le a lavea’iina ai i tatou mai le oti e faavavau! Peitai o le faamoemoe silisili o le a mafai ai ona tatou faaoga o upu e tolu sa faaogaina i senituri ua mavae e ni alii totoa se toatolu. Sa latou mautinoa e mafai e le Atua ona lavea’i latou mai le ogaumu ‘a’asa pe a finagalo i ai. ‘Ae peitai, a le o lea, o a latou tala, o le a latou auaua pea ia te Ia!” (in Conference Report, Oct. 1994, 45; po o le *Liahona*, Ianuari, 1995, 41).

- O le a se mea e mafai ona tatou aoao mai i le tali a Sataraka, Mesako ma Apeteniko, e uiga i le usiusitai i tulafono a le Alii? (Sa naunau Sataraka, Mesako ma Apeteniko e usiusitai i le Alii tusa lava pe le faasaoina i latou. O lo tatou usiusitai e le tatau ona faamoemoe pe tali mai le Alii i faamanuiaga tatau i se taimi e le i faamoemoeina.) O le a le tulaga e matautia ai le usitai i le Alii ona o lo o manaomia na te tuuina mai ni faamanuiaga patino?
- O le a le mea na tupu ina ua lafoina Sataraka, Mesako ma Apeteniko i le ogaumu aasa? (Tagai Tanielu 3:21–27.) O ai sa i ai i le ogaumu ma i latou? (Tagai Tanielu 3:25.) E faapefea ona fesoasoani le Faaola ia i tatou pe a tatou toe foi atu ia te ia i le taimi o o tatou puapuga?
- O le a le aafiaga o le lototele o Sataraka, Mesako ma Apeteniko sa i ai ia Nepukanesa? (Tagai Tanielu 3:28–30.) E faapefea ona aafia uiga o o tatou tuaoi i le Ekalesia i mea tatou te faia?

### **3. Sa tatalo Tanielu tusa lava pe sa i ai le vavao a le tupu ma sa lafoina o ia i le lua o leona. Sa auina atu e le Alii se agelu e puipuia Tanielu.**

Aoao ma talanoaina le Tanielu 6.

Sa suia le nofoaiga a le Tupu o Nepukanesa e lona atalii o Pelesara. Ina ua fasiotia Pelesara, “Na maua e Tariu le Metai le malo” (Tanielu 5:31), ma ua maua e Tanielu le tulaga sili. (Manatua: O Tariu le Metai e le o le Tupu lea o Tariu sa taitaiina le Malo o Peresia ina ua maea Kuresa lea na tagi atu i ai tagata Iutaia i le fausiaina o le malumalu. Tagai Esera 4–6; lesona 47.)

- Aisea na taumafai ai alii silisili ma aloalii e saili se sese o Tanielu? (Tagai Tanielu 6:1–5. Ua leaga o latou loto ina nei manatu le tupu ia Tanielu, ma ua latou popole ina nei tuuina atu ia te ia e le tupu se malosili atu.) O le a le vavao na taumafai nei alii e saina e le tupu? (Tagai Tanielu 6:6–9. Ona ua iloa e masani ona tatalo Tanielu, o lea na latou tauanauina ai le Tupu o Tariu e saina se vavao, mo aso e 30 e tatau ona tapuai uma atu tagata ia te ia ae le o se isi Atua. O i latou e le usitaia le vavao o le a lafoina i le lua o leona.)
- Sa faapefea ona tali atu Tanielu i le vavao a le tupu? (Tagai Tanielu 6:10.) O le a se mea ua tatou aoao mai ia Tanielu e uiga i le taua o le tatalo? (O le tatalo sa matuai taua ia Tanielu o lea sa faaauau ai pea ona ia tatalo e ui lava ina faamatauina lona olaga i le faia o lea mea.) Ia tofi tagata o le vasega e mafaufau loloto i le taua o le avanoa e tatalo atu ai i le Tama Faalelagi.
- O le a se lagona na oo i le Tupu o Tariu ina ua lipotia atu e ona tagata sa latou vaaia Tanielu o tatalo? (Tagai Tanielu 6:12–15.) Sa faapefea ona faamatalaina e le tupu lona talitonuga i le Atua? (Tagai Tanielu 6:16, 18.)
- Sa faapefea ona faamanuiaina e le Alii Tanielu i le lua o leona? (Tagai Tanielu 6:19–23.) O le a se aafiaga na oo i ai le Tupu o Tariu ma tagata o le malo ona o le faatuatua ma le lototele o Tanielu? (Tagai Tanielu 6:24–28.)

Sa saunoa mai Elder Tom Perry: “E le gata ina manuia le tupu i le galuega a Tanielu, ae ona o le faatuatua o Tanielu i le Alii, na aoga foi i le nuu uma lava. Aua na auina atu le malelega a le tupu i tagata uma o le malo e tataua ona tapuai i le Atua soifua moni, le Atua o Tanielu. E maeu le taunuuga e oo i ai a tatou galuega a o tatou auauna atu ‘i le lalolagi’ o lo o tatou i ai, i le galue punouai o le tagata i lana ua tofia ai!” (in Conference Report, Apr. 1988, 16; po o le *Liahona*, Iulai, 1988, 16).

#### 4. Ua tuuina atu e Eseta lona ola e faasaoina ai tagata.

Aoao atu ma talanoaina le Eseta 3–5; 7–8

O Eseta o se fafine Iutaia sa le i umi se taimi na ola ai o ia ina ua maea taimi o Tanielu. Ina ua maliliu ona matua, sa tausia o ia e le tama a le uso o lona tina o Moretekai. O Eseta e matuai lalelei tele, o le na fiafia i ai Asueru le tupu o Peresia ma Metai, ma ua ia avea ai o ia ma masiofo.

- Sa tofia e le Tupu o Asueru Hamanu e avea ma ana alii silisili (Eseta 3:1). Sa faapefea ona faaalua le lototele o Moretekai ina ua faatonuina o ia e le tupu ma isi auauna e ifo atu ia Hamanu? (Tagai Eseta 3:2–4.) O a ni uiga faaalua o Hamanu? (Tagai Eseta 3:5–14. Sa le fiafia o ia ma ia tauanauina le tupu e tuuina atu se faatamaiga i ni “tagata faapitoa”—o tagata Iutaia uma i le malo.)
- Ina ua iloa e Eseta le mea o lo o fetautalatalaai ai tagata Iutaia, sa ia aveina atu se feau ia Moretekai e fesiligia ai le mea ua tupu (Eseta 4:1–6). O le a le mea na fesili atu ai Moretekai ia Eseta? (Tagai Eseta 4:7–9.) Aisea na faigata ai ia Eseta ona alu i le tupu? (Tagai Eseta 4:10–11. O le tulafono e mafai e le tupu ona fasiotia se tasi e malaga atu ia te ia e aunoa ma se faatagaga).
- O le a se savali na tuuina atu e Moretekai ia Eseta ina ua ia iloa lona manao e fetai ai ma le tupu? (Tagai Eseta 4:13–14.) O a ni lagona o Eseta a o ia mafau-fauina se ala e “oo mai ai le malo i se tulaga faapea”? (Eseta 4:14.) E mafai faapefea ona tatou mauaina se faamautinoaga o o tatou olaga o lo o i ai ni faamoemoega? E faapefea e nei faamautinoaga ona fesoasoani ia i tatou?
- O a mea na manaomia e Eseta mai ana galu teine ma tagata sa Iuta mo le sauniuni atu e fetai ai ma le Tupu? (Tagai Eseta 4:16.) E mafai faapefea ona fesoasoani tatalo ma anapogi tuufaatasi ma isi tagata ia i tatou?
- I le sauniuni atu o Eseta e fetai ai ma le tupu, sa ia faapea mai, “A ou oti, ou te oti ai lava” (Eseta 4:16). E faapefea ona tutusa lenei tali ma le tali na tuuina atu e Sataraka, Mesako ma Apeteniko a o le i tuuina atu i latou i le ogaumu aasa? (Tagai Tanielu 3:17–18.) E faapefea ona faaalua e lenei faamatalaga le alofa o Eseta i ona tagata ma le Atua?
- Ina ua fetai ai Eseta ma le tupu, sa ia talia o ia ma ia faapea mai o le a faia soo se mea e na te manao i ai (Eseta 5:1–3). Sa ia manao e oo mai le tupu ma Hamanu mo se taumafataga (Eseta 5:4–8). I le aso lona lua o le taumafataga, o le a le mea sa manaomia e Eseta mai le tupu? (Tagai Eseta 7:3–4.) O le a le mea na faia e le tupu ina ua ia logotala o tagata o lo o faufau Hamanu e faatamaia o tagata Iutaia? (Tagai Eseta 7:5–10.)
- Sa faatautau Hamanu, ae ua faasalalauina i le malo atoa le poloaiga e fasiotia tagata Iutaia uma. O le a le mea na fai atu Eseta i le tupu e fai? (Tagai Eseta 8:5–6.) O a faamanuiaga na maua e tagata Iutaia ona o le faatuatua ma le lototele o Eseta? (Tagai Eseta 8:16–17.) O a ni faamanuiaga ua e maua ona o le lototele ma le faatuatua o isi tagata?

- O a ni lui o lo o tatou feagai i lenei vaitaimi e moomia ai le faatuatua e pei o Eseta? O a ni faamanuiaga o le a tatou maua pe a tatou taumafai e fai le mea sao e tusa lava pe tatou te feagai ma faigata?

Faaiuga

Molimau atu o le a faamanuiaina i tatou e le Alii pe a tatou maua le lototele e tu mo le upu moni. Uunai tagata o le vasega e mulimuli i faataitaiga a Tanielu, Sataraka, Mesako ma Apeteniko, Eseta ma Moretekai.

## Manatu Faaopoopo e Aoao Atu Ai

O mataupu o lo o taua i lalo e faaopoopo i le oototoga o le lesona fautuaina. Atonu e te manao e faaoga se tasi o nei mataupu pe sili atu foi e avea o se vaega o le lesona.

### 1. O faamanuiaga sili o le usiusitai ma le lototele

- O le a le mea e tutusa ai Tanielu, Sataraka, Mesako, Apeteniko, Eseta ma Moretekai? (Sa ia i latou uma le lototele e fai ai le mea sao, e ui lava o le faia o lea mea o le a lamatia o latou ola.) O a ni tulaga sa e oo i ai e te filifili ai pe e te tu i le mea moni o lo o e iloa pe leai?

Molimau atu a o tatou taumafai e tausi tulafono, o le a faamanuiaina i tatou e le Alii. E ui i lea, o faamanuiaga tatou te maua o le a le talafeagai i taimi uma. Mo le faamaninoina atu o lenei mea, atonu e te manao e talanoaina puapuaga na oo i nei tagata:

- Sa le mafai ona fanau Sarai seia 90 tausaga o lona matua (Kenese 17:15–17; 21:1–2).
  - Sa faatauina atu Iosefa e ona uso ma mulimuli ane sa molia i se solitulafono e na te le i faia (Kenese 37:27–28; 39:7–20).
  - Sa faalataina le Faola e sana uo, ma faamasinoina ai ma le lē sala, ma sa faasatauroina (Ioane 18–19).
  - Sa fasia Nifae ma saisaia i maea e ona uso (1 Nifae 3:28; 18:10–11).
  - Sa faamalosa Alema ma Amoleka e matamata atu i fafine ma tamaiti a o susunuina i latou ona o lo latou talitonuga (Alema 14:8–11).
  - Sa falepuipui Iosefa Samita ma maliu fasia (MFF 135).
- E te manatu aisea na tuuina ai e le Alii nei tagata e feagai ma ia faigata? E te manatu aisea na latou manumalo ai i nei faigata? O a ni mea ua tatou aoaoina mai i nei faataitaiga?

### 2. Tu mo le upu moni

Tuu atu i tagata o le vasega e faataga mai tulaga eseese nei e moomia ai lo latou tutu mo le mea o lo o latou iloa e sao. Mafaufau i ni auala e faatatau i tagata o le vasega. Atonu o le a fesoasoani nisi nei o manatu fautuaina:

- Ua faasese e lau uo se tasi ma faamalosa oe e te faia lea mea.
- Ua fautuaina oe e se tasi e te faalogologo i musika le talafeagai.
- Ua fai atu se tasi ia te oe e te alu i le faleaiga i le Aso Sa pe a tuua le lotu.
- Ua ofoina atu e se tasi ia te oe se fagupia po o se isi mea e le talafeagai ma le Upu o le Poto.

---

**Faamoemoega**

Ina ia faamalositia molimau a tagata o le vasega e uiga i le toefuataiina o le Ekalesia a Iesu Keriso ma uunaia i latou e fesoasoani i le fausia o le malo o le Atua i le lalolagi.

---

**Sauniuniga**

1. Suesue ma le agaga tatalo mau nei:
  - a. Tanielu 2:1–23. Sa faia e le Tupu o Nepukanesa se miti, ma sa ia poloaiina ana auauna mo le faamatalaina o lea miti (2:1–13). Sa tatalo Tanielu ma ana uo, ma sa faaalia e le Atua ia te ia le miti ma lona faaliliuga (2:14–23).
  - e. Tanielu 2:24–49. Sa faaalia e le miti a le Tupu o Nepukanesa le faatuina o se malo e faaumatia ai malo uma, ma le olioli i aso e gata ai o le malo o le Atua i isi malo.
2. Mau faitau faaopoopo: Mataupu Faavae ma Feagaiga 65.
3. Ia tofi ni tagata se toalua pe toatolu o le vasega latou te saunia ni molimau e uiga i le moni o le Ekalesia.
4. Afai e te faaaogaina le gaoioiga e faatosina mai ai, ia tusia se siata o lo o i lenei lesona i se pepa lautele po o luga foi o le laupapa a o le i amataina le vasega.
5. Afai e te faaaogaina le siata o le “Miti a Nepukanesa” (tagai i le itulau 218), ia tusia i luga o se pepa lautele po o luga foi o le laupapa a o le i amataina le vasega. Aua e te tusia igoa taitasi o malo seiloga ua outou talanoaina ma le vasega.
6. Afai e maua le ata o Tanielu o lo o Faaliliuina le Miti a Nepukanesa, atonu e te manao e faaoga i le taimi o le lesona (62531; Taga o Ata o le Talalelei 115).

---

**Faalautelega  
Fautuaina o  
le Lesona**

Gaoioiga e  
Faatosina Mai Ai

Atonu e te manao e faaoga se tasi o gaoioiga nei (po o sa oe lava gaoioiga) e amata ai le lesona.

Ia faatosina atu tagata o le vasega i le siata sa e tusia i luga o se pepa lautele po o luga foi o le laupapa:

	6 Aperila 1830	1880	1930	1980	1995	2000
	6	133,628	670, 017	4,639,822	9,340,898	Silia ma le 11,000,000
	1	10	16	44	88	100
	0	23	104	1,218	2,150	2,581
	0	10	30	188	307	334
	0	1	7	19	47	102

- O le a sou manatu o a mea o lo o suitulaga ai nei fuainumera?

Tuu atu i tamaiti o le vasega ni nai minute e mafaufau ai i se tali o lenei fesili. Ona faamaea lea o le siata e pei ona faaalua i lalo:

	6 Aperila 1830	1880	1930	1980	1995	2000
Tagata o le Ekalesia	6	133,628	670, 017	4,639,822	9,340,898	Silia ma le 11,000,000
O Gagana ua lolomi- ina ai le Tusi a Mamona	1	10	16	44	88 (39 ua atoa ma le 49 ua na o se vaega ua faaliliu)	100 (61 ua atoa ma le 39 ua na o se vaega ua faaliliu)
Siteki	0	23	104	1,218	2,150	2,581
Misiona	0	10	30	188	307	334
Ua faaoga ai Malumalu	0	1	7	19	47	102

(E mafai ona maua faamaumauga lata mai i lomiga fou a le Ekalesia. Atonu e te manao e faaopoopo se isi koluma i le siata ina ia tuu i ai ma na fuainumera.)

Tofi ni tagata o le vasega e tuuina mai ni a latou faamatalaga e uiga i le tuputupu a'e o le Ekalesia. Faamatala atu o lenei lesiona o lo o faamatala ai Tanielu o se perofeta anamua sa muai vaai i le faatuina manumalo o le malo o le Atua i le lalolagi—O le Ekalesia a Iesu Keriso o le Au Paia o Aso e Gata Ai.

Mau Talanoaina  
ma le Faaogaina

A o e aoaoina atu nei mau, ia talanoaina pe faapefea ona faaoga i le olaga i aso taitasi. Uunai tamaiti o le vasega e faamatala ni aafiaga e faatatau i mataupu ua taua i le mau.



## **1. Ua maua e Tanielu se faaaliga na faaali mai ai ia te ia le miti a le Tupu o Nepukanesa ma lona faaliliuga.**

Aoao ma talanoaina le Tanielu 2:1–23.


Sa faia e le Tupu o Nepukanesa se miti matautia i se tasi o po. Sa ia tofotofoina ana auauna i lona faapea atu ua galo ia te ia ma sa poloaiina i latou e faaali mai ma faamatala mai lona uiga (Tanielu 2:2–5). Ina ua latou faapea mai e le mafai ona latou faamatalaina le miti, o lea sa faatonuina ai loa e Nepukanesa ia fasiotia alii popoto uma o Papelonia, e aofia ai ma Tanielu ma ana uo (Tanielu 2:10–13). Ina ua alu ane le taitaiu a le tupu e ave Tanielu e fasioti, sa alu atu Tanielu i le tupu ma fai atu ia te ia e tuu atu se taimi na te faamatalaina ane ai le miti (Tanielu 2:14–16).

- Sa faapefea ona saunia Tanielu mo le faaliliuina o le miti a le tupu? (Tagai Tanielu 2:17–18. Na ia talosagaina ana uo e tatalo mo ia) E faapefea ona fesoasoani tatalo a tagata o lou aiga ma au uo ia te oe?
- Na faapefea ona tali mai tatalo a Tanielu ma ana uo? (Tagai Tanielu 2:19, 27–28.) O le a le mea na faia e Tanielu ina ua faatoa mavae lona mauaina o le faaaliga e uiga i le miti a le tupu? (Tagai Tanielu 2:20–23.) O a ni mea na faaaliga e ana upu e uiga i ona lagona i le Atua? Aisea e taua ai le faaaliga o le faafetai i le Alii? E faapefea ona tatou faaaliga lo tatou faafetai ia te ia?
- Vaai le eseese o mea na liliu i ai Tanielu ma Nepukanesa ina ua sailia tali o fesili. (Tagai Tanielu 2:2, 19–23, 28.) O a ni ni mea le mautu ua liliu i ai tagata i aso nei pe a latou manaomia le fesoasoani mo tali i fesili faigata po o le faia foi o faaiuga? O a mea ua taofia ai le tele o tagata mai le sailia o le taitaiga a le Atua i ia tulaga?

## **2. Sa faamatala ma faaliliuina e Tanielu le miti a Nepukanesa.**

Aoao atu ma talanoaina le Tanielu 2:24–49.

- Sa faapefea ona faamatalaina e Tanielu le tupua tele sa vaai e le tupu i lana miti? (Tagai Tanielu 2:31–33. Ia toe tagai atu i le ata o Tanielu ua ia faaliliuina le Miti a Nepukanesa po o lau ata foi o le siata o lo o faaaliga i lalo.)



- O a mea o lo o faatusa i ai vaega eseese o le tupua? (Tagai Tanielu 2:36–43. O vaega o lo o faatusa i malo eseese o lo o taumafai e avea ma malosiaga o le lalolagi.)

Ia tusia igoa o malo taitasi i luga o le ata ao e talanoaina faaliliuga nei a Peresitene Spencer W. Kimball:

- O le ulu o le tupua o lo o faatusa ia Nepukanesa ma lona malo o Papelonია.
  - O ona fatafata ma ona lima ua faatusa ia Kuresa ma ona malo o Metai ma Peresia.
  - O lona manava ma ona ogavae ua faatusa ia Filipino ma Alesana ma Eleni po o le malo o Maketonia.
  - O vae uamea ua faatusa i le Malo o Roma
  - O vae uamea ma le omea ua faatusa i se vaega o malo o Europa.
- I le miti a Nepukanesa o le a le mea na faatamaia le tupua o lo o faatusa i malo o le lalolagi? (Tanielu 2:34–35.) O le a le maa . . . o lo o faatusa i ai le maa e le i tofia i lima? (Tagai Tanielu 2:44–45; MFF 65:2).

Sa aoao mai e Peresitene Kimball: “Sa tofuaataiina mai le Ekalesia a Iesu Keriso o le Au Paia o Aso e Gata Ai i le 1830 . . . O le malo lenei na faatuina e le Atua o le lagi, o le a le faaumatia, ma o le maa na tofia i le mauga . . . o le a avea ma mauga tele ma faatumulia ai le lalolagi” (Lipoti o le Konafesi Aperila, 1976. 10; po o le *Liahona*, Aokuso, 1976, 5).

- O le a le mea na valoia e Tanielu e uiga i le Ekalesia i aso e gata ai? (Tagai Tanielu 2:34–35, 44.)

Atonu e te manao e lisi valoaga nei i luga o le laupapa. Na valoia mai e Tanielu o le Ekalesia o le a:

- “Tofia e aunoa ma lima” (Tanielu 2:34)
- “Avea ma mauga tele ma ua tumu ai le lalolagi” (Tanielu 2:35).
- “Le faaumatia” (Tanielu 2:44).
- “E le tuuina atu ia i se tasi” (Tanielu 2:44).

u. “Na te faaumatia ma faatamaia isi malo uma lava” (Tanielu 2:44).  
f. “Tumau lava e faavavau” (Tanielu 2:44).

- O le a le uiga o le “e le tofia i ni lima”? (Tagai Tanielu 2:34. E le faia e ni lima o se tagata.) E faatusa faapefea le Ekalesia toefuataiina a Iesu Keriso i se maa e le tofia i lima?

Sa saunoa mai Elder Joseph B. Wirthlin: “O lo tatou Alii ma lo tatou Faaola o ia o le ulu o le ekalesia ma e taitaia e ala mai i ana auauna. O le ekalesia lenei a le Alii, e le o se ekalesia a se tagata” (Lipoti o le Konafesi Oketopa, 1993, 4 po o le *Liahona*, Ianuari 1994, i. 8).

- Ua faapefea ona taunuu le valoaga a Tanielu i nei ona po e uiga i le faatumuina o le lalolagi i le Ekalesia ma o le a lē faaumatia? (Atonu e te manao e faata-tau i le siata lona lua i le gaoioiga e faatosina mai ai.)

Ua molimau mai Peresitene Gordon B. Hinckley: “O le Ekalesia moni lenei. E na te gafatia ona tetee atu i soo se matagi e taia ai. Na te onosaia faitioga e amusia ai. Na faatuina e le Atua lo tatou Tama Faavavau mo le manuia o Ona atalii ma afafine i augatupulaga uma. Na te tauaveina le suafa o Lē o loo tu i le ulu, o le Alii ia o Iesu Keriso, le Faaola o le lalolagi. E pulea ma o loo galue i le mana o le perisitua. Na te auina atu i le lalolagi se tasi molimau i le paia o le Alii. Ia outou faatuatua ma faamaoni, a’u uo e. Ia outou faamaoni i mea silisili a le Atua ia ua faaalua mai i lenei tisipenisione” (“Keep the Faith,” *Ensign*, Sept. 1985, 6).

- O le a se mea tatou te faia e fesoasoani ai i le fausia o le malo o le Atua i o tatou aiga, i o tatou nuu, ma le lalolagi atoa?

Ia tofi se tagata o le vasega e tuuina mai se molimau e uiga i le moni o le Ekalesia.

---

## Faaiuga

Molimau atu o le Ekalesia a Iesu Keriso o le Au Paia o Aso e Gata Ai o le malo lea o le Atua i le lalolagi ma o lo o taitaiina e Iesu Keriso. Ia uunaia tagata o le vasega e auai i le fausiaina o le malo o le Atua i le lalolagi.

# “Ina Tulai Ia Ina Tatou Faia Ia”

Lesona  
**47**

*Esera 1–8, Neemia 1–2, 4; 6; 8*

---

**Faamoemoega** Ina ia faamalosiā tagata o le vasega e fausia Siona ma faaalua le alofa FaaKeriso ia i latou e teena le galuega a le Alii.

---

**Sauniuniga**

1. Suesue ma le agaga tatalo mau nei:
  - a. Esera 1–6. Sa faitauina e le Tupu o Kuresa lona igoa i valoaga a Isaia ma sa faatumulia o ia i le naunautai e faataunuu le finagalo o le Alii. Sa ia faasaolotoina tagata Iutaia sa faatagataotauaina e Papelonia ma tuuina atu i latou e toe foi i Ieruselema ma fausia le malumalu (Esera 1.) Sa taitaiina e Serupapelu ma Iosua le 50,000 o tagata i Ieruselema, ma amata ona latou fausia malumalu (Esera 2–3). Sa teena le fesoasoani na ofoina atu e Samaria e fesoasoani ai i le fausiaina o le malumalu, ma sa taumafai e taofia le galuega; ma sa faamutaina le toe fausiaina (Esera 4). I le tele o tausaga mulimuli ane, sa faaalua le mananao o perofeta o Hakai ma Sakaria i tagata Iutaia e faamaea le malumalu; ae sa tetee pea tagata Samaria (Esera 5; tagai foi i le Hakai 1). Sa faafouina e le Tupu o Tariu le poloaiga a Kuresa e toe fausia le malumalu, ma sa faamaeaina ma faapaiaina i le TLM 515. (Esera 6).
  - e. Esera 7–8. E silia ma le 50 tausaga talu ona maea le faapaiaina o le malumalu, ae maua loa e Esera le faatagaga mai le Tupu o Aretaseta o Peresia e taitaia le isi vaega o Iutaia e toe foi i Ieruselema. Sa tatalo ma anapopogi le nuu o Esera ma sa puipua i latou e le Alii i la latou faigamalaga.
  - i. Neemia 1–2; 4; 6. Ina ua iloa se tala e uiga i tagata Iutaia sa toe foi i Ieruselema, sa “feagai i latou ma puapuaga ma gaosa e tele,” o lea sa faatagaina ai e le Tupu o Aretaseta ia Neemia e malaga atu i Ieruselema e toe fausia pa o le aai (Neemia 1–2). Sa taumafai fili o Iutaia e teena i latou mai le fausiaina o pa. Sa faaaupegaina e Neemia tagata faigaluega ma faaauu pea le galuega seia maea (Neemia 4; 6).
  - o. Neemia 8. Ina ua maea ona fausia pa faataamilo o Ieruselema, sa faitau atu e Esera mau i tagata. Ina ua latou faalogoina upu o le tulafono, sa naunau i latou e usitaia.
2. Mau faitau faaopoopo: Hakai 1.
3. Atonu e te manao e tofi se tagata o le vasega e saunia se oototoga o le talafaa-solopito o lo o taua i le tala faatusi paia muamua.
4. Afai e maua le ata o le Malumalu sa Faaoga i Aso Anamua, atonu e te manao e faaoga i le taimi o le lesona (62300; Taga o Ata o le Talalelei 118).

---

**Faalautelega  
Fautuaina o  
le Lesona**

Gaoioiga e Faatosina Mai Ai Atonu e te manao e faaoga gaoioiga o lo o taua i lalo (po o sa oe lava gaoioiga) e amata ai le lesona.

Tofi se tagata o le vasega e faitau mai le saunoaga lenei a Elder Dallin H. Oaks.

“Atonu tatou te mauaina se fuaiupu patino o tusitusiga paia na faia mo se faamoemoega e ese e tusa ai ma tausaga o le soifua, ua matuai ese lava, i lalo o le faaliliuga a le Agaga Paia, o le a aumaia ai ia i tatou se savali faaletagata e tala-feagai ma o tatou manaoga i le taimi nei . . . Afai tatou te saili e faatatau tusitusiga paia i o tatou lava tulaga, ‘ina ia aoga e aoaoina ai i matou’ (1 Nifae 19:23), e mafai e se Tama Faalelagi alofa ona faaaogaina e faamanuia ai i tatou i ala maualuluga eseese” (*Studying the Scriptures* [devotional given in the Salt Lake Tabernacle, 24 Nov. 1985]).

- Pe ua e faitauina ea se mau ma manatu o lo o talanoa sao atu ia te oe? (Tofi ni tagata o le vasega e fetufaai atu ni mea na tutupu.) E faapefea ona fesoasoani mau e saunia ni taiala faapitoa mo lou olaga?

Faamatala atu o mea o lo o talanoaina i lenei lesona sa amataina e se tagata sa ia mauaina se vaega o se mau sa tusia i le 150 tausaga a o le i fanau mai o ia, sa talanoa sao atu ia te ia—o le mea moni, sa ia tau atu lona igoa.

## Mau Talanoaina ma le Faaaogaina

---

A o e aoaoina atu nei mau, ia talanoaina pe faapefea ona faaoga i lou olaga i aso taitasi. Uunai tamaiti o le vasega e faamatala ni aafiaga e faatatau i mataupu ua taua i le mau.

### **1. Ua faatagaina e le Tupu o Kuresa tagata Iutaia e toe foi atu i Ierusalem ma fausia le malumalu.**

Ia aoa atu ma talaonaina le Esera 1–6.

Ia tau atu (pe tofi se tagata o le vasega e tuuina atu) se oototoga o le faamatalaga lenei o se talafaasolopito:

I le 721 TLM, ina ua ave faatagataotauaina malo o Isaraelu (o malo i le itu i Matu, po o ituaiga e sefulu) e Asuria, sa ave tagata Asuria ma tagata tautaua o le lalolagi. I le 612 TLM, sa faaumatia ai tagata o Asuria e Papelonia i lalo o le taitaiga a le Tupu o Nepukanesa, sa pulea e Papelonia le tele o laueleele sa faatoilaloina e Asuria. O le faatoilaloina e Papelonia o le malo o Iuta (le Malo i Saute) sa afua mai i le 605 TLM, ina ua latou ave faatagataotauaina le tele o Iutaia, i le 587 TLM, ina ua latou faatafunaina Ierusalem.

Ina ua maluu Nepukanesa i le 562 TLM, sa vave ona faoa le pule mai ia Papelonia. I le TLM 539, sa maua e Metai ma Peresia ia Papelonia, i lalo o le taitaiga a Kuresa. O Kuresa o se tagata lotoalofa, e le pei o Nepukanesa, lea sa ia taitaiina ma le sau tagata ma sa toilalo. Na i ai ia Kuresa le faatuatuaga ma le faamaoni o tagata na ia pulea, aua sa taitaiina e ia ma le alofa ma le agalelei tagata faatagataotauaina sa i ai.

E le i leva ona faatoilaloina Papelonia, ae poloaiina e Kuresa ua tataua ona toe fausia le malumalu i Ierusalem. Sa ia valaaulia tagata Iutaia o lo o i lona malo e toe foi atu i Ierusalem ma toe fausia le malumalu, ma sa ia toe fafoiina atu ipu auro ma siliva sa gaioia mai e fitafita a Nepukanesa mai le malumalu. (Tagai 2 Nofoaiga a Tupu 36:22–23; Esera 1:1–3, 7. O le valoaga a Ieremia o lo o faatatau i nei fuaiupu, e faapea o Iutaia o le a toe foi atu i Ierusalem pe a maea le 70 tausaga o le faatagataotauaina o Papelonia; tagai Ieremia 25:11–12; 29:10.)

- Aisea na manatu ai Kuresa e tatau ona toe fausia le malumalu i Ierusalem? (Tagai Esera 1:1–2.) Na faapefea ona iloa e Kuresa o lo o finagalo le Alii e na te faia lea mea? O upu a Kuresa o lo o faamauina i le Esera 1:2 e faatatau lea i valoaga o lo o i le Isaia 44:28 o lo o ta’ua ai le igoa o Kuresa (tagai foi Isaia 45:1–5; ia faamatala e ui lava o le tala ia Kuresa na oo mai a o le i oo mai le tusi o Isaia i le Feagaiga Tuai, ae sa soifua Isaia pe tusa ma le 150 tausaga a o le i fanau mai Kuresa). O le tagata Iutaia o Flavius Josephus, e tusia talafaasolopito sa lipotia mai ai o Kuresa sa ta’ua lona suafa i valoaga a Isaia, sa pai i ai le Agaga o le Alii, ma sa naunau e faataunuu mea sa ia tusia (*The Works of Flavius Josephus, Antiquities of the Jews*, trans William Whiston [n.d.] bk, 11, chap 1, pars, 1–2).
- O le a sou manatu pe a faitauina tusitusiga paia ma faitau valoaga o le a taua ai lou igoa ma ni faamatalaga o ni mea o le a e faia?

Ina ua taitaiina e Serupapelu ma Iosua le vaega muamua o tagata Iutaia e toe foi atu i Ierusalem, sa latou mauaina iina Samaria. Atonu e te manao e faamatala o Samaria e tupuga mai i tagata Isaraelu sa sosola mai le taimi o sauaga ma fenofoa’i ma Asuria ma Papelonia lea na auina atu e le tupu e faa’ainā ai le laueleele.

- O le a le mea na manaomia e Samaria mai tagata Iutaia na toe foi atu? (Tagai Esera 4:1–2.) Sa faapefea ona tali atu Iutaia i le manao o Samaria? (Tagai Esera 4:3. Sa le mananao Iutaia e fesoasoani Samaria i le toe fausiaina o le malumalu ona latou te manatu o Samaria e le o ni Isaraelu moni.) O le a le mea na faia e Samaria ina ua le talia e Iutaia la latou fesoasoani? (Tagai Esera 4:4–7, 11–24. Sa latou taumafai e taofi le toe fausia o le malumalu e ala i lo latou faaseā atu i tupu na suitulaga ia Kuresa.)
- Sa faafuasei ona faamuta le galuega o le malumalu. O le a le mea na musuia ai Iutaia e toe faaauau la latou galuega i ni tausaga mulimuli ane? (Tagai Esera 5:1–2, Hakai 1. Sa saunia e le perofeta o Hakai ma Sakaria ni faatonuga musuia.) O le a le mea na fetalai atu ai le Alii e ala atu ia Hakai i Iutaia i Ierusalem e uiga i le malumalu? (Tagai Hakai 1:3–4, 7–8.) O a ni amioga a Iutaia sa faalavelave i le toe fausiaina o le malumalu? (Tagai Hakai 1:2). O a ni uiga o lo o faalavelave ia i tatou mai lo tatou auauna atu ma tapuai e le aunoa i le malumalu?
- Sa toe taumafai foi Samaria e taofi le toe fausiaina o le malumalu ina ua toe amata galuega. Ae sa faamatalaina e Iutaia le manao o le Tupu o Kuresa, ma le Tupu o Tariu e faaauau le galuega (Esera 5–6). O le a le mea na faia e Iutaia ina ua maea le galuega? (Tagai Esera 6:15–22.)

## 2. Sa taitaiina e Esera le isi vaega o Iutaia e toe foi atu i Ierusalem.

Aoao atu ma talanoaina le Esera 7–8.

- E pei ona vave liliu e le Alii le loto o le Tupu o Kuresa e faasaoloto Iutaia, sa faapea foi ona ia liliuina le loto o le tupu o Aretaseta e tuuina atu Esera ma le vaega o Iutaia e toe foi atu i Ierusalem (Esera 7:27–28; tagai foi i le fuaiupu 11–26). O a ni faataitaiga o le faamaulaloina e le Alii o loto o taitai o malo i le Ekalesia i aso e gata ai? (Tagai mo se faataitaiga, Thomas S. Monson, Lipoti o le Konafesi, Aperila, 1989, po o le *Liahona* Iulai, 1989, 50–53). O le a se mea e mafai ona tatou faia e uunaia ai loto o taitai o le malo ina ia faamaluluina o latou loto i le Ekalesia? (O tali e mafai ona aofia ai le usitai i tulafono o le laueleele, faia o mea lelei, sauniuni mo le aoaoina atu o le talalelei i le lalolagi, ma le tatalo i le Alii ina ia faamaluluina loto o taitai. Tagai MFF 58:21, 27; 98:4–6.)

- O le a le mea na faia e Esera e mautinoa ai o lo o puipuia le vaega o Iutaia sa ia aveina atu i Ieruselema? (Tagai Esera 8:21–23, 31.) Ua faapefea ona faamanuina oe, lou aiga, ma isi ona o le anapogi?

### 3. Ua alu atu Neemia i Ieruselema ma taitaiina tagata e toe fausia pa puipui mo le puipuia o le aai.

Aoao atu ma talanoaina le Neemia 1–2; 4; 6. Atonu e te manao e faamanino atu o Neemia o se tau tuipu a le Tupu o Aretaseta o Peresia. O se tulaga lenei o le matua faatuatuaina ma le matafaioi, o lo o moomia ai Neemia e mautinoa o lo o puipuia taumafa ma vaiinu a le tupu. E ui lava ina i ai Neemia i se tulaga taua i Peresia, sa manatu o ia i tagata o lo o i Ieruselema ma ia fesoasoani ia i latou pe a faalogo i o latou mafatiaga.

- O le a le mea sa faia e Neemia ina ua ia faalogo i mafatiaga o ona tagata i Ieruselema? (Tagai Neemia 1:4–11; 2:1–5.) Sa faapefea ona tali atu le Tupu o Aretaseta i le manao o Neemia? (Tagai Neemia 2:6–8. Sa tuuina atu e le Tupu ia Neemia se faatagaga e alu atu ai, saunia ni ana auauna ma i latou e puipuia lona saogalemu, ma faatagaina o ia e faaoga laau mai le vao e fausia ai pa puipui.) O le a se mea ua tatou aoaoina mai ia Neemia e mafai ai ona taitaiina i tatou pe a o tatou mafatia i faigata ma puapuaga o isi?
- Sa faapefea ona uunaia e Neemia tagata e toe fausia pa puipui e faataamilo i le aai? (Tagai Neemia 2:17–18.) Aisea e te manatu ai o le molimau atu i le upu moni ma le fetufaai atu o ni mea na tutupu faaleagaga, o lo o i ai se malosiaga e musuia ai isi ina ia faia le lelei? Na musuia faapefea oe ona o ni molimau ma ni mea faaleagaga na tutupu i isi?
- O Sanepalata o le taitai o Samaria, ma o ia ma ona tagata o ni fili o Iutaia sa toe foi mai ma Serupapelu. Sa faapefea ona tali atu Sanepalata i le toe fausia o pa puipui o le aai? (Tagai Neemia 2:10, 19; 4:1–3, 7–8, 11.) Sa faapefea ona tali atu Iutaia i ia taumafaiga e taofia galuega o pa puipui? (Tagai Neemia 4:9, 13–15.)
- O le a le mea na faia e Neemia ina ua fai atu Sanepalata ia te ia e taofi le galuega ae se i o la feiloai? (Tagai Neemia 6:1–4.) E faapefea ona taumafai isi tagata o le Ekalesia e taitaiese mai isi tagata mai le galuega a le Alii i ona po nei? E faapefea ona tatou tali atu i ia faatosinaga sese?

Sa fautua mai Elder Marvin J. Ashton: “E i ai tagata ma faalapotopotoga o lo o taumafai e faatupuina ia i tatou le ita ma le feinau, e ala i le faia o faatulagana sese ma le le tonu. O lo tatou matua lē atamamai lava, pe a tatou faatagaina i tatou i ona po nei, tatou te feitai, lotovaivai, pe faamanu’alia foi le loto, ona o le fiafia o isi tagata e ta’useseina o tatou tulaga ma mea o loo tatou auai. O le a lē tuu itiitia ai lava a tatou mataupu faavae po o tulaga faatonuina, ona o faamatalaga a ē taufaaleaga. O lo tatou tiutetauave o le faamalamalama atu lea i ai o lo tatou tulaga e ala lea i mafuaaga, o le tauanau atu ma le agalelei, ma mea moni ma le sa’o. O lo tatou tiute foi o le tutumau lea ma le mausali i mataupu taua i aso nei atoa ma mataupu faavae e faavavau o le talalelei, ae ia aua lava nei finau atu i soo se tagata po o soo se faalapotopotoga . . . O lo tatou tiutetauave o le aoao ma le folafola atu. O lo tatou tiutetauave e le gata ina aloese i le feinau, ae ia vaai ua matua lafoaia atoatoa ia mea” (Lipoti o le Konafesi Aperila, 1978, po le *Liahona*, Oketopa, 1978, 11).

#### 4. Ua olioli tagata ina ua faitau atu e Esera tusitusiga paia ia i latou.

Aoao atu ma talanoaina le Neemia 8.

- Ina ua maea ona fausia e tagata puipui o le aai, o le a le mea na latou mana'ao ai ia Esera? (Tagai Neemia 8:1–2. Ia iloa o le toatele o Iutaia ua leva ona faatagataotauaina ma ua leva ona latou le toe faalogo i ni tusitusiga paia.)
- O le a le umi na faitauina ai e Esera tusitusiga paia i tagata? (Tagai Neemia 8:3, 17–18.) Sa faapefea ona tali atu tagata? (Tagai Neemia 8:3, 6, 9, 12.) E mafai faapefea ona tatou gauai atu ao faitau i tusitusiga paia? (Talanoaina le auala tatou te gauai atu ai i tusitusiga paia ma musumusuga a le Agaga e oo mai a o tatou faitauina.) E faapefea ona tatou faatupuina lea ituaiga o fiafia i tusitusiga paia e pei ona faia e ia tagata?
- O le a le mea na faia e Esera e fesoasoani atu ai i ona tagata ina ia malamalama i tusitusiga paia? (Tagai Neemia 8:8.) O le a se mea ua fesoasoani ia te oe i au taumafaiga ina ia malamalama i tusitusiga paia ma fesoasoani i lou aiga ina ia malamalama? (Atonu e te mana'o e tofi se tagata o le vasega e fetuفاai atu ni mea sa latou faia e faaleleia ai i latou lava po o latou aiga i le suesueina o tusitusiga paia.)
- O le a se tala a Esera ma nisi o taitai ina ua latou vaaia ua amata ona fetagisi tagata ina ua latou faalogo i tusitusiga paia? (Tagai Neemia 8:9–11.) E faapefea e tusitusiga paia ona faaosofia lou olioli?

Faaiuga

“O le malosi o Neemia, atamai, lē manatu faapito, lotonuu, ma le atamai faaletagata na toe maua ai se malo fou ma le maoae o Iuta. O le toe faatuina o Ierusalem, lea sa taatia mo se tausaga ma le afa, ua toe amata. O Esera, o se tagata amiotonu, o se faitaulaga faamanuiaina, ua faatasi atu ma Neemia i lenei galuega, ma ua faamanuiaina i laua i le toe faatuina o se faalapotopotoga a Iutaia i Ierusalem” (*Tusi Lesona o le Feagaiga Tuai a le Tamaitiiti Aoga: 1 Tupu–Malaki* [1982], 314).

Faamatala atu e pei ona maua e Iutaia le tiutetauave e toe fausia ai Ierusalem, ua faapena ona i ai i le Au Paia o Aso e Gata Ai le matafaioi i le faatuina o Siona i le lalolagi. Ina ia fesoasoani ia i latou mo le faia o lea tulaga, e moomia lo latou mulimuli i aoaoga o lo o i tusitusiga paia ma auai atu i galuega faalemalumalu. Molimau atu i le moni o tusitusiga paia ma le taua o galuega faalemalumalu.

Toe faamanatu atu i tagata o le vasega o lo o taumafai nisi tagata e taofi le galuega a le Alii. E tatau ona tatou faaali atu le amio FaaKeriso ma alofa ia i latou ae le o le faatagaina o i latou e taitaieseina i tatou mai lo tatou taumafai e fausia le malo o le Atua.

#### Manatu Faaopoopo e Aoao Atu Ai

O mataupu o lo o taua i lalo e faaopoopo i le ootootoga o le lesona fautuaina. Atonu e te mana'o e faaoga se tasi o nei manatu pe sili atu foi e avea o se vaega o le lesona.

##### 1. “Ua matua tele lava le galuega, ua taapeape foi i matou” (Neemia 4:19)

A o fausia pa puipui faataamilo i Ierusalem, sa faataapeape e Iutaia i latou ina ia latou galulue i itu ma vaega eseese o le pa (Neemia 3; 4:19). I nisi taimi sa latou



taumamao ai, ae sa latou galulue i le faamoemoega e tasi, ma i lo latou galulue faatasi sa mafai ai ona latou faamaeaina pa puipui. Faamanatu atu i tagata o le vasega o le Ekalesia ua vaevaaina i ni iunite eseese (e pei o aiga, uarota, paranesi, siteki, itu, ma korama) i le lalolagi atoa. O nisi taimi e foliga mai ai e mamao ese mai le tasi iunite i le isi. A o le Au Paia uma o lo o galulue i le faamoemoega e tasi, ma afai e galulue faamaoni tagata taitoatasi, o le a faaauau pea le faatupu-laia o le Ekalesia.

## **2. “O Malumalu e mo Feagaiga e Faavavau”**

Afai e maua le *Faaopoopoga o Ata Vitio mo Afiafi Faaleaiga 2*, (56736), atonu e te manao e faaali atu le “O Malumalu e Mo Feagaiga e Faavavau,” o se ata e ono minute, e avea ma vaega o le talanoaga i le taua o malumalu.

# “O Le Aso Sili ma le Matautia o Ieova ”

Lesona  
**48**

*Sakaria 10–14; Malaki*

---

**Faamoemoega** Ina ia uunaia tagata o le vasega e (1) sauniuni mo le afio faalua mai o le Faaola o Iesu Keriso, (2) ia totogi faamaoni le sefuluai ma le taulaga anapogi, ma le (3) ia iloa faamanuiaga e oo mai ona o le mana o faamauga o le perisitua.

---

**Sauniuniga**

1. Ia suesue ma le agaga tatalo i fuaitau mai le Sakaria 10–14 ma le Malaki o lo o talanoaina i le lesona lenei.
2. Mau faitau faaopoopo: Mataupu Faavae ma Feagaiga 45.
3. Atonu e te manao e tusia i ni fasipepa o mau o lo o taua i le vaega muamua o le lesona ma tufatufa atu i tagata o le vasega.
4. Afai e te manao e faaoga le gaoioiga e faatosina mai ai, ia i ai le ata o le Afio Faalua Mai (62562; Taga o Ata o le Talalelei 238).
5. Ia i ai se kopi o le *Feagaiga Fou Taiala mo Tagata o le Vasega* (31392) mo tagata taitoatasi o le vasega.

---

**Faalautelega  
Fautuaina o  
le Lesona**

**Gaoioiga e  
Faatosina Mai Ai** Atonu e te manao e faaoga se tasi o gaoioiga nei (po o sa oe lava gaoioiga) e amata ai le lesona.

Ia faaali atu le ata o le Afio Faalua mai. Ona tuuina atu lea o fesili nei:

- O a ni lagona e te maua pe a e faalogoina upu nei e pei o le *Afio Faalua Mai, aso mulimuli*, po o le *faailoga o taimi*? O lo o taua e le mau le Afio Faalua Mai o se “aso e sili ma le matautia” (Malaki 4:5). E mafai faapefea ona sili ma matautia?

Sa saunoa mai Peresitene Ezra Taft Benson, “[O le Faaola] i lona afio mai e sili ma matautia, e faalagolago i le itu faaleagaga o i latou o lo o totoe” (“Prepare Yourself for the Great Day of the Lord,” *New Era*, May 1982, 49).

Faamatala atu o lenei lesona e aofia ai talanoaga e uiga i le (1) valoaga a Sakaria ma Malaki i aso e gata ai ma le (2) o a tatou sauniuniga mo le Afio Faalua Mai.

---

**Mau Talanoaina  
ma le Faaogaina**

A o aoaina atu nei mau, ia talanoaina pe faapefea ona faaoga i le olaga i aso taitasi. Uunai tamaiti o le vasega e faamatala ni aafiaga e faatatau i mataupu ua taua i le mau.

**1. Sa valoia e Sakaria ma Malaki le tele o mea e tutupu i aso amuli.**

Ia talanoaina nisi o valoaga o lo o taua i lalo mai ia Sakaria ma Malaki, o lo o faamatala ai mea e tutupu i aso mulimuli. Afai sa e saunia ni fasipepa o lo o tusia

ai mau, ia tufatufa atu i tagata o le vasega. Tuu atu i tagata o le vasega e faitau mai mau taitasi ma faamatala mai mea o lo o aoao mai ai. Afai e tuuina mai e mau ni faamatalaga e mafai ona fesoasoani ia i tatou e saunia ai mo le Afio Faalua Mai, talanoaina pe faapefea ona tatou faaaogaina.

*O Valoaga ua faataunuuina i sauniuniga mo le Afio Faalua Mai*

- a. Malaki 3:1. Sa valoia mai e Malaki o le a saunia e se avefeau le auala mo le afio mai o le Alii. Sa saunia e Ioane le Papatiso le auala o le Alii i lana galuega i le lalolagi, a o Iosefa Samita o le avefeau lea sa saunia le ala mo le Afio Faalua Mai (tagai Mataio 11:10; Joseph Fielding Smith, *Doctrines of Salvation*, comp. Bruce R. McConkie, 3 vols. [1954–56], 1:193–95, 3:10–14).
  - e. Malaki 4:5–6. Sa valoia mai e Malaki o le perofeta o Elia o le a toe foi mai a o le i oo i le Afio Faalua Mai e liua loto o tama i fanau ma loto o fanau i o latou tama. Sa faataunuuina lenei valoaga ina ua faaali atu Elia ia Iosefa Samita i le Malumalu i Katelani, i le toefuataiina o ki o le faamauga (MFF 110:13–16). *O le mea e mafai ona fai*: E tatau ona tatou sailia suafa o o tatou augatama ma faataunuuina sauniga mo i latou i le malumalu (o lo o talanoaina lenei mataupu i se vaega o le lesona).
- Aisea e fesoasoani ai le iloa o nisi o valoaga ua faataunuuina e uiga i le Afio Faalua Mai?

*O Valoaga e tatau ona faataunuuina a o le i afio mai le Faaola*

- a. Sakaria 10:6–8. O le a faapotopotoina tagata o Iuta ma Iosefa, ma o tagata foi o Efaraima o le a matua uiga ese. O le a valaau atu le Alii i ona tagata ma faapotopotoina i latou. *O le mea e mafai ona fai*: E mafai ona tatou fesoasoani i le faapotopotoina e ala lea i le talai atu o le talalelei i isi.
  - e. Sakaria 12:2–3, 8–9. O le a faia se taua tele i totonu o Ierusalema faapea foi ona tuaoi, ae o le a faasaoina e le Alii tagata o Ierusalema mai le faafanoga. *O le mea e mafai ona fai*: E tatau ona tatou faatuatua le Atua o le a ia faasaoina ona tagata i faigata o aso amuli.
  - i. Sakaria 14:8. O le a tafe foi le vai ola mai le malumalu i Ierusalema ma faasaoina ai le Sami Mate ma le vao o Iuta (tagai foi Esekielu 47:1, 8–9).
- O le tele o valoaga i aso e gata ai e aofia ai mala e pei o taua, mala faanatura, ma le amiotelega ua sosolo. E mafai faapefea ona faatumau lo tatou talitonuga pe a tatou faalogo ua nei valoaga ma molimau i le faataunuuina? (Tagai MFF 38:28–30.)

*O Valoaga o le a faataunuuina pe a afio mai le Faaola*

- a. Sakaria 14:3–4. O le a tulai le Faaola i le Mauga o Olive, ma o le a vaeluaina le mauga i ni vaega se lua (tagai foi i le MFF 45:48).
- e. Sakaria 12:10; 13:6. O tagata Iutaia e ola i le taimi o le laveaiina o Ierusalema o le a vaai ia Iesu Keriso ma o le a latou faanoanoa aua sa latou le talia o ia o le Mesia (tagai foi i le MFF 45:51–53).
- i. Sakaria 13:2. O le a fano tupua sese, agaga le mama, ma perofeta pepelo.
- o. Sakaria 14:5. O tagata amiotonu e i ai i le laueleele o le a aveina a'e latou te fetaiiai ma le Faaola. O tagata amiotonu foi ua maliliu o le a toe tutu ma o le a latou fetaiiai ma ia (tagai foi MFF 88:96–98).

- u. Sakaria 14:9. O le a nofotupu le Alii i le lalolagi uma ma pule i le taimi o le Meleniuma.
- f. Sakaria 14:12–13; Malaki 3:13–18; 4:1–3. O le a faaumatia tagata amioleaga uma, ae faaolaina na o tagata amiotonu (tagai foi 1 Nifae 22:15–17, 19).
  - Aisea e te manatu ai sa faaalua mai e le Alii nei valoaga e uiga i aso e gata ai, le Afio Faalua Mai, ma le Meleniuma? (Tagai MFF 45:34–44.) E mafai faapefea ona tatou sauniuni mo le Afio Faalua Mai o le Faaola? (Tagai MFF 45:56–57.)  
 Sa saunoa mai Peresitene Ezra Taft Benson: “A tatou ola i poloaiga a le Atua, o le a mafai ona tatou tulimata’i i luma ma le fiala ma faatalitali mo le afio faalua mai o le Alii o Iesu Keriso, ma le mautinoa e ala i a tatou galuega, ua tatou agavaa faatasi ma e ua pele ia i tatou, tatou te mau faatasi i Ona luma mo le faavavau atoa. E leai se mea e faigata ai ona maua lenei sini maoae. E le tatau lava ona tatou faavaivai mo sina taimi. E ao ina tatou faamaonia i aso taitasi o o tatou soifuaga, ua tatou loto malilie e fai le finagalo o le Alii—talai atu le talalelei toefuataiina, ma molimau atu i le lalolagi, ma avatu le talalelei i isi” (*The Teachings of Ezra Taft Benson* [1988], 341).
  - E fesoasoani faapefea ia te oe lou iloa o le amiotonu e iu ina manumalo ma olioli nai e amioleaga?

## 2. Sa aoao mai e Malaki faamanuiaga e maua e i latou e totogi le sefuluai ma taulaga.

Aoao atu ma talanoaina le Malaki 3:8–12.

- E faapefea e tagata ona “faoa mea a le Atua” e ala i le lē totogiina o le sefuluai ma taulaga?
- O le a le uiga o le totogi atoa o le sefuluai?  
 Sa faailoa mai e le Au Peresitene Sili: “O le faamatalaga faigofie ua tatou iloa o le fetalaiga a le Alii lava ia, lea na faapea mai, o tagata o le Ekalesia e tatau ona ‘totogi le tasi o vaesefulu o a latou tupe maua i le tausaga,’ lea ua faamalalama o tupe latou te maua. E leai se tasi ua faamaonia pe faatagaina ona toe faia se isi faamatalaga e sili atu nai lo lenei” (Tusi a le Au Peresitene Sili, Aso 19 o Mati, 1970; tagai foi MFF 119:1–4).
- O a faamanuiaga ua folafola mai ia i tatou e le Alii pe a tatou totogi le sefuluai? (Tagai Malaki 3:10–12.) E faapefea ona faamanuiaina oe e le Alii pe a e totogiina sefuluai ma taulaga?
- O le a se tulaga e faaosofia ai lo tatou totogiina o sefuluai ma taulaga?

Ina ua maea ona faatepa i faamanuiaga ua tuuina mai e le Alii i tagata totogi sefuluai, sa saunoa mai Peresitene Gordon B. Hinckley:

“Aua nei sese o outou manatu i lau upu. Ou te le o fai atu a totogi au sefuluai o le a e maua sou fale manaia, po o ni au taavale taugata, po o se faletele taugata i Hawaii. E tatalaina mai e le Alii ia i tatou faitotoa o le lagi e tusa ma mea tatou te manaomia, ae le tusa ma mea ua tatou matape’ape’a i ai. Afai tatou te totogi a tatou sefuluai ina ia tatou mau’oa ai, ua sese le pogai ua tatou totogiina ai. O le pogai moni lava o le sefuluai, o le tuuina atu ai lea i le Ekalesia o mea na te faia ai le galuega a le Alii” (Lipoti o le Konafesi, Aperila, 1982, 60; *Liahona* Iulai, 1982, 69).

- Aisea e avea ai ma se lui i nisi taimi le usitaia o le tulafono o le sefuluai? O le a se mea e faia ina ia faataunuaina ai lenei lu'i?

### 3. Ua valoia e Malaki le toe foi mai o Elia i le lalolagi e toefuataiina mai ki o le mana o faamauga.

Aoao atu ma talanoaina le Malaki 4:5–6.

- Sa valoia e Malaki o le a toe foi mai le perofeta o Elia i le lalolagi a o le i Afio Faalua Mai le Alii (Malaki 4:6). Sa faapefea ona taunuu lenei valoaga? (Tagai MFF 110:13–16. Sa faaali atu Elia i le Malumalu i Katelani ma toefuatai mai ki o le mana o faamauga ia Iosefa Samita.) O le a le uiga o le “liliu atu o loto o matua i fanau, ma loto o fanau i o latou matua”? (O lona uiga ia faamauina i o tatou augatuaa—o tatou “tama”—ma o tatou tupuaga uma—a tatou “fanau”—e faavavau. Ona o le mana o faamauga o le perisitua ma sauniga o le malumalu mo i latou o ola ma i latou ua maliliu, ua mafai ai ona faatasia aiga e faavavau.)
- E faapefea ona e lagonaina le liliu atu o lou loto i ou augatuaa a o e faia talafaa-solopito o aiga ma galuega faalemalumalu mo i latou? E faapefea e folafolaga o feagaiga o le malumalu ona faaliliu lou loto i ou matua, lou toalua, ma lau fanau?
- O le savali o lo o i le Malaki 4:5–6 o lo o aoaoina i tusi faavae taitasi (Luka 1:17; 3 Nifae 25:5–6; MFF 2:1–3; Talafaasolopito—Iosefa Samita 2:37–39). Aisea e te manatu ai ua taua soo lenei savali?

Faaiuga

Tuuina atu lau molimau i mea ua e filifilia e talanoaina i le lesona. I se faaiuga mo lesona aoaoina o lenei tausaga, atonu e te manao e faaali atu lou agaga faafetai mo aoaoga i le Feagaiga Tuai.

Tuu atu i tagata o le vasega se kopi o le *Feagaiga Fou Taiala mo Tagata o le Vasega* (31392). Faamatala atu o mataupu aoaoina mo le tausaga fou o le Feagaiga Fou. Unaia tagata o le vasega e amata ona aoao i le taiala ma sauniuni mo le lesona i le vaiaso fou ma aoao faatasi ma o latou aiga le Feagaiga Fou.

### Manatu Faaopoopo e Aoao Atu Ai

O mataupu o lo o taua i lalo e faaopoopo i le oototoga o le lesona fautuaina. Atonu e te manao e faaoga se tasi o nei mataupu pe sili atu foi e avea o se vaega o le lesona.

#### 1. Valoia le oo mai o le Faaola

- A itiiti pe tusa ma le fitu faaaliga mai o le Faaola i aso e gata ai, sa muai tau mai e tusitusiga paia. E fia e mafai ona e ta'u maia?

O faamatalaga o lo o taua i lalo o le a fesoasoani ia te oe i le taliina o lenei fesili:

- I le Perofeta o Iosefa Samita i le Uluai Faaaliga (Galuega 3:19–21; Talafaasolopito—Iosefa Samita 2:15–17).
- I ona malumalu i aso e gata ai (Malaki 3:1; MFF 133:1–2).

- i. I le vanu o Adam-on-di-Ahman (MFF 116; Tanielu 7:13–14, 22; tagai foi MFF 107:53–56, o loo faamatala ai se fonotaga ua mavae i le Adam-on-di-Ahman e tali tutusa lava ma le fono o le a faia iina).
- o. I Ierusalem a i le vaitaimi o se feteenaiga ua lauiloa e le lalolagi ua taua o le taua o Amaketona (Esekielu 38–39; Sakaria 12–14; Faaaliga 11; MFF 45:47–53).
- u. I le aai o Ierusalem Fou, i Initipene Misuri (3 Nifae 21:24–26).
- f. Mo tagata amiotonu i le taimi o le Afio Faalua Mai (Sakaria 14:5; 1 Tesalonia 4:16–17; MFF 88:96–98).
- g. Mo tagata amioleaga (MFF 133:42–51).

## 2. O afea o le a taunuu ai le Afio Faalua Mai?

Sa faamanino mai e le Alii e ui ina o le a toe afio moni mai o ia, ae e le iloa e se tagata le taimi tonu (MFF 39:20–21; 49:7).

Sa saunoa mai Richard L. Evans: “O nisi o le usoga . . . sa latou o atu ia [Peresitene Wilford Woodruff] ma fesiligia . . . i sona manatu pe o le a le taimi e uma ai le lalolagi—ma pe o le a foi le taimi e afio mai ai le Matai? O nei upu, ou te manatu e le o upu moni ia na ia tautalagia, ae sa ta’u mai i nei upu le agaga o lana tali e faapea: ‘O le a ou ola e faapei o le a afio mai taeao—ae o lo o ou totona pea au laau fua suamalie!’ Ou te manatu e mafai ona tatou avea lenei fuaitau e fai mo i tatou ma ia tatou ola ai e pei o le a oo mai taeao le iuga—ma galulue pea e toto laau aina! E le tatau ona tatou faagalo o tatou avanoa ma o tatou aiga ma uo ona o le popole i mea e lē oo i ai lo tatou malamalama; e le tatau foi ona tatou tuua mea e tatau ona fai i le taimi nei, ma mea e mafai ona tatou faia, ona o le popole i mea o le a oo mai i le lumanai” (Lipoti o le Konafesi, Aperila, 1950, 105–6).



O LE EKALESIA A  
**IESU KERISO**  
O LE AU PAIA O ASO  
E GATA AI

